



Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL 1.7.86








Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL 1.7.86




Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAGL. 1.7.86





Early European Books, Copyright © 2011 ProQuest LLC.  
Images reproduced by courtesy of the Biblioteca Nazionale Centrale di  
Firenze.  
CFMAAGL 1.7.86



208

1724.

VIII

FILESAC

Scheer:

*[Faint, illegible handwriting]*

1724



Ex Legato D: Equitij Antonij Francisci  
De Marmis

1.7.86

IOANNIS  
**FILESACI**  
THEOLOGI  
PARISIENSIS  
**SELECTORVM**

*LIBER SECVNDVS.*



**PARISIIS,**

Sumptibus MATHVRINI DV PVIS, viâ  
Iacobæâ, sub signo Coronæ.

**M. DC. XXXI.**  
*CVM PRIVILEGIO REGIS, ET APPROBATIONE.*

6





## INDEX TRACTATVVM huius secundi libri Selectorum.

1	EVRIPIVS SECVLI.	pag. 1
2	IVRISIVRANDI RELIGIO.	p. 72
3	MYSTERIA.	p. 113
4	CEREMONIÆ.	p. 155
5	CANTVS ECCLESIAE.	p. 195
6	CONSCIENCIA.	p. 218
7	REGIA MAIESTAS SACRO-SANCTA.	p. 236
7	VXOR IVSTA.	p. 271
9	VARRO, SEV DE MVLTIPlici SCRIPTO- RVM GENERE.	p. 333
10	APOLOGIA SMITHEA, seu DE BENI- GNITATE ECCLESIAE.	p. 396



INDEX CAPITVM,  
ET CVIVSQUE PARAGRAFI HVIVS  
SECVNDI LIBRI SELECTORVM.

Euripus Seculi.

**E**Vripi Euboici varia descriptiones. Rerum omnium & vi- Cap. 1.  
cissitudo, & inconstantia. Nihil nouum. Mutationes ali-  
quo pacto necessariae. Imperiorum conuersiones. Mutationum  
istarum, tres causae, vel ex ipsarum rerum natura, vel ex mun-  
do senescente, vel ex Diuina Prouidentia ordine, & dispositione.  
Exempla. In ijs omnibus nil admirandum.

Vita humanae crebra mutationes. Ipsa nauigationi compara- Cap. 2.  
ta. Corpus instar nauiculae. Penè omnis vita naufragium. Nau-  
fragio perire genus mortis scæuum & detestandum veteribus.

Hominum qui tractant publica, cum Euripo comparatio. Am- Cap. 3.  
bitionis status periculosus. Descriptio ab Aquila exemplo. Am-  
bitioni triplex periculum imminet, à seipsa, ab ipsis rebus &  
honoribus, à rebus externis. Honores non sine metu. Impe-  
riorum & Rerum publicarum turbandarum duæ principes causæ,  
Ambitio & Auariatia ex Aristotele. Peregrini, spretis ciuibus,  
honoribus minimè exornandi.

Nonnisi idonei & digni ad honores publicos & dignitates Cap. 4.  
promouendi. Inuiti vel non ambientes Magistratibus exornan-  
di. Imperiti & flagitiosi penitus remouendi. In vnoquoque Ma-  
gistratu tria requirit Aristoteles. Genere nobiles an idcirco periti  
& idonei. Politica doctrina tribus modis comparatur. Qui opi-  
bus abundant an idcirco peritiores, & magis idonei. Magistra-  
tus dignum non efficit. Magistratuum ingens numerus de dignitate

ā ij



Index Capitum & Paragraphorum.

*multum detrahit, velut & si quis indignus exornetur, aut preproperè, & prematurè.*

Cap. 5. *Qui publica tractant, ab inuidia, à calumnia, ab inconstantia Principum, à seipsis denique iactantur. Inuidiæ damnoſa effecta. Admirandæ actiones non sine inuidia & calumnia. Indigni honoribus aucti merito inuidia digni. Sibi rebus florentibus temperandum.*

Cap. 6. *Calumniæ iactatio grauissima. Aula Principum vndique calumniatoribus referta. Exempla. Calumniatorum multiplex descriptio, artes variæ. Calumniatores delatores. Amicitia simulata, temporaria, infida.*

Cap. 7. *Auaritæcum Ambitione coniunctus status noxius. Auarus satiari nequit. Ambitiosus simul & Auarus triplici ratione non expletur. Ambitiosi ob fortunam secundam inſoleſcunt, cæteris valde graues. Potentia nimia nunquam satis fida. Quo amplior eo grauior eiusdem lapsus, nec sibi satisfacit.*

Cap. 8. *Principum inconstantiæ periculosissimus status. Aula Principum altera nouerca. Nouerçæ nomen tragicum. Aula leuis & dubia. Causæ duæ cur Principes sibi non semper pro affectu constant. Aristotelis quæstio quid in Republica de eo agendum videatur, qui supra cæteros emineat. In Regno, quid. Fortunæ delineatio. Moderatio cogitanda.*

Cap. 9. *Quibus in publicis rebus omnia ad votum, Diuinam Prouidentiam ij perpetuò vigilantem ac singularum rerum, quæ hic aguntur, curam gerere cogitent. Supra cæteros qui erecti postea de statu deiecti sunt, quam benignè cum ipsis Deus agat, serio meditentur: Periissent nisi periissent. Exempla. Moderatè fortunæ securæ conditio. Facere de necessitate virtutem.*

Cap. 10. *Vitæ priuatæ laus. Ab aulica vita metus non leuis. Collatio vitæ publicæ & priuatæ. Bona vita, bene viuere ganeonum. An plane à tractandis publicis negotijs abstinendum. Ignauum otium fugiendum. Tertulliani locus aduersus vitam priuatam, ut*



### Index Capitum & Paragraphorum.

videtur, expensus & explicatus, pro varia hominum & aetate  
& conditione. Quis secessus, quod otium laudandum, ex quo non  
ad plurimorum commodum tantum, sed etiam ad publicam rem non  
parum adiumenti & emolumenti peruenire posse agnoscitur.

#### Iurifurandi Religio.

Iurifurandi varia & multiplex definitio. Per quæ veteres Cap. 1.  
olim iurarunt. Per meam salutem: Hebraei, Per nomen .i. Deum.  
Nominatio Sancti. Emendata vulgata Ecclesiastici 23. Iusur-  
randum uni Deo tribuendum. Donatistarum amentia, qui per  
suos Episcopos iurarent. Iurandi origo.

Gentiles, Per Deos suos iurabant. Socrates, Per hircum, ca- Cap. 2.  
nem, anserem. Varia Socratis Iurifurandi interpretatio apud  
Patres. Quid de eo Apollonius apud Philostrat. Suid. etiam De-  
mosthen. Iusurandum Scytharum, Burgarorum, Aegyptiorum,  
Persarum. Græcorum olim & aliorum, Per Caput, etiam recen-  
tiorum. Mira eius rei historia apud Zozimum. Per Caput Re-  
gis etiam Aegyptiorum. Iudæis usitatum, Per Caput, Per Cæ-  
lum, Per Terram, Per Hierosolimam, Per Templum, Per timorem  
Patris. Offensorum Iusurandum, Per salutem suam vel filio-  
rum. Per sepulchra defunctorum. Per patris vel matris sanita-  
tem. Per eorum beatam memoriam. Per cineres eorum. Muham-  
medis impostoris Iusurandum. Per Genium. Per salutem Prin-  
cipis, Per Imperatorem, Per vitam Regis, vel filiorum. Νῆ τὸν  
θεόν. Iuratio. Per Melchom. Vnde Pæni homines immolare di-  
dicerint. Vt Gentiles ita Christiani Per Deum iurant. Per ca-  
pillum Dei vel caput. Per Deum. Per Christum. Per Spiritum  
Sanctum. Per Corpus & Sanguinem Domini. Per sacro-san-  
ctum Baptisma. Per Coronam Episcopalem. Per inseparabi-  
lem Trinitatem. Per diem Iudicii.

Iurifurandi formula. Testis est Deus. Scit Deus. Inuoco Deum. Cap. 3.  
super animam meam. Per vestram gloriam, an sit iuratio apud  
Apostolum. Νῆ τὸ θεόν explicatur. Ita me Deus adiunget. Ναυ



Index Capitum & Paragraphorum.

μα' τοι, quæ iuratio? Ille, ipse, voces hæ solitariæ, dignitatis ergò usurpatæ. Iusiurandum iocosum. Ita saluus sim. Deus sit mihi propitiuus. Christiani reprehensiqui Gentilium iuramenta usurparent. Viuit Dominus. Hæc faciat mihi Dominus & hæc addat. Militum Alexandri & Romanorum quæ iurandi forma.

Cap. 4. Iurare positis super altare sanctum manibus. Coram altari. Propositis, tactis Sacris Euangelis. Iusiurandum prestitum corporaliter, legaliter. Ponere manum i. iurare. Exod. 23. Iurare super lapidem. super Crucem. In Cruce consecrata, non consecrata. Super Reliquias. Ritus singularis, iurando stipulas in manibus tenere, deinde proicere. In Capitularibus descriptus, quæ explicandus ex coniectura. Iurare super tumultum S. Dionysij. Super altarium. Iusiurandum mirum Iudæo à Christiano oblatum.

Cap. 5. In Iureiurando prestando quæ desiderantur ex Philone. Nec nisi postulante necessitate. Eorum quæ prohibentur, non una & eadem ratio. Intentio iurantis qualis esse debeat.

Cap. 6. Qui iurare legibus prohibeantur apud Gentiles, apud Christianos. De Clericis quo pacto intelligi debeat, explicat Photius, & ad eum Balsamo. Inscriptio quid. De Episcopis alia Codicis, alia Nouellarum sententia. Paruuli iurare non coguntur, & quo ætatis anno ad iurandum adigi possunt.

Cap. 7. Ex iurandi facilitate, mentiendi consuetudo. Mendacium duplex, in habitu, in verbis. Quis habitus conueniens. Triplex mendacium circa verba. Mendax triplex. Serui mendaces unde. Periurium ex praua consuetudine iurandi. Periurij causæ variae & multiplices. Qui periuurio rem sibi querunt. Periuurio an pœna aliqua constituta. Pontifices Romani Gentiles, causarum ad Sacra pertinentium Iudices, inde periurij, de quo & Censores. Periuoris pœna grauis indicta, Capitularium legibus. Periurij exagitatio.

## Index Capitum & Paragraphorum.

### Mysteria.

*Natura arcana non omnibus nota. Deum ignotum esse quid §. 1. sit, apud Scriptores prophanos; Explicatio ex Apostolo & Theodoro, S. Cypriano, Minutio.*

*Gentilium mysteria. Quid mysterium, variè. Mysterij notatio ex Iamblico. §. 2.*

*Mysteriorum silentium cuiusmodi, & eius usus antiquissimus apud Gentiles. Diagoras, Alcibiades, impij habiti, propter vulgata mysteria. §. 3.*

*Mysteriorum occultatio repetita, ex opertaneis, symbolis, vocabulis, locutionibus subobscuris; Clementis locus ad id expensus. Qui apud Gentiles inter Deos relati, nomen sortiebantur aliud ab eo quod antea inter mortales obtinebant. Aliud idioma cœlestium, aliud mortalium. Mosis triplex nomen, in circumcisione, ex euentu, in cœlo. De nomine Iesu, in Cœlo, apud Angelos, in terris, Lactantij sententia. §. 4.*

*Mysteriorum libri arcanis literis scripti. Ægyptiorum litera, seu triplex, seu duplex scribendi genus. Pythagoras circumcissus, B. Ambrosio Iudæus. §. 5.*

*Mysteriorum occultatio apud Gentiles, aut ratione personarum, aut rerum. Profani à Sacris expulsi. Orphei versus, qui apud S. Iustinum Mart. & Theodoret. non sunt Orphei, sed Onomacriti. Dissidium Senecæ patris cum Lactantio de admittendis in Templis Gentilium piratis, gladiatoribus, meretricibus, &c. De impuris à Sacris arcendis. Illustratio ex Cod. Theod. Gentili prægnanti prohibitus Templi ingressus, obliqua imitatio Iudæorum. §. 6.*

*Mysteriorum occultatio ex rebus, ex locis. Adyta quid sint, §. 7. quam varia, Ioseph Patriarcha Serapis Ægyptiorum: Præfatus Prætorio dictus.*

*Mysteriorum apud Gentiles occultatorum tres causæ: Prima, maioris venerationis gratia, Secunda, quia in ijs multa ob-*



Index Capitum & Paragraphorum.

scena. Tertia, quia plurima in ijs magica. Explicatio versiculi Davidici de Etruria, & loci Ciceroniani de disciplina Etruscae origine. Descriptio Sacrorum horum magicorum. P. Nigidius Figulus Magus. Sacra mysteria magica apud Eunapium.

§. 9. Philosophis sua non defuerunt arcana, etiam vocabula à vulgi vsu longè alia.

§. 10. Iudeorum mysteria. Qui panes subcineritij à Propheta imperati, & quid significant. Quis ille Propheta, apud Clementem Alexandrinum. Occultatio mysteriorum duplici velo expressa. Gentilis qui legem Iudaicam amplecti vellet, quæ Catechesis & institutio. Septem præcepta à Deo data ante legem Mosaicam.

§. 11. Christianæ religionis mysteria, ex collatione legis Mosaicæ. Mysterium respectu personarum, duplicem sortitur notionem, explicatio loci Math. 7. Nolite dare sanctum canibus. Clementis locus ex Euangelio ignoto, fortean Nazoreorum. Gentilibus ante Constantinū M. negatus accessus ad Ecclesias Christianas. Mysterij notio altera: Non omnes fideles mysteriorum capaces, ex Scriptura. Versio vulgata expensa, Hebr. 5. Rom. 11. Ephes. 3. Psalm. 118.

§. 12. Ex SS. Patribus mysteria non omnibus aperienda. Dogmata ad mysteria pertinere, quorum alia scripta, alia minimè scripto tradita. S. Scriptura obsignata Davidis sygillo, & quæ ipsius inscriptio. Cathecumeni, Nouitioli Tertulliano. Prophanus multiplici significato, ut & Idiota.

§. 13. Mysteriorum Christian. occultandorum quæ ratio. Quæ veneratio & reuerentia in Sacris. Ecclesia, mysteriorum locus, in quo secreta caelestia. Explanatio loci apud S. August. epist. 43. ex Seneca & Quintiliano.

Ceremoniæ.

§. 1. Homo totus à Deo pendet, cui & animo, & corpore venerationem conuenientem adtribuat. Corporeus & externus cultus Ceremoniis significatur. Ordinis ratio id postulat.

§. 2. Ceremonia



Index Capitum & Paragraphorum.

*Ceremonia pro Religione; Ceremonijs Religionem carere non §. 2.*  
posse. Ceremonias non unius eiusdemque generis & dignitatis  
esse, nec etiam originis.

*Ecclesia domus, ciuitas, nec nisi temporis progressu, quoad res §. 3.*  
externas, perfici potuit. Ex collatione cum Republica Iudæorum.

*Cur Sectarij nostras damnent Ceremonias. Quæ à Gentilibus §. 4.*  
in sua Idolomania factitata, quo pacto vel improbanda, vel non  
usurpanda à Christianis. Ex SS. Patribus.

*Imitatio Gentilium qualis. Veritas ubicumque reperitur, Dei §. 5.*  
est. Ex varijs. Ceremoniæ tota Ecclesia & receptæ & probatæ,  
non innumera. Religio Christiana nõ æstimada à stoliditate vulgi.

*Obijciunt Ceremonias nostras partim à Gentilibus, partim §. 6.*  
Iudæis depromptas. Ceremonias Gentilium bonam partem Iu-  
dæicarum imitatione, & nonnunquam nostrarum, post Constan-  
tinum M. institutas fuisse. Diabolus auctor præcipuus Ceremo-  
niarum Gentilium. Numa institutor Romanarum.

*In gratiam curiosi lectoris, enumerata & expensæ aliqua §. 7.*  
Gentilium Ceremoniæ, quas à Iudæicis originem sumpsisse de-  
monstratum. Excelsa, de quibus Scriptura, quanam fuerint.  
Item luci, & cuius venerationis. Diabolus quantum potest res  
Dei emulatur.

*Sacrum Diti & Proserpinæ factum apud Romanos, mera fuit §. 8.*  
imitatio Iudæici Sacrificij à Summo Pontifice, semel in anno,  
procurati. Leuit. 16. Heb. 9.

*Codex Sacrorum apud Arcades ex duobus lapidibus compa- §. 9.*  
ctus, exemplo duarum tabularum Mosaicarum, in quibus lex de-  
scripta. In Templis Gentilium vel fontes, vel putei. Ex Iudæis  
qua ratione istud petiit. Christianis veteribus ad fores Eccle-  
siæ, vas aquæ lustralis. Kερητόν.

*In Templis Gentilium Vesta ignis æternus. Iudæorum emu- §. 10.*  
latio. Lucerna apud Gentiles, vñ apud Iudæos, & hæc multi-  
plex, siue noctu, siue interdiu. Exploratio victimarum immo-

Index Capitum & Paragraphorum.

landarum apud Gentiles, exemplo ritus Iudaici. Sal in Sacris Gentilium, ut apud Iudeos.

§. 11. In Sacris conuersiones variae & circuitus apud utrosque Christianis veteribus an istud usitatum. Tertulliani locus expensus in verbo, *Ambiendi*. Tacitae obiectioni responsum. Verbis *Procedendi*, *Pergendi*, usi veteres. Solemni pompa Sacra sua ferendi Gentilium ritus manauit à Iudeis. Iudeorum impietas in deserto, Idolo Moloch sacrificantium, & eius tabernaculum deferentium.

§. 12. Principibus urbem aliquam ingredientibus, itum est obuiam à Ciuibus, Sacra sua gestantibus. Gentilium, Iudeorum, Christianorum exempla.

§. 13. Gentiles Christianorum ritus imitari voluisse. Formulae Ecclesiasticae à Gentilibus in suis Sacris usurpatae. Saluiani locus explicatus.

§. 14. De Sacrificulis Gentilium. Pontifices Maiores in quaque prouincia constitutos. Iudeorum imitatio. Formulae Christianae à Gentilibus usurpatae. Gentiles, Philosophos auctores suarum opinionum, Patres, Antistites, vocant.

§. 15. De signo Crucis. An aliquid persimile factitatum apud Gentiles. Tertulliani locus valde obscurus, tentatus. huic lux facta ab eodem Tertulliano, ex coniectura.

§. 16. An apud Iudeos Ceremonia aliqua in usu fuerit quae aliquam signi Crucis speciem referret. Vnctio Regia in capite in modum coronae. Vnctio Sacerdotalis in modum litere Graecae X. & quae significatio.

§. 17. De signo Crucis, siue vno, siue tribus digitis efformando. Historia ad eam rem insignis. Philonis Iudaei pro suis ceremoniis retinendis quae rationes, nostris maxime congruentes. Conclusio ex S. Augustino.

Cantus Ecclesiae.

§. 1. Cantandi in publicis conuentibus Christianorum mos, vel ab ipsis Apostolorum temporibus inualuit. Varroni Musica du-



Index Capitum & Paragraphorum.

plex, *Assa* voce & Organica. *Platoni*, *Aristoteli*, alijs, *Musica* triplex, & quæ. *Gentilium* alijs, voce simul & saltatione, alijs sola saltatione Deos suos venerabantur.

*Canendi*, in *Sacris*, ritus à *Iudeis* manauit. *Gentilium* in §. 2. *Sacris Cantus* non sine harmonia. *Christianorum veterum* quis *Cantus*. *Explicatio loci* apud actus passionis *S. Cypriani*. *Schola Cantorum*.

*Tertulliani locus* variè explicatus. *Explicationum quæ* magis §. 3. ad *Tertulliani mentem* faciat, inducet lector.

*Musica vocalis* qualis in *Ecclesia*. *Clementis Alexandr. locus* §. 4. *subobscurus* dilucidè expensus. *Donatistarum quæ Cantica*.

*Chorus*. *Cantores* multiplicis generis, & variorum ordinum pro temporum §. 5. *varietate*. *Canonis Laodic. explicatio* & emendata versio *Latina*.

*Lectores*, *adolescentuli*, *pueri*, *infantuli Cantores*. *Historia* §. 6. *puerorum vocalium Ecclesie Carthaginensis*, eorumque pro fide *Catholica martyrium*.

*Vocalis Musica* cuiusmodi fuerit apud *Christianos*, nec nisi §. 7. *gravis*. *Gentiles* in suis *Sacris* graues sonos adhibebant. *Spondæus* cur *Pontificius dictus*.

*Franci veteres* parum expoliti, & eorum *Cantus aliquantum* §. 8. *agrestior*; à *Pipino Rege* primū, *Romanum Cantum* multo suauiore & gratiore suscipiunt. *Cantum Romanum* videri aliquando emendatum.

*Principes olim Chorum Cantorum* in comitatu habuisse. §. 9.

*Musica organica* etiam in usu apud *Christianos veteres*: se- §. 10. *quentibus* deinde seculis.

*Canticum*, *Te Deum* laudamus, quando decantari ceptum, §. 11. *vocali* & *organica Musica*.

*Quæ vocalis Musice species* à *Christianis* probatæ; *Chromatica* §. 12. *damnata* à veteribus. *Vmnulata vox*. *S. Hieronymi locus* forsan, nec sine ratione, emendandus. *Voces* secabiles, collisibiles. *Canon Concil. Nicæni 2. illustratus*. *Mollicule vocalis Musice* grauis reprehensio.



## Index Capitum & Paragraphorum.

### Conscientia.

Conscientiæ definitio multiplex. Conscientiæ actus varij. Conscientia iuxta Regulam Iudiciorum expendenda. Conscientiæ monentis exemplum, Eua, Genes. 3. Conscientia vice Numinis. Deum nil latere. Conscientia nostri comes perpetuus, nostra omnia nouit. Conscientia testis, Iudex. An propriæ Conscientiæ iudicio standum, an aliorum existimationi. Conscientia examen quotidie constituendum. Auctores ad id, qua Sacri, qua profani. An Iudex reprehendendus si innocens damnetur. Innocens malè damnatus an infamis. Conscientia vltrix malefactorum. Exemplum ex Genes. 42.

### Regia Maiestas Sacrosancta.

- §. 1. Religio metu constat, ita Maiestas & honor. Regi & honor simul & timor exhibendus.
- §. 2. In eos qui maledictis & libellis famosis Reges ac Principes insectantur: Principes licet hæc non attingant; an Poëtis, quibus mentiri peculiare, istud liceat. Nonnullis infœliciter istud cessit.
- §. 3. Historicis quibus pro scopo veritas, an istud permissum & quomodo.
- §. 4. Fanaticorum hominum in Principes etiam defunctos scribendi audacia & proteruia, quid de scriptis eiusmodi statuendum. In parricidas Regum stylus stringendus.
- §. 5. An Princeps liberas populi voces prohibere debeat. Verborum aut scriptorum petulantiam olim leges coercuerunt. Quid de lege Theodos. Arcad. Honor. Imp. cur adeo benigna. Magistratus pro legum veterum seueritate agat, nec Princeps id curet.
- §. 6. Quid si Princeps sua potestate abutatur, scripto lesus, an Reipublica an priuatam vlcisci debeat iniuriam. Magnificè contemnet. Attamen libero monitore eoque familiari, si sapiat, carere non potest.
- §. 7. Principem lædi non posse sine Diuini Numinis læsa religione.
- §. 8. Formula Sacramenti militaris præstiti Imperatoribus à

### Index Capitum & Paragraphorum.

*militibus Christianis. Rex Francorum, Rex Sacerdotalis vel Pontificalis.*

*Principes parentes publici, in quos non aliter affectus populus quàm liberi erga parentes. Parentes etiam paulò morosiores ferendi.*

*Principes tutores publici, subditi pupilli, quibus in tutores nefas moliri quidquam. Quid unctio sacra, & cuius energiae in Regibus. Principis salus omnium salus, & contrà.*

*Quid Principi agendum, si quis suorum res novas moliat. Principibus innata quodammodo Clementia. Principem suspicacem esse decet, nec motiuncula illum rerum caput omittere cogat.*

*Princeps non tantum sibi sed etiam fidissimis Consiliariis prospicere debet. Non perfecta modò, verum & cogitata scelera, maxime in Principem, vindicanda.*

*Publica administratio non est absque invidia. Princeps cuncta exploret, sed omnium potissimum tacitus & silens. In ingratos severus. Est misericordia puniens, est crudelitas parcens.*

*Principi quo pacto Ecclesiae benignitas proposita. Qualis haec describitur, & quousque illam Princeps emulari debeat. Princeps cui Superiori subijcitur.*

*Apostolorum quodnam in fideles imperium. Ecclesia Dei placatrix est, non exacerbatrix. Quid de turbone potentissimo agendum, an iudiciorum mora & forma seruanda. Princeps sibi simul ac toti imperio confestim caueat.*

*Principis tutela certissima, eaque multiplex, à Caelo, ab innocentia, à pietate.*

### Vxor Iusta.

*Vxor iusta quae dicatur. Vxor columna quietis. Prius, spe- rata, Pacta, Sponsa. Sponsalia aliquando Matrimonio aequata. Adulterarum triplex genus apud Hebraeos, & suum cuique adsignatum supplicium. Apud Graecos Sponsalia penè iuris eiusdem cum Nuptijs. Quàm pudicè Sponsus erga Sponsam se gerat. Perit*

ē iiij



Index Capitum & Paragraphorum.

*mente virginitas. Matrimonium à Diuini Numinis inuocatione auspicandum. Publicè in Ecclesia celebrandum. Latinis, Græcis. Apud Græcos Sponsalia benedictione sacra peragi. Matrimonium publicè in Ecclesia celebrandum.*

Cap. 2. *Nuptiarum aliæ legitimæ, aliæ prohibita, & hæ in triplici differentia. Matrimonij definitio. Vxor quæ iusta, quæ legitima. Matrimonij bonum triplex.*

Cap. 3. *Consensus in matrimonio qualis. Magnatibus Rege inconsulto uxorem ducere non licet. De matrimonio inter personas dissparis cultus. Quæ legitimæ personæ ad matrimonium contrahendum. Auaritiæ ratio nulla habenda ex variis. De vetulis nupturientibus. De formæ studio.*

Cap. 4. *Matrimonij bonum primum quod est fidei explicatur. Mulierum delicta ex duplici fonte præsertim, Ambitionis & Auaritiæ. Mulierum habitus vel ad cultum vel ad ornatum refertur. Mundus muliebris diuersus ab ornatu. Luxus vestium muliebrium reprehensus. Etiam impudicarum pudor aliquis. De gemmis & coma. Medea prima pilos tingere excogitauit. De vnguentis. Mulieres quo pacto viris suis placeant. Mos patrius quis seruandus. Calis Græcæ nobilissimæ luxu perditæ mors infælix.*

Cap. 5. *Vxorum ornatus immoderatus quantum fidei coniugali officiat. Argumentum deformitatis pudicitia, vulgi sententia. Andronici Comneni Imp. historia. Fœmina amissa pudicitia, ad peiora audacior. Moderatus mariti erga uxorem amor.*

Cap. 6. *Coniuges sibi mutuam pudicitia & fidei coniugalis legem debent. Explicatio loci Apost. 1. Corinth. 7. Mulier sui corporis potestatem non habet, sed vir. Ad id insignis historia ex B. Augustino. Marito non licet quod uxori non licet. Mariti in uxorem quale imperium. Ex Pythagora quo pacto uxor in viri potestatem venit. Seruendi verbum, in uxoribus à B. Augustino usurpatum benignè explicatum. Penes uxores domus cura. Mulieres olim solæ panem pinsebant.*



### Index Capitum & Paragraphorum.

Bonum proles. Nuptias non concubitus sed consensus facit. In Cap. 7.  
veteri Testam. cur Matrimonio tantū tributum fuit quadruplex  
ratio. De Esseis. Adamo duæ filię, nuptæ Cain & Abel, ex B.  
Chrysoſt. An proles aut expectāda aut concupiscenda. Matrimo-  
nium à matre non à patre dictum, & cur. Puerperę nonniſi cum  
vitę discrimine. An mater proprios lactare debeat liberos. Græci  
μαμμᾶς, Matres ita Latini vocarunt. Mamma Ægyptiis pri-  
mum matris lac. Liberi cuiusque familie firmamentum.

De secundis nuptiis. Debiti cōiugalis appellationes varię. Ad- Cap. 8.  
uerſus repetitas nuptias ſcriptores quā ſacri quā profani aliquantū  
acerbiores. Menſe Maio cur veterib. nuptię improbat. Secūde nu-  
ptię Ss. Patrib. cur minus laudat. Maritus etiā ſeruus appellatus.

Sacramentum bonum tertium Matrimonij quale ſit. Nexus Cap. 9.  
inter coniuges quanti faciendus. Benedictio nuptialis cuiusmodi,  
& varius inde ritus. Quandiu vxor abſentem maritum expe-  
ctare debeat antequam alteri nubat.

Varro, ſiue de multiplici ſcriptorum genere.

Ingeniorū bonitas à Cælo & ſolo. Ingeniū viti perſimile, culturā Cap. 1.  
deſiderat. Europæorū & Aſiaticorū collata ingenia. Atticū ingeniū.

Ingeniorum cultura. Pater optimus liberorum magiſter. For- Cap. 2.  
mido ad diſcendum nocet plurimum. Qui diſcipuli ad bonas artes  
capeſſendas parum idonei, nec vna ratione.

Cui vſui comparata eruditio. Finis triplex Lactantio. A lit- Cap. 3.  
teris & ſcriptione immortalitas.

Lectio, iudicium, otium ad ſcribendum neceſſaria. Bibliothecę Cap. 4.  
parandę ſtudio cuiusmodi. Iudicium in ſcribendo quo pacto ad-  
hibendum. Obſcuritas vitanda. Feſtinatio non laudatur. Scri-  
bendi materia diſſimilis parē ſtylum deſiderat. Otium captandum.

Ingenij ſterilitas, eius cauſę multiplices. Cur eruditi nonnulli Cap. 5.  
aliquid litteris mādare recuſent. Otij torpor homini erudito vitā-  
dus. Aduerſus eos qui diſcendi cupidos ſcriptis ſuis neſcio qua per-  
uicacia fraudant. Seculi infelicitas, quo nullus laborū fructus, à  
ſcribendo plures deterret.

Index Capitum & Paragraphorum.

- Cap. 6. *Primum genus scriptorum, eorum qui res antea à nemine pertractatas in lucem primi proferunt. Non omnia patefacta, multa superesse indaganda. Ad historiam verè scribendam iter lubricum.*
- Cap. 7. *Secundum genus scriptorum, eorum qui rem iam tractatam attingunt, sed dissimili & stylo & methodo. Imitatio non omnis laudanda.*
- Cap. 8. *Tertium genus Plagiatorum. Tribus modis aliena sumuntur. Gentilium præstantissimi quique Philosophi quantum è libris sacris Hebræorum profecerint. Ægyptij Propheta .i. Sacerdotes Moysi Pentateuchus ante Alexandri M. tempora in linguam Græcam conuersus. Euripides Aristophani plagiarius. Prouerbum, Phanicum sermones, quid significet, excusatio veterum qui ex antiquioribus aliqua, vel non pauca mutuati sunt. Veri plagiarij qui, ijq; duplicis generis. Aliena opera nobiliorum auctorum in scriptione prænotata.*
- Cap. 9. *Quartum genus scriptorum, eorum qui ex una in aliam linguam auctorem aliquem interpretentur. Quid in illis versionib. præstandum.*
- Cap. 10. *Quintum genus scriptorum, qui aut Commentarius, aut Scholiis auctorem aliquem illustrare contendunt.*
- Cap. 11. *Scriptorum imperitorum scribendi pruritus. Præcoces ingeniorum fructus. Non quam-cito & ad molem, sed aptè & conuenienter scribendum.*
- Cap. 12. *De lectoribus & iudicio librorum editorum. Nemo sui operis Iudex legitimus. Vulgi iudicium repudiandum, Periti harum rerum de quibus ferendum iudicium, probi Iudices, aduersus reprehensores malignos.*
- Cap. 13. *Qualis censura de nostris scriptis ferenda, aut quæ ad materiam quæ tractetur, aut ad dispositionem, aut ad stylum refertur. Scriptores styli Asiatici, vel styli Attici. Vulgo magna pro bonis Theologica scriptio.*







IOANNIS FILESACI  
THEOLOGI PARISIENSIS  
SECTORVM  
LIBER SECVNDVS.

EVRIPIVS SECVLI.

CAPVT PRIMVM.

*Euripi Euboici varia descriptiones. Rerum omnium & vicissitudo & inconstantia. Nihil nouum. Mutationes aliquo pacto necessariae. Imperiorum conuersiones. Mutationum istarum tres causa, vel ex ipsarum rerum natura, vel ex mundo senescente, vel ex diuina Prouidentiae ordine & dispositione. Exempla. In iis omnibus nil admirandum.*

**E**VRIPIVM Euboicum, siue septies die ac septies nocte, fluctibus inuicem versis, immodicè fluentem, Strab. lib. 9. Mela. lib. 2. seu die ac nocte simul septies reciprocantem, Plin. hist. nat. lib. 2. c. 97. aut temerè in modum venti, nunc huc nunc illuc verso mari iactatum, Lilius lib. 38. rerum omnium quæ sub cælo sunt perennem perpetuamque inconstantiam nobis velut

A

ante oculos constituere ac referre: nemo est tam hebetis & stupidi ingenij, qui non facile intelligat. Sanctus Cyprianus ep. 2. eleganter, *Salum iactantis seculi* dixit. Ita Lucius Seneca præf. lib. 3. quæst. natur. *Alternæ sunt vices rerum*, Non modo quia, ut ait Lucilius,

*Intereunt, labuntur, eunt rursum omnia versum:*

Et ut loquitur Septimius Florens, Tertullianus Apolog. c. 45. *Non quia quotidie lux interfecta resplendet, & tenebræ pari vice decedendo succedunt, sidera defuncta viuescunt, tempora ubi finiuntur, incipiunt.* Seneca ep. 24. ista imitatio est, apud quem hæc præmissa, tum sequentia: *Nullius rei finis est, sed in orbem nexa sunt omnia, fugiunt ac sequuntur, diem nox premit, dies noctem, omnia transeunt ut reuertantur. Nihil noui video, nihil noui facio.* Ista non vno loco repetit M. Antoninus Imperator, 7. & 8. libris de vita sua, apud quem sæpius legere est, *ὅτι δὲν καὶ πάλιν πάντα καὶ πάλιν ὁλίγη χρόνια.* Nihil nouum, omnia vñtata, breui tempore duratura. E sacris libris descriptum istud, Ecclesiast. 1.3. *Nihil sub sole nouum. Quod factum, est ipsum permanet; quæ futura sunt, iam fuerunt, & Deus instaurat quod abiit.* Quin potius ad crebras illas & quotidianas rerum humanarum mutationes illa referenda sunt. Siquidem Plinio Iuniori, lib. 4. ep. 24. *Nihil desperandum, nulli rei fidendum, cum videamus tot varietates tam volubili orbe circumagi.* Et Tacitus Annal. 3. vtrumque complexus est. *Rebus cunctis inest quidam velut orbis, ut quemadmodum temporum vices, ita morum vertantur.* Iis congruunt quæ canit Poeta princeps, 1. Georgic.

— sic omnia fatis

*In peius ruere, ac retro sublapsa referri.*

Arnobij 1. disputatio perbellè huic rei accommodata, dum prolixè differit, *Noui fieri nihil, sed esse omnia vetera,*



& nulli antiquitati inaudita: quandoquidem statis temporibus  
 rerum vicissitudines fiant, atque ut in maritimis aestibus, modo  
 secundæ res affluant, modo rursus resfluant malis reciprocantibus  
 prospera. Præiuit Tertullianus, de Pall., suosque Carthagi-  
 nenses admonet, in ipso vniuerso, perpetuas rerum vices  
 deprehendi. *Si quid mare, inquit, diluit, cælum deussit, terra  
 subduxit, gladius detotondit, alias versura compensato redit.*  
 Atque ista velut communi totius generis humani bono  
 & pene necessario euenire, ille idem lib. de Anima de-  
 monstrat iis verbis. *Onerosi sumus mundo, vix nobis elementa  
 sufficiunt, & necessitates arctiores & querelæ apud omnes, dum  
 iam nos natura non sustinet: Re vera lues & fames & bella &  
 voragines ciuitatum pro remedio deputanda, tanquam tonsura  
 insolescentis generis humani.* Imperiorum & Rerum publi-  
 carum conuersiones & periodos, quas Plato & Aristoteles  
*κρίσεις* vocant, quid iuuat commemorare, de quibus extat  
 grauissima Polybij 6. dissertatio. Liuij lib. 42. non est ista  
 prætermittenda sententia. *Omnia humana tum maxima  
 quæque & regna & imperia sub casibus multis esse. Urbium  
 cadauera, terrarum exposita funera, dixit B. Ambrosius,  
 ep. 8. Carthago aratrum passa, Modestino D. lib. 7. tit. 4.  
 l. 21. Lactantius lib. 7. c. 15. definit nihil esse humanis viri-  
 bus laboratum, quod non humanis æque viribus destrui  
 possit, quoniam mortalia sunt opera mortalium.* Symmachi 8.  
 Ep. 27. ea vox est, *Nihil hominibus æternum est, voluunt  
 mortalia vices crebræ, & omnium rerum fuga fit.* Ac quam-  
 quam harum mutationum causas non sit huius loci dis-  
 quirere, attamen rebus ipsis, ex sui ipsius natura, inditam  
 esse instabilitatem & inconstantiam, veterum permulti  
 existimarunt, ut ex iis quæ nunc protulimus satis apparet.  
 Naturales esse Rerum publicarum conuersiones ex Plato-

A ij

ne affirmat Orator princeps. Cæcilius, apud Minutium  
Fœl. Octauio, *Omnia in rebus humanis dubia, incerta, suspensa,*  
*magisque omnia verisimilia quàm vera:* Sed Ethnico homini  
istud condonandum, utpote in magna rerum istarum  
ignoratione versanti. Communcem omnium hominum  
fortunam ac naturam esse dixit Aristides orat. Smyrn.,  
sed ille eadem orat. gratulatoria Smyrn. aptissimum istud  
verbum addit, multa esse miracula temporis *πολλὰ τὰ θαύ-*  
*ματα τῆς χρόνου.* Mundo senescenti rerum omnium inclina-  
tionem & variationem eiusmodi, veterum non pauci ad-  
signarunt: non aliter atque in senili corpore, in quod tam  
varij, tam frequentes morbi vndiquaque irruunt, & ut  
loquitur Satyricus Iuven. Satyr. 10.

— circumfilit agmine facto

*Morborum omne genus.*

S. Cyprianus lib. ad Demetr. admirabili orationis lepore  
ac venustate, hoc ita expressit. Scire debes senuisse iam  
mundum, non illis viribus stare, quibus prius steterat, nec  
vigore & robore eo valere, quo antea præualebat. Non hyeme  
nutriendis seminibus tanta imbrum copia est, non frugibus  
æstate torrendis Solis tanta flagrantia est, nec sic verna de tem-  
perie sua sata leta sunt, nec adeo arboreis fætibus autumnæ  
fecunda sunt. Minus auri & argenti opes suggerunt, exhausta  
iam metalla, & pauperes venæ breuiantur in dies singulos &  
decrescunt: deficit in agris agricola, in mari nauta, miles in  
castris, innocentia in foro, iustitia in iudicio, in amicitiiis con-  
cordia, in artibus peritia, in moribus disciplina. S. Ambrosius,  
aduersus Symm. Mundi, sicut omnium rerum, primæua viam  
mutasse dixit. Et ut loquitur B. Augustinus, ep. 3. *Mundo*  
*declinante in extrema, fessisque rebus ætatem ultimam protestan-*  
*te.* Quod fatetur Theodoretus 4. fab. hæ. de Nestorianæ



SELECTORVM LIB. II.

hæreseos origine agens. Ita Phlegon Trallianus lib. de  
mirabilibus dixit naturam, vigentem viribus, omnia Deo-  
rum naturæ æmula, initio educasse, successu autem tem-  
poris, cum vis illa primæua euanesceret, naturarum quo-  
que quantitates decreuisse. Clemens Alexandrinus aliquid  
simile habet Strom. 7. Nec abludit S. Hieronym. Præfat.  
lib. 8. Comm. in Ezechielem. Eleganti similitudine hanc  
mundi vim vigoremque labascentem, explicat B. Am-  
brosius, ep. 42. quamquam ad singularem hominis natu-  
ram illam referat, *Quemadmodum magnetis lapis tantam  
naturæ vim habet, ut ferrum ad se trahat, & transfundat se in  
illius speciem, ita ut, plerisque experiri volentibus, cum plures  
annulos ferreos ad eum lapidem admoerint, omnes pari teneat  
modo, deinde si ei annulo cui adhæserit lapis, alium admoueas  
annulum, & rursus per ordinem singulis substituas, licet in om-  
nes penetret per ordinem ex illo lapide vis natura, tamen priores  
nexu vehementiori constringit, posteriores remissiore. Illud idem  
in mundo euenisse manifestum, cum primæua sui origine omnia  
vegeta magis ac robustiora, fecundiora, perfectiora, minúsque à  
suo scopo aberrantia deprehendantur, succedentibus seculis sen-  
sim ac paulatim rebus omnibus à florenti primario isto seculo  
desciscantibus. Quamquam ut locum hunc absoluam, Co-  
lumella præfatione operis sui, pertinaciter mundum se-  
nescere neget. Sed à mundo tantisper mentem cogitatio-  
nemque auocemus, & potius, qui hoc vniuersum archite-  
ctatus est, totum hoc quicquid sit Diuina sapientia mode-  
rantem, spectemus. Stoicus Romanus Sen. præf. lib. 3.  
Quæst. nat. tantum non Christianè ista pronunciauit &  
verè: Regna ex infimo coorta supra Imperatores iacuerunt:  
Vetera imperia in ipso flore cecidere: Iniri non potest numerus  
quàm multa ab aliis fracta sunt, nunc cum maxime Deus alia*

A iij

*exaltat, alia submittit, nec molliter ponit, sed ex fastigio suo nullas habitura reliquias iactat. Diuinæ prouidentiae certissima ista sunt effecta. E cœlo siquidem ista vox apud Danielelem 4. Cognoscant viuentes, quoniam dominatur Excelsus in regno hominum, & cuicumque voluerit, dabit illud, & humilimum hominem constituerit super eum. Sic vulgata: sed Sancti Pagnini versio longè clarior. Cognoscant viuentes quod dominetur Altissimus in regno hominis, & cui quod voluerit, dabit illud, & humilem hominum constituet super illud. Anna Samuelis Prophetæ mater eodem pacto, 1. Reg. 2. Dominus pauperem facit & ditat, humiliat & subleuat. Suscitât de puluere egenum, & de stercore eleuat pauperem, ut sedeat cum Principibus, & solium gloriæ teneat. Valdè pertimescendum quod apud Iob 36. scriptum est, Deus Reges in solio collocat in perpetuum, & illic eriguntur. Et si fuerint in catenis, & vinciantur funibus paupertatis, indicabit eis opera eorum, & scelera eorum, quia violenti fuerunt. Veterum Ethnicorum sapientiores quique, fatum, quod illi crebrò enunciabant, diuinæ prouidentiae admirabilem dispositionem intelligi voluerunt. Quo spectant illa Statij 3. Syl.*

*Sunt fata Deum, sunt fata locorum.*

Cuius rei vnum & alterum illustre subiiciam exemplum. Hierusalem vnâ cum Templo priore euersa fuit à Nabuchodonosor, anno Sabbatico; & illa eadem, anno eodem, euersa est à Tito & Romanis, eodem die, qui incidit in decimum nonum nostri mensis Augusti, ut prodit illustriss. Scaliger, de emend. temp. 6. & in Euseb. Subiungam & istud: Terra promissionis subacta, & distributa singulis Tribubus, primum apud Iudæos summum Sacerdotem extitisse Phinees, sic Hierosolymis à Tito & Romanis dirutis, vltimum extitisse Sacerdotem summum, nomine



SELECTORVM LIB. II.

7

Phinices, vt auctor est Nicephorus Chronolog. Quinetiam Constantinopolis à Constantino Magno instaurata, amplificada, dedicata est mense Maio, feria secunda; & ipsa eadem à Mahumete secundo expugnata, mense Maio, feria secunda, vel, vt aliis placet, feria tertia, sub Constantino: Auctores Codinus, Phranfes. Sed vt è diuerticulo in viam redeamus, si quis tâtas & tam crebras rerum omnium vicissitudines, iam à priscis temporibus perpetua quadam ferie contigisse perpendat facile *ἀναμνηστικῶς* Democriti, siue admirationis vacuitatem illam, de qua Strabo 1. sibi comparabit; & cum Horatio 2. ep. 6. exclamabit:

*Nil admirari prope res est vna, Numici,*

*Solâque quæ possit facere, & seruare beatum.*

Aut potius iuxta diuina oracula, Rom. 11. *O Altitudo diuitiarum sapientiæ & scientiæ Dei, quàm incomprehensibilia sunt iudicia eius & inuestigabiles viæ eius.*

CAPVT SECVNDVM.

*Vitæ humanæ crebræ mutationes. Ipsa nauigationi comparata. Corpus instar nauiculæ. Penè omnis vita naufragium. Naufragio perire, genus mortis scæuum, & detestandum veteribus.*

**T**ANDEM hæc omnia prætermittamus quæ latissimè patent, vnius vitæ humanæ Euripum, & in eo varios ac multiplices affluxus & refluxus speciatim expendamus. Vitam humanam aut mari, aut nauigationi, qui persimilem dixerunt, non modo varias nauigandi rationes, sed & innumera, quæ in ipso mari & nauigationis cursu occurrunt, discrimina intellexerunt. Seneca ep. 70. ad diuturnam aut breuiorem hominum vitam ista refert: *Prænaui-*

*gamus vitam.* Sic M. Antoninus 3. de vit. Ingressus es vitam, nauigasti, vectus es, discede. Et quamquam discessus iste, quem nos mortem vocamus, seu externa vi contingat, seu naturali solutione, de qua plebeiam illam & vulgi vocem refert Seneca ep. 69. *Bella res est mori sua morte*, attamen quidquid illum antecedit, mera nauigatio apparet, quemadmodum enim in mari, ut ait Virgilius 3. *Æneid.*

— *terraque urbésque recedunt.*

Seneca epist. 70. *Sic in hoc cursu rapidissimi temporis, primum pueritiam abscondimus, deinde adolescentiam, deinde quicquid est illud inter iuuenem & senem medium, in utriusque confinio positum, deinde ipsius senectutis optimos annos: Nouissimè incipit ostendi publicus finis generis humani. Scopulum esse illum putamus, dementissimi, portus est, aliquando petendus, nunquam recusandus: In quem si quis intra primos annos delatus est, non magis queri debet, quàm qui citò nauiganit. Alium enim venti segnes ludunt ac detinent, & tranquillitatis lentissimo tadio lassant, alium pertinax flatus celerrimè perfert.* Tertullianus de Anim. non minori elegantiâ totum hunc Senecæ locum æmulatus est, cùm morti seu naturali seu violentæ vim inesse contendit, iis verbis: *Violentior mors quæ per aliena grassatur, quæ animam per commoda expellit, quæ tunc mori adfert cùm iucundius viuere est in exultatione, in honore, in requie, in voluptate. Vis est & illa nauigij cum longè à Caphareis saxis, nullis depugnata turbinibus, nullis quassata decumanis, adulante flatu, labente cursu, latante comitatu: intestino repente percussu, cum tota securitate desidunt, non secus naufragia sunt vitæ etiam tranquillæ mortis euentus, nihilo refert integram abire corporis nauem, an dissipatam, dum animæ nauigatio eueratur.* Maximus Tyrius serm. 3. ut hoc obiter dicam, hominis dum in his terris agit corpus, nauiculæ immensum mare



SELECTORVM LIB. II.

mare traicienti, comparat. Boëtius ille, 1. de Consol. Prof. 3. seu eruditionem, seu vitæ sanctitatem spectes clarissimus, merito de humana vita istud scripsit: *In hoc vitæ salo, circumdantibus agitamur procellis.* Senecæ Consol. ad Polyb. c. 28. imitatio est, apud quem hæc legas, *In hoc profundum inquietumque proiecti mare, alternis aestibus reciprocum, & modo alienans nos subitis incrementis, modo maioribus damnis deferens, assidueque iactans, nunquam stabili consistimus loco, pendemus & fluctuamur, & alter in alterum allidimur, & aliquando naufragium facimus, semper timemus.* Quod ait nos aliquando naufragiū facere, sapius dicere debuit, siquidem Saluiano lib. 3. *pene omnis vitæ naufragium est, & quo pacto istud contingat sic exponit: Intantum quippe vitiosè ab omnibus viuitur, ut prope nullus Christianorum sit, qui non ingiter naufragare videatur.* Quandoquidem in communi hominum cœtu sic versamur, ut vndiquaque à naufragio vel famæ, vel rei domesticæ, vel potius, ut cum nostris loquar, diuinæ gratiæ, periculum nobis immineat. Rectè Petronius, Satyr. *vbique naufragium est,* Si quidem ut ipse explicat, *illum bellantem arma decipiunt, illum Diis vota reddentem penatum suorum ruina sepelit: ille vehiculo lapsus properantem spiritum excussit, cibus avidum strangulauit, abstinentem frugalitas.* Veruntamen si qui interim quod ad naufragij proprium ac primarium significatum spectat, in aquis suffocari, leue hoc ipsum & minimi faciendum esse putant, ij primum apud se cogitent veteres, genus hoc mortis, videlicet naufragio perire, supra quam credi possit, vel maxime reformidasse. Tertullianus, Apol. 9. Ethnicis singularem istam exprobrat immanitatem aduersus Christianos, *Crudelissimè in aqua spiritum extorquetis.* Vegetius lib. 4. de prælio nauali loquens, *Inter tanta tamen mortuum genera,*

B

qui acerbissimus casus est absumenda piscibus insepulta sunt corpora. Ovidius, 1. Trist. El. 2.

*Non lethum timeo, genus est miserabile lethi,*

*Demite naufragium mors mihi munus erit.*

Sed ad rem, quis honestatis & omnis innocentiae amans, famae iacturam, ipsa morte acerbiozem non putat? Quis florente ac diuite familia & gente natus ad inuitas redactus? fortè,

*Nudus, egens, veneris naufragus in pelago,*

Vt ait Porphyrius Poëta apud Fulgentium, Mythol. lib. 2. non ægrè spiritum ducat? Quis tam parum de animae suae salute & immortalitate cogitans æternos alterius vitae cruciatus non perhorrescat, malitque sempiternam istam infelicitatem, non vnius vitae, sed multiplicis, si talem natus esset, dispendio redimere? Quicquid illud sit nemini dubium esse potest, ut vnda impellitur vnda, sic vitam humanam variis subinde iactari casibus. S. Ambrosius Orat. funeb. Theod. quam ornatè ista, dum de hominum conditione disserit: *Effusi utero de calidis in frigida, de humidis in arida, piscium more iactamur, quos naufragos in hanc vitam quidam naturæ fluctus expuit:* Sic vitam ordiri datum est, at hanc ipsam ducere non nisi inconstantissimè, quandoquidem Apuleio florid. 4. *Nihil quidquam tam profferum hominibus datum, quin ei tamen admixtum sit aliquid difficultatis, ut etiam in amplissima quaque letitia subsit quæpiam, vel parua querimonia, coniugatione quadam mellis & trifellis, Vbi uberi ibi tuber.*



## CAPVT TERTIVM.

*Hominum qui tractant publica cum Euripo comparatio. Ambitionis status periculosus. Descriptio ab aquilæ exemplo. Ambitioni triplex periculum imminet, à seipsa, ab ipsis rebus, & honoribus, à rebus externis. Honores non sine metu. Imperiorum & Rerumpublicarum turbandarum duæ principes causa, Ambitio & Avaritia. Ex Aristotele. Peregrini, spretis Ciui-  
buis, honoribus minime exornandi.*

VITÆ priuatæ & publicæ, seu eorum qui tunicata quiete, ut loquitur Martialis, lib. 10. Epigr. 51. delectantur, aut illorum qui in medio positi sunt, iuxta Senecam ep. 73. qui in Republica versantur, comparatio, satis indicat non esse tam lac lacti simile quam horum, qui honoribus præditi, rem tractant publicam, cum Euripo illo Euboico vitam maximè conuenire, & eò magis si Aulæ addicti, suas omnes fortunas, opes, felicitatem denique in ea collocent. Varios Euripi istius vitæ, præsertim Aulicæ, accessus & recessus singillatim inuestigemus, atque in primis à quo in pelagus istud scopulosum & infestum impellantur: Ambitionis status ille est, sed & fallax & periculosus. Poma per vitrum aspicientibus multò maiora sunt. Columnarum interualla, porticus longiores iungunt. Seneca epist. 66. *Speciosa & magna contra visentibus cum ad pondus reuocata sunt fallunt.* Sic se habent ad quæ adspirat ambitio, nam ipsa cum sublimioribus collata dignitatibus, eius qui illa tam cupidè prosequitur, præpostero opinionis errore, longè ampliora quam res

B ij

ita se habeat, existimantur. Eiusmodi comparisonem cum præstantioribus quàm grauitè expressit Plinius Iunior Paneg. apud Traianum suum: *Vt corpora quamlibet ardua & excelsa, procerioribus admota decreſcunt, item vt altiffimæ ciuium dignitates, collatione fastigij tui (Imperatorij) quaſi deprimuntur, quantoque propius ad magnitudinem tuam (Imperatoriam) aſcenderint, tantum etiam à ſua deſcendiſſe videantur.* Fungi planè ac peponesisti ambitioſi, qui hæc non cogitent, quin potius voti ſui ac deſiderij compotes facti, quaſi Cælum vertice tangerent, cæteros omnes longe infra ſe collocatos eſſe arbitrantur. Quorum imaginem non aptius, non venuſtius, nobis repræſentari exiſtimem, quàm Aquilæ volantis lepida deſcriptione, apud Madaurenſem illum, Florid. i. iis verbis. *Aquila cum ſe nubium tenus altiſſimè ſublimauit, euecta alis, totum iſtud ſpatium quo pluitur & ningitur, vltra quod cacumen nec fulmini nec fulgori locus eſt, in ipſo, vt ita dixerim ſolo ætheris & faſtigio hyemis, ſeſe exculit, nutu elementi, laeuorſum vel dextrorſum, tanta mole corporis labitur, velificatas alas quo libuit aduertens, modico caudæ gubernaculo, inde cuncta deſpiciens.* Sed quis euentus huius tam elati, tam excelsi, atque vno nomine ambitioſi conatus, nil niſi *flamma ſtipula exorta, claro crepitu, largo fulgore, cito incremento, ſed materia leui, caduco incendio, nullis reliquiis.* Quàm parum hæc ſolida ſint, & nimium quantum fallacia, non vno loco poſthac demonſtrabimus, nunc quantum periculi ipſi ambitioni inhæreat, paulo fuſius explicandum eſt. Atque vt certo ordine tam varia & multiplex diſſertatio noſtra progrediatur, imprimis illud ſtatucendum eſt, non vnius generis eſſe periculum, de quo quæritur. Aut enim à rebus ipſis & honoribus proficiſci ſolet, aut ambitioſi ſibimet periculum



creant, vel denique vltro quamplurimis diuersisque, atque externis discriminibus peti se in dies & singula momenta sentiunt. Aliquid in ipsis honoribus pertimescendum videri tam perspicuum est, quàm quod maximè, & nos de ea re alio loco nonnihil diximus, pauca hæc nunc subiicio. Seneca de Tranq. c. 3. *Cum vtilem se efficere ciuibus mortalibusque propositum habeat aliquis, simul & exerceatur & proficiat qui in medijs se officijs posuit, communia pro facultate administrans. Sed in hac tam insana hominum ambitione tot calumniatoribus in deterius rectorquentibus parum tuta simplicitas est, & plane futurum si semper est quod obstet quam quod succedat.* Philo Alexandrinus de creat. Princip. sanctissimè admonet, Principatum omnem lubricum esse, innumeris insidiatoribus obnoxium, quod si aliquando confirmetur, id fieri non sine multis acceptis & illatis calamitatibus, atque nihilo stabiliores esse honores quorum incertissima sit possessio; quæ si quando perseueret, nihil tamen verè boni contineat. Illustre huiusce rei exemplum habes in ritu illo triumphandi, apud Romanos vsitato. Istud inter cætera memorat Septimius Florens, Apol. 33. *Hominem se esse etiam triumphans in illo sublimissimo curru admonetur. Suggestitur enim ei à tergo: Respice te, hominem memento te: Etiam utique hoc magis gaudet tanta se gloria coruscare, ut illi admonitio conditionis suæ sit necessaria.* Addendum & illud in eodem curru, vñ cum triumphante, extitisse seruum publicum, qui coronam illius capiti impositam sustineret: Cui additus erat & carnifex cum tintinnabulo & flagris. Secundo loco videndum est, quæ ratione à seipsis non leuia qui magistratus gerunt sibi accersant & attrahant incommoda, hoc vt multo clarius elucescat, ex altero Philosophiæ parente Aristotele 5. Po-

B iij

lit. c.2. intelligendum est, ipforum Imperiorum & Re-  
rumpublicarum non tam turbandarum quàm euer-  
tendarum has esse causas, & has quidem præcipuas ac princi-  
pes, ambitionem & auaritiam, reliquas vero huiusmo-  
di, cum, in Republica, ciuium pauci, omnes honores in-  
tercipere solent, ceteri mancant inglorij, aut omnem  
omnino parandarum diuitiarum rationem sibi vsurpant,  
reliquis egestate laborantibus. Deinde cum magistrati-  
bus exornati, priuatos contumeliis afficiunt. Tum qui  
præsunt, vestigalia & bona publica depeculantur, & in  
suos vsus peculiares conuertunt, vel priuatorum seu ci-  
uium, seu qui illis parent, fortunas inuadunt. Quin  
etiam si quis supra modum inter suos excellat, & recte  
Liuius lib.38. istud admonet, *Neminem unum ciuem  
tantum eminere debere, ut legibus interrogari non possit,  
nihil tam æquandæ libertatis esse, quàm potentissimum  
quemque dicere causam.* Illis est addendus metus, non  
tam quod imbecilliores aut tenuiores metuant ne iniuria  
à potentioribus afficiantur, aut nobiles à plebe, si modo  
penes eam est imperium, quia potius quod potentissi-  
mus ciuis quispiam veretur, ne propter scelera & malefi-  
cia à se perpetrata pœnas det. Sequitur contemptus,  
cum nulla est aut exigua iudicum vis & potestas, magi-  
stratum plane iniustus, & indignis quidem largitioni-  
bus, habitus delectus. Denique si ordinum in Republica  
aliquis, ut pote iudicum seu magistratum, in immen-  
sum excreseat. Addit insuper vir ille nulli secundus, si qui  
humilis & abiectæ sortis homines, necnon & Peregrini  
in ipsa Republica obtineant magistratus. Postremum  
hoc ad id, de quo quæritur, maximè pertinere existiman-  
dum est. Si quidem vbi Peregrinus aliquis in honoribus



adipiscendis, ipsis ciuibus praelatus est, non modò inuidiam, sed & odium plurimorum sibi conciliabit. Ac quamquam de ipsa Republica bene meritus, & suis praeclarè factis ad eam peruenerit dignitatem, nihilominus tamen ciues ipsi, qui, vel sua, vel maiorum virtute & industria, Rempublicam iuuisse dicuntur, istud æquo animo pati non possunt. At quanto iniquius ferent si peregrinus, penè ignotus, nulla fidei, probitatis, fortitudinis commendatione dignus, illustrissima praefectura & magistratu exornetur. Hæc vna res in Imperiis & Rebus publicis non leues turbas excitauit, hæc nonnullos Imperatores & Principes pessumdedit. Id de Macrino Imperatore prodit Xiphilinus Macrin. ex Dione, mitto ceteros quos longum esset percensere. Quo loco cum Statio, propterea ad Crispin. liceat exclamare,

*Nos certè taceamus & obruta multa*

*Nocte tegi, propria patiamur crimina gentis.*

Saluiano 7. *Franci semper habiti sunt hospitales*, & quando Galli vnà cum ipsis in vnā coaluerunt gentem, non minori affectu & studio in excipiendis peregrinis propensos sese demonstrarunt; sed hæc benignitas tum magno constitisse nonnumquam visa est, cum ipsi peregrini ad maximas dignitates, ciuibus ipsis dissimulantibus, vel insigni socordia & veterno laborantibus, sibi adiutum fecerunt: & quàm sæpe Galliam suis Nouercam esse docet experientia. Ammianus Marcellinus lib. 25. Iulianum Imperatorem meritò carpit, quod in vrbium decuriis, quæ sunt minores Senatus, vel peregrini sua auctoritate aut dissimulatione promouerentur. Est Peregrinorum genus aliquod, cui non minus periculi imminet quàm superioribus, si honores & magistratus ambiat.

Hos intelligo qui ab auita, & permultis antea seculis in Republica recepta religione descuerunt, quos à reliquis ciuibus legitimo sacrorum ritu, & orthodoxa fide diffidentes, dignitatibus exornare nefas esse dicendum est, si tranquillam & tandem saluam Rempublicam esse velimus. Sapienter Iustinianus Imperator apud Procop. bell. Vand. lib. 2. Gilimerem, quondam Vandalorum Regem, Arrianæ hæresi renunciare recusantem, Patriciatus honore insignire renuit, inconcussum nihilominus Reipublicæ statum, ut optandum, sic retinendum velim.

## CAPVT QVARTVM.

*Non nisi idonei & digni ad honores publicos & dignitates promouendi. Inuiti vel non ambientes magistratibus exornandi. Imperiti & flagitiosi penitus remouendi. In unoquoque magistratu tria requirit Aristoteles. Genere nobiles an idcirco periti & idonei. Politica doctrina tribus modis comparatur. Qui opibus abundant an idcirco peritiores & magis idonei. Magistratus dignum non efficit. Magistratum ingens numerus de dignitate multum detrahit, velut & si quis indignus exornetur, aut præproperè & præmaturè.*

**S**ED pergamus & qui sibi nocere soleant, magistratus ambientes cæteros expendamus. Ac in primis, qui rerum agendarum plane imperiti, tanta tamque incredibili audacia & confidentia, quoslibet honores captare non verentur, ij nobis sunt excutiendi. Præstantissimus ille cuiusvis eruditionis præceptor Aristoteles, polit. 3. c. 7. in omnibus ferè artibus, præsertim practicis & effectricibus,



cibus, triplex hominum genus spectandum esse admonet; sunt qui praeceptis & ratione habitum alicuius artis sibi compararunt: sunt qui usu tantum experientiaque artis ipsius cognitionem adepti sunt: postremò sunt & opifices, qui in politicis rebus, *Officia*, non modo apud Iurisconsultos, sed etiam apud probos auctores nuncupantur. Nunc omisso isto genere postremo, cui parendi necessitas perpetuò imposita est, de duobus prioribus agamus, qui, neque habitu & ratione, neque usu gerendis magistratibus, aut dignitatibus sustinendis, idonei sunt, ac nihilo minus ad illas, omni studio & conatu, contendunt, non à cuiusvis periculi metu liberos se esse minimè existiment, & eo magis si vel opum parandarum cupiditate, vel ambitione, seu cæteris pro libidine imperandi, studio ducti, ipsos appetant & consectentur honores, quos ut planè indignos, à Republica gerenda penitus remouendos esse, apud Platonem 1. Repub. Socrates existimat. Solis itaque viris probis, & qui nulla ratione abduci ab officio possint, demandandos esse magistratus contendit. Et alio loco lib. 7. de Repub. Ciuiles honores, hominibus imperij minimè cupidis, concedendos esse concludit: quin si laborem administrationis detrectent, etiam multa imposita, cogendos esse, quandoquidem ob vitæ & morum integritatem, non iam suæ, sed publicæ utilitati ipsos consulturos esse, pro comperto habeatur. Sic certè sapientissimi quique principes, ambitiosis illis, ut potè indignis ad quolibet magistratus capeffendos, omnem omnino aditum interclusum esse voluerunt, quos non aliter minus idoneos iis gerendis existimarunt, nisi quod penitus indignos, illi, sua ambitiosa & incredibili cupiditate se se præbuerint. De Galba Imperatore istud scripsit Tran-

C

quillus, Galb. 15. Existimabatur Senatoria & Equeſtria officia biennij ſpatio determinaturus, nec daturus, niſi inuitis ac recuſantibus. Plinius, Panegy. ſuum inter cætera Trajanum laudat, quandoquidem ab eo impetratum quod poſtulabatur, & oblatum quod non poſtulabatur, quique inſtaret ultro, & ut probi concupiſcerent admonuit. Et paulò poſt, non niſi idoneis & dignis collata eſſe dignitatum beneficia, commemorat. O te dignum, inquit, qui de magiſtratibus noſtris ſemper hæc nuncios, nec pœnis malorum, ſed bonorum præmiis bonos facias. Vtile eſt, Cæſar, & ſalutare præſidibus Prouinciarum hanc habere fiduciam, paratum eſſe ſanctitati, indiſtriæ ſuæ maximum præmium, iudicium Principis, ſuffragium Principis. Nunc ſi bene aliquis Prouinciam rexerit, huic quaſita virtute, dignitas offertur. Nec multò poſt, Nihil magis prodeſt candidato ad ſequentes honores, quàm peractus optimè magiſtratus: magiſtratus magiſtratu, honor honore petitur. Sic apud Pacatum, Panegyric. Dux aliquis cuehitur, exegit diſciplina caſtrorum, præfectus attollitur, imponendum eſt Prouincia caput. Admirandum ſanè illud eſt, quod de Theodoſio Magno narrat item Drepanius Pacatus, Panegy. niſi quis non tam verè quàm oratoriè dictum putet: Illud tamen, inquit, præ cæteris mirum, quod cum omnia faceres, ut imperare deberes, nihil tamen faciebas ut imperares: Argumento eſt dies ille communis boni auctor, quo tu ad ſuſcipiendam Rempubicam vocabaris, oblatum imperium deprecatus es, nec dans ſpeciem tantum ut cogi videreris, ſed obnixè & diu & velut impetraturus egiſti. Illud idem de illuſtrioribus fœminis Plinius, Panegy. apud Trajanum, dicebat, quæ nihil tam laude & prædicatione dignum præſtare poſſunt, quàm ſi verum honorem, non in ſplendore titulorum, ſed in iudiciis hominum reponant, magniſque nominibus pares ſe faciant, etiam dum recuſant.



Quod multo rectius viris probistribuendum esse cenſeo, qui nihil ſibi grauius accidere poſſe arbitrantur, ſi dignitatis alicuius & publici muneris officium ſuſtinere cogantur. Sic Alexander Seuerus, inter optimos quoſque Imperatores numerandus, *inuitos non ambientes, in Rempublicam collocandos eſſe dictitabat*. Vorum elegantiffimi Symmachi, vrbi præfecti fuit, cum ad Theodoſium ipſum ita ſcriberet lib. 10. ep. 30. *Melius vrbi noſtræ (Romæ) in poſterum conſuletis, ſi eligatis inuitos*: Magiſtratus intelligit: quod ab eodem Imperatore factitatum eſſe, ille idem auctor eſt lib. 3. ep. 81. iis verbis ad Ruſinum ſcribens: *Quid quod etiam longe intendit (Theodoſius) oculos, & per immenſum requirit venas bonorum, nullosque auidius trahit quàm nihil deſiderantes*. Auguſtorum Gratiani, Valentiniani, Theodoſij, ſeuertiſſimam illam in, turpiſſimo ambitu, quoſlibet magiſtratus preſantes, legem Cod. Theod. 6. tit. 1. l. 1. omittere non poſſum: *Nihil eſſe, inquiunt, tam iniurioſum in conſeruandis & cuſtodiendis gradibus dignitatis, quàm uſurpationis ambitio*. Perit enim omnis prærogatiua meritorum, ſi abſque reſpectu & contemplatione, vel qualitate etiam prouectionis emeritæ, cuſtodiendi honoris locus præſumitur potius quam tenetur: *ut aut potioribus eripatur id quod eſt debitum, aut inferioribus proſit, quod uidetur indebitum*. Et quamquam de imperitis alicuius muneris, & officij publici exequendi, ſermo inſtitutus ſit, nihilominus qui tales ſunt, etiam indignorum nomine comprehenduntur: quæ vox alicuius magiſtratus gendi planè ignaros, ac præterea qui, politico homini neceſſarias, artes & diſciplinas vix nouerunt, ſed flagitiſis moribus præditos complectitur. De imperitis prius videndum, poſtremò indignos vniuerſum conficiemus. Antequam ſpeciatim de vnoquoque genere eorum qui

honoribus & dignitatibus exornantur, istud Aristotelis Polit. 5. c. 9. maximè obseruandum est. In iis qui summis magistratibus præsunt tria requiri, studium & amorem erga Rempublicam, tum scientiam & vsum, hoc est vt sint idonei & periti, denique probitatem & iustitiam formæ Reipublicæ congruentem, sed iam singula dispiciamus. Dignitas & magistratus omnis, vel in iis quæ belli sunt, vel pacis rebus gerendis versatur: Armata militiæ, honores omnes & munia publica, vnus nobilium ordo, quasi iure optimo sibi debita, etiam sibi vni vendicat. An origine & gente nobiles, idcirco his militaribus honoribus capeffendis idonei habendi sint non vna ratione dubitari potest. Aristoteles Polit. lib. 3. c. 5. Rempublicam suam ordinibus quatuor constare vult, proborum, nobilium, ditiorum, & infimæ plebeculæ, quæritque si honores alicui horum ordinum tribuendi, an ille non nisi peritos horum gerendorum contineat. Nobiles præsertim & ditiores commemorat, negatque iis, ideo quia nobiles sint, vel opibus abundantes, peritiam inesse exequendi alicuius officij publici. Istud à simili declarat, si quis nobiliorum, aut locupletiorum, cum iis qui tibia canendi artem profitentur, comparetur, an propterea melius canere dicetur, propter generis nobilitatem vel diuitias? Nihil minus, si quidem oporteat ei qui opere præstat, organorum quoque exhibere præstatiā, & nobilitas atque opes nihil omnino iuuant ad rectè & ex arte canendum. Idem planè statuendum in re nautica, arte militari, & cæteris artibus. At dicent, nobiles longè animosiores, audaciores, & ad quoduis belli discrimen subeundum, longè paratiores esse plebeiis hominibus. Non hîc agitur cum manum cum hoste conferere necessum est, cum vt ait Virgil. lib. 10. Æn.



— *hæret pede pes, densusque viro vir*

*Miscetur*, de arte in bello imperandi quæstio est: ista non fumosa nobilitatis imagine comparatur. Istud ex Polybio lib.6. magnopere obseruandum discimus, Politicam doctrinam tribus modis comparari, lectione historia, opera seu disciplina magistri, & usu, quod & in re militari valere nemo, cui mens læua non fuerit, dubitabit. Quisquis igitur nobilis militiæ nomen dederit, istud in primis curet vt se Tactico Magistro, seu Tribuno, seu Veterano Centurioni, in disciplinam tradat: sed siue hunc, siue illum nonnisi exercitissimum, & rei bellicæ scientissimum velit. Præclare illud adnotatum apud Platonem, Lachet. legimus: Armorum magistros ineptos, & rei militaris parum scientes, Lacedæmonem præsertim vitasse, quia in ea ciuitate nonnisi rei bellicæ peritissimi æstimbantur, & imperiti excludebantur. Nec audiendi nobiles, qui Plebeiis quouis in negotio ignobilitatem exprobrant, apud Iuuenalem Satyr.8.

*Vos humiles, aiunt, vulgi pars vltima nostri,*

*Quorum nemo queat patriam monstrare parentis.*

Sed vicissim reponent Plebeij, ex eodem Poëta:

— *Sed te censeri laude tuorum*

*Pontice noluerim, sic v: nihil ipse future*

*Laudis agas: Miserum est aliorum incumbere famæ.*

Plinius Iunior lib.5. ep.17. Eximiè istud, *Mirè*, inquit, *cupio ne nobiles nostri nihil in domibus suis pulchrum nisi imagines habeant.* Quantum, oro, ignominia & infamia nobilibus accedit, qui planè degeneres, maiorum dūtaxat rebus præclare gestis, & immortalī laude ac prædicatione dignissimis nituntur: verè Poëtam vnumquemque id genus nobilium ita compellare credendum est. Iuuen. Satyr.8.

C iij

*Nil nisi Cecropides, truncóque simillimus herma.  
 De quocumque voles proavum tibi sumito libro,  
 Quod si precipitem rapit ambitus atque libido,  
 Si frangis virgas sociorum in sanguine, si te  
 Delectant hebetes lasso lictore secures,  
 Incipit istorum contra te stare parentum  
 Nobilitas, clarámque facem proferre pudendis.*  
 Sic Ausonius noster septem Sapientum ludo,  
*Maiorum meritis gloria non datur,  
 Turpis saepe datur fama minoribus.*

Eleganter certè apud Philostratum lib. i. de vit. Sophist. in  
 Dionysio. Ad maiorum gloriam confugere eorum est,  
 qui propriæ laudis iacturam fecerunt. Quantoperè ex isto  
 nobilium numero reformidare quispiam debet, ne illi  
 Poëta istud in aurem immurmuret,

*Maiorum primus quisquis fuit ille tuorum,  
 Aut pastor fuit, aut illud quod dicere nolo.*  
 De suis nobilibus vtinam duntaxat Idem Poëta Saty. 6.  
 hæc scripsisset,

*Transco suppositos & gaudia votaque saepe  
 Ad spurcos decepta lacus, atque inde petitos  
 Pontifices Salios, Scaurorum nomina falso  
 Corpore laturos:*

— *si quis distendere vellet  
 Et vexare uterum pueris salientibus, esses  
 Æthiopis fortasse Pater.*

Sed ad rei militaris peritiam, quam exquirimus, tandem  
 redeamus, nec solis attributam nobilibus, fatendum est:  
 & quàm sapius obscuro genere nati, cæteris nobilibus &  
 virtute & fœlicitate bellica longè antecelluerunt. Nihil  
 tam obuium in publicis historicorum monumentis. Ri-



deant quantum volent ipsi nobiles Ventidium Bassum & istud occinant. Agell. 15. c. 4.

*Concurrere omnes Augures, haruspices,*

*Portentum inusitatum, conflatum est recens,*

*Nam mulos qui fricabat, Consul factus est.*

At ille primus de Parthis triumphauit, remque Romanam toto Orientis tractu nutantem firmavit, stabiliiuit; Cui iure optimo symbolum huiusmodi assignauerim: *Suppleuit fortuna genus.* Adde & hoc Iuuen. sup.

*Plebeia Deciorum animæ, Plebeia fuerunt*

*Nomina.* Verè equidem Seneca epist. 66. *Potest ex casa vir magnus exire, potest ex deformi humilique corpusculo formosus animus ac magnus. Quosdam itaque videtur mihi in hoc natura tales generare ut approbet virtutem omni loco nasci.* Sed nimis multa de armatæ militiæ scientia, nunc de togatæ peritia dicendum, & quàm dolendum sit tot imperitos, ineruditòs ciuilibus istis magistratibus exornari, non vnius generis causæ existunt, ex quibus tanti mali origo profluxisse dignoscitur. Vna eaque præcipua semper viris probis visa est, quod dignitates eiusmodi venales sint, quam rem pluribus alio loco lib. 1. Select. excusimus. Sed quoniam malum istud tam altas radices egit, ut vix ac ne vix quidem, si non funditus extirpari, saltem reuelli possit. Interim videamus quam peritiam diuitiæ ipsæ, quarum beneficio magistratus illi comparantur, suppeditent B. Hieronymus Apol. 1. contr. Ruff. verè istud, *Lutera marsupium non sequuntur, sudoris comites sunt & laboris.* Tacitus Ann. 3. *Eloquentiam non discerni fortunam* scripsit. Iuuenalis, Satyr. 8. *Plebeios homines utpotè tenuioris fortunæ, non ideo reiiciendos censet, quasi cum musis minus aptè isti consentiant;*

— tamen ima plebe togatum

*Facundum inuenies.*

Et paulò post,

— veniet de plebe togata

*Qui iuris nodos & legum enigmata soluat.*

Sic Minutius Fœlix, Octau. *Ingenium non dari facultatibus, nec studio parari, sed cum ipsa mentis formatione generari. Quàm grauitè ista expromit Seneca. Liberalibus me studiis tradidi, quamquam paupertas alia suaderet, & ingenium cò duceret, ubi præsens studij pretium est. Ostendi in omne pectus cadere virtutem, & eluctatus natalium angustias, nec sorte me, sed animo mensus, par maximis steti. Aulonij Consulis, grat. act. ad Gratianum Imperatorem, quondam discipulum, oratio est dum ei gratias agit, & aptè ad eam rem: Non possum ostendere imagines maiorum, nec deductum ab heroibus genus, sed ea quæ nota sunt dicere. Patriam non obscuram, familiam non pœnitendam, frugalitatem sine sordibus, victum, vestitum, suppellectilem, munda, non splendida. Et quamquam non diffitear opes, & prolixam aliquam hæreditatem plurimum adiuventi, ad animum optimis artibus & disciplinis excolendum asferre, non tamen, si sanus sim, solis diuitiis eam vim inesse dicam, vt ipsæ possessores suos, idcirco cuiuslibet dignitatis & magistratus ciuilis gerendi, idoneos efficiant. Quàm istud indignum videri debet, illis locupletioribus, nonnisi diuitiarum beneficio, ad publica ista munia, patere adiutum. Quis æquo animo ferat studiorum rudes, litterarum profanos, expertes bonarum & libero homine dignarum artium, ad Reipublicæ gubernacula euolare, in clarissima magistratuum subsellia irrumpere. Sed multo magis indignandum atque indolescendum flagitiosis artibus & moribus,*



SELECTORVM LIB. II.

25

moribus, ad hæc ciuilia officia euehi. Rectè Seneca Præf. I. quæst. nat. *Ambitio ad dignitatem, nisi per indigna non ducit.* Veterum ea querela est de iis quos seculi infelicitas ad dignitates prouehit, maximâ illarum infamiâ. At quis stupor id genus hominum animos occupauit, cum putant magistratum, quos adepti sunt, ornamentis dignos & idoneos effici, & in virtutis contubernium admitti. Præclare vir ille consularis & penè martyr, Seuerinus Boëtius, Consol. l. 2. prof. 6. De quo Gerbertus seu Syluester 2. meritò ista,

— gladio bacchante Gothorum,

*Libertas Romana perit, tu consul & exul,*

*Insignes titulos præclara morte relinquis.*

*Collata improbis dignitas, non modo non efficit dignos, sed prodit potius & ostendit indignos. Rationem adsignat: Si ipsis dignitatibus ac potestatibus inesset aliquid naturalis ac proprii boni, nunquam pessimis prouenirent, neque enim sibi solent aduersa sociari. Ita cum pessimos plerumque dignitatibus fungi dubium non sit, illud etiam liquet natura sui bona non esse quæ se pessimis hæere patiantur. Et alio loco Consol. 3. prof. 4. Non ea vis est Magistratibus, ut utentium mentibus virtutes inferant, vitia depellant: Atqui non fugare, sed illustrare potius nequitiam solent nec possumus ob honores reuerentia dignos iudicare, quos ipsis honoribus iudicamus indignos. Sic Saluianus 4. Quid est dignitas in indigno, nisi ornamentum in luto? Et antea Publius Syrus Mim.*

*Loco ignominie est apud indignum dignitas.*

Non immerito itaque B. Bernardus confid. 2. c. 7. dum suum Eugenium monet, quosdam sui seculi ambitiosos, & vitæ ad rectam virtutis regulam minus compositæ perstringit, sic autem loquitur: *Non tu de illis es, qui dignitates*

D

*virtutes putant?* Istud vero prætermittere mihi religio est, clarissimas & ornatissimas quasque dignitates, non modo ab eis qui ad illas indignè irrepserint, verum etiam propter effrenum numerum eorum qui illis exornantur despectui haberi. Verè siquidem à B. Hieronymo ep. ad Pammach. dictum est, *Quamvis clarus honor vilescit in turba & apud viros bonos, indignior sit ipsa dignitas, quàm multi indigni possident. Et latent in multitudine laurea, & triumphus interdum triumphantium sordibus polluantur.* Hoc certè memoria dignum quod ab Aurelio Victore, Vespas. proditum est; Præfetti Prætorio dignitatem suo tempore, id est Constantini Magni ævo, viluisse, propter indignitatem eorum qui illam gessissent. Memorandum istud verè portentum quod Pistorij in Etruria contigisse narrat Ammianus, lib. 27. ea in vrbe asinus, ipso meridie, tribunal conscendit, quod fuit augurium indignæ promotionis Pistoris cuiusdam in Correctorem provinciæ. Alterum huic persimile, apud eundem Ammianum, lib. 28. Scopas, quibus nobilitatis curia mundabatur, florere visas, & istud non aliud portendebat quàm indignos & sordidos homines extollendos. Nullus itaque, omnis honestatis & iustitiæ amans, succensere debet Catullo Epig. 53. in Nonium Strumam stylum stringenti, his versibus.

*Quid est Catulle, quid moraris emori?*

*Sella in curuli Struma Nonius sedet.*

*Per Consulatum peierat Vatinius,*

*Quid est Catulle, quid moraris emori?*

Non aliter Boëtius, Consol. 3. prof. 4. Ex consule, *Tu num tandem tot periculis adduci potuisti, ut cum decorato (homine flagitiosissimo) gerere magistratum putares, cum in eo mentem nequissimi scurræ delatorisque respiceres?* Sed ne cui scru-



pulus inhæreat, dum quæritur, annon qui sunt periti nobiles, aut ditiores, idcirco digni existimandi sint? ambitio absit, nihil est quod non facile probes. S. Ambrosio ep. 7. *Omne pretiosum non est dignum;* Illustrem te familiæ nobilis ac gentis splendor, tum opes permaximæ faciunt, sed qui ambitiosissimè & arrogantissimè iam non minores, verum maximos quosque magistratus, & ambis & confectaris, vide ne per abrupta, confragosa, tibi que ignota loca, præcipitem te agas. Insignem de ea re locum habes apud Tacitum, Annal. 3. *Brutidium*, inquit, *artibus honestis copiosum, & si rectum iter perageret, ad clarissima quaque iturum, festinatio extimulabat, dum aequales, dein superiores, postremo suasmet ipse spes anteire parat, quod multos etiam bonos pessundedit, qui spretis quæ tarda cum securitate, præmatura vel cæm exitio properant.* Querela ista est apud Liuium lib. 32. *Iam Ædilitatem Præturamque fastidiri, nec per honorum gradus documentum sui dantes nobiles homines, tendere ad Consulatum, sed transcendendo media, summa imis continuare.* Seneca lib. 7. de benef. c. 30. prudentissimè solens suo more, ita censet. *Sæpe, inquit, quod explicauit mora, pertinaciâ trahentis abruptum est.* Qui præproperè & præmaturè maximas quasque dignitates ambiunt, hæc sibi ob oculos obuersari quacunque ratione optare debent. Neque vero omiserim alterius generis homines, quos venustè describit Phædrus Augustalis Libertus, lib. 2. fab. 36.

*Est Ardelionum Romæ quædam natio,*

*Trepidè concursans, occupata in otio,*

*Gratis anhelans, multa agendo nihil agens,*

*Sibi molesta & aliis odiosissima.*

Ij sursum deorsum, rursus prorsus versant omnia, ut aliquo in pretio tanquam rerum omnium periti, ac proinde

D ij

ciuilibus officiis digni, habeantur. Sed tandem de imperitis huiusmodi sermonem absoluam, præclarâ Socratis apud Platonem Alcib. I. sententiâ, dum conqueritur ad plebeias & vulgarias artes, in quibus peccasse, non tanti est, imperitos non accedere; ad Rempublicam vero, in qua gerenda nonnisi periculosissimè peccatur, imperitissimum quemque admitti.

---

### CAPVT QVINTVM.

*Qui publica tractant, ab inuidia, à calumnia, ab inconstantia Principum, à seipsis denique iactantur. Inuidie damnoſa effecta. Admiranda actiones non sine inuidia & calumnia. Indigni honoribus aucti meritò inuidia digni. Sibi rebus florentibus temperandum.*

**Q**UOS exagitat ambitio, siue peritos siue imperitos gerendi alicuius magistratus, explicauimus; nunc quo pacto in illo seculi Euripo iactentur, & quos accessus aut recessus patiantur, videamus. Ac illud quidem citra vllam dubitationem existit, ipsis triplicem imminere tempestatem periculosissimam, quarum vnaquæque varias ac multiplices subinde procellas immittat, inuidiam, calumniam, & inconstantiam Principum, præter ea quæ aliquo honore exornatus, sibi ipse creat pericula, de quibus singillatim modo dicendum est: ita tamen, vt veluti domesticas Syrtis postremo loco, tria vero priora illa æstuaris, priore loco describamus. Primum occurrit & commune quidem discrimen Inuidia, insita, teste Tacito, 2. histor. mortalibus natura, Recentem videlicet aliorum felicitatem



*agris oculis introspicere, modumque fortuna à nullis magis exigere quàm quos in æquo videre. Siquidem in vicino versatur inuidia, simplicius longè posita miramur, ait Seneca, de breuit. vitæ c. 15. Apte Claudianus, i. in Ruffinum,*

— dominoque parabat

*Exitium, fœcundus ager, metuenda colonis*

*Fertilitas. Et certè S. Basilius, serm. de Inuid. vniuer-*

*sim dixit, velut publico & communi totius generis humani vitio, vnumquemque gentis suæ hominibus & contribulibus inuidere, nec ignotis quibusque, sed vicinis & proximis ac familiaribus suis, imo vero his qui artificij eiusdem, vel officij, vel operis existant. In maximis quibusque ciuitatibus, istud quotidie vsu venire certum est, sed in municipiis & cæteris minoribus oppidis, Inuidiam præsertim regnum obtinere nemo est qui non aduertat. Siquidem, auctore Martiale, Præf. lib. 12. in his municipium spectatur rubigo dentium & iudicij loco liuor, & vnus aut alter mali in pusillo loco, multi, aduersus quos difficile est quotidie habere bonum stomachum. Imperitos vel indignis modis ad honores prouectos iusta premere videtur Inuidia, at dignos & rerum prudenter gestarum conscientia nixos, non nisi iniustissimus liuor persequitur, à Principe tamen, vel eo penes quem imperij summa consistit, metuendum. Polybij. i. sententia illa est, cum docet, illustres atque admirandas actiones, graues inuidias, atque acres calumnias, conflare solere. Tiberio Imperatori, magnitudo famæ exitio erat, auctore Tacito, Ann. 3. apud quem & istud legas, vita Agricola, Non minus periculum ex magna fama, quàm ex mala. Sallustio Catil. ita visum, à quo hæc sunt, Regibus boni quàm mali suspectiores sunt, semperque his aliena virtus, formidolosa est. Singularis Germanici prudentia ea fuit, Tiberio*

D iij

imperante, cum cæsis Barbaris, erecto in Germania trophæo, appposito titulo, *Sui memoriam in illo non fecit, de se nihil addidit metu inuidiæ, an ratus conscientiam factis satis esse.* Tacit. Annal. 2. Verè Quintilianus Declamat. 348. *Hanc esse conditionem dixit omnium qui administrationem Reipublicæ aggrediuntur, ut ea quæ maximè pertinent ad salutem communem, cum quâdam suâ inuidiâ efficere cogantur.* Miserandum plane ad honesta recto itinere vadenti perpetuam undique occurrere Inuidiam, qui altiori stant gradu, sua vestigia de proximò terentem, limis excipiunt oculis, æquales, illis subesse nonnisi ingratis patiuntur, inferiores, parem sibi blandientis fortunæ aspectum non sine inuidia exoptant. Tacito Ann. 14. *Rumor populi neminem sine æmulo finit. Quis enim ista Senecæ Conf. Polyb. non usurpet: Ille me gratia forensi longè antecedit. Ille stipendiis militaribus & quæsitâ per hoc dignitate, ille Clientum turba, huius turbae par esse non possum, huius gratiæ, tanti est ab aliis vinci sese persuadere. Eò spectant ista Tibulli lib. 3.*

*Est quæ præterea populus miratur in illis*

*Invidia est, falso plurima vulgus amat.*

Senecam, Vit. beat. c. 2. ad eam rem accommodatè, quis non istud enunciasse dixerit, *Quàm magnus mirantium, tam magnus invidientium populus est. Et eò quidem numerosior, si indigni honoribus aucti fuerint.* Lepidè Phædri, 1. Fab. 7. versus, de his hominibus, iactari possunt.

*Personam tragicam fortè vulpes viderat,*

*O quanta species, inquit, cerebrum non habet.*

*Hoc illis dictum est, quibus honorem & gloriam*

*Fortuna tribuit, sensum communem abstulit.*

*Quibus affinè illud est Iuuenalis Saty. 3.*



*Quales ex humili magna ad fastigia rerum  
Extollit, quoties voluit fortuna iocari.*

Portius latro apud Senecam Patrem Contr. i. lib. 2. *Aurum  
& argentum, ludibria fortunæ, quæ inter iocum ipsis Dominis  
veniunt.* Nec est quod vnumquemque probum magis  
vrat, quàm si Tigillinum aliquem præmia virtutum, quia  
istud velocius contingat, vitiis adeptum fuisse conspiciat  
Tacitus hist. i. Sic se habet seculi infelicitas,  
—— donant arcana Cylindros.

Illius generis homines,

*Criminibus debent hortos, prætoria, mensas,  
Argentum vetus & stantem inter pocula caprum.*

Iuuen. Saty. 2. Vulgi magis quam Tertulliani Apolo. 12.  
Vocem illam esse arbitror. *Prælatio alterius, sine alterius con-  
tumelia nō potest procedere, quia nec electio sine reprobatione.* Nec  
enim probi viri aliquem de Republica benemeritum,  
summis exornari dignitatibus molestè ferre possunt, im-  
probi formident, cæteri conticescant: Ille vero ita mode-  
ratè se gerat, vt nullum omnino Inuidiæ ictum pertimes-  
cat. Attamen istud Galli Rhetoris, apud Senecam Pa-  
trem, Controu. 8. lib. i. sæpius memoria repetat, *Inuidio-  
sum esse, vnum hominem toties optare omnes honores intercipere,  
nec expedire Reipublicæ, videri tantum ex vno pendere.* Illustre  
exemplum apud Æmiliū Probum, Thrasib. Bene, ait,  
Pittacus ille, qui septem sapientum numero est habitus, cum ei  
Mitylenei multa millia iugerum agri muneri darent, Nolite rogo  
vos, inquit, mihi dare quod multi inuideant, plures etiam con-  
cupiscant, quare ex istis nolo amplius quam centum iugera, quæ  
& meam animi æquitatem & vestram voluntatem indicent,  
nam parua munera diutina, locupletia non propria esse consue-  
verunt. Ac certè cui omnia quæ sunt præstantissima &

summa, quasi huic vni destinata tribuuntur, istud Saluiani 2. ad Eccl. Cath. dies noctesque cogitet, *Vbi hoc vnus accipit quod vniuersi, & si par est mensura, maior inuidia est. Quo fit, vt licet ipsum accipiat, plus debere videatur, quia magis fit vnus obnoxius, qui videtur omnibus comparatus.* Nec abludit Tacitus lib. 14. & manifestum discrimen satis apertè indicat, *Habet aliquid ex iniquo omne magnum exemplum, quod contra singulos utilitate publica rependitur.*

## CAPVT SEXTVM.

*Calumniæ iactatio grauissima. Aulæ principum vndique calumniatoribus refertæ. Exempla. Calumniatorum multiplex descriptio, artes variæ. Calumniatores, delatores. Amicitie simulatæ, temporariæ, infidæ.*

**C**ALVMNIAM, fluctum plane Decumanum esse in hoc vitæ humanæ salo, si quis neget, procul à communi hominum cœtu, in aliquam ignotam solitudinem, tanquam in vltimas terras, ab ortu suo deportatum se fuisse sibi prius persuadeat, quam si quis penitus effugerit, omnem humanæ conditionis sortem excessisse videbitur. Quod si ab Inuidia nil tutum esse supra satis abundè demonstrauimus, eadem omnia calumniæ obnoxia esse necessario fatendum est, hæc enim illam ita consequitur, vt quibus inuideant eosdem calumniari, siue apud Principem, siue in circulis, apud vnumquemque non dubitent. In foro id vsitatum videri scribit B. Cyprianus ep. 2. *Inimicus, inquit, insimulat, calumniator impugnat, testis infamat, vtrobique grassatur in mendacium criminum prostitute vocis venalis*



*venalis audacia.* At nihil hoc ad Aulas Principum, quæ calumniatoribus & delatoribus nunquam caruerunt. Innumera sunt harum rerum apud scriptores, quæ Græcos, quæ Latinos, exempla, pauca subiiciam. Illustre illud est Titij Sabini equitis Romani, Tiberio Imperatore, per calumniam euerſi & extincti. Latinus Latiaris, huius tragædiæ architectus, callidè Sabinum aggreditur, *fortuitos primum sermones promere*, mox ipsius constantiam laudare occipit, quod non, vt ceteri, florentis domus Germanici amicus, afflictam deseruiſſet, simul honorificè de ipſo Germanico diſſeruit, *Agrippinam eius uxorem miſerans*: Adhæc Sabinus (*vt sunt molles in calamitate mortalium animi*) effudit lachrymas, adiunxit queſtus, ac iam audentius *Seiani ſenitiā, ſuperbiam, ambitionem incuſat, nec in Tiberium conuiſiſ abſtinuit.* Sabinus Latiarem velut fidiffimum amicum ratus, in eius domum ventitare cœpit, & vltro dolores ſuos eius fidei concedere, habendæ de Sabino quæſtioni teſtes deerant, *tres ſubornati Senatores*, non minus turpi latebra quàm deteſtanda fraude, tectum inter & laquearia ſeſe abſtrudunt, foraminibus & rimis aurem admouent, *Sabinus repetitis querelis*, omnem animi ſui ægritudinem, non ſine verborum acerbitate, apertè expromit; *hinc properata accuſatio, illico occiſus Sabinus*, è ſcalis præcipitatus, corpus in flumen proiectum: *Canis Sabini*, qui etiam in carcere ſemper cum hero fuerat, mortuum non deſeruit, ſequæ ad extremum, in flumen in quod proiectum heri corpus, coniecit. Quæ Tacitus Annal. 4. & Dio, Tiber. narrant. Neque verò prætermittendam, apud eundem Dionem, calumniatorum & delatorum id genus, elegantem hoc loco deſcriptionem arbitror. Solent calumniatores initio alteri maledicere, ſed ei in cuius gratiam has ſtruunt inſi-

E

dias, tum illius alterius arcana quædam patefaciunt, quibus auditis, nimium creduli & simplices apud quos hæc vulgantur, plus æquò liberè de eo, de quo quæstio, animi sui sensa explicant, ut qui tutò & cum omni fiducia apud amicos, quique idem planè sentiant, se colloqui arbitrentur, hæc certissima minimè malis & suspicacibus hominibus ad exitium via, infœlicissima viuendi ratio, vbi horum, quos tu amicos existimes, congressus, colloquia, imò ignotas quidem ac notas aures vitare cogaris, & quod longe grauius est, muta atque inanima, tectum & parietes circumspectare. Eadem exaggerat Ammianus Marcel. lib. 14. de Gallo Cæsare, Antiochiæ agente, sub Constantio Imperatore. Excogitatum ab ipso Gallo, *Vt homines quidam ignoti, vilitate ipsa parum cauendi, ad colligendos rumores per Antiochiæ latera cuncta destinarentur, relaturi quæ audirent, hi blandè & dissimulanter honoratorum circulis adstipendo, peruadendoque diuites domos, egentium habitum, quicquid noscere poterant vel audire, latenter intromissi per posticum in Regiam nunciabant, sed ita vi obseruantes, conspiratione concordi, aut fingerent quædam, aut cognita duplicarent in peius. Quin eo tempore etiam ipsi parietes arcanorum soli conscij timebantur.* Præclare Seneca de Tranq. c. 12. *Teterrimum vitium auscultatio, & publicorum secretorumque inquisitio, & multarum rerum scientia, quæ nec tutò narrantur, nec tutò audiuntur.* Istud Taciti Ann. 4. quasi ex oraculo dictum puta: *Delatores genus hominum publico exitio repertum, & pœnis quidem nunquam satis coercitum, per præmia, sub malo Principe, eliciuntur. Contrà verò sub optimo nihil gratius nihil eo seculo dignius contingit, quàm de super intueri delatorum supina ora, retortaque ceruices, ut loquitur iunior Plinius Paneg. Hoc agnoscunt & fruuntur boni omnes, cum velut piaculares publicæ sollicitudinis vi-*



*etima supra sanguinem noxiorum, ad lenta supplicia grauiorese-  
que pœnas ducuntur. Sed de iisdem tanquam aqua & igni  
interdicendis, & velut in orbem alterum deportandis,  
quàm elegantia sunt quæ apud eundem sequuntur: Con-  
gesti sunt (delatores) in nauigia raptim conquisita, ac tempesta-  
tibus dediti, abirent fugerentque vastatas delationibus terras, ac  
si quem fluctus & procellæ scopulis reseruassent, hic nuda saxa  
& inhospitale littus excoleret, ageret duram & anxiam vitam,  
relictæque post tergum totius generis humani securitate mœreret.  
Neque vero vlla ratione ab iis aduersis fluctibus calumniæ  
& delationis sese possunt præstare securos, qui, quantum-  
uis digni, à Principe honoribus aucti sunt, quandoqui-  
dem vt ambitione, ita simulatione nulla vnquam Princi-  
pis cuiuslibet Aula carere visa est. Præter illa quæ com-  
mentario nostro de idololatria politica exposuimus, ista  
subiungere placet. Narrat Phile, Græcus Poëta non po-  
stremi nominis, Tharandum, Schytiæ feram, in colores  
mille, pilos suos conuertere. Istud præstat Aulicus qui  
rem suam facere cupit, siquidem Iuuenale teste Satyr.3.*

*— melior qui semper & omni*

*Nocte dieque potest alienum sumere cultum.*

*Sic apud Claudianum, l. in Ruff.*

*Edidit simulare fidem, sensusque minaces*

*Protegere, & blando frontem prætexere risu.*

*Simulationis elegantem descriptionem vide apud The-  
mistium orat.3. At dissimulatio hæc quàm periculosa sit  
nemo est qui non aduertat, quandoquidem in Aulis Prin-  
cipum vt plurimum perfidiam comitem habeat. Nec  
enim simplex quædam & veluti taciturna simulatio cen-  
senda est, sed recta & subdola amicitia significatio, quam  
vt funestissimum scopulum quilibet sapiens potissimum*

E ij

cauere debet. Plinius, Paneg. de sui Trajani aureo seculo, ex collatione superiorum temporum, ita dissert: *Iam etiam & in priuatorum animis exoleuerat priscum mortalium bonum, amicitia, cuius in locum migrauerant assentationes, blanditiæ, & peior odio amoris simulatio: Etenim in Principum domo nomen tantum amicitie inane irrisumque manebat. Non aliter hæc postrema expressit Symmachus l. ep. 26. Comitatus (Principis) frontes hominum aperit, mentes tegit. Eæ sunt amicitie Aulicæ, quas vulgus, referente Seneca ep. 9. Temporarias appellat. Ita enim utilitatis gratia comparata sunt, ut florentes amicorum turba circumsedeat, circa euersos ingens solitudo sit, & inde amici fugiunt, ubi probantur. Hac re tot nefaria exempla sunt, aliorum metu relinquentium, aliorum metu prodentium. Qui fortunam sibi vndiquaque propitiam in Aula expertus est, monentem audiat Senecam ep. 3. Nullum habet maius malum occupatus homo, & bonis suis obsessus, quàm quod amicos sibi putat, quibus ipse non est. Equem enim ille beatulus amare conspicitur, nisi cuius fidei sua quantumvis iniqua, iniusta, in alicuius perniciem composita, consilia crediderit: vnde immerito de alterius perfidia conqueri videbitur. Siquidem Seneca epist. consultore, Sic viue, ut nihil committas siue enuncies, nisi quod committere etiam inimico possis. Apud Tacitum, Ann. 11. Silius, Fides integra, inquit, non manet ubi magnitudo questuum spectatur. Vbi enim conscius ille secretorum maiora emolumenta lautiolemque fortunam aliunde consecuturum se arbitrabitur, facile cum priori amicitia diuortium faciet, nouo fidei sacramento sese alteri obstringet. Quidni, ut antea,*

—— crebris periuria necit  
Blanditiis, sociat perituro federe dextras.



Vt habet Claudianus, i. in Ruff. *Gratia malorum tam infida est quam ipsi*, auctore Plinio Nepote, i. ep. 5. Iam non Phalaridem ep. 34. sed ex Tripode Apollinem ista verè pronunciasse puta. Fidem neque apud alios vltos, neque in amicis firmam deprehendi. Quamobrem omnibus perspectis, desertissimam in Lybia solitudinem præ hominum conuictu eligendam censerem, tutiusque cum truculentissimis Nomadibus, imo cum leonibus, versari malm, quàm cum huius seculi hominibus. Urbanè Phœdrus præf. 4.

*Non semper ea sunt quæ videntur, decipis*

*Frons prima multos, rara mens intelligit*

*Quod inferiore condidit cura ungulo.*

At si quis ita apud se cogitet, hæc si omnino vera sint, omnem hominum inter se societatem dirimi, & funditus sublato amicitia sanctissimo vinculo, tolli videri, Theophrasti consilium accipiat apud Senecam, ep. 3. quod est huiusmodi, *Ante amicitiam iudicandum esse, post amicitiam credendum. Vnde enim tot infidelitatis argumenta, nisi quod plurimi præposterè officia permiscet, siquidem cum amauerint iudicant, & non amant cum iudicauerint. Et quoniam in humanis negotiis interueniunt quedam, quæ consuetudo fecit arcana, cum amico omnes curas, omnes cogitationes esse miscendas. Imprudenter qui, quæ tantum amicis committenda sunt, obuiis narrant, & in quaslibet aures, quicquid illos vrit, exonerant, male qui charissimorum conscientiam reformidant. Cautum te velim, suspicacem nolim: nam multi fallere docuerunt, dum timent falli, & aliis ius peccandi suspicando fecerunt, apud eundem Senecam, eodem loco.*

## CAPVT SEPTIMVM.

*Auaritie cum ambitione coniunctæ flatus noxius. Auarus satiari nequit. Ambitiosus simul & avarus triplici ratione non expletur. Ambitiosi ob fortunam secundam insolescunt, ceteris valde graues. Potentia nimia nunquam satis fida. Quo amplior, eo grauior eiusdem lapsus, nec sibi satisfacit.*

**S**ED antequam nostri Euripi, seu accessum seu recessum voces, Principum gratiam & fauorem expendamus, varios ambitionis & metuendos flatus turbinesque disquirere operæ pretium est. Non leue in primis periculum est, si cum ambitione coniuncta sit auaritia. Et quamquam de ea re nonnihil differuerimus in Ecloga nostra de dignitate venali, nihilominus tamen cùm præfens dissertatio ita postulet, istud cursim attingam. Nemo est tam parum in historiæ scriptorum lectione versatus, aut tantillam rerum humanarum experientiam vsumque habens, qui non mecum recognoscat eos omnes quos supra ceteros fortuna eucxit extulitque, multa quidem Principibus debere, & multa imputare, vt cum Seneca loquar, *Quibus nunquam tam plenè occurrere nulla liberalitas potest, vt cupiditates illorum, quæ crescunt dum implentur, exsatiæ. Illud ita demonstrabat Attalus, referente Seneca ep. 72. Vidisti aliquando canem, missa à Domino frustra panis aut carnis, aperto ore captantem? quicquid excepit protinus integrum deuorat, & semper ad spem futuri hiat: Ita fortunati illi, quicquid expectantibus fortuna proiecit, id sine vlla voluptate demittunt, statim ad rapinam alterius erecti & attenti. Non aliter*



Eumenius Rhetor, Panegyri. ad Constantinum Augustum, de hac re verba fecit. Nullis, ut res est, muneribus fortunæ expleantur, quorum cupiditates ratio non terminat, atque ita eos felicitas ingrata subterfluit, ut semper pleni spei, vacui commodorum, presentibus careant, dum futura prospectant. Communis illa vox est, etiam vulgi, apud Senecam i. de Clem. Facit avidos nimia felicitas, nec tam temperatæ cupiditates sunt unquam, ut in eo quod contigit, desinant. Sic censet beatus ille Veronensium Episcopus Zeno, serm. de Avaritia: Avaritia non suo, non alieno, non ipso orbe contenta, totum possidet, & de inopia queritur semper. Iam Stoicum agit Seneca, ep. 118. Et à populari discedit sententia, cum hæc scribit; Non est, ut existimant homines avida felicitas, sed pusilla, quandoquidem neminem satiat. At quemadmodum in hydropicis fieri amat, quamquam illorum suis vix aut nulla ratione restringi possit; ea tamen vis morbi imperantis est, ac planè tyrannis, ut perpetuo bibendi desiderio crucientur. Sed quoniam incredibilis ista cupiditas, vix ullis iusti & honesti terminis circumscribi potest, quid causæ sit, cur isti ambitiosi tam avidè opes undique corrādere soleant, inquiramus. Triplicem huius rei rationem assignari posse semper existimaui. Prima est, quod isti beatuli ex modico censu & tenui familia profecti, dignitates & honores suos magnificè tueri volunt, ac proinde maximis opibus familiam fundare, & sustentare cogitant. Secunda, quoniam plurimorum operâ & auxilio ad sui conservationem indigent, illos non tantum liberalitate, sed aliquando etiam profusione sibi demereri studeant, necessum est; Itaque viscatibus hamatisque muneribus, ut cum Plinio Iunior 9. ep. 30. loquar, non tantum sua promere, sed & aliena corripere cogantur. Mortalium infelicitissimi, quorum liberalitatem

conductitij, vt habet Tertullianus, lib. de pœnit. *Laterones, seruitutem faciunt.* Tertia & postrema, quoniam luxui & delitiis eorum satisfieri oporteat, præter alios sumptus extrarios. Quibus omnibus cum domesticæ facultates, licet principali beneficentia cumulata, non suppetant, in bonorum & innocentum fortunas inuolare coguntur sapius. Quis enim parandis istis voluptatibus, sumptui modus adhiberi potest? Nam delicati illi ac fluentes, parum se lautos putant, *Nisi luxuria verterit annum, nisi hyberne poculis rose innatent, nisi æstiuam in gemmis capacibus glaciem falerna frangant, quorum gulæ angustus sit noster orbis, qui appositas dapes non sapore, sed sumptu iudicent,* quales describit Pacatus noster Paneg. Itaque Principis Ærarium sollicitandum, quod alioquin sub bono Principe silens & quietum, hoc est, minimè auctum bonis subditorum fisco addictis, neque damnatorum, forsan ex delatione & calumnia, spoliatione, nunc, vt eorum auaritiæ fiat satis, iam spoliarium ciuium, cruentarumque prædarum seuum receptaculum efficiatur, quemadmodum Plinius Iunior Paneg. eleganter describit. At quo pacto id fiat, paulò post ille idem demonstrat iis verbis: *Nunquam Principibus defuerunt, qui fronte graui & tristi supercilio, utilitatibus fisci contumaciter adessent, qui eo miseros subditos adigunt vt nouis iisque grauissimis indictionibus oppressi, veteres se persolvere possent desperent, & ad vetera tributa deficiant,* vt habet Plinius Paneg. Atque eam ob rem resculas vt & habitatiunculas familiasque aliò transferre cogantur. Quod nos ex Saluiano fusius alibi explicauimus. Nec ista curant Commodiani isti, qui illud purius splendidiusque credunt aurum, *quod dederint dolentes, quod hominum lachrymæ non amarium aquæ abluerint,* vt ait Pacatus Paneg. Cætera persequamur,



sequantur, ac videamus ambitioni non vnicam auaritiam adtribui comitem, illa non nisi pompa & comitatu maximo apparet: *Regina procacium vitiorum auaritia est*, aiebat Senator Cassiod. 12. ep. 1. Ego rectius ambitionem dixerim, quæ nullius rei, quàm in sua potestate ambitiosus habeat, dispendium pati recuset, modò emineat. Hinc arroganter & elatè hunc eundem sese gerere nemo miretur. Ita Pacatus noster Paneg. *Indiscreta felicitum pedissequa superbia est, ac vix cuiquam contigit & abundare fortuna & indigere arrogantia*. Saluianus ep. 2. ita locum hunc æmulatus est, *Pedissequa plerumque noui honoris est superbia*. Sic enim comparatum est, vt quemadmodum Galba Imperator apud Tacitum, i. histor. disserit, *Secundæ res acrioribus stimulis animum explorent, quia miseriæ tolerantur, felicitate corrumpimur*. Siquidem, eodem Saluiano 7. auctore, *Quotus quisque sapientum est, quem secunda non mutant, cui non crescat cum prosperitate vitiositas: non vna certè nec vnius generis: & felix ille ambitionis successus, ceteros sic aspernatur, vt sibi vni totum hoc fortunæ beneficium deberi, & in omnium oculos incurrere oportere, reliquis omnibus abdicatis, existimet*. Illud est, ait Arnobius 1. *liuoris & auaritia genus & obtreclatio quedam sordens, suas eminere tantummodo velle fortunas, aliorum res premi, & in contemptu humilitatis calcari*. Non est igitur quod miremur ambitiosos istos, adepti honoris prospero euentu elatos, adeò insolenter se gerere erga ceteros. Apud Senecam Patrem 2. Contr. 2. verè dixit Rufus Vibius Rhetor: *Nihil esse insolentius nouitio diuite*. Ac Tertuliano quidem de habit. mulieb. *semper abundantia contumeliosa in seipsa est, vt prospera fortuna magna peccandi illecebra est*. Venustè Iuuenalis Satyr. 3. de fortunatis illis & locupletibus,

— *Feriunt pariter vadimonia, deinde*

*Irati faciunt, libertas pauperis hæc est;  
Pulsatus rogat, & pugnâ concisus adorat,  
Vt liceat paucis cum dentibus inde reuerti.*

Quàm lepidè Marcellus Palingenius.

*Heu mundus totus quædam est natiua tyrannis,  
Debilibus robusta nocent & grandia paruis.*

Varronem Margop. imitatus est, apud quem hæc legas,

*Naturâ humanis omnia sunt paria,  
Qui pote plus urget, piscis ut sepe minutos  
Magnus comest, ut aues enecat accipiter.*

Sic B. Ambrosius Hexam. 5. c. 5. *Auaritia potentiorum subiecti ubique inferiores sunt. Quo quisque infirmior, eo prædæ patet, minor apud illos esca maioris est. Sed hæc satis, nam nimis multa de hac sententia apud veteres, quâ Græcos, quâ Latinos. Cothurnata ista scelera, ut vocat Lactantius 6. c. 20. quid tandem infortunij suis portendant auctoribus accuratius inuestigemus. Illud in primis statuendum est, fœlices istos, & ambitione & rebus ex animi sententia fluentibus planè excæcatos multa moliri & aggredi, quæ si tantillum diiudicarent & expenderent, ab iis agendis pertinacissimè abstinere: Nullam potentiam nimiam unquam satis fidam fuisse sibi ante omnia persuaderet, vel vno Tacito teste 2. hist. Pacatus Paneg. rectè admonet iis verbis, *Fugitiva successuum repentinorum voluptas, ut accipit, sic relinquit.* Seneca Pater 2. Contr. 1. *Fati maligna perpetuâque in rebus omnibus lex est, ut ad summum perducta, rursus ad infimum velocius quidem quàm ascenderint, relabantur.* Sic Portius Latro apud eundem, *Omnis fortuna blandientis speciosus cum periculo nitor, & sine causa sepe fluit, & sine ratione destituit.* Ea communis est rerum humanarum inconstan-*



fia, aduersus quam armandus est animus vniuscuiusque  
 eorum quos fortuna mirum in modum extulit. Quisquis  
 ille sit, perpetuò in memoriam reuocet istud Pauli Æmi-  
 lij Consulis Romani apud Liuium lib. 45. ad suos post Per-  
 seum Macedoniae Regem deuictum, sapienter dictum,  
*Exemplum insigne cernitis, inquit, mutationis rerum humana-*  
*rum, vobis hoc præcipuè dico Iuuenes, ideo in secundis rebus ni-*  
*hil in quemquam superbè ac violenter consulere decet, ne præ-*  
*senti credere fortunæ, cum quid vesper ferat, incertum sit.* Se-  
 neca breuit. vit. 4. semper sui similis propè diuinè, *Poten-*  
*tissimis & in altum sublatis hominibus excidere voces videbis,*  
*quibus otium optent, laudent, omnibus bonis suis præferant, cu-*  
*piunt interim ex illo fastigio suo, si tutò liceat, descendere. Nam*  
*ut nihil extra lacescat aut quatiat, in seipsa fortuna ruit. Sic*  
 censet Albinouanus mort. Druf.

(Fortuna) iniustum ius sibi ubique facit.

Porro quodcunque otium illi percipere videantur, me-  
 rum figmentum esse credendum est, nam ambitionis, ve-  
 lut Circes poculo aureo, adeo sunt dementati, ut hoc  
 vnum seriò cogitent, qua ratione in isto Aulico neruo &  
 robore ætatem agant. Illi persimiles mihi videntur iis qui  
 apud Persas suspendio necandi, prius vestibibus Regiis in-  
 duri, in sella Regia collocantur, cum potestate aliquandiu  
 lautè & delicatè viuendi, deinde his vestibibus exuti, flagris  
 cæsi, in crucem tolluntur, ut prodit Dio Chrysostomus  
 orat. 4. Ita Seneca ep. 18. *Liberaliora sunt alimenta carceris,*  
*sepultos ad capitale supplicium non tam angustè qui occisurus est,*  
*pascit.* Minutij fœlicis Octau. istud nimis quàm verum est,  
*Miseri in hoc altius tolluntur, ut altius decident.* Claudianus  
 eodem pacto,

— tolluntur in altum,

F ij

*Vt lapsu grauiore ruant.*

Lactantij 7. c. 15. ista sunt, *Plus habent ponderis ad ruinam, quæ sunt cæteris altiora.* Quidni, cum auctore Pacato Paneg. *Victoria non alia ratione pennata fingatur, nisi quia indicet, quod hominum cum fortuna euntium, non cursus sit, sed volatus;* Ita summæ potentæ, auctoritatis & dignitatis alis subnixi, in cælum nullo negotio euolare se posse & Ioui ipsi assidere credunt, hoc sibi iure optimo debitum esse prædicant, nec interea à suo Ioue terreno, fulmen suis capitibus imminere, in animum suum inducere queunt, quin nescio quo veterno & stupore laborantes, nihil tam excelsum esse credunt, tam eximium, quod non concupiscant, quin si quid ex summis in eos collatis beneficiis, tantillum Princeps delibare & diminuere cogitet, omnem omnino publicæ rei sollicitudinem abiicere se minitentur. Quintilianus Declamat. aptissimè, *Iniquissima magnorum meritorum conditio est, si quicquid non fuerit adiectum de prioribus perit, & pessimo exemplo gratiam præteritis auferunt, reliqua cessantia.* Nescio an id velit Manlius Seuerinus consol. 2. prof. 4. *Felicitissimi cuiusque delicatissimus sensus est.* Nec mirum, quandoquidem illi cum seipso non semper bene conueniat, *Quis enim est, aiebat idem Boëtius, tam compositæ felicitatis, ut non aliqua ex parte cum status sui qualitate rixetur, cur non multo magis cum cæteris?* Quæ satis aperte admonent, hominem id genus quatenus & à seipso, & ab omnibus vel adeo infimis sibi metuendum esse intelligat.



## CAPVT OCTAVVM.

*Principum inconstantia periculosissimus status. Aula Principum altera nouerca. Nouerca nomen tragicum. Aula levis & dubia. Causa dua cur Principes sibi non semper pro affectu constant. Aristotelis quaestio, quid in Republica de eo agendum videatur qui supra ceteros emineat. In regno, quid. Fortuna delinatio. Moderatio cogitanda.*

**S**IC tandem in ancipitem & lubricum locum istum deuenimus de Principum inconstantia, qui in Euripi nostri salo omnium maximè pertimescendus est. Atque antequam hoc ipsum explicemus, velim Aulicos omnes quos fortuna bearit, (nam solidæ virtuti & probitati hoc loco vix vllum præmium vel magmentum assignare possis) ex M. Antonino Philosopho Imperatore potissimum istud ediscere lib. 6. vit. suæ. Aulam Principum veluti Nouercam existere. Cur illam Aulicus, quisquis sit, non reformidet satis causæ esse non video. Cestius Pius apud Senecam Patrem. 7. Controu. 1. illud profert: *Nouerca nunquam satis priuignus occiditur.* Maria tandem aliquando conquiescunt. Prædones iam miserantur. Hostes quantumvis armati & victores, ex miseratione iram ponunt. Iudices aduersarij acerbitate & indignitate moti, reum aliquando absoluunt; Nouerca vltra insepultam sepulturam defæuire solet. Nemo istud miretur, *Nouerca nomen tragicum est*, aiebat Ennodius Ticinensis cont. 2. insuper ille idem Augustus, Aulam scenæ per similem esse dixit. Noti sunt Petronij Arbitri versus.

F iij

*Grex agit in scena mimum, Pater ille vocatur,*

*Filius hic, nomen diuitis ille tenet.*

*Mox ubi videndas inclusit pagina parres,*

*Vera redit facies, dissimulata perit.*

Sic omnia illic magnam partem ficta, & simulata pro conditione Aulae, si Clementi Alexandrino credimus, de quo aliàs, nam eo loci fides fluxa & sublesta, amicitia vacillans & dubia, cōcordia fucata & tecta, omnes Pertinaci Imperatori persimiles, apud Aurelium Viçt. blandi summo perè, quorum verba non alia sunt, quàm quæ à summis labris profecta. Nec in Aula foccum duntaxat spectes, sapius Cothurnum, ita vt qui Imperatoris seu Regis personam sustinuerit, deposito Cothurno ubi ad statueram redierit suam, vix cum Caluo Salaputio Catulli comparandus apparebit, quodque longè grauius est, beatus illico, extemplo miser: *Quasi solstitialis herba paulisper fuit.* Repente exortus est, repentino occidit. Inconstantia illa Principum nunc est examinanda. Illius duas potissimum causas animaduerto. Prior est, quod Princeps vnus summè aucti, suo lateri perpetuò adhærentis, tædio afficiatur, suæque beneficentiæ modum, non ad vnum tantummodo, sed ad plures peruenire debere existimet, nihilque supremæ dignitati suæ magis conuenire arbitretur, quàm si varietate & diuersitate eorum qui illum obsideant, delectetur. Tacitus Ann.3. ita censet iis verbis: *Fato potentia (Aulici cuiusque summi) raro sempiterna, an satias capit, aut illos (Principes) cum omnia tribuerint, aut hos (summates) cum iam nihil reliquum est quod cupiant.* Sic Crispus Sallustij ex sorore nepos Tiberij, Mæcenæ Augusti gratiâ excidit, quamquam vtrique secreta Imperatorum inniterentur. Vterque etiam sub finem, speciem magis in amicitia



vel Augusti, vel Tiberij quam vim tenuit, Plinius Iunior Paneg. in gratiam sui Trajani, cuius bonitas in proverbum abiit, ista protulit, *Quod tam infidum mare, quam blanditiæ Principum illorum, quibus tanta leuitas, tanta fraus, ut facilius esset iratos quam propitios habere.* Alexander Magnus, apud Curt. lib. 6. Philotam ex familiaribus & præcipuis amicis vnum, arcano Regis consilio capitis damnatum, pridie regia excepit cæna, & familiari colloquio, magna beneuolentiæ simulatione. Aufonio Edyll. 3. satis audacter istud excidit,

*Et semper fictæ Principum amicitia.*

Posterior illa causa est, quod si quem Princeps in immensum supra cæteros extulerit, quasi imperij consortem sibi adsciuisse, seu inuidorum tacitis cohortationibus, siue suoptè ingenio sibi persuadeat. Aquila Trochilum seu Regaliolum nullo modo ferre potest, perpetuas cum ipso inimicitias gerit, teste Plinio l. c. 74. Aquila consensu omnium Regina auium audit, Regaliolus, etiam Aristoteli 9. hist. animal. Rex vocatur. Aquila auium nullam non modo in imperij, ac ne nominis quidem societatem vult admittere. Dio 54. narrat Mæcenatem Augusto dixisse, Agrippa aut gener tuus fiat, aut occidatur, necesse est. Si quidem ad supremum potentiæ fastigium ab ipso Augusto euectus erat Agrippa. Questionem mouet Aristoteles 3. Polit. c. 9. quid de eo statuendum sit qui in aliqua Republica præ reliquis, virtute, dignitate, opibus emineat. Respondet in vitiosis Rebus publicis, Tyrannide, Oligarchia, Democratia, cum ciuium æquitas seu æqualitas omnium maximè retinenda sit, alienum minimè videri eiusmodi hominem Republica eiiciendum. Nec propterea omnino damnat apud Athenienses Ostracismi

(quod erat exilij genus) legem, qua præstantiores nonnulli ciues in exilium acti sunt; exemplo & ratione id firmat. Apud Herodotum lib. 1. Thrasylbulus qui Mileti tyrannidem vsurpat Periandrum, inter Græciæ sapientes numeratum, consulit, qua ratione Miletum in tranquillissimo statu seruare posset. Nihil ad hæc Periander, sed spicis eminentioribus & extantibus sublati ac resectis, segetem æquasse visus est, quod ubi rescivit Thrasylbulus, satis intellexit potentiores quosque de medio tollendos esse. Rationem affert eiusmodi, etsi alicuius animantis pars aliqua reliquis membris pulchrior appareat, pictor qui in toto pingendo versatur non idcirco ipsam maiorem contra legitimæ proportionis regulam depinget; neque qui naucm fabricat, puppim, quæ supra cæteras partes commendatur, ideo plus iusto ampliorem construet, quemadmodum neque ipsius nauis clauum, cuius beneficio illius cursus dirigitur: Nam vt habet Apulcius Apolog. *Ingentia & enormia gubernacula facilius mergunt quam regunt.* Idem in Rebus publicis obseruandum, vt si quis opibus, agnatis, cognatis, clientelis abundet, & supra cæteros emineat, lege in illum agendum esse videri, & in exilium pellendum scribit, etiam si alioquin vir optimus, & virtutis iustique amantissimus habeatur: Vt metu rerum nouandarum Rempublicam liberet. Et quamquam aliàs lex ista relegationis suapte natura & per se iniusta sit & tyrannica, attamen aliquo pacto iusta censeri debet, cum non alia sine quam ad sui & publicæ tranquillitatis conseruationem, eiusmodi lege vtatur Respublica. Hæc differit Aristoteles ex aliorum sententia, nam ubi quid ipse sentiat, exprimit, tandem concludit ciuem virtute præstantem, nullo pacto ciuitate pellendum, quod certè optimis legibus & institutis



tis temperatam ac stabilitam Rempubicam deceat, & eius scopo, hoc est, communi & publico bono conuenientissimum existat: sed in Regno vbi ex vnus arbitrio & nutu omnes subditi pendent, res non parum difficultatis habet; Quoties enim reperti sunt, qui Regum vel atate vel facilitate abusi sunt? Innumera sunt huius rei in veterum monumentis exempla, sed illustrius nullum est eo quod narrat Polybius lib. 5. Philippo Macedoniæ Regi, Persei vltimi Regis patri, præcipui erant in Regno administrando, Apelles velut tutor, Leontius Cetratorum Præfectus, Megaleas primus inter Regios Scribas; Apelles eam cum duobus istis societatem inuit vt illi Regis nomine omnia administrarent, & in Aula, & in Macedonico Regno. Publicæ rerum gerendarum sollicitudinis curam ipsi soli sibi vendicabant. Si quid Rex alterius consilio de bello mouendo cogitaret, ac re ipsa urbem aliquam hostium oppugnaret, vel ab eiusmodi consilio Regem auerrebant, aut si Rex in proposito pertinax esset, nihil non moliebantur, seu secretis cum hoste consiliis, aut nonnullis ducum ac militum corruptis, variisque exercitu incommodis affligto, vt Rex magno dedecore, nec non suorum cade, satis aperta prodicione obsidionem soluere cogeretur, exhausto prius arario Regio: ita vt Rex à fœderatis & pecuniam & comæatum mutuari cogeretur. Qui Philippum veluti puerum & regnandi imperitum arbitrabantur, & reapse aspernati fuerant, tandem suo magno malo intellexerunt illud Claudiani 3. cons. honor. verum esse, quod de Honorio Imperatore vix pubere enuntiauit,

— *Sic ætas animo cessit.*

Illud idem de cæteris Regibus pronunciare licet. Infæli-

G

cissimus horum trium interitus Polybium impulit, ut gra-  
uissimè & prudentissimè de tota re ita censeret. Omnes in  
vniuersum mortales paruis momentis & sublimes euchi,  
& rursum deiici, quod in iis, qui Regum Aulas colunt  
præcipuè locum habet, illi etenim planè similes sunt cal-  
culis quos præ manibus habent nummularij, nam eius-  
modi calculi pro arbitrio numerarij, modò obolum mo-  
dò assen valent, modò nummum aureum: Ita etiam Au-  
lici ad Regis nutum vel beati, vel miseri repente existunt.  
Istud nullo pacto prætermittendum, Apellem horum  
trium præcipuum, sui infortunij & imminētis ac ruentis  
fortunæ argumentum inde sumpsisse, cū ipse magno  
ducum & militum, præter amicos & clientes non paucos,  
comitatu, ad Regiam profectus esset, & ad interiūs Regis  
cubiculum pro sua veteri consuetudine, recta perrexisset,  
Admissionalis siue licitor, cui id negotij demandatum fue-  
rat, iubet illum expectare, neque tum Regi vacare. Appel-  
les rei nouitate perturbatus & perculsus, pedem referre  
cœpit, mox à ducibus, militibus, & honoratis desertus,  
cum paucis familiaribus in hospitium se recepit. Idem  
Ferdinando Toletano, Duci Albano, qui fax & terror  
Belgij, apud Philippum secundum Hispaniæ Regem,  
contigit: Apellis & reliquorum secutus infœlix exitus. Ex-  
clamare libet cum Claudiano lib. 2. in Ruffinum,

*Heu, quàm breuibus pereunt ingentia causis.*

Fortunæ apud veteres varia erat delineatio, Dione Chry-  
sostomo orat. 63. referente, illa nouaculam sub pedibus  
habens pingebatur, vel globo insistent, clauum manu ge-  
stans, vel Amalthææ cornu. Nouacula fœlicitatis præci-  
sionem denotabat, globus facilem illius mutationem,  
Quiuis beatus teste Ammiano 26. *Versa rota fortuna an-*



*te vesperum potest esse miserrimus,*

*Desinat elatis quisquam confidere rebus.*

Vt rectè monet Claudianus 2. in Ruff. Clauus nihil aliud sibi vult, quàm fortunam, hominum vitam regere: Amalthææ cornu, bonorum omnium copiam & cumulum indicat. Addere licet ingentes honorum & gloriæ titulos, sed beatis istis aurem vellic Tiberius apud Tacitum lib. 1. aureo planè dicto, *Cuncta mortalium incerta, quantoque plus* (ipse Imperator) *adeptus foret tanto se magis in lubrico esse.* Et hoc verissimum esse Quintiliani Declam. 271. istud indicat, *Solet fatigari fortuna, solet posteaquam nimium indulsit, in fine deficere:* Nec absimile illud Calpurnij Declam. 8. *Nesciunt stare successus, & quotiens prodire felicitas non potest, redit.* Quis rerum vsu & experientia tam parum valere existimandus est, qui Taciti Ann. 14. dictum istud verum esse non affirmet: *Ex mediocritate fortunæ pauciora esse pericula?* Qui plus possit apud Principem, hanc sibi apud omnes laudem & commendationem comparet, vti publico Elogio & testimonio dicatur,

*Nec nocuisse ulli, & fortunam habuisse nocendi.*

Quod de suo Drufo affirmat Albinouanus de obit. Mæc. *Modestæ fama summis mortalium minimè spernenda est,* Tacito Ann. 15. auctore. Nec Regum duntaxat ea propria censeri debet, qui principes in Cæsarum amicitia agunt, suntque omnia, in eam præsertim curam & cogitationem incumbere debent: & quam in Rege suo moderationem & comitatem omnes conspiciunt, in se præ cæteris deriuandam esse iudicent, nec periclitantium & ad misericordiam Principis mitissimi peruenire cupientium, querelas superbè repudiari non patiantur. Sed quoniam hæc ad facilem Principis aditum pertinent, de quo nos de Idolola-

tria politica Commentario pluribus egimus. Idcirco cætera nostri instituti capita videnda sunt. Apud Latinos venustè totum hoc fortunæ ludibrium expressit Pacuvius, Poëta vetus, iis versibus,

*Fortunam insanam esse & cæcam & brutam perhibent Philosophi,*

*Saxoque eam instare globoso prædicant volubilem,*

*Ideo quo saxum foret impulerit, cadere fortunam autumant.*

*Cæcam ob eam rem esse memorant; quia nihil cernat quo sese applicet.*

*Insanam autem illam aiunt, quia atrox, incerta, instabilisque sit;*

*Brutam autem, quia dignum atque indignum nequeat internoscere.*

#### CAPVT NONVM.

*Quibus in publicis rebus omnia ad votum. Diuinam providentiam perpetuò vigilantem, ac singularum rerum, quæ hîc aguntur, curam gerere cogitent. Supra ceteros qui erecti, postea de statu deiecti sunt, quàm benignè cum ipsis Deus agat, serio meditentur, periissent nisi periissent. Exempla. Moderata fortunæ secunda conditio. Facere de necessitate virtutem.*

**N**AVTÆ & vectores, qui in ea, qua Ionas. i. vehebatur, naui tantam tamque periculosam exortam tempestatem aduertentes, sibi inuicem dixerunt: *Venite & mittamus sortes, & sciamus quare hoc malum sit nobis.* Idem si quæsierint apud se qui in isto seculi Euripo iactantur, vnde tam vario & multiplici fluxu & refluxu agi-



tentur, non seipſos modò circunſpiciant, ſed & oculos at-  
tollant, atque Diuinam prouidentiam rebus humanis,  
necnon vitæ noſtræ ſingulis momentis & actionibus  
præſſe intelligant. Profanis & Ethnicis, qui recta ſenſe-  
runt, non alia mens fuit. Afer ille Madaurenſis 9. Mileſ.  
quàm eleganter: *Nec conſilio prudentis, vel remedio ſagacis,  
Diuinæ prouidentia fatalis diſpoſitio ſubuerti vel reformari  
poſteſt. Eludant licet, vt ait Curtius, lib. 5. quibus forè & te-  
merè humana negotia volui agique perſuaſum eſt, equidem ater-  
na conſtitutione crediderim, nexuque cauſarum latentium &  
multo ante deſtinatarum, ſuum quemque ordinem immutabili  
lege percurrere. Non aliter Aurelius Viſtor, Numerian.  
Arduum fatalia deuertere, eoque futuri notionem ſuperfluam.  
Illud Taciti lib. 17. Quæ fato manent, quamuis ſignificata, non  
vitantur. Vtinam iſtud nūquam experta fuiſſet Gallia no-  
ſtra. Nunc ad noſtros beatulos ſermonem conuertamus,  
& hæc diſcant, qui ad maximas dignitates, malis artibus,  
peruenerunt, & in iis flagitioſè, arroganter, auarè, crude-  
liter ſe geſſerunt, iuſtitix Diuinæ pœnas ſe daturus certo  
ſciant. Appianus bell. punic. admonet magnoperè ti-  
mendam fœlicibus Nemefim. Claudianus 1. Ruff. ali-  
quantum ſtomachosè,*

*Sæpe mihi dubiam traxit ſententia mentem,  
Curarent ſuperi terras, an nullus ineſſet  
Reſtor, & incerto fluerent mortalia caſu.  
Nam cum res hominum tanta caligine volui  
Adſpicerem: lætoſque diu florere nocentes,  
Vexarique pios, rursus labefacta cadebat  
Religio, cauſæque viam non ſponte ſequebar  
Alterius, vacuo quæ currere ſemina motu  
Affirmat, magnumque nouas per inane figuras*

G iij

*Fortuna non arte regi.*

*Abstulit hunc tandem Rufini pœna tumultum.*

Certè dum isto rerum prospero successu, votisque usque ad invidiam fœlicibus fruuntur homines id genus, sibi plaudunt, blandiuntur, minusque aut nihil de exitu cogitant, ipsique fortunæ legem dixisse arbitrantur. S. Anselmus Cantuariensis Archiepiscopus, Doctor Theologus Parisiensis, dicere solebat, Ioanne Sarisberienfi ep. 202. referente, se nihil magis habere suspectum, quam quod eum Deus, in tota vita, nulla corripuisset aduersitate. Eorum vero qui dignitatibus & honoribus maximis aucti sunt, & in iis moderatè ac summa æquitate sese gesserunt, si aduersam, æmulatorum & aduersariorum factione, fortunam experiantur, longè alia ratio est: nam clementissimus Deus, in eorum salutem hanc illis calamitatem euenire permisit. Sallustio 1. hist. *Secundæ res mirè sunt vitiis obtentui.* Aristides, orat. de pace, fœlices scribit non omnes satis sapere videri, quin per fortunam plerique eorum deteriores reddantur. Et vt argutè Phœdrus 3. Fab. 44.

*Successus ad perniciem multos deuocat.*

Optimus ille mundi rector & moderator, probos illos in tanta rerum omnium copia & fœlicitate *diurnare*, vt cum Quadrigario loquar, non finit, ne perpetuo isto luxu & assentatorum laude ac prædicatione, opum etiam atque bonorum quotidiano affluxu enerues & elanguidi, vix de immortalitate cogitent. Fœlix istarum rerum iactura, quæ illos de animæ salute cogitare, sibi que in æternum consulendum esse admonuit. Qui rebus florentibus, de vita æterna quasi per somnium aliquid inaudiisse videbantur, de summo illo fœlicitatis gradu deiecti & derurbati, nihil his in terris perpetuum, nihil sibi constans, stabile, man-



furum, tandem aliquando vel serio animaduertunt. Iam sublati in cœlum oculis, incredibilem erga se Dei præpotentis benignitatem ac clementiam profitentur: liceat illorum unicuique cum Zenone Cittico exclamare apud Laërt. Suid. Iam bene nauigauī, cū naufragium feci. Exempla ad eam rem maximè accommodata & memoratu digna, hīc percensere operæ pretium duxi. Callistratus apud Codin. lib. Origin. Constant. sub Constantino Magno Consul creatus & primus quidem apud Constantinopolim eo loci renuntiatus, quem Senatum tunc temporis appellarunt, cū populus Bizantinus nouum Consulem faustis acclamationibus excepisset, & ea quidem potissimum sententia, Callistratus fortuna fauente, ad aliud prouehetur. Constantinus inde nescio quid mali suspicatus, Callistratum inuitum sacro Presbyterij ordine insigniri præcepit, qui postmodum Episcopus creatus, vita sanctissimè acta, & Episcopi munere præclarè functus, perierat nisi periisset. Apud Suid. Antiochus cubiculi præpositus (honor à Constantini seculo maximus) apud Theodosium Iuniorem delatus, honore quoungebatur priuatus est, & publicatis ipsius bonis in sacerdotum ordinem coopertus est. Non aliter apud eundem Cyrus ab eodem Theodosio Iuniore per inuidiam bonis spoliatus, ex Pagano Christianus & Episcopus factus religiosè vixit, & hinc piè migravit, apud Niceph. 14. c. 46. Quidni vterque cum Seneca, ep. 118. generose ac fortiter exclamare potuit, *Nihil nobis tecum fortuna, non facimus nostri tibi copiam.* Apud Zonaram Eudoxiam Theodosij Iunioris vxorem res aduersæ non leuiter affligerant. Sed ut scribit Seneca ep. 91. *Sæpe maiori fortuna locum fecit iniuria.* Ipsa namque Atheniensis Philosophi filia, à fratribus pa-

terna domo eiecta, dum Constantinopoli ab Imperatore in integrum restitui se, omni ope, & studio contendit, ad ipsius Theodosij Augusti matrimonium peruenit: mitto quid ipsa pertulerit à marito, Aula expulsa, & quatum animæ suæ bene cōsultum fuerit, sua peregrinatione Hierosolimitana: Perierat nisi periisset: Alexius Protostrator apud Nicet. 4. hist. sub Emmanuele Commeno Imperatore Bizantino, fortunis & honoribus florentissimus, Monasticem profiteri coactus, pietate & sanctitate vitam insignem duxit, ac perierat nisi periisset. Psaltes Regius 15. secundum vulgatam nostram, quæ ex Septuaginta, qui dicuntur, manauit, verissimè istud profatur. Multiplicatæ sunt infirmitates eorum, postea accelerauerunt. Quamquam S. Hieronymi, Santis Pagnini, & aliorum ex Hebræo versio, de Idolis & Idolorum cultoribus, locum explicet. Nec certè à re, de qua agitur, istud alienum videri debet, nam fœlices isti dum omnia illis prosperè succedunt, quot vitiis indulgent, tot Idola sibi construunt. Veteri & nouo testamento vulgare, vitia Idola nuncupari. Quicquid illud sit, non dubium est aduersos istos casus, certissimam, ad Dei misericordiam procurandam, viam sternere. Tum enim de Dei & Diuina iustitia serio cogitare illi incipiunt. Lactantio 2. c. 1. *Ex rerum prosperitate luxuria, & luxuria vero ut vitia omnia, sic impietas aduersus Deum nascitur, Et calamitas virtutis occasio est,* ait Seneca quar. vir. c. 4. *Quem ita imitatus Minutius fœlix Octau. Calamitas disciplina virtutis. Quid enim in beatis illis, quibus omnia ad votum succedunt, spectare licet, nisi enervatam fœlicitatem, qua animi permadescunt, nisi aliquid interueniat quod humanæ sortis & metus ac cultus diuini numinis admoneat, velut perpetua ebrietate sopiti? Quos specularia*



*specularia semper à statu vindicarunt, quorum pedes inter fomenta subinde mutata tepuerunt, quorum cœnationes subditus & parietibus circumfusus calor temperauit: Ac ne quis intepestat cibis, ne quid palato iam calloso parum ferueat, cœnam culina prosequitur. Sic illos dum tam venustè describit Seneca, epist. 78. Istud, si Christianus fuisset, addere potuisset, imo debuisset, non magis ver & æstatem hyemi, diem nocti, quàm vitam alteram huic caducæ & mortali succedere. Quàm vereor horum fœlicium plerosque, conscientia meritorum. In nihilum abire post mortem magis optare quàm credere; malunt enim extinguì penitus, quàm ad supplicia reparari. Quis apud illos in suo florentissimo statu de æternis cruciatibus differere audeat; & si audeat, quis persuadeat, in futura vita impiis, iniustis, facinorosis, & vno nomine profligatæ vitæ hominibus, ignem sapientem repositum esse, qui, vt loquitur Minutius Fœlix Octau. Membra vrit & reficit, carpit & nutrit, sicut ignes fulminum corpora tangunt nec absumunt; sicut ignes Æthnæ & Vesuij, & ardentium ubique terrarum flagent nec erogantur: ita pœnale illud incendium non damnis ardentium pascitur, sed inexesa corporum laceratione nutritur. Hæc quamuis à pio & disertò oratore Christiano pronuntiata, non pluris faciunt quàm*

*— quod pauendum rancidæ*

*Edentularum cantilenæ suaferint.*

Vt ait Prudent. in Romano. At vbi in ordinem redacti sunt, & veterno illo, quo tandiu laborauerant, soluti ac liberati, tandem discussa illa caligine mentis oculis obducta, omnia quæ in hac mortali vita censentur bona, fluxa & caduca esse perspiciunt, ac Circensi pompæ persimilia, quorum momentanea sit ostentatio, in quibus nihil diu-

H

turnum, nihil constans firmumque reperiri possit, non aliter quam in fructibus illis, quos fugaces appellant, quos alieno tempore frustra requiras. Infelices eos vocant qui longè sibi dissimiles, utpotè cum non aliam felicitatem ipsi putant quàm opibus, gloria, honoribus, vulgi admiratione & prædicatione abundare, & iis carere non aliud esse credunt quàm ærumnosam & calamitosam vitam agere. Sed hi qui censentur ærumnosi futurorum memores, ac de huius vitæ commatu reapse cogitantes, sensim frugalitati, temperantiæ, continentiae, honestati, modestiæ, assuefacti, luxum omnem atque intemperantiam, fastum denique faciliè & nullo negotio dediscunt. Iam assuescunt à se remouere pompam, & usu rerum ornamenta metiri. Non potest, ut liberè fatear, cum Seneca Tranq. c. 8. tanta varietas & iniquitas casuum ita depelli, *Ut non multum procellarum irruat, magna nostræ navis armamenta pendentibus, cogenda in arctum res sunt, ut tela in vanum cadant. Sed quoniam non est tantum roboris nobis, angustande certè sunt res domesticæ, ut minus ad iniurias fortunæ simus expositi. Habiliora sunt corpora pusilla, quæ in arma sua contrahi possunt, quàm quæ superfunduntur, & undique magnitudo sua vulneribus obiecit.* Ac denique quicumque nos casus exceperit, multo leuiorem minusque grauem ac pertimescendum vsus efficiet quotidianus, vitæque tum ad omnem virtutem composita, *Nihil miserum est quod in naturam consuetudo perduxit,* aiebat Seneca Tranq. Paulatim enim voluptati sunt, quæ necessitate ceperunt. Sed ista demissa nimium, & velut humi repens oratio videri potest. In cælum attollendi sunt oculi, & ab eo inuictum animum, & ad hæc aduersa fortiter toleranda, succinctum, paratumque, quacunque precum efflagitatione expectemus,



qui dixit, *Ego percutiam & ego sanabo.* Deuter. 32. *Tanta enim est summi Patris pietas, ut etiam ira eius ex misericordia sit, & ideo castiget ut parcat. Is est qui de malorum nostrorum feminibus, causas bonorum caelestium provideat. Ut praeclare differit S. Paulinus epist. 10. Arripe occasionem, vidua scribens, ait B. Hieronymus epist. ad furiam, & fac de necessitate virtutem. Non quaeruntur in Christianis initia, sed finis. Paulus male cepit, sed bene finiuit. Iudae laudantur exordia, sed finis proditione damnatur. Non aliter Petrus ille Rauennas, Latinorum Ecclesiae scriptorum disertissimus, Serm. 40. Christianus faciat de necessitate virtutem; moriatur innocens, qui totus vixit in crimine. Sed ne quis beatis illis fortunae suae fastigio praecipitatis, scrupulum iniiciat, quod illa vitae morumque conuersio praepotenti Deo, idcirco minus grata, minusque accepta sit, quod ipsi non nisi aliena vi, de vita in melius commutanda, & procuranda animae salute, cogitare cogantur. Dicant cum B. Augustino, ep. 45. *Felix necessitas, quae in meliora compellit.* Plinio Iuniori Panegyri. ita visum *Incipit esse beneficiū, quod necessitas fuerat.* Memoria sapius reperant istud Prophetæ Hierem. Thren. 3. *Misericordia Domini quia non sumus consumpti.* Annon primarij & omnium praestantissimi beneficij loco habendum est, tot vitiorum seruum ac mancipium, tot cupiditatum, curarum, anxietatum, molestiarum alienarum, quasi catenarium aliquem Atriensem vinculis illigatum, Dei benignitate manu missum, tot calumniis, tacitis odiis, & simulatibus obnoxium, alterius arbitrio non suo viuentem, in libertatem à Deo miserante assertum. Nec iam cogitet, quibus nunc rebus illi carendum sit, *Ad viuendum velut ad natandum is melior qui onere liberior, quandoquidem sunt in ista vitae humanae tempestate, leuia sustenta-**

tui, grāuia demersui, aiebat Madaurensis ille Platonius  
Apolog. Sed tu Cœlum suspice.

## CAPVT DECIMVM.

*Vitæ priuatae laus. Ab aulica vita metus non leuis. Collatio vitæ publicæ & priuatae. Bona vita, bene viuere ganconum. An planè à tractandis publicis negotiis abstinendum. Ignauum otium fugiendum. Tertulliani locus aduersus vitam priuatam, ut videtur, expensus & explicatus, pro varia hominū & etate & conditione. Quis secessus, quod otium laudandum, ex quo non ad plurimorum tantum, sed etiam ad publicam rem non parum adiumenti & emolumenti peruenire posse agnoscitur.*

**S**Citissimè & verissimè Lucretius 2.

*Suaue mari magno turbantibus æquora ventis,*

*E terra magnum alterius spectare laborem;*

*Non quia vexari quemquam est incunda voluptas,*

*Sed quibus ipse malis careas, quia cernere suaue est.*

Beatos certè illos non possum non prædicare, quæ portu vel fidissima statione, Euripi nostri metuendos illos accessus & recessus, & eorum qui in illo deprehenduntur grauissimas & periculosissimas iactationes conspiciunt. Nec vllam vel tutiorem ac securiorem stationem existimauerim quàm vitam illam priuatam, cui qui se addixerint, deuouerint, si modo suo non abutantur otio, fœlicitatis, quantam homo iis in terris capere potest, non minimam portionem ad se peruenisse in dies experiuntur. Cernunt aliorum catenam auream, & laxam, aliorum arctam & fordidam. Multos vident quibus necessariò hærendum sit in



fastigio suo, ex quo non possunt nisi cadendo descendere, qui abundè testantur maximum onus suum, quod aliis graues esse cogantur, ne subleuatos se, sed suffixos, qui fortunæ blandimentis occæcati, iustitia, mansuetudine, humana lege, & benigna manu, vix norunt præparare multa ad sequentes casus præsidia, quorum spe securius pendeant, quorum cupiditates non finitæ sunt, sed in immensum incertumque productæ, cum aliquem incrementis terminum isti figere nequeant: Et quamquam à publicarum rerum tractatione abstineas, quandoquidem in turbam te dederis, vide quo in discrimine verferis. Stoici Romani hæc sunt epist. 103. *Tempestas minatur antequam surgat*, crepant ædificia antequam corruant, prænuntiat fumus incendium, subita est ex homine perniciēs, & cō diligentius tegitur, quò propius accedit. *Erras si istorum tibi qui occurrunt vultibus credis*, hominum effigies habent, animos ferarum. Quid si à populo, ab obuiis quibusque hominibus tantum periculi est, quid non multo magis ab aula, à sacrariis illis quibus inclusi sunt Ioues isti terreni. Ingeniosum Poëtam Ouidium 3. Trist. Eleg. 4. harum rerum scientem audi,

*Vsibus edocto si quidquam credis amico*

*Viue tibi, & longè nomina magna fuge.*

*Viue tibi, quantumque potes prælustria vita,*

*Sæuum prælustri fulmen ab arce venit:*

*Nam quamquam soli possunt prodesse Potentes,*

*Non prosunt, potius plurimum obesse solent.*

*Et alius quisquis fiet veterum in Catalectis.*

*Viue, & amicitias Regum fuge, pauca monebas,*

*Maximus hic scopulus non tamen vnus erat:*

*Viue, & amicitias nimio splendore nitentes,*

H iij

*Et quicquid colitur perspicuum fugito.*

*Ingentes dominos & famę nomina clare,*

*Illustrique granes nobilitate domos*

*Deuita.*

*Ex alto magna ruina venit.*

Mitto cætera eiusdem suauissimi gustus: Et cum Quidio  
sup. absoluo, Eleg. 4. lib. 3. Trist.

*Crede mihi, bene qui latuit bene vixit, & intra*

*Fortunam debet quisque manere suam.*

Horatium 1. ep. 17. comitem addo.

*Nec vixit male, qui natus moriensque fefellit.*

Cui affiné est istud Suidæ ex ignoto auctore, Ita viuere, ut  
nemo vixisse te sciat. Quos in immensum fortuna extulit,  
quam longè absunt ab ista priuata vitæ tranquillitate, tam  
miseri ab huiusmodi vitæ cultoribus iudicantur, quando-  
quidem ipsi sibi renuntiare non possunt, persona illis im-  
posita tuenda est. Circumstant illos quærentium, postu-  
lantium, ambiciosorum negotiosorum turbæ, in animum  
eorum inquirunt, obseruantur oculi, liberiora omnia sunt  
iis quorum affectus tegi possunt, illis nullum secretum li-  
berum est, in multa luce fortuna eos posuit, quos nihil  
plebeium decet, nihil humile; multum ab illis homines  
exigunt, multum expectant: nec somnum quidem ex-  
tendere in partem diei licet, aut à tumultu rerum in otium  
ruris, gratia quietis, confugere, aut assiduâ laboriosi offi-  
cij statione fatigatum corpus voluntaria peregrinatione  
recreare, aut ex suo arbitrio diem disponere. Non longè  
aliter sensisse visus est auctor Dialogi de oratorib. Pul-  
chrum id quidem indulgentiam Principis ingenio mereri, quanto  
tamen pulchrius, si ita res familiaris exigat, seipsum colere, suum  
genium propitiare, suam exercere libertatem. Neque tamen  
lautè, delicatè, genialiter, viuendi rationem iis verbis in-



tellectam probauerim. Istorum ganeonum ea vox est apud Senecam ep. 123. *Vna fœlicitas est bona vita, facere omnia liberè, frui patrimonio hoc est viuere*: potius interpretationem illam Plinij, præf. lib. 18. adhibendam cenſeo, *Nos relictis æſtimationi ſuæ iſtis hominum turbis, pergamus excolere vitam, eoque conſtantius quo operè nobis maior quàm famę gratia expetitur*. Audio nonnullos inſufurrare. Quemadmodum in diuitiis, ſic in honoribus illud plerumque euenire, vt plures in opes inuehantur, quàm eas contemnant ſerio, vel repudient. Sic auctor Dialogi de oratoribus, *Opes facilius inuenies qui vituperent, quàm qui faſtidiant*. Quemadmodum auctore Seneca Patre 2. Declam. 1. *Facilius eſt paupertatem laudare, quàm ferre*. Itidem qui honores & dignitates aſſequi nequeunt, ab iis tanquam à Scylla & Caribdi cauendum eſſe dicunt. Dicam cum Lucilio 27. & quidem ex animo,

*Nulli me inuidere; neque Strabonem fieri ſepius me*

*Delitiis iſtorum velle aut percipere.*

Albinouanus appoſitè de obit. Mæcenat,

*Maior res magnis abſtinuiſſe fuit.*

Placet mihi iſtud Saluiani 1. *Inter quamlibet dura nulli beatiores ſunt, quàm qui hoc ſunt quod volunt*. At quoniam omnium hominum non vna eſt eademque vel naturæ propenſio & inclinatio, vel par ad alterius arbitrium viuendi neceſſitas, aut ſaltem non ſimplex & leuis impuſſio. Muſa Rhetor apud Senecam Patrem 7. Controu. 1. *Alij viuere ſine Reipubl. adminiſtratione non poſſunt, alijs in priuato latere & extra omnem inuidiam ſeceſſiſſe, præcipua tranquillitas eſt*. Non idcirco damnare vel audeam, aut velim, qui ad Reipublicæ gubernacula accedant, quos Princeps in aliquo honoris gradu, atque adeò faſtigio collocarit. Minir

omnium: Aristidi orat. i. Leuctr. secedere, & publica de-  
 tractare negotia ignavia istud non sapientia aut grauita-  
 tis vllum prabet iudicium. Et Plinius Iunior, Paneg. exi-  
 miè, *Recusare omnes honores ambitionis est, moderationis est eli-  
 gere paucissimos.* Sed ciuilem istam & publicam viuendi ra-  
 tionem cum priuata, & penitus ab hominum animis in  
 communi societate moderandis & regendis abhorrente,  
 conferre institui, & vtra sit præferenda exquirere. Nec  
 quis mihi homines planè ignauos & otio torpentes som-  
 niet. Est quod maximè laudandum & prædicandum otium  
 existimem, vt & aliud huic dissimile penitus damnandum.  
 Otium hoc posterius homine tantisper suo nomine di-  
 gno, quandoquidem penitus iners existat, indignum exi-  
 stimo. Draconis Atheniensis leges sanguine tinctas vete-  
 rum erat sententia, quarum vna erat; Otioso & ignauo  
 mortis pœnam irroganto. Plutarchi. Solonis placet mo-  
 deratio, Arcopagitæ quo quis modo vitam instituat in-  
 quirunto: Ignauum & ignobile siquidem otium, homi-  
 num est, quibus summa curarum, summa votorum est,  
 mollem in pòsterum & pinguem, hoc est, vt ipsi existi-  
 mant, innoxiam & beatam vitam viuere. Qui, vt ait, Sal-  
 lustius apud Lucium Senecam ep. 60. *Ventri obedientes, ani-  
 malium loco numerandi sunt, non hominum; & horum nonnulli  
 ne animalium quidem, sed mortuorum. Qui latitant & torpent,  
 & sic in domo sunt quasi in conditiuo. Horum licet in limine  
 ipso nomen marmori inscribas, mortem suam antecesserunt.*  
 Idemque aiebat Themistocles, vnumquemque illorum  
 viuum esse sui ipsius sepulchrum. Vt refert Plutarchus in  
 Solone. Isti sunt qui vt habet Sulpitiæ Satyra,

— Somno moriuntur obeso.

Qui sunt vt loquitur Næuius, Alcest.

Corpore



— Corpore pectoreque undique obeso

*Mente exensa.*

Quorum corpora, Seneca auctore ep. 88. in sagina, animi, in macie & veterno sunt. Verè equidem ut alio loco expressit. Quare bon. vir. c. 2. *Languent per inertiam saginata, nec labore tantum, sed mole & ipso sui onere deficiunt.* Reliquos otiosos videamus. Sunt veterum non pauci, qui Philosophos tanquam huic inertii otio addictos, grauissimè reprehendant. Pacuuius acerbè illos perstrinxit hoc versu,

*Ego odi homines ignauâ operâ & Philosophâ sententiâ.*

Macedo Philosophus apud Agellium 13. c. 8. hunc versum pro foribus omnium templorum describendum esse censebat, quia nihil fieri posse indignius neque intolerabilius dicebat, quàm quod homines ignaui ac desides, operti barba & pallio, mores & emolumenta Philosophiæ in linguæ verborumque artes conuerterent, & vitia facundissimè accusarent, intereuntibus ipsi vitiis madentes. Non aliter Quintilianus, Declam. 268. *Philosophos vanos vocant & otiosos, & in ambitum ipsum, contra quem maximè differere videntur, alligatos.* Alio loco, Declam. 283. *Vos Cynici, nouo genere ambitus, adorationem miserâ captatis.* Præclare illos defendit, & contra quod urgent aduersarij, aptissimè reponit istud Seneca vit. beat. c. 20. *Non præstant Philosophi quæ loquuntur, multum tamen præstant quod loquantur, quod honesta mente concipiant. Nam si & paria dictis agerent, quid esset illis beatius? Interim non est quod contemnas bona verba & bonis cogitationibus plena præcordia. Studiorum salutarium etiam citra effectum laudanda tractatio est. Nos otium negotiosum nunc explicemus, & in iis qui illo rectè vtuntur, omni prædicatione dignum iudicabimus, cum longè aliter se se gerant, quàm qui in otio torpent, & toti cupidita-*

I.

tibus, voluptatibus, iocisque diffluunt, quos eleganter expressit his versibus Ennius, Iphigen.

*Otio qui nescit uti, plus negotij habet*

*Quàm cum est negotium in negotio:*

*Nam quid quod agat institutum est nullo negotio*

*Id agit, studet, ibi mentem atque animum delectat suum.*

*Otioso in otio animus nescit quid sibi velit.*

De otio huiusmodi quo de agitur scrupulum alicui mouere potest Tertullianus, lib. de pallio, cum ita scribit, *Vita meliore magis in secessu fruarè quam in promptu. Sed ignaua infamique, scilicet Patria & Imperio, Reique publicae uiuendum est.* Tertulliano equidem, vel potius ei qui pro toga aduersus pallium hanc protulit sententiam. Nullo negotio fieri satis arbitrator, iis paucis verbis,

*Non eadem est ætas, non mens.*

De ætate primum videamus. Plinius Iunior 4. ep. 23. rectè meo iudicio sic censet, *Prima, inquit, vitæ tempora, media Patria, extrema nobis impertire debemus, ut ipsæ leges monent, quæ maiorem annis sexaginta otio reddunt.* Seneca breuit. vit. c. 20. eò alludit: *Lex, inquit, à quinquagesimo anno militem non cogit, à sexagesimo Senatorem non citat.* Paulo aliter Aprenas Rhetor, apud Senecam Patrem, 1. Contr. 8. *Senator post sexagesimum & quintum annum in curiam venire non cogitur, non vetatur.* Et Quintilianus, Declam. 306. istud innuit, *Non perpetuò Senatorem citat Consul.* Et senum certè aptior nulla, neque conuenientior exercitatio esse potest, cum se in illam iam deuexam & inclinatam ætatem receperint, quàm ut sibi illud veteris Poëtæ perpetuo occurrant,

*Vni viuere tibi, nam moriere tibi.*

*Quidni in eam cogitationem singulis momentis incum-*



bant, iam despumauit ætas, iam vitia primo feruore adolescentiæ indomita lassauit, non multum superest vt extinguat, idcirco ætatem istam ad bonam mentem, non ad publicam rem tractandam comparatam esse manifestum est. Et quamquam illa, cum se multis experimentis longa & frequenti rerum patientia domuerit, nonnullis persuadere videatur eandem publica munia & tuto & sapienter obire & sustinere posse, attamen non pauca occurrunt in Republica mutationes, quibus non iam senum, sed viro-  
rum, & eorum qui florida ætate vigent, consiliis prospiciendum est, *Iuuenes quidem*, teste Plinio Iuniore, lib. 3. ep. 1. *adhuc confusa quedam & quasi turbata non indecent, senibus placida omnia & ordinata conueniunt, quibus industria sera, turpis ambitio est.* Cassiodoro 5. ep. 25. *Sola senum vita est, quietis inuenisse remedia.* Ecquid igitur ad Reipublicæ gubernacula senes euocare necessum est, nisi illos ambitioni suæ immori malis, quàm immortalitatis parandæ studio. Non eadem est ætas. Quam mentem, ab ipsa vel iuuanda vel administranda Republica, sine vlla reprehensionis labe, abesse posse nos existimemus; nunc inuestigandum est. Nemini in primis dubium esse potest, non omnes tractandorum publicorum negotiorum idoneos esse, seu quorum animus ab istis curis publicis omnino auersus est & alienus. Et frustra ad Rempublicam animum suum arietare permiserint, seu quia mollis & tener, nec tot, quæ vndique ingruant, molestias exhaurire, ærumnas exor-  
bere possit, seu quia à natura sic effectus & efformatus, vt vel leuia quæque metum & consternationem incutiant,

*Et motæ ad Lunam trepidabit arundinis umbram.*

Annon præstat huius ingenij hominem secedere, suoque delectari otio, rebusque priuatis ac domesticis operam

dare. Sed hunc hominem intelligo, cuius probitas, candor, integritas perspecta sit, qui exiguo lare sit contentus. Ecquid humile tugurium cogitas, quod est latissimum virtutum receptaculum, in quo spectanda est, ut ait Lucanus, Paneg. Pison.

— Plena pudoris

*Libertas, animusque mala ferrugine purus.*

Fœlix profecto secessus, de quo non immerito istud pronuntiavit Ennodius Ticinensis, Ethic. I. diæt. 24. *Secundis rebus proximum est, quacunque accesserint mala nesciri.* Præclarum huius rei exemplum habes apud Curtium 4. Abdolominus Regum Sicioniorum stirpe editus, ob inopiam, hortum suburbanum exigua colebat stipe, causa ei paupertatis, sicut plerisque probitas erat: Ille intentus operi diurno, strepitum armorum qui totam Asiam concusserat, Alexandro Magno auctore, non exaudiebat. Rex ex ista humili fortuna renuntiatus & ab Alexandro probatus, ab eoque rogatus qua patientia inopiam pertulisset. Respondit ille, *Vtinam eodem animo regnum pati possim. Hæ manus sufficere desiderio meo: Nihil habenti, nihil defuit.* Antisthenes, apud Hesychium Illustrium, affirmabat obscuritatem nominis bonum esse non dissimile labori. Seneca audiendus, *Non ut leonum animaliumque impetus caueis coercerentur, sic hominum quorum maximè in seductu actiones sunt. Ita tamen delituerint, ut ubicumque otium suum absconderint, prodesse velint & singulis & vniuersis ingenio, voce, consilio.* Senec. de Tranq. c. 3. Adde S. Augustinum lib. 5. de Ciuit. c. 19. *Nec sic quisque debet esse otiosus, ut in eodem otio utilitatem non cogitet proximi; nec sic actuosus, ut contemplationem non requirat Dei. In otio non iners vacatio delectare debet, sed aut inquisitio, aut inuentio veritatis, ut in ea*



quisque proficiat, & quod inuenerit teneat, & alteri non inuideat. Iam penitiùs dispiciamus qui priuatam illam vitam sunt amplexi, an ignauam & infamem degere videantur, & patriæ & Reipublicæ prorsus inutiles. Quinam illi sint prius explorandi veniunt, tum illorum secessus, & patriæ & imperio aliquantum conducere videbitur. Homines id genus cum, ut Christianos decet, præsertim ac in primis id curent, ut vni Deo & Optimo & Maximo sese approbent, quod se nec iustius nec sanctius præstare credant, quam si erga Dei benignitatem gratos se præbeant, in acceptis à Deo beneficiis memoria recolendis perpetuo versantur, quod illis singulare & proprium est. Nam cæteri, quorum animus in varia distractus, utpotè nouis & multiplicibus cupiditatibus æstuans, vix istud cogitant. Illi secedentes quo magis ac magis in diuinis beneficiis, vel ab ipso ortu ad hæc usque tempora susceptis, recensendis & ponderandis occupantur, eò magis se obstrictos profiteri solent, cum longe cæteris maiora sibi tributa esse arbitrentur. Apud Senecam epist. 73. *Quemadmodum Neptuno plus debere se indicat ex his qui eadem tranquillitate usi sunt, qui plura & pretiosiora illo mari vexit, & animosius à mercatore quam à vectore soluitur votum, & ex ipsis mercatoribus effusus gratus est, qui odores ac purpuras & auro pensanda portabat, quam qui vilissima quæque & Saburræ loco futura congesterat: sic huius otij & pacis beneficium ad omnes pertinens, altius ad eos peruenit, qui utroque bene utuntur.* Addo & dum bene utantur, non videri hac ratione inutiles & Patriæ & Reipublicæ. Nec enim duntaxat Curiam, forum & administrationem publicæ rei reliquerunt, sed ad ampliora secesserunt. Dicam cum Seneca epist. 8. *Qui nil agere videntur, maiora agunt, humana diuinaque simul tractant.* Totos

se ad rerum pulcherrimarum cognitionem & diuinarum  
 contemplationem conuerterunt, ex iis didicerunt bene  
 debere beneficia bene soluere. Interdum autem solutio  
 est ipsa confessio, confitentur igitur multum se debere ei,  
 cuius administratione ac prouidentia contingit liberum  
 istud otium, & arbitrium sui temporis & imperturbata  
 publicis occupationibus quies. Ista est gratitudo Diuino  
 Numini adeo accepta, vt non sibi tantum, probi illi, sed &  
 aliis à Deo ampliolem multo & copiosiore extundat,  
 extorqueat beneficentiam. Hos inutiles dixeris, qui cate-  
 ros mortales, suo exemplo, ingratitude vitium obstina-  
 tissimè fugere ac detestari, vicissimque suam grati animi  
 significationem longè illustriorem reddere ac manifesta-  
 re doceant? Qui nobis omnibus istud Plinij Paneg. vltro  
 inculcent, *Liberalitatem iucundiores debitor gratus, clario-  
 rem ingratus facit.* Infelices & inutiles eos dices qui pro  
 populo Christiano fidelissimas agunt excubias? qui suis  
 precibus diuinam emolliunt iram? quorum beneficio;  
 dum Mosis exemplo in monte, manus attollunt, nobis est  
 & facilis & certa de Amalechitis victoria, *Neque solus ille  
 militat, qui in acie stat, & cornu dextrum laeuumque defendit,  
 sed & qui portas tuetur, & statione minus periculosa non otiosa  
 tamen fungitur, vigiliasque seruat, & armamentario praeest,*  
 ait Seneca, de Tranquillit. c. 3. Hæc ad publicam & Patriæ  
 & Imperij salutem & vtilitatem non pertinere, qui dixerit  
 ex alicuius Diagoræ Melij schola se prodiisse, satis apertè  
 fatebitur. Absoluo sanctissimi Episcopi Gregorij Nan-  
 zianzeni, ep. 57. qui Theologus apud Græcos optimo iure  
 audit, cohortatione. Migremus hinc, ait vir summus, viri  
 efficiamur, somnia proiciamus, umbras prætereamus,  
 aliis vitæ oblectamenta, plusque doloris quàm voluptatis



habentia relinquamus: alios occupatos teneant, iactent ludificentur, inuidia & tempus & fortuna, sic enim rerum humanarum inconstantiam appellant. Valeant throni, principatus, opes, splendores, elationes, casus, vilis hæc & despicabilis gloriola, ac denique magnæ huius scenæ ludicra nugæque theatricæ. Nos verbum arctissimè complectamur, ac pro omnibus rebus Deum habere optemus, solum illud perenne bonum & nostrum. S. Augustinus lib. i. Retract. c. 8. *Magis mihi me debeo, quàm hominibus cæteris, quamuis Deo magis quàm mihi.*

O SOLES, Ô TVNICATA QVIES.

SVBSILIRE IN COELVM EX ANGVLO LICET.

S. Gregorius Nazianz.

Ἐμοὶ δὲ μάλιστα ἀρετῆς ἔστιν ἢ ἀναγκαζία.

Mihiequidem maxima actio est otium.





# IVRISIVRANDI RELIGIO.

## CAPVT PRIMVM.

*Iurifurandi varia & multiplex definitio. Per qua veteres olim iurarunt. Per meam salutem: Hebraei, Per nomen. 1. Deum. Nominatio Sancti. Emendata vulgata Ecclesiastici 23. Iusiurandum vni Deo tribuendum. Donatistarum amen-tia qui per suos Episcopos iurarent. Iurandi origo.*

**D**E Iurifurandi religione dicturus, ab illius definitione ordiendum arbitror, quam variam & multiplicem varij & diuersi auctores tradunt. S. Gregorio Nysseno, Homil. 4. in Cantic. Iusiurandum est oratio per se confir-mans veritatem. Clemens Alexandrinus, 7. Stromat. ait, Iurare idem esse ac Iusiurandum, vel tanquam Iusiuran-dum mente conceptum proferre affirmatiue. Paulò am-prior, nimiumque diffusa hæc definitio videri potest, quandoquidem eo modo id quod asseueramus, & de quo affirmare dicimur, illud omne Iusiurandum esse pronun-tiarem, quod etiam vulgaris loquendi modus non faci-lè admitteret. Mallem igitur alteram Iurifurandi defini-tionem, apud eundem Clementem, probare. Est autem eiusmodi, Iusiurandum dicitur confessio definitiua, cum  
Diuina



Diuina assumptione. Eodem pacto Philo Alexandrinus, lib. 2. Allegor. & lib. de spec. leg. aliquantò apertius. Iusiurandum est fidei signum firmissimum, coniunctum cum Dei testimonio. Tum paulò post; Iurare est in re dubia testem Deum inuocare. Sic alio loco, Iusiurandum nihil est aliud quàm in re ambigua Dei testis citatio. Aliis Iusiurandum dicitur esse affirmatio vel negatio, sacræ rei assertionem, vel attestacionem firmata. Sacras res non vnius generis esse, cùm apud omnes in confessio sit (de quibus singillatim dicemus, vbi ea per quæ iurare vsus obtinuit, enumerabimus.) Sed cùm earum nullum sit, aut maius, aut præsentius testimonium, quàm Diuini Numinis, idcirco totum hoc qualecunque sit, ad Deum referri debet. Hinc illud est B. Augustini, in psal. 109. serm. in decoll. S. Ioan. Bapt. *Quando iuras quid facis? Deum testem adhibes.* Et alio loco. *Quid est iurare? Deum testari.* Sed multò clarius, ac ad rem qua de agimus accommodatius: *Quid est iurare, nisi ius reddere? Deo, quando per Deum iuras: ius salutis tuæ reddere, quando per salutem tuam iuras; ius filiis tuis reddere, quando per filios tuos iuras? Quod autem ius debemus salutis nostræ, filiis nostris, Deo nostro, nisi charitatis, veritatis & non falsitatis?* Cùm dicit quisque, *PER MEAM SALUTEM*, salutem suam Deo obligat; quando dicit, *PER FILIOS MEOS*, oppignorat Deo filios suos, vt hoc veniat in caput eorum, quod exit de ore ipsius; si verum, verum; si falsum, falsum. Cùm ergo filios suos, vel caput suum, vel salutem suam, quisque in iuratione nominans, quidquid nominat, obligat Deo. Iurisperitis D. lib. 12. tit. 2. l. 3. & c. non ita visum, apud quos, qui iussus per Deum iurare, per caput suum, vel liberorum suorum, iurauerit, ipsius Iusiurandum ratum non habetur, ac si eiusmodi iuramentum Diuini Numinis religionem atque

reuerentiam, nullo pacto sapere videatur. Nisi quis ex forma Iuris rem interpretari velit, quæ & in ipsa lege expressa est, ut tunc demum iuratum habendum sit Iusiurandum quod ab aduersario delatum sit, & conceptis ab aduersario verbis, & expressa formula: siquidem omne omnino licitum Iusiurandum, per quod voluit quis sibi Iurari, idoneum est. Sed ego è diuerticulo in viam, & quod à S. Augustino dictum est, illud idem obseruo in nostris Capitularibus lib. 1. cap. 63. *Sunt aliqui, qui per charitatem & veritatem iurant, & cauent se à iuramento nominis Dei, & nesciunt quod, idem est Deus quod est charitas & veritas, dicente Ioan. Apostolo, 1. c. 4. quia Deus charitas est. Item ipse Dominus in Euangelio. Ioann. 14. Ego sum via & veritas.* Itaque satis apparet in Iureiurando quidquid nominetur, Diuini Numinis inuocatione comprehendi. Apud Gentiles istud notissimum est, ynde Næuius,

*Ius sacratum, Iouis iurandum sanguine.*

Et Iurisiurandi eam notationem adsignat, ex Ennio, Apuleius, *Nam & Iouis Iurandum dicitur.* Ita elegantissimus Themistius orat. 1. Dei inuocationem Iuriiurando applicat. Hebræi per NOMEN iurare dicunt, hoc est, per Deum, metu quodam religioso ac reuerentia, Dei vocem non exprimentes. Ita Leuitici 24. locus insignis istud probat, *Ecce egressus filius mulieris Israëlitis, quem pepererat de viro Ægyptio, inter filios Israël, iurgatus est in castris cum viro Israëlita, cumque blasphemasset NOMEN, & maledixisset ei, adductus est ad Moysen.* Malè in nostris editionibus post NOMEN, addita est vox, DOMINI, quæ elegantem illam Hebræorum locutionem corrumpit. Et certè editio Romana vulgatæ versionis, habet. Cumque blasphemasset, NOMEN. Sic versio, ex Hebræo, Santis Pagnini.



Nuncupauit filius mulieris Israëlitis NOME N. Itidem ex Chaldaeo Paraphrasta Latinus Interpres. Et expressit filius mulieris Israëlitis, NOME N. Proferam germanum locum ex Ecclesiastico 13. *Omnis Iurans, & Nominans, in toto à peccato non purgabitur.* Versus, qui præit, istud explanat, *Nominatio Dei non sit assidua in ore tuo, & nominibus Sanctorum non admiscearis.* Posterior pars hæc, (& nominibus Sanctorum ne admiscearis,) in Codicibus Græcis emendationibus nihil habet quod respondeat: itaque assummentum videtur, & consulenda Ecclesiastici editio ab eruditissimo Hæschelio castigatissima. In priori parte nostra vulgata habet, *Nominatio Dei*, Græci omnes codices, *ὀνομασία τῆς ἀγίου*, *Nominatio Sancti*, longè congruentius ad Iudaicum morem. Ad nostrum Iusiurandum, quod non sine Dei nuncupatione, siue expressa, siue non dispari elocutione intellecta, fieri contendo, tandem redeundum est. Ac quicquid in eo exprimitur, non aliud indicare credendum est quàm Iusiurandum omne ad Dei præpotentis Maiestatem pertinere. Hinc illud Madaurensis Platonici, lib. de Deo Socrat. *Iusiurandum est Summi Deorum honor proprius.* Similiter Optatus lib. 2. Donatistas arguit, quòd per suos Episcopos iurarent, ac si illos pro Deo haberent. Additque istud, *Solet Deus, ad probandam fidem, in iuratione ab hominibus nominari.* Siad vos *Diuina migravit de celo religio*, quia per vos iuratur, nemo vestrorum langueat, nolite mori, imperate nubibus, pluite, si potestis, et per vos plenius Iuratur & de Deo sileatur. O sacrilegium impietati commixtum, dum homines per vos iurantes libenter auditis! Eam ob causam, Hierocles Iusiurandum reuerenter habendum esse dicebat: Et Orator princeps 3. offic. Iusiurandum religiosam affirmationem appellauit. Ac si Iusiurandum

sine aliqua Diuini Numinis religione vsurpari & concipi nequeat. Neque vero abs re proposita videri debet, si obiter Iurandi originem explicemus. S. Chrysostomus homil. 9. in Act. Apostol. Iuramentum in orbem inuectum prodit, cum hominum mores flagitiis quibusque & sceleribus contaminari atque inquinari cœperunt, cum Idololatria paulatim serpere cœpit, atque adeo in dies vigere ac florescere, cum rerum omnium perturbatio iam sese proderet, & cum homines ipsi iam dubiæ & fluxæ fidei deprehenderentur, tum necessum fuit Deum aduocare testem, quasi fideiussorem, qui dictis & promissis satisfactorius esset. Si quidem iuramentum sit fideiussio, ubi mores fidem non habent: Et quoniam homines parum sibi mutuò credunt, non iam fideiussorem hominem querere oportuit, sed Deum. Denique cum iurgari & de communi diuidendo, familia Herciscunda & similibus, inter se contendere cœperunt, Iuramento quisquis rem suam sibi vindicare tentauit. Apostolus itaque meritò *Iuramentum omnis controuersiae finem esse* pronuntiauit, Hebr. 6. Caius Iurisconsultus D. lib. 12. tit. 2. l. 1. eodem pacto, *Iurisurandi religionem tanquam maximum expediendarum litium remedium*, in vsum venisse affirmat. Quod non vnius generis & modi existere palam est. Iurisconsulti triplex faciunt, voluntarium, necessarium, iudiciale. In Basilicis 22. tit. 5. quatuor species numerantur, quas etiam explicat Balsamo, ad Photij Nomocanonem tit. 13. c. 18. Sed ego manum subduco, ne quis Iurisconsultus magister. Noui enim istud Columellæ lib. 10.

*Nec manibus mites ferulas, nec cruribus aqua  
Terga rubi.*



## CAPVT SECVNDVM.

Gentiles per Deos suos iurabant. Socrates, Per Hircum, Canem, Anserem. Varia Socratis Iurisiurandi interpretatio apud Patres. Quid de eo Apollonius apud Philostrat. Suid. etiam Demosthen. Iusiurandum Scytharum, Bulgarorum, Ægyptiorum, Persarum. Græcorum olim & aliorum. Per Caput, Etiam recentiorum. Mira eius rei historia apud Zozimum. Per Caput Regis etiam Ægyptiorum. Iudeis visitatum. Per Caput. Per Cælum. Per terram. Per Hierosolymam. Per Templum. Per timorem Patris. Offensorum Iusiurandum. Per salutem suam vel filiorum. Per sepulchra defunctorum. Per patris vel matris sanitatem. Per eorum beatam memoriam. Per Cineres eorum. Muhamedis Impostoris Iusiurandum. Per Genium. Per salutem Principis. Per Imperatorem. Per vitam Regis, vel filiorum. Νῦν καὶ θεὸν. Iuratio. Per Melchom. Vnde Pæni homines immolare didicerint. Vt Gentiles ita Christiani. Per Deum iurant. Per Capillum Dei vel Caput. Per Deum. Per Christum. Per Spiritum Sanctum. Per Corpus & Sanguinem Domini. Per Sacrosanctum Baptisma. Per Coronam Episcopalem. Per inseparabilem Trinitatem. Per diem Iudicij.

**N**E in incertum & immensum diuagetur nostra disputatio, viam quandam & rationem in ista Iurisiurandi religione explicanda statuamus. Quoniam vero ipsius definitionem superiori capite excussimus, cætera condigeramus ordine, vt primum illa recenseamus per quæ antea iurare solebant maiores, tum iurandi formulas subiungemus. Deinde ritus qui Iurisiurando adhibebatur, postea conditiones præstandis iuramentis requisitas &

K iij

qualis iurantium intentio esse debeat, explicabimus. Insuper qui iurare prohibiti sint dispiciemus. Postremò de periurio videbitur. In primis igitur constat veteres non vno Iurandi eodemque genere & arbitro, Iuramentum enuntiasse. Gentiles *Per Deos* suos iurasse, nemo est in his litteris adeo peregrinus qui istud ignoret. Et aliis pridem hæc sunt obseruata, pauca adiiciam. Seneca Conf. ad Helu. c. 10. ex collatione maiorum cum hominibus sui seculi, istud ostendit. *Tunc* (id est priscis illis seculis) *per fideles Deos religiose iurabatur, qui per illos iurauerant ad hostem morituri, ne fallerent, redibant.* Vnde mortale Iuramentum cuiusmodi vocat Publicola apud S. Augustinum ep. 153. dum ait Afros barbaros *per Demones* iurare solitos. Ipse Tertullianus Apolog. c. 32. Testim. Amm. Gentiles perstringit acerrimè, quandoquidem apud eos, citius *per omnes Deos*, quàm *per unum Genium* Cæsaris peieraretur. Ex quo Minutius Fœlix Octau. istud descripsit. *Est eis (Ethnicis) tutius per Iouis Genium peierare, quàm Regis.* Apud Tertull. Apol. 4. Socratis Iusiurandum *Per Hircum, Canem, Anserem*, mirum in modum exagitarunt Scriptores nostri. Lactantius 3. c. 19. nulla omnino ratione Socratem hac in parte excusandum censet, quamquam tacitè hoc Iuramento Deos suos deridiculo habuisse videatur. Socrates *Per Canem & Anserem* deierabat. O hominem scurram (vt ait Zeno Epicureus) ineptum, perditum, desperatum, si cauillari voluit religionem; dementem si hoc serio fecit, vt animal turpissimum pro Deo haberet. Tertullianus paulo æquior. Socrates in contumeliam Deorum *Quercum & Hircum & Canem* deierabat. Sed propterea damnatus est, quia Deos destruebat. S. Augustinus de vera relig. c. 2. pro Socrate ob Iuramentum



huiusmodi facere videtur, iis verbis: Socrates audacior cæteris fuisse perhibetur, Iurando per Canem quemlibet & Lapidem quemlibet, & quidquid Iuratum esset in promptu, & quasi ad manum occurrisset. Credo intelligebat qualiacunque opera natura, quæ administrante Diuina Prouidentia gignerentur, multò quàm hominum & quorumlibet opificum esse meliora, & ideo diuinis honoribus digniora quàm ea quæ in templis colebantur. Non quod verè lapis & canis essent colenda sapientibus, sed ut hoc modo intelligerent, qui possent, tantà superstitione demersos esse homines, ut emergentibus hîc esset tam turpis demonstrandus gradus, ad quem venire si pueret, viderent quanto magis pudendum esset in turpiore consistere. Mitto cætera, quæ validissimè Gentilibus ipsis vœternum excutiant. Socratis Iusiurandum eiusmodi ita defendit Apollonius apud Philostratum, lib. 6. c. 9. quod per ea iuraret Socrates non tanquam Deos, sed ne per Deos iuraret. Suidæ locus, verbo, Lampon de isto Per Anserem Iuramento, non immerito addendus videtur. Narrat Lamponem Atheniensem, Sacerdotem, Aruspicem, Oraculorum interpretem; Per Anserem, cum quempiam fallere vellet, iurare solitum: Primos Socraticos eodem modo iurare solitos. Rhadamantum vero primum prohibuisse Iusiurandum Per Deos fieri, sed Anserem iurari voluisse: Itidem, Per Canem, Arietem & similia. Cur autem, Per Anserem, potissimum iuraretur illam affert rationem, quoniam sit auis fatidica. Demosthenes Per terram, Per fontes, Per fluuios, Per latices, iurare solitus erat, si Phalereo credimus. Phot. num. 265. Apud Lucianum, Toxar. Scythæ Per ventum & acinacem iurabant. Bulgari, forsan soboles Scytharum, Per Spatham, iurabant. Nicol. 1. ad Consult.

Bulgar. c. 67. *Ægyptij Per cape & allia*, ita scribit Plinius 19. c. 6. *Allium capasque inter Deos in Iureiurando habet Ægyptus*. Persarum Reges *Per Mithram* seu *Solem*. Apud Ælian. 1. c. 33. *Per Caput* iurare omnium penè Gentium consuetudo fuit: apud Aristid. orat. 3. Platon. Græcis illis antiquioribus in usu istud fuisse nemo ignorat, quin & recentioribus, de quibus hoc narrat Zonaras, ad Canonem ultimum Concil. Calcedon. Cum vingerentur Ægyptij Episcopi, quatenus decreta Concilij Calcedonensis suo Chirographo confirmarent, & id recusarent, donec in locum Alexandrini Patriarchæ suum defuncti, alius sufficeretur, statutum ab Imperatore & Senatu, ut vel fideiussores darent, vel sacramento fidem suam obstringerent. Erat autem Iusiurandum eiusmodi. *Per Caput & Salutem Imperatoris*, & per ipsius iurantem incolumitatem. Nonnulla adiciemus postea. Interim Balsamo ibidem ad eundem Canonem Concilij Calcedonensis adnotat, Iusiurandum hoc vocari, *ἱερὰ κεφαλή*, ut etiam habet Zonaras eodem loco, quod nihil aliud indicet quàm alicuius iurationem, in caput Imperatoris, vel propriam salutem. Quod quidem Iuramentum non reducitur secundum Iurisperitos, ad quinque Iurisurandi species, lege statutas. Sic Balsamo. Porro *Per caput Imperatoris* iurare adeo magni æstimabant, ut omne aliud quodcunque existeret, pro nihilo ducerent. Scribit Zozimus lib. 5. hist. cum Alaricus Gothorum Rex, Honorij Imperatoris auditâ Epistolâ, quæ ipsi à Iouio Præfecto Prætorio lecta fuerat, ob sui contemptum commotus, suos Romam illius oppugnandæ gratia, ire iussisset, Iouius, Principis tacto capite, Iusiurandum præstitit, & cæteros, quotquot aderant, Duces & Primores idem præstare



stare compulit, nunquam pacem cum Alarico facien-  
dam, sed bellum perpetuo gerendum. Interca Alaricus  
cum longè moderatioribus quàm antea conditionibus,  
pacem ab Honorio postularèt, ac omnes & præsertim  
Episcopi, quos apud Imperatorem intercessores adhibue-  
rat, illas probassent, & è Republica esse dicerent, Iouius &  
& quotquot Magistratus gerebant eas penitus repudian-  
das esse dictabant, quandoquidem *Per Caput Impera-*  
*toris* iurassent quod si *Per Deum* præstitum esset Iura-  
mentum, fortasse negligi posset, permittendo benigni-  
tati Diuinæ facinoris impij condonationem: At contra  
Iusiurandum *Per Caput Imperatoris* datum, nullomodo  
fas esse delinquere. S. Hieronymus, i. contr. Iouin. etiam  
suo tempore, *Per Caput* iurare vsitatum fuisse prodit.  
De Latinis istis Iusiurandi formulis consulendus est vir  
clarissimus Briffonius, de quo quidquid magnificè dixerò  
minus erit, hoc maximum Gallie ornamentum ob defen-  
sam Gallici Imperij tutelam fraus Iberica crudelissime su-  
stulit, *Per Caput* Iudæos iurare consueuisse mox osten-  
demus cum ea omnia per quæ illi iurabant vno veluti  
fasce complectemur, quod antequam præstemus, inte-  
rim discamus ex Abenezra, Ægyptios, *Per Caput Regis*  
sui, iurasse. Sic Iudæus ille magister, apud rerum Hebrai-  
carum scientissimum Drusium. Consuetudo Ægyptio-  
rum est hodie vt iurent, *Per Caput Regis*, & qui sic iura-  
uerit, nisi ratum habuerit verbum suum, reus est mortis,  
nec libra auri, quam offert pro redemptione sua, cum li-  
berare potest, quandoquidem publicè contempsit Re-  
gem. De Iudæis nunc agamus. Seruator noster Christus,  
apud S. Math. 5. ita suos alloquitur, *Audistis quia dictum est*  
*antiquis, non periurabis; reddes autem Domino iuramenta tua.*

Ego autem dico vobis, non iurare omnino, neque per Cælum, quia thronus Dei est; neque per terram, quia scabellum est pedum eius; neque per Hierosolymam, quia ciuitas est magni Regis; neque per caput tuum iuraueris, quia non potes unum capillum album facere aut nigrum. Hæc à B. Augustino de serm. Dom. in monte lib. i. c. 17. pereleganter explicantur iis verbis, *Quari potest cum diceretur; ego autem dico vobis non iurare omnino, cur additum sit neque Per Cælum, quia thronus Dei est, & cætera usque ad id quod dictum est, neque Per Caput tuum.* Idem de verbis Apost. serm. 28. Credo propterea, quia non putabant Iudæi se teneri Iureiurando, si per ista iurassent. Et quoniam audierant; Reddes autem Domino Iusiurandum tuum, non se putabant Domino debere Iusiurandum, si Per Cælum aut terram, aut Per Hierosolymam, aut Per Caput suum iurarent, quod non vitio præcipientis, sed illis male intelligentibus factum est. Itaque Dominus docet nihil esse tam vile in creaturis Dei, ut per hoc quisque periurandum arbitretur, quando à summis usque ad infima Diuinâ providentiâ creata regerentur. Incipiens à throno Dei usque ad capillum album aut nigrum. S. Hieronymus in cap. 5. Math. ita scribit; Iudæi Per Angelos & urbem Hierusalem & Templum & elementa iurantes, creaturas resque carnales venerantur honore & obsequio Dei. Sed longe acutius ista exponit S. Augustinus sup. cum docet per ista iurare perinde esse ac per Deum iurare: Quia inquit ipse, utique Dominus est, Domino Iusiurandum debet, qui Per Hierosolymam iurat. Neque Per Caput tuum iuraueris. Quid enim poterat quisque magis ad se pertinere arbitrari quàm caput suum? Sed quomodo nostrum est, ubi potestatem faciendi unius capilli albi aut nigri non habemus? Ergo Deo debet Iusiurandum infallibiliter tenenti omnia & ubique præsentis; Quisquis etiam Per Caput suum



*iurare voluerit, & hinc etiam cetera intelligantur.* Priscos illos Iudæorum patres aliter iurasse legimus, vt in Genes. 31. cum Laban Assyrius, *Per Deum Abraham & Deum Nachor* iurasset, Iacob vicissim, *Per Timorem Patris sui Isaac* iurauit. Timorem pro Deo, Hebraica locutione, vsurpant tradunt viri eruditi. Et Dei cultum, omnemque religionem cum metu & timore coniunctam esse alio loco demonstrauimus, & nonnihil in Commentario de Conscientia dicemus. Ridiculam de eiusmodi iuramento Iudæorum, *Per Cælum & Terram*, sententiam adiungam, qua negant Iusiurandum esse, si quis *Per Cælum* vel *Terram* deiceret, nisi edixerit per eum qui habitat in Cœlis, & nomen Dei addiderit. Nos alio loco, vbi de ritu iuramenti concipiendi agemus, singularem verporum istorum, erga Christianos, etiam in forensi negotio, perfidiam atque infidelitatem aperiemus. Nec illud præterire possum, Iudæos nonnullos etiam post Christi Domini Natiuitatem, hæc & multo plura iurandi genera vsurpassse. Testem habeo S. Epiphanium hæres. 19. qui in hæresi Ossensorum (qui Iudæi sunt) narrat, Elbrai Iudæum ad Ossenos se aggregasse, Imperante Traiano, qui se Prophetam dicebat, qui iurabat *Per Solem ac Terram, panem, Cælum, æthera ventumque*, velut Numina, & ita suos Ossenos iurare iussit, *Per salutem suam vel filiorum suorum* iurare aliquos diximus superiori capite, addo tamen & istud Isidori Pelusiotæ 2. epist. 188. *Multi Per Deum iurantes, periurij crimine sese deuinciunt, per filiorum autem caput ne iurare quidem audent.* Illustratur locus ex S. Augustini loco de verb. Apóst. serm. 28. *Timet aliquis falsum iurare Per filium suum, & non timet falsum iurare, Per Deum suum.* Fortassis hoc dicens in animo suo? *Timeo per filium meum falsum iur-*



rare ne moriatur: Deo autem, qui non moritur, etsi falsum per eum iuretur, quid mali contingit? Benè quidem dicis, nihil mali contingit Deo, quando falsum iuras Per Deum, sed contingit mali multum tibi, qui fallis proximum, qui testem adhibes Deum. Breuitati consulens mitto cætera. Etiam Per sepulchra defunctorum, præsertim aut suorum aut heroum & virorum fortium aliquando iuratum fuisse, ex Seneca patre suas. 2. colligi potest. Et firmari istud videtur loco Philonis Alexandrini, de spec. leg. apud quem legere est, si rei necessitas religionem Iurisiurandi postulet, magis decere iurare Per Patris aut matris sanitatem & senectutem prosperam, si uiuant; aut si defuncti sint, Per eorum beatam memoriam. Per Cineres parentum eodem pacto iurabatur, ut ex Seneca patre 1. Contr. 1. colligere est, Per lapidem etiam aliquos iurasse refert S. Augustinus de verb. Apost. serm. 30. Nescio an id referendum sit ad veterum Romanorum Iurisiurandum, Per Iouem lapidem, de quo tam multi scripserunt, aut generatim Per Deos Gentilium, ex lapide seu marmore effictos, & ut non-nemo veterum dixit, Imaginatos. Vnde illud Clementis Alexandrini exhortator. Terram calcare didici non adorare. Lactantius Clementis Interpres 2. c. 2. & 17. Calcare terram nihil aliud est, quàm simulachra non adorare, quia de terra facta sunt. Auctor est Euthymius, Panopl. part. 2. tit. 24. Muhamedem impostorem illum impurissimum, iurare solitum Per Solem, Lunam, astra, igneum splendorem, animalia, canes cursores, plantas, aliaque incognita & barbara vocabula Dæmonum noxiorum, Per Genium Principis olim Gentiles, tritum illud est. Et Tertullianus ad Scap. cap. 28. 32. Per Genium Principis iurare, nihil aliud indicari ait quàm Per Dæmonem Principis. Non minus vulgatum istud etiam, Per sa-



*lutem Principis iurare.* Ioseph Genes. c. 42. *Per salutem Pharaonis iurat.* S. Basilius in psal. 14. ὁ γὰρ ἰσθὶς habet, siue salutem, siue sanitatem dicas 1. q. 7. c. 9. ex B. Gregorio lib. 10. ep. 31. *Per salutem Dominorum nostrorum Rempubicam gubernantium.* Formula hæc Iurisiurandi à B. Gregorio condita & unicuique Episcopo ad vnitatem Ecclesiæ redeunti proposita & præstanda, *Per Imperatorem* itidem iuratum esse leges indicant, vt superiores Iurandi species. D. 12. tit. 1. l. 13. Cod. 4. tit. 1. Etiam morem hunc diutius perdurasse mihi facile persuadeo, ex illa Iurandi formula, quam supra descripsimus ex B. Gregorio. Erat necnon in vsu Iusiurandum, *Per Maiestatem Imperatoriam.* Vegetius 2. c. 5. ita refert, *Iurant (milites) Per Maiestatem Imperatoris, quæ secundum Deum generi humano diligenda est & colenda.* Sed illud obseruandum venit, aliquot postea seculis, vetitum fuisse, ne quis iuraret *Per vitam Regis vel filiorum suorum*, vt disertis verbis expressum est in nostris Capitularibus 3. c. 42. *Per Deum* Iurare & Gentiles & nostri Christiani consueuerant, præter aliis notata, ista subiiciam. S. Augustinus de verb. Apost. serm. 28. scribit Græcos suo tempore illud quotidie in ore habuisse, Νὴ τὸν Θεόν, quæ est iuratio, *Per Deum*: Ita Persarum Reges, Νὴ τὸν Μίτρά, sanè *Per Mithram seu Solem.* Ita expressit Ælianus 1. c. 33. post Plutarchum Apophth. Eodem pacto Iudæi in Idololatricam lapsi *Per Melchom* iurabant, quod illis Deus per Sophoniam prophetam c. 1. exprobrat. Quis autem Deus sit iste Melchom, ex S. Hieronymo discimus suis in Prophetam Amos c. 5. Commentariis. Lucæ in Actis Apostolorum 7. Μολοχ dicitur, Aquila vertit Melchom Symmachus & Theodotio. Rex vester. Moloch vero seu Melchom erat Deus Ammonitarum cui liberos suos miseri il-

li in sacrificium offerentes cremabant, quem ritum crudelissimum Chananei, patria à Iosue pulsi, cum in Africa posuerunt sedes, retinuerunt. Nam Saturnus Pœnorum, cui tale sacrificium fiebat, non alius erat quàm iste Moloch Ammonitarum. Quamquam etiam Carthaginenses à Tyriis Phœnicum præstantissimis, ex quibus originem ducebant, istud didicisse, credi possit. De hoc, *Per Deum*, Iuramento apud Ethnicos, eleganter ista differit Lactantius 2. c. 1. sparsim, quæ nos breuiter constringemus & coaceruabimus, *Nunquam* (Gentiles) *Dei meminere*, nisi dum in malis sunt. Nam & cum iurant, & cum optant, & cum gratias agunt, non Iouem aut Deos multos, sed Deum nominant, adeo ipsa veritas, cogente natura, etiam ab inuitis peccatoribus erumpit, quod quidem non faciunt in prosperis rebus. Nam tum maximè Deus ex memoria hominum elabatur, cum beneficiis eius fruenter, honorem dare Diuinæ indulgentiæ deberent. Postquam metus deseruit & pericula recesserunt, tum vero alacres ad Deorum templa concurrunt. A Tertulliano 1. cont. Marcion. istud exscripsit, qui sic habet, *Maiores popularitas generis ne nominis quidem Moysi compotes ne dum instrumenti Deum Moysi tamen norunt etiam tanta Idololatria dominationem obumbrante seorsum tamen illum quasi proprio nomine Deum perhibent & Deum Deorum: Et si Deus dederit, & quod Deo placet, & Deo commendo. Vide an nouerint quem omnia posse testantur. Nec hoc ullis Moysi libris debent. Ante animam quam prophetia. De nostris Christianis, Per Deum iurantibus, res tam nota est quàm cuique sua domus. Sed quis non rideat vel potius succenseat grauissimè, dum audit repertos fuisse, qui Per Capillum Dei, iurarent. Meminit Iustinianus 22. q. 1. c. 10. quod etiam extat in nostris Capitularibus. Illud autem ex Iustiniano expressit Iulianus Ante-*



cessor Nouell. 71. Nouell. 77. iis verbis, *Si quis Per Capillum Dei, vel Per Caput iurauerit, vel alio modo blasphemia contra Deum usus fuerit, officio Praefecti urbis, ultimo supplicio afficiatur. Si quis autem talem hominem non manifestauerit, non est dubium quod Diuina condemnatione similiter coërcbitur: Ipse quoque Praefectus urbis, si neglexerit, post Dei iudicium etiam nostram indignationem timeat.* Apud Vegetium 2. c. 5. milites in legionem adscripti, iurare consueuerant, *Per Deum & Per Christum & Per Spiritum Sanctum.* Iuramenti, *Per Christum.* meminit S. Augustinus de verb. Apost. serm. 28. sed Saluianus noster lib. 4. quàm piè & grauius istud describit pro sui seculi infelicitate. Vnde, inquit, *peruulgatum hoc ferè & apud nobiles & apud ignobiles sacramentum est. Per Christum. Per Christum, quia hoc facio. Per Christum, quia hoc ago. Per Christum quia nihil aliud dicturus sum. Per Christum, quia nihil aliud acturus sum. Et quid plura? In id penitus deducta res est, ut sicut de Paganis Barbaris prius diximus, Christi nomen non videatur iam sacramentum esse, sed sermo.* Quae sequuntur non minoris sunt pietatis. *Per Corpus & Sanguinem Christi,* Christiani olim iurabant. S. Hieronymus Dialog. aduers. Lucifer. istud nos docet, loquens de Episcopis Catholicis, in Ariminensi Concilio fraude Arrianorum deceptis, *Concurrebant Episcopi, qui Ariminensibus dolis irretiti, sine conscientia, haeretici ferebantur, contestantes Corpus Domini & quicquid in Ecclesia sanctum est.* Eusebius refert hist. Eccles. 6. c. 42. Nouatum haeticum quos ad suas partes euocaret, eiusmodi sacramento obtrinxisse. Iura mihi, *Per Corpus ac Sanguinem Domini nostri Iesu Christi* quod me nunquam deserere, & ad Cornelium (Papam) reuerti velis. Sic cum Victor quidam Monachus, in suspicionem venisset non

rectæ fidei, Concilio Ephesino, aduersus Nestorij hæresim, constitutæ, & propterea alicuius maledicentiæ in S. Cyrillum Alexandrinum, qui in eo Concilio primas partes egerat, in publico conuentu Episcoporum, iurauit *Per Sacro-sanctum Baptisma & Veneranda Christi misteria* nullius horum scelerum se conscium esse, vt scribit S. Cyrill. Apolog. ad Theodos. Imp. *Per Coronam Episcopalem*, adiurandi formula apud Afrôs vsitata. Ita S. Augustinus ep. 147. ad Proculianum Episcopum Donatistarum. *Per Coronam nostram*, nos adiurant vestri (i. Donatistæ) *Per Coronam vestram*, vos adiurant nostri. Iusiurandum Regum Francorum primæ stirpis, in sanciendo fœdere, memorat Gregorius Turonensis hist. Franc. 9. c. 20. hoc pacto. Iurant partes *Per Dei omnipotentis nomen & inseparabilem Trinitatem vel Diuina omnia ac tremendum diem iudicij*. S. Chrysostom. in 2. ad Thessalonicens. c. 5. narrat mulierem quandam Constantinopolitanam, emisse sibi in seruos virum & eius vxorem, siue, Iuris vocabulo, contubernalem, ac cum vir, seruus nequam & flagitiosus existeret, hera de utroque vendendo cogitauit, quod cum ipsa contubernalis rescisset, amicam heræ suæ conuenit, & nō sine lachrymis ipsam obtestata est, quatenus heram suam ab eo proposito auerteret, addito huiusmodi Iureiurando *Ita Christum videas in die iudicij*, ne meas preces despicias, ac Christum cœlis apertis vidit die sequenti ista mulier, quæ intercessit & rem confecit. Subiungit Diuinus vir, pueros, cum flagris cæduntur forsan asperius, quàm par sit, adiurare solitos *Deum & Christum* in caput seu Pedagogi, seu alterius, *Ita Christianus moriaris*, id est pari cruciatu & acerbitate pœnæ. Sed quod dolendum est, fidem faciunt auctores non pauci, Christianos aliquando



quando Gentilium iuramenta vsurpasse, de quibus sequenti capite, illud tantum describam ex Concilio Aurelianensi 4. c. 15. *Si quis Christianus, vt est Gentilium consuetudo, apud cuiuscunque feræ vel pecudis exta, inuocatis insuper nominibus Paganorum, fortasse iurauerit, si se ab hac superstitione commonitus noluerit cohibere, donec reatum emendet, à consortio fidelium vel Ecclesiæ communionem pellatur.*

## CAPVT TERTIVM.

*Iurisurandi formulæ. Testis est Deus. Scit Deus. Inuoco Deum super animam meam. Per vestram gloriam, an sit iuratio apud Apostolum. Νῦν τὸν Θεὸν explicatur, Ita me Deus adiunget. Ναὺς τοι, quæ iuratio. Ille, ipse, voces hæ solitaria, dignitatis ergò vsurpata. Iurandum iocosum. Ita saluus sim. Deus sit mihi propitius. Christiani reprehensi qui Gentilium iuramenta vsurparent. Viuit Dominus. Hæc faciat mihi Dominus, & hæc addat, Militum Alexandri & Romanorum quæ iurandi forma.*

**I**VRISVRANDI varias & discrepantes formulas nunc recensere instituti ratio postulat. Neque ego quæ apud priscos auctores Ethnicos reperiuntur attingere velim, cum clarissimus Brissonius & alij non pauci has omnes diligentissimè excusserint. Nos Christianas magnam partem examinabimus. S. Augustinus de serm. Dom. in monte, De verb. Apostol. serm. 28. nonnullas recenset eiusmodi, *Testis est Deus. Scit Deus. Inuoco Deum super animam meam.* Has autem iurandi formulas, ex Apostolo Paulo ep. 89. efformatas esse declarat. Sic enim Apostolus Rom. 5. *Testis mihi est Deus, cui seruo in spiritu meo in Euan-*

M

gelio filij eius, 2. Corinth. 1. *Testem Deum inuoco* super animam meam. Iuratio prorsus certa & expressa, ait S. Augustinus; Itidem Philipp. 1. *Quæ scribo vobis ecce, coram Deo, quia non mentior.* Sed B. Augustinus tacitæ quorundam obiectioni aduersus has Apostoli formulas aptè respondet, *Nisi fortè quis dicat tunc cauendam esse iurationem, cùm per aliquid dicitur quod iuratur: At non iurauerit (Apostolus) quia non dixit, Per Deum, sed dixit, Testis est mihi Deus. Ridiculum est hoc putare. Tamen propter contentiosos, aut multum tardos, ne aliquid interesse quis putet, sciat etiam hoc modo iurasse Apostolum dicentem, 1. Corinth. 15. Quotidie morior per vestram gloriam, Fratres, quàm habeo in Christo Iesu Domino nostro. Per vestram gloriam, iuratio est, inquit Sanctissimus Doctor qui istud firmat, ex Græcis eiusdem Apostoli verbis, *Νὴ τοῦ ὑμετέων* (alii legunt, *ἡμετέων*) καὶ *Χριστοῦ*. Per vestram gloriationem. Et reuera iurandi formulam esse probat idem B. Augustinus, ex quotidiana iurandi apud Græcos forma. *Νὴ τὸ θεόν* de qua suprà diximus. Et certum est, vocem *Νὴ*, esse particulam iurantis & obtestantis. Attamen Photius apud Oecum. in epist. S. Pauli in huius loci interpretatione dubius est, nam duobus modis exponit. Priore, vt sit iurationis formula; Posteriore, vt sit sensus, Morior propter vestram gloriationem, id est, vt gloriari possim de vobis, Christo per me acquisitis. Hinc nonnulli sibi hanc Apostoli obtestationem seu professionem publicam potius quàm iurationem esse contendunt. Sed inter hanc & illam non multum discriminis esse video. Nihilominus S. Basilus in Psal. 14. Apostolum his verbis iurasse pernegat, *Ita me Deus adiunget*, vetus illa Iurisiurandi formula, & nunc quidem vulgaris. Philo de leg. spec. quosdam reprehendit, qui ita iurabant, *Ita me adiu-**



uet, & vocem, *Altissimi*, reticebant: quandoquidem non aliud quidquam addendo, & supprimendo vocem, *Altissimi*, suppleri potest, si lubet, Sol, Cælum, Terra, Mundus, quæ sunt creaturæ præcipuæ & sempiternæ: Quæ qui vnius & veri Dei religionem profitentur, sine scelere quasi pro numine in iurando usurpare nequeunt. Video equidem præscos Gentiles nonnunquam in suis iurandi formulis hac reticentia vsos. Apud Suidam, formula illa Iurisiurandi, *Ναὶ μὲν τὸν Σανὲν περὶ αὐτόν*, nullo alio adiecto. Et tamen ipsum Deum intelligebant: Equidem apud Latinos, voces illæ *Ipsæ*, *ille*, solitaria, hoc est suppressio nomine proprio eius de quo agitur, dignitatis ergo ita enuntiabantur, vt auctor est Donatus illustris Grammaticus, in Andr. Terent. Ita in Panegyrico, qui Maximiano Imperatori dictus est. *Omniū, vt dicitur, accepto nuntio navigationis tuæ, vna vox & hortatio fuit, quid dubitamus, quid moramur?* IPSE iam soluit, iam prouehitur, iam fortasse peruenit, experiamur omnia, per quoscunque fluctus eamus: quid est quod timere possimus? Cæsarem sequimur. Græcis istud non inusitatum. In vita Pythagoræ. Iambl.c.18. Pythagorei, cum de Pythagora loquebantur, non exprimebant nomen proprium, sed *Αὐτόν*, *Ipsum*, pronunciabant. Et Donatus hac voce sic prolata, auctorem aliquando designari scribit, & Pythagoras suæ sectæ auctor & princeps. Interim Suidas locutionem illam, *Ναὶ μὲν τὸν*, usurpari docet à Callimacho, & contendit Græcos veteres non temere *Per Deos* iurasse, sed per obuia quæque, vt ex Homero & Menandro demonstrat, atque hoc genus orationis ad pietatem & religionem, maioremque Diuini Numinis reuerentiam homines informare. Memorat idem Suidas Iusiurandum iocosum seu derisionis gratia, *Per papaueris virentem her-*

*bam.* Ad nostros Christianos redeo, quos vſos lego iis iurandi formulis, *Ita ſaluus ſim, Vere dico*, & in Iureiurando de calumnia, *Scit Deus*. De quo videndus Scholiaſtes Iuliani Anteceſſoris Conſtit. 33. c. 78. quin & illa, *Deus ſit mihi propitiuſ*, quæ iſti ſuperiori, *Ita me Deus adiuuet*, reſpondet. Cod. Theod. 9. tit. 1. l. 4. Conſtantini Magni eiufmodi fuit, *Ita mihi ſumma Diuinitas ſemper propitia ſit, & me incolumem præſtet, vt cupio, ſæliciffima & florente Republica*. Trajani Iuſiurandum non aliter in rei Romanæ commodum publicum conceptum fuit. Sic in Prouinciarum ſpeciem redactam videam Daciam. Sic Pontibus Iſtrum & Euphratem ſuperem. Iuliani Parabatæ perſimile. Sic ſub iugum mittam Perſas. Apud S. Ambroſium ep. 64. cùm de integritate pudoris alicuius puellæ, de qua ſuſpicio erat, ageretur, pro puella teſtimonium dixit, ſoror, nulli eam ſe virorum familiaritati dedidiſſe, *Optare cum ea ſibi à Domino Ieſu partem reſeruari in regno Dei*. Votum iſtud voces, ſiue obteſtationem, perinde eſt. Illud certè obſeruatione dignum, Chriſtianos aliquando Gentilium Iurandi formulas vſurpaſſe, hoc nos docet Concil. Trullanum c. 95. cuius Canon eiufmodi legitur. Eos qui Gentilium Iuramenta iurant, Canon pœnis ſubiicit, & nos iis quoque ſegregationem decernimus. Baſamo longè diligentius quàm Zonaras, hunc ſic interpretatur, vt ex Canone S. Baſilij, in epiſtola ad Amphiloſchium, c. 80. pœnis Canonicis ſiue Eccleſiaſticis afficiantur, qui iuramenta Gentilium vſurparint, ad fidem dictis ſuis faciendam. Sed omnes illi nec pari affectu & ſtudio, nec pari religione ad hæc impelluntur, ita non parem ſeueritatem experiri debent. Ac imprimis credere par eſt nullum Chriſtianum, qui re vera talis ſit, credere Deos Gentilium vllam Diuini Numinis ratio-



nem & Maiestatem habere, itaque cum apud se falsos Deos esse agnoscant Christiani, illi aut sponte per eos iurant, & tunc excommunicandi, si laici: sin autem vel coacti & necessitate quadam, aut per contemptum horum falsorum Deorum, mitius punientur, & quidem arbitrio Episcopi. Verum S. Basilij Canon iste non tantum eos damnat, qui iurandi Gentilium formulis vtantur, sed iis triplex crimen attribuit, quoniam sine magna necessitate fidem in Christum prodiderint, & Dæmoniorum mensam attigerint, & Gentilium sacramenta iurarint. Sed ne quis Ecclesiasticos ab hac impietate semper alienos fuisse arbitretur, audiat Canonem Concilij quarti Carthaginensis, c. 61. *Clericum Per creaturas iurantem, acerrimè abiurgandum, si perstiterit in vitio, excommunicandum.* At *Per creaturas* iurare, inter Gentilium iuramenta annumerari debere, nemo est qui non fateatur, & meminit Balsamo ad Canonem illum Trullanum. Quod vero attinet ad Canonem hunc Trullanum, & S. Basilij, ni fallor, video improbum illum morem Christianorum etiam Magnatum iurandi, secundum formam & modum Gentilium in Orientali Imperio, vsitatum fuisse. Eo enim respexisse videtur Isidorus Pelusiota 4. ep. 144. qui altero post S. Basilium seculo vixit, dum grauissimè conqueritur de Christianis nonnullis, qui patiebantur Gentiles non modo sacra & veneranda Christianæ religionis arcana, siue mysteria attingere, verum etiam illi ipsi, nefariis & abominandis gentilium sacris, per iuramenta ipsorum scelerata atque absurda, communicare audebant. Reliquas Iurisiurandi formulas persequamur. Vulgarem istam tritamque Iudæorum obiter adnotamus. Extat in libris Regum, *Viuat Dominus.* Item, *Hæc faciat mihi Dominus, & hæc addat.* Sed

M iij

istam magis execrationem esse putant quam iuramentum: quamquam iurationem cum execratione coniunctam in Scriptura cernere liceat. Ita Paralippom. 6. *Si peccauerit quisquam in proximum suum, & iurare contra eum paratus venerit, seque maledicto constrinxerit.* Grauiissimum illud est & maxime laudandum iuramentum quod Persæ, iuueniles annos egressi, & in virorum classem adscribendi, dare solebant, ea forma. Apud Isid. Pelus. lib. 4. ep. 198. Iuro me contempturum omne malum lucrum, voluptatem corporis, inanem gloriam, quin potius æmulabor virtutem, colam Diuinum Numen, & parentes, vera dicens & bona agens: neque horum quidquam violabo sciens & volens. Adiungam, sed veniam præfatus, duplicem iurandi formulam planè iniquam & inhonestam, quam Aristoteles ipse Polit. 5. c. 9. qui utramque prodit, & satis apertè damnat. Prioris usus erat receptus in Democratiis, siue populari statu, æuo eiusdem Aristotelis, & cuiusmodi forma erat. Plebem non afficiam iniuria. Et Athenis, Ephebi ac impuberes iurare solebant, se Democratiæ defensores, cum in Ciuium album, anno ætatis 20. referrentur. Sed in Oligarchiis, ubi pauci ditiores & potentiores dominantur, iurandi ea erat formula. Plebi ero inimicus, quodque malum potero, illi moliar. Sacramenti militaris aliquas subiici formulas nil vetat. Nouella constitutio Theodosij & Valentiniani Imperatorum sic habet, *Iuratur in militiæ sacramento, ut necessitates publicæ procurentur.* Apud Curtium lib. 7. *Annon propemodum in tua verba tui omnes te præeunte iurauimus? Eosdem nos inimicos amicosque habituros esse quos tu haberes?* Epictetus Arriani lib. 1. c. 14. de militibus Romanis istud prodit. Milites propter stipendium iurare se Cæsaris salutem omnibus rebus anteferre. S. Hie-



onymus Heliodorum sic virget ep. 1. *In sacramenti verba iurasti pro nomine eius non te patri parciturum esse. Apud Athenienses qui vigesimum ætatis annum attigissent, sub dio ista iurabant; Arma non dehonestabo, nec adstantem, quisquis is fuerit, socium relinquam: pugnabo quoque pro focis & aris solus & cum multis, patriam nec turbabo nec prodam, nauigabo contra quamcunque destinatus fuero regionem, solemnitates perpetuas obseruabo, receptis consuetudinibus parebo, tuebor & solus & cum reliquis omnibus, atque colam Sacra patria. Hæc refert Pollux lib. 8. c. 9.*

## CAPVT QVARTVM.

*Iurare positis super altare sanctum manibus. Coram altari. Propositis, tactis sacris Euangelis. Iusiurandum præstitum corporaliter, legaliter. Ponere manum. 1. Iurare. Exod. 23. Iurare super lapidem. Super crucem. In cruce consecrata, non consecrata. Super reliquias. Ritus singularis, iurando stipulas in manibus tenere, deinde proiicere. In capitularibus descriptus quæ explicandus ex coniectura. Iurare super tumultum S. Dionysij. Super altarium. Iusiurandum mirum Iudæo à Christiano oblatum.*

**I**VRANDI ritus nunc nobis explicandi sunt & ij præsertim qui apud Christianos in usu esse cœperunt. Tactæ altari, Iusiurandum præstitum fuisse auctor est S. Chrysostomus homil. 9. in Act. Apost. Apud Gregorium Turonensem, & alios rerum nostrarum scriptores istud crebrò occurrit, *Positis super altare sanctum manibus.* Usitatum etiam istud apud Iudæos; Sic enim 3. Regum 8. scriptum est, *Si peccauerit homo in proximum suum, & habuerit aliquod*

*iuramentum quo teneatur adstrictus, & venerit propter iuramentum, Coram Altari tuo, in domum tuam. Propositis Sacris Euangeliiis. Iampridem iurandi mos inualuit, vt apparet in nonnullis actionibus Conciliorum, Ephesini, tom.2. c.6. & Calcedonensis Act.1. & 4. & secundum formulam Iurisiurandi descriptam à B. Gregorio lib.10. ep.31. Iurantem Sancta quatuor Euangelia in manibus tenere necessum est. Concilio Rhemenfi 22. q.5. c.22. Nullus ex Ecclesiastico ordine cuiquam laico quidquam super sacrosancta Euangelia iurare presumat, sed simpliciter cum veritate & puritate dicat, est, est, Non, non. Innumera sunt huius ritus apud Ecclesiasticos scriptores testimonia. Aliena subiiciam, & illud præsertim illustre, in Codice Iustiniano 3. tit.1. l.14. quo vult Imperator, Iudices omnes, quacunque ratione designati & lecti fuerint, non aliter litium primordium accipere, nisi prius ante sedem iudicalem Sacrosanctæ deponantur Scriptura, & hæ permaneant, non solum in principio litis, sed etiam in omnibus cognitionibus vsque ad ipsum terminum & definitiuæ sententiæ recitationem; Aduocatos per simili iuramento adstringit, etiam litigantes, vt habet synopsis Basilicorum 7. tit.16. Interim edicit Iustinianus, Tactis Sacrosanctis Euangeliiis Iusiurandum istud exhibendum esse cod.3. tit.28. l.1. quod Alexander Seuerus, corporaliter præstitum Iusiurandum appellauit, vt ex eodem Codice apparet, de qua re Iuriconsultorum nostri æui princeps Cujacius. Illud idem significare voluit Pelagius Papa, epist.3. qu.9. c.20. ad Decoratum Patricium, cum tactis Sacrosanctis Euangeliiis præbitum legaliter sacramentum dixit. Imitatio hæc videtur esse ritus Iudaici, in præstando iuramento, qui subobscurè designatur in Exodo 23. Nostra vulgata sic habet, Nec iunges manum tuam, vt pro  
impio*



*impio dicas falsum testimonium.* Santis versio, ex Hebræo, cum qua conuenit & illa Chaldæi Paraphrasta, *Nec ponas manum tuam cum impio, ut sis ei testis falsus.* Et exponunt rerum Hebraicarum peritissimi, *Ponere manum*, idem significare quod, *Iurare.* Ritus à Iudæis obseruatus ille est, vt iuraturi super librum legis, aut tale aliquid quod sacrum erat, manum ponere tenerentur: at hunc librum nonnisi dignum, idoneum, hoc est, summa religione scriptum & paratum, non vitiatum proponunt, & quo in suis Synagogis vtantur. Omne aliud iuramentum qualecunque sit & quauis forma expressum, ridet, ac pro nihilo ducunt; vnicum hoc legitimum agnoscunt & venerantur. Notat Glossa ad caput 22. q. 5. c. 10. Ecce dico, versutiam quorundam, qui *Super lapidem*, falsum iurabant, nec se existimabant periurij reos. Frauserat eiusmodi, vt cum super librum (Euangeliorum, vt ego interpretor) iurare deberent, lapidem aliquem supponebant, decipiendo eos quibus iurabatur, nec idcirco putabant se iuramenti vlla lege teneri, cum super lapidem iurassent. Reliquos ritus nostros videamus. Olim, *Super crucem*, nostri iurare solebant. Huius moris meminit Gratianus, atque iuxta inscriptionem, locum citat ex Pio Papa, 22. q. 5. c. 2. vnde caput præcedens desumptum est. Romani emendatores Gratiani, adnotarunt apud Burchardum & Iuonem caput istud citari ex Theodori, Græci hominis, Cantuariensis Archiepiscopi, Pœnitentiali. Sed quoniam non extat liber, licet Pœnitentiale Romanum, editore Antonio Augustino, viro incomparabili, magnam partem ex illo Theodori confectum sit: attamen aliunde inuestigare oportuit, extat verò in libro Pœnit. Bedæ venerabilis c. 9. de remediis peccatorum, iis verbis, *Qui sciens virtutem iuramenti, vel*

N

periurij, periurat in manu Episcopi, aut Presbyteri, vel Altari, vel Cruce consecrata, tres annos pœniteat. Si vero in Cruce non consecrata, unum annum pœniteat. Si autem in manu hominis, apud Græcos nihil est. Græcos, Antonius Augustinus, Gentiles interpretatur, quos Noui Testamenti Sacræ literæ, & vetustiores Ecclesiæ Patres Græci, sic indigetant. Ego Græcos vsitatiore vocabulo pro Gente explicare mallem, quoniam vt & historiæ & scriptores omnes passim docent, nulla natio adeo prona est, & procliuis ad iurandum & peierandum, quàm Græcorum, vnde natum veruerbium, *Græca fides*. Sed ad nostrum Iusiurandum reuertamur, & interim moneamus in nostro Gratiani Decreto edito, bis repeti (*In cruce non consecrata*) priore loco tollenda est vocula negandi (*non.*) Nam ex Bedæ cōtextu, duplicem crucem, super quam iuraretur, agnoscimus, consecratam vnā, alteram non consecratam, *Super Reliquias Sanctorum* iurarunt etiam nostri. Ita in Capitularibus 6. c. 209. *Omne sacramētum in Ecclesia & Super Reliquias, iuretur, & quod in Ecclesia iurandum est, vel cum sex electis, vel si duodecim esse debent, quales potuerit inuenire.* Sic illum Deus adiunget & illi Sancti quorum istæ Reliquiæ sunt, vt veritatem dicat. Eodem ritu pactum Caroli Calui capit. 2. & Henrici Regis firmatur, *Sic me Deus adiunget, & istæ Sanctæ Reliquiæ.* Et pluribus locis istud legere est in Capitularibus Caroli Calui. D. 63. c. 33. Quin extat forma iuramenti Othonis Magni, quo se Ioanni duodecimo Summo Pontifici obstringit & in ea adhibet SS. Trinitatem, lignum viuificæ Crucis & Reliquias Sanctorum. Interim præclarum hoc antiquitatis monumentum, cum permultis aliis, beneficio eruditissimi & humanissimi Sirmondi sumus consecuti, & Deo bene iuuante, multo plura eidem debi-



turi fumus. Apud Gregorium Turonensem 3. histor. Franc. c. 14. & alios rerum nostrarum scriptores, istud crebro occurrit, *Positis super altare sanctum manibus iurare*. Video in iisdem nostris Capitularibus & ritum & formam iurandi non satis perspectam. In eo capite quod reperitur lib. 6. Capitularium c. 285. Episcopi Gallicani grauitur conqueruntur de iis qui res, seu bona Ecclesiæ à Regibus petere, aut retentare, vel auferre, vel inuadere, vel vastare præsumerent. Sed quoniam nonnulli suspicabantur istud non fieri absque ipsorum Episcoporum conniuentia, hoc sacramento iis verbis concepto sese apud omnes purgare illi voluerunt: *Vt ergo omnis suspicio à nobis cunctis Sacerdotibus, & omnibus Christi & Sanctæ Dei Ecclesiæ fidelibus funditus auferatur, prostitemur omnes, stipulas (sic legendum, non stipulis) dextris in manibus tenentes, easque propriis è manibus eiicientes, coram Deo & Angelis eius, ac vobis cunctisque Sacerdotibus & populis circumstantibus, nec talia facere nec facere volentibus consentire, sed magis, Deo auxiliante, resistere. Quid istud sibi velit, Stipulas in manibus tenere, & easdem proicere.* Fateor me non satis capere, nisi forsan imitari voluerint ipsi Episcopi, ritum illum enuntiandæ excommunicationis solemnem, de quo sic Burchardus Decret. ii. c. 3. qui æuo Caroli Magni vixit, *Debent duodecim Sacerdotes Episcopum (tunc excommunicatum quempiam è suis Diocesanis) circumstare & lucernas ardescentes in manibus tenere, quas in conclusionem Anathematis vel excommunicationis, proicere debent in terram & conculcare pedibus, additâ eiusmodi execratione. Sicut hæc lucerna, de manibus nostris proiecta, hodie extinguuntur: sic eorum (qui hoc pacto excommunicati fuerint) lucerna in æternum extinguatur, nisi forte resipuerint, & Ecclesiæ Dei, quam laeserunt, per emendationem & condignam penitentiam*

*satisfecerint.* Est illud non prætermittendum, quod narrat Gregor. Turonensis 5. c. 32. *Super tumultum S. Dionysij*, aliquando iuratum fuisse. Mulier quædam matrimonio copulata, in suspicionem adulterij venerat, pater infontem affirmabat, propinqui & affines patri dixerunt: Si est innoxia, *Super tumultum hunc B. Dionysij Martyris*, sacramentis affirma. Pater eleuatis manibus, *Super Altarium* iurauit filiam non esse culpabilem. Iurisiurandi varia esse genera Iurisconsulti tradunt, & nos antea nonnihil de iis diximus. Est autem inter ea iuramentum de calumnia, cuius ritum formulamque, aliàs illectam inauditamque, in iure Græco-Romano 2. legere est. Iudæus quidam, factus Christianus, res quasdam sibi vendicabat, quas ad eum pertinere audacter Iudæi pernegabant, Quæstor iubet Iudæum, tum Christianum, iuramentum de calumnia præstare, cæteros vero Iudæos plenum, sed quale is qui ex Iudæo Christianus factus, præscriberet, quod ita expressit, vt vnusquisque ipsorum rubo cingatur, & infideat culeo, ac mare ingrediens (res Constantinopoli gesta videtur) ter Circuncisionem suam conspuat, his verbis vtens. Ita me iuuat Barasæ, Baraa, Adonai, Elohi, qui transduxit Israël per mare rubrum, siccis pedibus, & aquam eis è saxo potabilem præbuit, mannaque comedendum dedit eis, cum coturnicibus, licet ipsi fuerint ingrati, repudiatis porci carnibus. Per eam legem, quam Adonai promulgauit, perque spûs reiectionem hanc in corpus circuncisionis, & per rubum, quo cincti sunt lumbi mei. Non mentiendi causa, nomen Domini Sabaoth, in hoc Iureiurando assumo. Mitto cætera, quæ omnia quam fidem mereantur, indicent sapientiores.



## CAPVT QVINTVM.

*In Iureiurando præstando quæ desiderantur ex Philone. Nec nisi postulante necessitate. Eorum quæ prohibentur non una & eadem ratio. Intentio iurantis qualis esse debeat.*

**P**HILLO Alexandrinus ille, Platonis æmulus, de Decal. de legib. special. quàm eleganter de Iureiurando ritè & innoxie emittendo disserit, vultque in primis rem de qua iuramentum concipiendum sit, nobis esse notissimam, ne quid temerè affirmemus: Deinde quàm vera sit, tum vt ipse iuraturus, sit purus anima, corpore, lingua, illa, ab omni scelere & flagitio, corpore non immundo, lingua cuiusuis maledicentiæ experte, quandoquidem nefas sit per os, quo profertur nomen istud sanctissimum, quidquam turpe emanare. Et qui iurat, non odio, aut amore infano, vel immoderata cupiditate, impellatur. Deinde loci & temporis opportunitas perpendatur. Primum illud maximè animaduertendum, ne crebro, vel inconsultè, & leuitate quadam, ad præstandum Iusiurandum nos accingamus, vel adeo prorumpamus. Mirum in modum placet illa præcepti Dominici, Math. 5. *Sit sermo vester, est, est, non, non: quod autem amplius est, à malo est.* Interpretatio ex B. Augustino in ep. ad Galat. c. i. *Non est contra præceptum iuratio, quæ à malo est, non iurantis, sed incredulitatis eius cui iurare cogitur. Prohibemur ergo iurare, cupiditate, aut delectatione iurandi. Quamuis enim iuramentum amplius sit quam est, est, non, non, & ideo à malo sit, non tamen à malo tuo, sed infirmitatis aut incredulitatis eorum, qui non aliter mouentur ad fidem.* Et alio loco, *Si iurare cogeris, scias de necessitate*

N iij

venire infirmitatis eorum, quibus aliquid suades, quæ infirmitas  
 utique malum est, unde nos quotidie liberari deprecamur, cum  
 dicimus, *Libera nos à malò.* Itaque non dixit. Quod autem am-  
 plius est, malum est. Tu enim malum facis, qui bene vteris iura-  
 tione. Quamobrem illa B. Augustini cautio i. de serm. D.  
 in monte, c. 30. In iuramento præstando adhibita, potissi-  
 mum retinenda, ut non nisi necessitate postulante id fiat,  
 ita ut licet iuramentum prohibeatur, si res ita urgeat, iam  
 malum minimè censendum sit. Sunt enim nonnulla, quæ  
 quidem prohibentur, quia per se mala sunt, & ea nulla  
 omnino ratione fieri possunt citra noxam, veluti furtum,  
 adulterium, homicidium, quemadmodum probat sum-  
 mus ille Philosophiæ Magister Ethic. 3. c. 1. Alia vero sunt,  
 quæ prohibentur ex occasione & ex adiunctis, quoniam  
 ex iis, si frequenter fiant, mala inde promanant & subse-  
 quuntur. Apostolus Ephesiis vino interdicit, non quia  
 istud per se malum sit, sed quoniam ex immoderato illius  
 usu, multa contra legem Divinam & humanam commit-  
 tuntur. Apud Madaurensē Miles. 2. *Liber Veneris hortator*  
*& armiger.* Huius etiam generis fors est, de qua S. August.  
*Sors non aliquid mali est, sed res est in dubitatione humana, Di-*  
*vinam indicans voluntatem.* Gratiani 26. q. 2. c. 1. glossæ ex-  
 plicatio est eiusmodi: Sortibus nihil mali inesse monstra-  
 tur, prohibetur tamen fidelibus, ne sub hac specie Diui-  
 nationis ad antiquos Idololatriæ cultus redirent. Sed cum  
 necessitas postulat, pro re vera, licita & honesta, iurari po-  
 test, sunt enim hæ tres iuramenti legitimi conditiones, ab  
 Hieremia 4. Prophetæ constitutæ, *Et iurabis, vivit Domi-*  
*nus, in veritate & in iudicio, & in iustitia.* Quamquam ut  
 hoc obiter dicam, B. Hieronymus in c. 4. Hierem. expli-  
 cans hunc locum, ait, *Iurandi,* vocem hîc pro confessione



vsurpari & ad condemnationem Idolorum, per quæ iurabat Israël. Cætera quæ speciatim de iuramento dici possent, sciens & lubens omitto, quandoquidem ista, ad leuissimas vsque minutias, sunt pertractata ab iis qui Theologiam moralem illustrarunt. De intentione iurantis pauca nobis dicenda sunt. Ac præ cæteris, S. Basilus, in psal. 14. audiendus est. De huiusmodi rebus quæ omnino perspectæ sunt & cognitæ, dum adstruis & affirmas, annue. De his vero quæ non ita se habent, etsi omnes homines adhortarentur & obsecrarent, nunquam vlllo pacto inducaris, vt contra rei veritatem affirmes. Citra vllam verborum implicationem, ad aliud respiciens, ipsam per se veritatem studeto exprimere, simplici ac nuda vsus assensione. Tremenda B. Gregorij 26. Moral. 7. c. sententia: *Humana aures verba nostra talia iudicant, qualia foris sonant. Diuina vero iudicia talia ea audiunt, qualia ex intimis proferuntur.* Certè nouerit ille, qui intentionem & voluntatem alterius variis explicat verbis, quia non debet aliquis verba considerare, sed voluntatem & intentionem, quia non debet intentio verbis deferuire, sed verba intentioni. Nec aliter Isidorus sent. lib. 2. c. 31. *Quacunque arte verborum quisque iuret, Deus tamen, qui conscientia testis est, ita hoc accipit, sicut ille, cui iuratur, intelligit.* Dupliciter autem reus fit, quia & Dei nomen in vanum assumit, & proximum dolo capit. Tacitus 4. histor. istud vocat, *Verba Iurisurandi per varias artes mutare.* Neque vero cuiquam dubium esse potest Iusurandum ad Dei cultum pertinere, cum qui illud violarit, impietatis scelere sese obstringat, vt Philo lib. de spec. leg. grauissimè demonstrat, nec immeritò, cum iurandi forma Deum vt Dominum & superiorem nostrum intocemus. Neque alterius generis esse illud credendum est, atque sacra & sacrificia, qui-

bus pacta firmantur, quemadmodum Sacrae & prophetae litterae nos docent. At haec quantumvis ad utilitatem nostram comparata sint, nequaquam tamen pro cuiusque arbitrio & voluntate, quin & ingenio, peragenda sunt.

## CAPVT SEXTVM.

*Qui iurare legibus prohibeantur apud Gentiles, apud Christianos. De Clericis quo pacto istud intelligi debeat, explicat Photius, & ad eum Balsamo. Inscriptio quid. De Episcopis, alia Codicis, alia Nouellarum sententia. Paruuli iurare non coguntur, & quo aetatis anno ad iurandum adigi possunt.*

**Q**VAMQVAM superiori capite praeccepti Domini de non iurando interpretationem ex S. Augustino & aliis didicerimus eiusmodi, ut non nisi ingruente necessitate Iusiurandum praestemus, nihilominus apud nos res sic se habet, ut nonnulli omnino iurare, legibus prohibeantur. Apud Romanos illos veteres, Flamen Dialis & Vestales minimè compellebantur iurare: Sic ex Fabio Pictore Agellius 10. c. 15. *Sacerdotē Vestalem & Flaminem Dialē, in omni mea iurisdictione iurare non cogam.* Praetoris verba sunt, ex edicto perpetuo. Seneca Pater 6. Controu. 8. paulo aliter, *Sacerdos raro iuret, nec vnquam nisi per suam Vestem.* De Vestali loquitur. Apud Christianos res non ita constituta est. Christianus, qualem effingit Clemens Alexandrinus Strom. 7. etiamsi rogatus, nunquam iurare dicitur. Nam cum iuste viuat, nihil ex iis quae decet fieri praetermittens, ubi examinatur iudicium veritatis, ipse factis verè & sanctè iurat. Itaque illi superfluum est linguae testimonium. S. Gregorius Nazianzenus orat. 1. in Iul. dum variis



rijs modis Christianam doctrinam commendat, illud inter cætera numerat, quod apud Christianos periurium adeo atrox & nefarium censeatur, vt Iusiurandum quoque ipsum nobis solis interdictum sit. Isidorus Pelusiota i. ep. 155. non modo non iurandum esse penitus contendit, ac ne quidem ab alio iuramentum exigendum, & duplici quidem ratione: Vna quod veritatis amans sit & studiosus qui interrogatur, ac proinde nonnisi verum illum enuntiaturum esse credendum est, etiamsi nullum adhibeatur iuramentum. Altera, quod si res agatur cum eo qui libenter mentitur, frustra Iusiurandum exigas, quia ita assuevit, proculdubio mentietur. Sed ista non alia interpretatione indigent, nisi quod citra necessitatem, & vbi res nec certa sit, vel honesta & licita, tum iuramentum omne repudiandum sit. Sequentibus seculis, pro diuerso personarum statu, Iurisiurandi religioni prospectum esse voluerunt. Iustinianus Imperator, Nouell. 123. de Clericis vniuersim istud pronuntiauit, *Ecclesiasticis regulis & Canone à Beatissimis Episcopis antiquitus instituto, Clerici iurare prohibentur.* Ita Photius in Nomocanone tit. 9. tit. 27. Leges & Canones vetant Clericum iurare. Et si alio loco exceptionem huiusmodi addat Photius. Si est suspicio de Clerico, quod eius qui confugit, res habeat, ille, iussu sui Episcopi, iuret. Ad Photij priorem locum lepidus est Balsamo, qui scribit nec legem nec Canonem reperiri qui prohibeat vel permittat Clericos iurare. Sed posteriori loco, quærit, an debeant Episcopi & Clerici præstare sacramenta corporalia (id est tæctis Sacris Euangelis,) & contendit Episcopum & Clericum omnino iurare prohiberi, quod de isto corporali iuramento interpretatur, ita tamen vt aliud sacramentum præstent, quod,

O

*Inscriptionem*, vocat, quæ corporalis iuramenti loco habeatur, & compleat omnia quæcumque sacramentum corporale facturum esset. Forsan *Inscriptionis* nomine intelligit merum testimonium, quod Episcopus enuntiat, oblatis Sanctis Euangelis. De qua re Iustinianus agit in Nouellis & Iuliani Antecessoris Nouell. 115. num. 435. latina versio est huiusmodi, *Nullus Episcopus cogatur ad iudicium venire, testimonij dicendi causa, sed Iudex apud Episcopum mittat ministros suos, ut, propositis Sanctis Euangelis, quod scit Episcopus dicat secundum hoc quod Sacerdotibus honestum est & deceat.* Extat in Codice Theodosiano locus elegans hac de re. Inscriptio ita habet, *Pars actorum habitorum in Consistorio, apud Imperatores Gratianum, Valentinianum & Theodosium, Constantinopoli.* Imperator Theodosius A. dixit, *Episcopus nec honore, nec legibus ad testimonium flagitatur. Item dixit, Episcopum ad testimonium dicendum admitti non decet. Nam & persona dehonoreratur, & dignitas Sacerdotis excepta confunditur.* Concilium Rhemense 22. q. 5. c. 22. non multum discrepat ab ea sententia cuius Canon sic habetur, *Nullus ex Ecclesiastico ordine cuiquam Laico quiddam super Sacrosancta Evangelia iurare præsumat, sed simpliciter cum veritate & puritate dicat est, est, non, non.* Sunt & alij qui à iurandi necessitate absoluuntur. Capitularium libro primo, *Paruuli qui sine rationabili ætate sunt, non cogantur iurare, sicut Guncbodigni faciunt. Et qui semel periuratus fuerit, nec testis sit post hæc, nec ad sacramentum accedat, nec in sua causa, vel alterius iurator existat.* Guncbodigni sunt Burgundiones, interprete Francisco Pithæo, viro eruditione præstanti, sic dicti à Gundobado Burgundionum Rege, qui leges suis humanitatis & benignitatis plenas condidit, ut au-



ctor est Gregorius Turon. l. 2. c. 33. histor. ex Concilio Hibernensi (vt citat Burchardus,) *Pueri ante annos quatuordecim non cogantur iurare.* Neque verò præter oleas illud à me additum existimet, quod de iuramenti solutione dicturi sumus ne quis in ea disputatione quidpiam desideret, istud adiungi placuit, sed nostro more, vt non anxie & enucleatè omnia persequi velimus quæ à nostris hominibus fusissimè pertractata leguntur, sed delibare, & quod rei caput est, indicare satis erit. Iusiurandum omne vel in Deum dirigitur vel in hominem. Ne quis verò rem aliter se habere existimet, cùm ex antecedentibus capitibus omne iuramentum in Deum referri satis accuratè docuerimus. Illud intelligendum venit, Iusiurandum omne ex sui natura nos obligare Deo potissimum, ac primo loco, veruntamen si hominis utilitatem istud respiciat, remittente homine, cui iuratum est, & Deus remittit. Denique hoc indubitatum ratumque seruandum est, si qui iurat directè ac præcipuè Deo placere vult, à Deo, vel ab eo qui in terris Dei vices gerit, ipsum iuramenti fide soluendum esse. Iurisiurandi gratiam facere istud appellabant: & vno nomine, Innocentij tertij, quem, Iurisconsultorum nostri æui summus, Iurisconsultissimum fuisse affirmat, effatum istud placet maximè, *In unoquoque iuramento exceptam intelligi Superioris auctoritatem.*

## CAPVT SEPTIMVM.

*Ex iurandi facilitate mentiendi consuetudo. Mendacium duplex. In habitu, in verbis. Quis habitus conueniens. Triplex mendacium circa verba. Mendax triplex. Serui mendaces, vnde. Periurium ex praua consuetudine iurandi. Periurij causa variae & multiplices. Qui periurio rem sibi quarunt. Periurio an poena aliqua constituta. Pontifices Romani Gentiles, causarum ad Sacra pertinentium Iudices, inde periurij, de quo & Censores. Periuris poena grauis indicta, Capitularium legibus. Periurij exagitatio.*

**V**T in virtute fieri amat, idem in vitio euenire perspicimus, vna siquidem virtute comparata, cum omnes inter se connexae & colligatae sint, ad ceteras deinceps facilis est accessio, quandoquidem se vltro offerant. Is est progressus hominis virtutum amore flagrantis, ita canit Rex & Propheta, *Ibunt de virtute in virtutem*. Vitij non alia ratio, sic enim se habet vitium suiipsius naturam, vt mera sit illecebra merumque illicium, quod ad aliud facilem viam struat, & hinc lapsus procliuis. Vnde illud Satyrici 2.

— *Nemo repente fuit turpissimus.*

Nec aliter se habet res de qua dicere instituiamus, cum ex mentiendi facilitate & consuetudine, iurandi facilitas nascatur, tum ex iurandi consuetudine periurium nullo negotio sequatur. Primum illud de mendacij vsu frequentius examinemus. S. Ambrosius ep. 15. mendacium duplex constituit, *Vnum in habitu, alterum in verbo*. Prius ex Scriptura explicat, in repetita lege, quam nos, Deuterono-



nium 22. vocamus, vbi hæc habentur, secundum versio-  
nem ex Hebræo, & firmat illa Paraphrastæ Chaldaei, *Non  
erunt arma viri super mulierem, seu, Non sit apparatus armorum  
viri in muliere.* Mihi magis arridet nostra vulgata, *Non in-  
duetur mulier veste viri, nec vir utetur veste feminea.* Sanctus  
ille Præsul Mediolanensis, vniuersim istud exponit, ne  
quis de solis vestimentis agi putet, *Quàm deforme,* inquit,  
*virum facere opera muliebria.* Ergo & pariant, ergo parturiant  
qui crispant comam, sicut femina; & tamen illæ velantur, isti bel-  
ligerantur. A mulieribus vt viri nonnulli cincinnis & calami-  
stris vt didicerunt, sic & emendicatis capillis. De qua re  
nobis alio loco, si Deus dederit, dicendum erit. De vestitu,  
qui mulieres magis quàm viros deceat, istud satis liberè  
scripsit Clemens Alexandrinus 3. Pedag. c. 2. Cultus facit  
mulieres meretrices, viros Androgynos, apud Platonem  
A natura & ab vsu lex est, nudum in foro ambulare non  
oportere, aut muliebri veste vt, etsi nulla lege scripta veti-  
tum sit. Suauissimi & Sanctissimi Bernardi confid. 3. c. 5. illa  
vox est, *Forma vestium, deformitatis mentium & morum indi-  
cium est.* Sed hæc alterius loci sunt. De mendacio in verbo  
& sermone pauca dicamus. Iurisconsultis cod. 1. tit. 22. l. 2.  
triplex est mendacium, in Iuris narratione, in facti, in ta-  
cendi fraude. De facti mendacio, hoc vnum proferam ex  
B. Ambrosio, vt suprà: *Non solum in falsis verbis, sed etiam  
in simulatis operibus mendacium est. Mendacium namque est  
Christianum se dicere & opera Christi non facere. Mendacium  
est Episcopum, Sacerdotem, vel Clericum se profiteri, & contra-  
ria huic ordini operari.* Alij mendacem triplicem faciunt.  
Primum, qui sine vtilitate vllius, sed sola leuitate aliqua  
mentitur, vt Thrasones illi, qui suas res præclarè gestas (si  
Diuis placet) mirificè extollunt: vt ille apud Plautum, Mi-

O iij

lit. glor. qui sexaginta millia hominum volaticorum se vno die suis manibus occidisse gloriabatur. Et alter ille, qui suo spiritu legiones difflabat. Vanum hunc vocat Seruius, in 2. Æneid. Secundum, qui solo fallendi animo, sine cuiusquam damno mentitur, ait Seruius Idem. Mendax alius qui totus ad nocendum comparatus est; cui generi præsertim adscribendi sunt, qui *ambiguè loquentes*, vt habet S. Augustinus, ep. 135. siue, oratione intorta, qualem describit à simili Plautus, de Inuoluolo, quæ in pampini folio intorta, implicat se, ita homines eiusmodi, sic suos sermones concinnant, vt alium atque alium sensum completantur, quos ex Festo, *Alterplices*, id est, duplices meritò dixeris. Ille idem Sanctissimus Episcopus, ep. 224. *Illud sane rectissimè dici non ambigo, non secundum verbum iurantis, sed secundum expectationem illius, cui iuratur, quam nouit ille qui iurat, fidem iurationis impleri. Vnde periuri sunt qui seruatis verbis, expectationem eorum, quibus iuratum est, deceperunt, & periuri non sunt, qui etiam verbis non seruatis, illud quod ab eis cum iurarent expectatum est, impleuerunt.* Seneca rectissimè, epistola 83. Ambiguitate verbi quærere locum fraudi istud faciendum non est vbi veritas quæritur. Lactantio Epitom. *Mendacium semper aut fallit, aut nocet.* Neque verò fallendi verbo, semper damnum aliquod comprehendi aliquis existimet. Additenim hæc Lactantius, *Non est ergo vir iustus, qui etiam sine noxa, vitioso sermone mentitur. Nam non usurpat illud Lucilianum; homini amico ac familiari, non est mentiri meum; Sed etiam inimico, atque ignoto existimabit non esse mentiri suum: nec aliquando committere vt lingua, interpret animi, à sensu & cogitatione discordet.* Illud per sæpe videmus, nonnullos proposito etiam vel minimo lucro, vtrò mentiri. Vnde Eusebius Cæsariensis 4. de



vita Constant. dicebat, Neminem velle se frustra mendacem esse. Eam ob rem Seneca epist. 69. *Nullum sine auctoramento malum esse* aiebat. Sallustius orat. 2. ad C. Caesar. eodem sensu: *Malitia præmiis exercetur; ubi ea dempseris, nemo omnium gratuito malus est.* Quamquam dissimulare non possum etiam reperiri mendaces, iam non sponte sua, etiam citra vllius, nisi suiipsius, detrimentum, à quibus vi extortum fuerit mendacium, quod in seruis nimisquam verum est, si vni Saluiano 4. credimus: *Mendaces serui esse dicuntur. Ad mendacium atrocitate præsentis supplicij coarctantur. Siquidem dum tormentis se volunt eximere, mentiuntur. Quid autem mirum est, si positus in metu seruus, mentiri mauult quàm flagellari?* Apud B. Ambrosium ep. 72. *Nimia seueritas extorquet plerumque terrore mendacium.* Non est igitur mirandum, si tam crebra existant mendacia, quæ proculdubio Iurandi facilitatem inducunt, cum seu cupiditas, seu mali imminentiæ metus, homines vltro ad quiduis audendum & perpetrandum impellant. At ubi aliquoties tam facile iurare cœperint, iam nullus pudor, & inde rebus suis aliquam, eamque non leuem accessiorem fieri animaduertunt, vt loquitur Petronius, Satyric. *Nemo eorum cælum putat, nemo Iusiurandum seruat, nemo Iouem pluris facit; sed omnes opertis oculis bona sua computant.* Nunc superest vt alteram propositionis nostræ partem examinemus, videlicet ex praua Iurandi consuetudine perjurium facillimè consequi. Theophr. in Characteribus, c. 19. Perditi ac desperati hominis primariam hanc notam esse dicit, facile & leues ob causas Iurare. Atque inde ad perjurium facilem lapsum esse indicat Philo de leg. special. cum ait, consuetudinem Iurandi crebro, argumentum esse perfidiæ, non fidei. At quæ maior perfidia

excogitari potest, quàm perjurio & Iuratione falsa conscientiam contaminare? Sed vt habet S. Augustinus in Ep. ad Galat. *Multi in ore habent Iurationem, tanquam magnum aut suauē aliquid.* Non aliter Saluianus 4. apud quem hæc legas: *Apud nonnullos Christi nomen non videatur iam sacramentum esse, sed sermo.* Et quod ad nostram disputationem facit: *Quis est omnino hominum secularium, præter paucos, qui non ad hoc Christi nomen in ore habeat vt peieret?* Quàm religiosè S. Augustinus de verb. Apost. Serm. 28. suos ab ista Iurandi facilitate dehortatur, & pro suo acumine, illud Iacobi Apostoli, *Ante omnia nolite Iurare*, sic exponit: *Isto verbo quod ait, ANTE OMNIA, cautos nos fecit aduersus linguam nostram. ANTE OMNIA, ait, vt attendatis præ cæteris, vt vigiletis, ne surrepat vobis consuetudo Iurandi.* Ille idem alio loco: *Ita ergo præcepisse Dominum intelligitur ne Iuretur, ne quisquam, sicut bonum, appetat Iusiurandum, & assiduitate Iurandi ad periurium per consuetudinem delabatur.* Gothorum gentem perfidam, & Francos illos veteres nondum Christianos mendaces non alia ratione dixit Saluianus 4. quin Episcopus ille sanctissimus B. Augustinus, in publico fidelium conuentu, dum Sacra Liturgia celebraretur, inhonestam illam Iurandi consuetudinem sui ipsius exemplo damnat: *Iurauimus & nos passim, habuimus istam teterrimam consuetudinem, & mortiferam. Dico charitati vestre, ex quo Deo seruire cepimus, & quantum malum sit in periurio vidimus, timuimus vehementer, & veternosissimam consuetudinem timore frenauimus, frenata restringitur, restricta languescit, languescens emoritur, & malæ consuetudini bona succedit.* Nec vero ex hac sola Iurandi facilitate periurium nasci credendum est, quin etiam si magna lucri spes affulserit, nullo negotio peierare solent



solent ij, qui magnâ habendi cupiditate ducuntur. Tacito II. Annal. *Fides integra non manet, ubi magnitudo quaestuum spectatur.* Ita est profecto, cum nonnulli, quali ex instituto vitæ, periurio rem sibi quærant. Apud Plautum Pseud. Lanij, Lenones memorantur. Caupones, Propolas, Salgamentarios numerat Saluianus, 4. ad Eccl. Cath. Cuius hic locus elegans mihi visus: *Si tibi quicumque ex Cauponibus qui promitteret, fidem promittenti non al negares. Si mutuum quidpiam Propola aut Salgamentarius postularet, redditurum eum non diffideres, quæ dedisses. Mendacibus denique interdum atque periuris, cautione facta, & dato fideiussore, res creditur. Christus tibi & fidelissimam cautionem, & fideiussores optimos dedit, Apostolos, Patriarchas, Prophetas, Martyres suos, totam denique Diuinarum literarum seriem, & non credis ei, nec fidem commodas?* Clemens Alexandrinus 3. Pædag. eodem sensu, ita Christianos admonet: Qui aliquid vendit, aut emit, eorum quæ à se venundantur, aut emuntur, nunquam duo dicat pretia. Absit omnino reprehendendum Iusiurandum ab eo quod venditur, ita sese gerant negotiatores forenses & Caupones. Et generatim Saluianus idem istud pronuntiauit: *Quid aliud cunctorum negotiantium vita, quam fraus & periurium?* Neque verò vel à consuetudine, vel à lucri non mediocris expectatione, periurium originem tantummodo ducere existimandum est, sed penitus deprauatis hominum moribus istud tribuendum. Huius rei extat apud Platonem, Dialog. 12. de Legib. præclara dissertatio, cuius hæc summa est. Rhadamantum suo, id est, aureo sæculo, simpliciter ac citò iudicia peregrisse, quandoquidem Iureiurando in singulis causis à litigantibus requisito, confestim simul ac tuto iudicare soleret. Nunc verò cum mortalium alij Deos esse

negent, alij res humanas curare non putent, plurimi verò & pessimi, vilissimis hostiis & ineptis blanditiis, eos ita sibi conciliari existiment, vt impunè liceat, peierando, grandem pecuniam extorquere. Itaque Rhadamanti modus iudicandi abrogatus est, mutata hominum de Diis opinione, ac proinde legibus commutatis. Propterea Legissator sapiens in iudiciis Iusiurandum litigantium prohibebit, adeo vt accusatoris intentio, ac defensoris deprecatio, sine Iureiurando in iudiciis describatur. Alioquin si passim omnibus Iurisiurandi licentia tribueretur, quamplurimi deprehenderentur periuri, quum facile vel quibusuis muneribus illecti, vel affinitate & sanguinis cognatione periurium admitterent. Ita censet B. August. 3. Ciuit. c. 2. *Nam corruptissimis moribus ad hoc mos Iurandi seruabatur antiquus, non vt à sceleribus, metu Religionis, prohiberentur, sed vt periuria quoque sceleribus ceteris adderentur.* Videtur autem non Catos illos, ac fide & probitate insignes Romanos intelligere, Sanctissimus Antistes, sed planè corruptam, & inquinatissimis moribus fœdatam atque adeo in extremum discrimen, exitiumque adductam Rempubicam Romanam, qualem suo æuo descripsit Sallustius, Iugurth. & Catilin. Et quis non tunc temporis, apud id genus Romanos, periurium, risum, iocumque fuisse dixerit? Imò cum Pacuio, periurium nihil aliud fuisse quàm mantile, quo quotidianæ noxæ & maculæ extergenterentur. Sic locum hunc Pacuij, apud Festum, aliis depositum, ingeniosissimè illustris Iosephus Scaliger restituit & emendauit, quem propter venustatem & leporem antiquum subiiciam:

*Machinam ordiris nouam manticulatam astu,  
Sanctiora adigis Iuranda, quibus quotidie  
Paruæ noxæ extergantur.*



*Mantica*, vt hoc dicam obiter, antiquitus dicebantur mantilia, quibus manus exterguntur, hæc vir maximus. Non abludit à sententia Pacuij Laberij Mimographus, cum dixit:

*Quid est Iusiurandum? emplastrum aëris alieni.*

At dicet quispiam, rei tam nefandæ, tam detestandæ, periurio scilicet, nullane apud veteres pœna constituta est? Magna certè ista quæstio. Oratori Principi hoc visum suis in legibus: *Periurij pœna Diuina, exitium: humana, dedecus.* Idem sensisse videtur Alexander Seuerus, Cod. 4. tit. 1. l. 2. alioquin optimus Imperator: *Iurifurandi contempta Religio satis Deum ultorem habet. Periculum autem corporis vel Maiestatis crimen, secundum constituta Diuorum parentum meorum, etsi per Principis venerationem, quodam calore, fuit peieratum, inferri non placet.* Legem istam nostri non probabunt, sat scio, cum qui consultò, per Principis Maiestatem peierasset, Maiestatis crimine aliquo pacto teneretur, ac proinde supplicio dignus: At qui per Deum, nulli pœnæ obnoxius erat. Hoc prisci illi Ecclesiæ Scriptores, Tertullianus & Minutius Fœlix, adeò grauitertulerunt, vt, magna cum Romani nominis contumelia, istud stomachosè Gentilibus exprobauerint, cuius rei meminimus & antea. Nihilominus periuros olim apud Romanos pœnâ non caruisse verosimilius est, quod ex eo colligere est, quoniam, ex Dionys. Halicarn. Pontifices de omnibus causis ad sacra pertinentibus, tam inter priuatos homines, quàm inter Magistratus iudicasse constet. Periurium verò ad Diuini Numinis cultum religionemque læsam pertinere nemo sanus negabit. Atqui istud firmari potest loco Plauti, Rudente:

*Gripe, quid tu istum talentum poscis? Gr. Iuratum est mihi;*

P ij

*Dare, La. Libet Iurare: tunc meo Pontifex, periurio es?*  
*Pontifex pro Iudice, de quo nos in auctiore Commentario*  
*de Sacra Episcoporum auctoritate. Sunt qui Censores in*  
*periuros animaduertisse existimant, ex iis Oratoris Princi-*  
*pis verbis, Censores nulla de re diligentius quàm de Iureiurando*  
*iudicabant. Istud etiam comprobatur exemplo decem*  
*captiuorum Romanorum, ab Annibale, accepto ab iis*  
*prius Iureiurando, Romam remissorum, qui permutatio-*  
*ne à suis non impetrata, cùm ad Annibalem non rediis-*  
*sent, à Censoribus, postea, omnium notarum & damnis*  
*& ignominiis affecti sunt. Porro quod ad legem illam*  
*Alexandri Seueri spectat, eius & elegantem & accuratam*  
*grauiorum Iurisconsultorum adductis sententiis inter-*  
*pretationem, legere est apud doctissimum & diligentissi-*  
*imum Menochium Cas. 319. Posterioribus seculis qui per-*  
*iurium admisissent, non impunè abibant. Apud nostros*  
*Gallo-Francos, Capitularium lib. 3. c. 3. De periuriis, Vt ca-*  
*ueantur, & non admittantur testes ad iuramentum, antequam*  
*discutiantur. Et si quis conuictus fuerit periurij, perdat manum,*  
*aut redimat. Ita lib. 5. Capitul. c. 125. De eo qui periurium fece-*  
*rit ut nullam redemptionem soluat, sed manum perdat. Quod si*  
*accusator contendere voluerit de ipso periurio, stet ad Crucem.*  
*Vnus aut alter scrupulus, qui ex hoc capite nasci posset,*  
*dissoluendus est. Prior est, quo negat legis istà particulâ,*  
*periurium, seu pecunia, seu aliâ ratione, absque vllò cor-*  
*poris detrimento, redimi posse, & tamen superiori allato*  
*capite, licebat pœnam istam corporalem redimere, &*  
*merito sublata est postea redemptio, cùm huius beneficio,*  
*multò facilius & liberius, ad peierandum homines istius*  
*temporis prorumperent. Ad Crucem vero stare, nihil*  
*aliud indicare arbitror, quàm quod lib. 1. Capitularium*



scriptum est, *Sancitum est ut nullus deinceps quamlibet examinationem Crucis facere presumat.* Et nos antea diximus, apud huius seculi homines morem hunc receptum fuisse, ut in Cruce, siue consecrata, siue non consecrata, iuraret. Quod priscis Canonibus pœnitentialibus maximè prohibitum est, idemque hoc loco Capitularium significatur. Tandem aliquando hanc de iurandi religione dissertationem absoluiamus, & quanto scelere atque impietate sese obstringant periuri, non meis, sed Sanctorum Episcoporum verbis intelligant. S. Augustinus de verb. Apost. serm. 28. ut suos auocaret à iurandi consuetudine quotidiana, crebra, sine causa, nullo extorquente, nullo de illorum verbis dubitante, ita in alteram partem propendet, ut nullo pacto iurandum esse putet, nisi magna necessitate compellantur, & cautiores, imo religiosiores esse vult ipsis Gentilibus, qui timent per lapides (hoc est Idola Deorum suorum) falsum iurare, *Tu non times Deum præsentem, Deum uiuentem, Deum scientem, Deum manentem, Deum in contemptorem vindicantem?* Claudis ille templum super lapidem (id est Idolum) & it ad domum suam. Ipse super Deum suum clausit; & tamen quando illi dicitur, iura per Iouem, quasi præsentis oculos timet. Eodem pacto Saluianus Episcoporum Magister, *Quàm minori peccato Pagani per Dæmonia peierant, quàm nos per Christum?* Quamto minoris res criminis est, Iouis nomen quàm Christi? Ibi homo est mortuus, per quem iuratur; hic Deus uiuus, qui peieratur; Ibi nec homo ullus, nec Deus summus; hic cum maximi sacramenti sit deieratio, necesse est maximi sit reatus peieratio. Ibi cum prope nullum sit iuramentum, nullum constat esse periurium. Nam cum Deus non sit per quem iuratur, non est periurium cum peieratur. Annon ista pudorem incuriunt Christiano ad periurium sese comparanti, quæ à

Themistio, orat. i. equidem præstantissimo Philosopho, & ab ipsis Imperatoribus, publicis suarum legum monumentis, laudato, sed tamen gentili, differuntur. Scribit vero nullam esse magis ab hominum societate abhorrentem malitiam, quàm perfidiæ & infidelitatis. Quippe quæ unicuique vitium sit, aduersus quod nullam cautionem ac præuisionem comparare possimus. Quod enim solum præsidium habemus, videlicet Iusiurandum, ac Deorum inuocationem, hoc ipso maximè abutitur, ut facilius lateat. Vno nomine, periurium est certissima societatis humane pestis ac perniciēs: Cum enim homines, sine pactis, conuentis, mutua quadam societate, consistere nequeant, horum sublata fide, immani detestandi periurij scelere, quæ hominum inter se societas cœtusque haberi potest? Rectè igitur Harmenopulus, Iusiurandum esse dixit solutionem obligationis naturalis & transactionem. Addo hominum inter se societatem non modo periurij nefando flagitio non tam labefactari, quin penitus conuelli, verumetiam religionem omnemque in Deum pietatem ex hominum animis euanescere, siquidem cultus omnis & religio Diuini Numinis nonnisi metu & reuerentia constare potest. At qui periurium risum iocumque faciunt, Deum præpotentem se minimè formidare fatentur. Quis igitur in illis pietatis & religionis sensus superesse potest? Finio hac aurea Sanctissimi Episcopi & summi in Ecclesia Christi Doctoris Augustini sup. sententia, *Falsa iuratio exitiosa est, vera iuratio periculosa est, nulla iuratio secura est.*





## MYSTERIA.

## §. 1.

**N**ATURÆ arcana non omnibus nota. Deum Ignoratum esse, quid sit apud Scriptores prophanos; Explicatio ex Apostolo & Theodoro, sancto Cypriano, Minutio.

## §. 2.

Gentilium mysteria. Quid mysterium, variè. Mysterij notatio ex Iamblico.

## §. 3.

Mysteriorum silentium, cuiusmodi & eius usus antiquissimus apud Gentiles. Diagoras, Alcibiades, Impij habiti, propter vulgata mysteria.

## §. 4.

Mysteriorum occultatio repetita, ex opertaneis, symbolis, vocabulis, locutionibus subobscuris; Clementis locus ad id expersus. Qui apud Gentiles inter Deos relati, nomen sortiebantur aliud ab eo quod antea inter mortales obtinebant. Aliud idioma cælestium, aliud mortaliū. Mosis triplex nomen, In Circuncisione, ex euentu, in cælo. De nomine Iesu, in cælo, apud Angelos, in terris, Lactantij sententia.

## §. 5.

Mysteriorum libri arcanis literis scripti. Ægyptiorum literæ, seu triplex, seu duplex scribendi genus. Pythagoras Circuncisus, B. Ambrosio Iudæus.

## §. 6.

*Mysteriorum occultatio apud Gentiles, aut ratione personarum, aut rerum. Profani à Sacris expulsi. Orphæi versus, qui apud S. Iustin. Mart. & Theodoret. non sunt Orphæi, sed Onomacriti. Dissidium Senecæ patris cum Lactantio, de admittendis in Templis Gentilium piratis, gladiatoribus, meretricibus, &c. De Impuris à Sacris arcendis. Illustratio ex Cod. Theod. Gentili prægnanti prohibitus Templi ingressus. Obliqua imitatio Iudeorum.*

## §. 7.

*Mysteriorum occultatio ex rebus, ex locis. Adyta quid sint, quàm varia. Ioseph Patriarcha Serapis Ægyptiorum: Præfectus Prætorio dictus.*

## §. 8.

*Mysteriorum apud Gentiles occultatorum tres causæ: Prima, maioris venerationis gratia. Secunda, quia in ijs multa obscena. Tertia, quia plurima in ijs magica. Explicatio versiculi Davidici de Etruria, & loci Ciceroniani de Disciplina Etruscæ origine. Descriptio Sacrorum horum Magicorum. P. Nigidius figulus Magus. Sacra mysteria magica apud Eunapium.*

## §. 9.

*Philosophis sua non defuerunt arcana, etiam vocabula à vulgi usu longè alia.*

## §. 10.

*Iudeorum Mysteria. Qui panes subcineritij à Propheta imperati, & quid significant. Quis ille Propheta, apud Clementem Alexandrinum. Occultatio mysteriorum duplici velo expressa. Gentilis qui legem Iudaicam amplecti vellet, quæ Catechesis & institutio. Septem præcepta à Deo data ante legem Mosaicam.*

## §. 11.

*Christiana Religionis mysteria, ex collatione legis Mosaicæ.  
Mysterium*



*Mysterium respectu personarum, duplicem sortitur notionem, explicatio loci Math. 7. Nolite dare sanctum canibus. Clementis locus ex Euangelio ignoto, fortean Nazoreorum. Gentilibus ante Constantinum M. negatus accessus ad Ecclesias Christianas. Mysterij notio altera: Non omnes fideles mysteriorum capaces, ex Scriptura. Versio vulgata expensa Hebr. 5. Rom. 11. Ephes. 3. Psal. 118.*

## §. 12.

*Ex SS. Patribus Mysteria non omnibus aperienda. Dogmata ad mysteria pertinere, quorum alia scripta, alia minime scripto tradita. S. Scriptura obsignata Davidis sigillo, & qua ipsius inscriptio. Catechumeni, Nouitoli Tertulliano. Prophanus multiplici significato ut & Idiota.*

## §. 13.

*Mysteriorum Christian. occultandorum qua ratio. Qua reuerentia & reuerentia in Sacris. Ecclesia mysteriorum locus, in quo secreta caelestia. Explanatio loci apud S. Augustinum, Epist. 43. ex Seneca & Quintiliano.*

Q

## Myſteria.

§. 1.

**S**I verè de Natura iſtud à Seneca pronun-  
tatum eſt, lib. 7. Quæſt. Natural. cap. 31.  
*Natura arcana non promiſcue, nec omnibus  
patent, remota, & in interiore ſacrario clauſa  
ſunt.* Quanto rectius de Deo & Dei Reli-  
gione iſtud uſurpandum erit. Seneca eidem ita viſum:  
*Deus, inquit, qui admiranda tractat, qui condidit, qui totum  
hoc fundauit deditque circa ſe, maiorque eſt pars operis ſui ac  
melior, effugit oculos, cogitatione uiſendus eſt. In Sanctiore ſe-  
ceſſu Maieſtas tanta deluſcit, & regnum ſuum, id eſt, ſe re-  
git, nec ulli aditum dat niſi animo. Tandem prope Diuinè  
iſtud concludit: Quid ſit hoc, ſine quo nil eſt, ſcire non poſſu-  
mus. Neque vero credendum eſt hæc Seneca cum Apo-  
ſtoli ſententia minus conuenire, cum ait, Rom. 1. Quod no-  
tum eſt Dei, manifeſtum eſt in illis (hominibus, & præſertim  
ſapientibus ſæculi:) Deus enim illis manifeſtauit. Inuiſibilia  
enim ipſius à creatura mundi (hoc eſt, ex creatione mundi)  
per ea quæ facta ſunt, intellecta conſpiciuntur, ſempiterna quoque  
eius virtus & Diuinitas. Acutiſſimè locum hunc ſic expli-  
cat Theodoretus. Ex rebus creatis, & totius vniuerſi ſtatibus  
conuerſionibus atque ordine, Diuinum Numen, hoc eſt,  
in iis condendis Diuinam potentiam, & iſdem etiam tam  
aptè regendis, Diuinam prouidentiam, quæ Inuiſibilia,  
dicuntur Apoſtolo, ſapientes gentium cognoue-*



runt, non autem inuisibile Dei, hoc est, perfectam & absolutam Diuinæ naturæ, quantum à nobis haberi potest, cognitionem assecuti sunt. Illud est quod Seneca dixit, in Diuiniore recessu Maiestatem Diuinam latitare. Arnobij religiosum istud dictum de Deo, cum ipsum ita compellat iis verbis: *Qui ut intelligaris tacendum est; atque ut per umbram te possit errans inuestigare suspicio, nihil est omnino muriendum.* Ita Minutius Fœlix, in Octauio: *Deum sic dignè æstimamus, dum inæstimabilem dicimus.* Hæc descripta sunt ex B. Cypriano, libro, *Quod Idola Dij non sint.* Sic enim habet: *Deus nec videri potest, visu clarior est; nec comprehendendi, tactu purior est; nec æstimari, sensu maior est; & ideo sic eum dignè æstimamus, dum inæstimabilem dicimus.* Sed ut ad Apostoli sententiam reuertamur. Si Deus præpotens ex rebus creatis in ipsius cognitionem ita homines peruenire voluit, ut nihilominus immensa illius & infinitæ sempiternæque naturæ Diuinæ arcanum aliquod sibi referuarit, quod non omnibus passim manifestaret: Idem in ipsius cultu, quem nos Religionem appellamus, cogitandum est, ut quædam sint omnibus perspicua & peruia alia aliis, pro rerum Diuinarum Maiestate & magnitudine, atq; audientium vel imperitia & imbecillitate, vel culpa referuata. Vnde Christus, Luc. 10. *Confiteor tibi, Domine Pater Celi & terræ, quod abscondisti hæc à sapientibus & prudentibus, & reuelasti ea paruulis.* Ac paulo post: *Nemo scit quis sit Filius nisi Pater, & quis sit Pater nisi Filius, & cui voluerit Filius reuelare.* Ac quamquam hæc ad veram & legitimam Dei cognitionem referenda sint, nihilominus omnis Religio, quæ Dei seu veri seu falsi cognitione nititur, sua etiam habet arcana, quæ vel indignis, vel minus idoneis, & plus æquo rudioribus minimè committenda existimauit.

Q ij

A Gentilibus initium ducemus, tum Iudæorum morem disquiremus, postremò Christianæ Religionis, ut omnium perfectissimæ, perpetuam regulam explicabimus. Sacrorum apud Gentiles mysteria quædam extitisse, quæ non omnibus manifesta fierent, nil tam clarè & perspicuè istud probat, quàm eorum qui illa nossent perpetuum silentium. Mysterij vox suo pte significato istud indicat. Theodoretò, in c. ii. Epist. ad Romanos, *Mysterium* est quod non est notum omnibus, sed iis solis qui contemplantur. Et in c. 15. Epist. 1. ad Corinth. *Mysterium* dicitur, quod non omnibus declaratur, sed solis amicis creditur, id est, iis qui sunt eiusdem symboli. Theodoretus istud exscripsisse videtur, ex B. Chrysostomo homil. 7. in priorem ad Corinthios. Verùm istud insuper addit os aureum, *Mysterium* appellari, quoniam quæ videamus aliter se habeant, quàm quæ appareant: nam alia videmus, alia credimus; aliter enim fidelis, aliter infidelis de iisdem afficitur. Appositè Tertulliani locus, lib. 2. ad uxorem, rem istam velut oculis subiicit: *Non sciet maritus infidelis, quid secretò ante omnem cibum gustes: Et si sciuerit panem non illum credit esse qui dicitur.* Vel ut alij legunt, *Num illum credet esse qui dicitur?* SS. Eucharistiam intelligit. Ille idem Theodoretus, lib. 1. de curatione Græcar. affection, apud Gentiles, scribit, Altiorē Sacrorum doctrinam, secretamque mysteriorum rationem cunctos nequaquam tenere, sed numerosam populi multitudinem videre caduntaxat quæ præ oculis fiunt: At verò Sacerdotes Cæremonias atque Orgia ritu legitimo exequi, ac proinde nosse. Quod dixit antea Theodoretus, *Mysterium* ad solos contemplatores spectare Suidas exponit, cùm *Μύστυν*,



Sacrorum disciplinam illam dictam velit, *ὡς δὲ τὰ μυσ-  
τήρια*, à mysteriis & arcanis rebus quæ fiebant cum quis  
initiabatur : Vel Mysteria dicta sunt, quod homines  
clausis sensibus humanis, & ultra corpoream imaginatio-  
nem euecti, Diuinas illuminationes recipiant. Eadem le-  
gere est apud Æliam Cretensem, in Orat. 3. S. Gregorij  
Nazianzeni. Mitto ceteras vocis Mysteriorum notationes,  
apud Clementem Alexandrinum, in Protreptico. Sed  
vna valde arridet *ἀπὸ τῶ μύω*, quod est connueo, & clau-  
do oculos, ac si aliud cogitandum sit quàm quod oculis  
cernitur, vt suprà ex Suida indicauimus. Lepida *Μυστήριον*,  
Mysterij etymologia, ex Iamblico, apud Photium, nume-  
ro 94. *ἀπὸ τῶ μύω*, quod Magicarum artium prima sit  
muriū Magia.

## §. 3.

Mysteriorum fidele silentium nunc videamus. M. Var-  
ro, quem in Theològia sui temporis præcelluisse tradit  
Seruius, apud B. Augustinum, lib. 4. de Ciuit. c. 31. asserit,  
*Multa esse vera, quæ non modo vulgo scire non sit utile, sed  
etiam tametsi falsa sint, aliter existimare populum expediat, &  
ideo Græcos Teletas ac mysteria, taciturnitate parietibusque  
clausisse.* Plutarchus, lib. de liberis educandis, scribit vete-  
res descripsisse arcanas Cæremonias sub quadam taciturni-  
tatis religione, vt his reticendis homines assueti, ad hu-  
manorum arcanorum fidem Deorum metum transfer-  
rent. Hinc illud Tertulliani, Apologet. c. 7. *Ex forma,  
omnibus mysteriis silentij fides adhibetur.* Philostratus, in vita  
Apollonij lib. I. c. II. Mysteriis silentium adtribuit. Et à Iu-  
lio Firmico, lib. de erroribus profanarum religion. omnia  
Ægyptiorum Sacra, *Mysteria* idcirco vocat, & satis co-  
piose illa quæcunque existerent, Symbolica fuisse con-

Q iij

tendit, quorum interpretatio non cuius explicata, quem-  
admodum Clemens Alexandrinus variis locis, & veterum  
Patrum non pauci tradiderunt, & nos postea videbimus.  
Arnob. lib. 5. *Antiquitatis historiae mysteria illa continent san-  
cta, quibus initis nomen est, & quæ non omnibus vulgò, sed  
paucorum taciturnitatibus traduntur.* Apuleius, quàm auda-  
cter, quàm fortiter, pro sua superstitione etiam nefanda,  
ista pronuntiavit, Apologia: *Nullò unquam periculo com-  
pellar quæ reticenda accepi, hæc ad prophanos annuntiare.* Ele-  
gans Tertulliani, Apologetici c. 7. defensio pro Christiani-  
nis, quos in suis mysteriis carne humana vesci, dictita-  
bant Gentiles: *Dicimur, inquit, sceleratissimi de sacramento  
infanticidij & pabulo crudæ.* Negat id Tertullianus, & du-  
plici ratione refellit: Aut enim istud patefactum est à  
Christianis, quod falsum est, quia non sunt proditores  
suiipsius, & mentiri apud eos nefas est: Aut ab extraneis.  
*Atqui etiam impiæ initiationes arcent profanos, & arbitris  
cauent, nisi si impij minus metuunt.* Hoc ipsum pluribus de-  
monstrat Theodoretus lib. 1. de curat. Græcar. affect. ex  
Orpheo, Platone, & aliis. Synesius, lib. de Insomniis, ait  
se Reipublicæ legibus prohiberi ne Mysteria euulget. Cæ-  
reris Sacra Eleusinia intelligit, quæ vulgare capitale fuit,  
lege Atheniensium. Inde Diagoræ Philosopho impietatis  
crimen obiectum, quod Athenagoras legatione pro  
Christianis explicat, & quidem variis capitibus. Diagoras  
impius habitus est apud Athenienses, quod Orphicam  
orationem euulgarit, quod Eleusinia & Cabiræ Sacra  
publicauerit, quod ligneam Herculis statuum confrege-  
rit ut sibi rapas coqueret, atque vno nomine simpliciter  
asseueraret omnino non esse Deum. Orphicam illam ora-  
tionem explicare minimè alienum videri debet: Istud



enim obseruatione dignum, Orpheum, apud Græcos, multitudinis Deorum auctorem primum, initio quidem, libro, *Ἀποκρίσεις*, Testamentorum, trecentos sexaginta Deos induxisse, postea pœnitentia ductum vnicum & solum Deum agnouisse, cuius rei fidem faciunt versus ipsius Orphei, ad Musæum filium, quos refert S. Iustinus Martyr, in exhortatione ad Gentes, & lib. de Monarchia Dei. Meminit & Theophilus lib. 3. ad Autolycum. De Diagona quid sentiret sui que similibus, qui acrius cæteris errorem istum Deorum Gentilium perspexerint, apertè docet Clemens Alexandr. in Protreptico, illos quos sui sæculi homines, *ἄθεοι*, impios cognominarunt, moderatè ac continenter vixisse, & istam Idolomaniam deprehendisse, non exiguum extitisse semen ad excitandam sciētillam intelligentiæ veritatis. Aristophanis Scholiastes, in Ranis, nouos Deos Diagonam introduxisse scribit. Nec minus ob eam rem impius habitus est Alcibiades, apud Athenienses, de quo, vt reliquos scriptores omittam, vnus Maximus Tyrius, Sermone 23. ista commemorat. Alcibiadem ebrium facem gestasse, hoc est, deridiculo habuisse agonem illum lampadum celebrari solitum Panathenæis, Vulcanalibus, Prometheis Sacris feriis: Deinde in epulis Sacerdotem, seu Sacrorum Interpretem, qui *ἱεροφάντης* dicitur, egisse; per ludum iocumque res sacras expressisse. *ὁ παρὰ τὰ τέλη*, habet Maximus.

## §. 4.

Sacrorum etiam apud Gentiles occultationis non leue erat argumentum, quod illa non fiebant, adhibitâ præsertim pompâ solemni, sine Cista, Vanno, & re simili. Quod sæpius occurrit apud Scriptores, quâ Græcos, quâ Latinos, & paucis Harpocratio; In omnibus Sacrorum

suorum Cœremoniis opertaneum adhibitum fuisse affir-  
 mat. Vt apud Macrobiū lib. Sat. i. c. 6. Verrius Flac-  
 cus narrat Circensium die puerum de cœnaculo pom-  
 pam supernè despexisse & patri retulisse quo ordine se-  
 creta Sacrorum in arca pilenti seu vehiculi pensilis com-  
 posita vidisset: Re intellecta, Senatui placuisse velari loca  
 ea quā pompa veheretur. Est & aliud argumentum My-  
 steriorum celatorum, quod symbolis & figuratis quibus-  
 dam locutionibus illa significarentur, in quibus vulgan-  
 dis, excutiendis, perstringendis toti sunt præsertim Cle-  
 mens Alexandr. Arnobius, Iulius Firmicus. Secretioris  
 etiam superstitionis istius apud Paganos perspicua erat  
 demonstratio, quod siue in symbolis, siue in reliquis Sa-  
 crorum ritibus, vocabulis & locutionibus ambiguīs,  
 obscuris, perplexis & à communi vsu remotis, sapius vte-  
 rentur, vt videre est apud eos auctores potissimum quos  
 antea nominauimus. Clemens Alexandr. 5. Strom. vno  
 verbo, non licere profanis verbis enarrare Mystera scrip-  
 sit. Meminit Athenæus lib. iii. c. 6. Hæret aqua in Cle-  
 mente Alexandr. cum scribit in Protreptico, qui Tesmo-  
 phoria celebrarent, eos *μεγαλειζομεν* dici, Heruetus vertit,  
 Megarice, loquentes, quod proposito nostro congruit,  
 alius, morem Megaricum vertit. Ita apud Romanos, in  
 Sacrificiis, *Sub vos placo*, pro, Supplico. Item, *Ob vos fa-*  
*cro*, pro, vos obsecro dicebant, auctor Festus. Etiam  
 Deorum maiorum, nomina in ipsis Sacris vsurpabant  
 alia, quā quæ vulgus; Auctor mihi in primis Macro-  
 bius. lib. i. c. 18. cuius hæc sunt. *In Sacris hæc religiosi arcani*  
*observatio tenetur, vt cum Sol in supero, id est, in diurno he-*  
*mispherio est, Apollo vocitetur; cum in infero, id est, nocturno,*  
*Dionysius, qui est liber Pater habeatur.* Sic & eorum qui ex  
 homi-



hominibus in Deorum censum relati fuissent. Fidem facit visitata precatio apud Romanos, qua qui olim, dum inter mortales versabatur, *Romulus*, nominatus, Deus, illorum existimatione ridicula, factus, *Quirinus*, appellatus est & ita inuocatus. Lactantius, lib. I. c. 21. vniuersim ista scripsit. Solent apud Gentiles, mortuis consecratis nomina immutari, credo, ne quis putet eos homines fuisse; Nam & *Romulus* post mortem *Quirinus* dictus est, & *Leda*, *Nemesis*, & *Circe* *Marica*, & *Ino* *Leucothea*, materque *Matuta*, & *Melicer* filius eius *Palæmon* atque *Portumnus*. Martianus Capella, lib. 2. de nuptiis Philologiae. Sic loquitur Philologia, *Iuno* pulchra licet aliud nomen tibi consortium caeleste tribuerit. Apud Theagem, in fragmentis Pythagoricis. Δίχ, Dice apud Superos, Dica apud Inferos, *Themis*, apud mortales. Hesichio, *Ceres*, vulgari apud homines nomine, sed apud Initiatos, mysticum nomen eius est, Ἀστία. Sic apud Ouidium, i. Fastorum,

Et, modo sacrificio, Clusius ore vocor.

Sextus Empiricus, lib. 8. aduersus Mathematicos, *Hercules* nomen est caeleste, *Alceus*, nomen est terrestre. Sic apud eundem, *Castor* & *Pollux* dum viuerent, sic appellati sunt, post mortem, *Dioscouri*. Credidere veteres mutationem nominum eiusmodi idcirco factam, quoniam aliud sit idioma caelestium & aliud mortalium, atque alia linguae exprimi in Caelo atque in terra. Quae Caestia sunt, verba intellectualis mundi, nominauit Martianus Capella, libro 2. Plato, in Cratylo, docet ex Homero, Deos aliis vocabulis res appellare quam mortales soleant. Nam *Scamandrum* Trojae fluuium, mortales vocant, Dij vero *Xanthum*: Ita *Chalcidem*, auem quandam, à Diis vocari; ab hominibus vero *Cymindim*. S. Gregorius Nazianz. ora-

R

tionem 3. ex eodem Homero, *Moly* herbam, Deorum dialecto indigetari. Dio Chrysostom. oratione, cuius lemma est, *Diogenes*, seu de seruis, addit apud Homerum, locum quendam, quem Troiani *Battiam* nominabant, à Diis sepulchrum *Myrrhines* appellari. Idem repetit, oratione 11. Apud Athenæum lib. 3. c. 8. Epicharmus, *Androphictidas* (conchiliorum species) ab hominibus vocari, à Diis vero *λδυγέ*. i. candidas. Et lib. 11. c. 12. In Cælo, *πλάδες*, dici, apud homines, Pleiades. Mirum est apud Christianos Scriptores etiam antiquos aliquid persimile legi. Clemens Alexandr. lib. 1. Strom. Mosi triplex nomen impositum fuisse tradit. Primum in Circumcisione, *Ioachim*, Secundum ex casu, quod in aquis repertus fuisset, *Moses*; Tertium in Cælo, *Melchi*. Ab ea sententia minime abluere videtur Lactantius, cum ita scribit, lib. 4. c. 7. *Quamuis nomen eius (Christi) quod ei à principio Pater summus imposuit, nullus alius præter ipsum sciat, habet tamen & inter Angelos aliud vocabulum, & inter homines aliud. Iesus quippe inter homines nominatur, nam Christus non proprium nomen est, sed nuncupatio potestatis & Regni.* Auctor Commentarij in Psalmos, qui nomine B. Hieronymi circumfertur, in Psalmum 146. istud scripsit. *Abram dicebatur in Chaldaea, & in Cælo, vocatur Abraham. Qui antea erat Saulus, postea vocatur in Cælo, Paulus. Ioannes & Iacobus filij tonitrui; Tonitruum utique in Cælo est.*

## §. 5.

Neque vero vocibus propriis & à vulgi usu remotis Gentiles in suis tantummodo Sacris utebantur, quin & libros habebant, quibus initiandi ritus & mysteriorum interpretationes continebantur, & ij descripti erant quibusdam characteribus vulgo ignotis, adeo ut si quis in



eos incidisset, si non esset initiatus, illos planè non intelli-  
 geret. Apuleius ista declarat, dum narrat quo pacto initia-  
 tus sit Sacris Isis, alioquin multiplicis nominis. *De oper-*  
*tis*, inquit, *adytis profert, hierophanta, quosdam libro litteris*  
*ignorabilibus prænatos, partim figuris eiuscemodi animalium*  
*concepti sermonis compendiosa verba suggerentes, partim no-*  
*dosis & in modum rota tortuosis, capreolatimque condensis api-*  
*cibus, à curiositate profanorum, lectione niunita.* Ammianus  
 Marcellinus, lib. 22. loquens de hieroglyphicis Ægyptio-  
 rum litteris, *Ignorabiles litteras*, dixit: & lib. 17. Obeliscum  
 Sesostridis Regis, *scriptilibus effigiatum elementis* pronun-  
 ciat. Apud Martianum Capellam idem legere est. *Erant,*  
*inquit, quidam libri, sacra nigredine colorati, quorum litteræ*  
*animantium credebantur effigies.* Ista fuit Sacrorum Ægy-  
 ptiorum occultandorum ratio, nec vnus modi. Nam  
 hæc, vel litteras & scribendi genus spectabat, quod triplex  
 erat, auctore Clemente Alexandr. lib. 5. Strom. Primum,  
 ὁμιολογῶν, vulgare, & scribendis epistolis aptum,  
 Secundum, ἱερογραμματῆς, quo Sacerdotes in rebus sacris  
 describendis utebantur. Tertium, ἱερογλυφικῆς, ratio scri-  
 bendi quæ insculpi solet, & ea sacra. Plutarchus libro de  
 Iside & Osiride, duplex tantum scribendi genus iis adfi-  
 gnat, vnum commune seu popolare, alterum sacrum: Il-  
 lud omnes discebant, hoc soli Sacerdotes. Meminit Dio-  
 dorus Siculus lib. 2. Strabo lib. 9. Fortean eos innuere vi-  
 detur Synesius, in Dione, cum scribit Barbaros quosdam  
 à communi hominum cœtu secretos, versari in contem-  
 platione rerum maximarum & quidem supra naturam,  
 sed ista tractari κατὰ ἱερὰ σύμβολα, secundum sacra signa &  
 fymbola. Eodem pacto, Ammian. Marcellin. lib. 22. sed  
 apertè de Ægyptiis Sacerdotibus agens. *Initia prima Sa-*

R ij

*crorum cautè tumentur, condita scriptis arcanis.* Alterum fuit apud eosdem Ægyptios mysteria occultandi institutum, cum ea non nisi magna religione manifestarent, & quidem præmissis antea expiationibus nonnullis & institutionibus, quemadmodum differit Clemens Alexandr. lib. 5. Strom. Hinc apud eundem Clementem, lib. 1. Strom. legimus, Pythagoram circumcissum fuisse (nam & Circuncissio apud Ægyptios in usu fuit. Strabo lib. 17. S. Hieron. in c. 5. Epistolæ ad Galat. alij.) ut illorum adyta ingredi posset, simul & mysticam doctrinam ediscere. Eam ob causam arbitror B. Ambrosium, Epistola 6. Pythagoram Iudæum dixisse. Miror quod de Origene prodit Suidas, illum ex quorundam Stoicorum Philosophorum libris didicisse *μετὰ ληρωτῶν ἐν ἱερῶ ἔργον* transumptiuum modum mysteriorum & arcanorum Græcorum seu Gentilium.

## §. 6.

Occultatio illa Mysteriorum apud Gentiles, ut generatim dicam, duplicis generis fuit, aut personarum respectu, aut rerum. Primum quidem quoad personas attinet, non omnibus ad quælibet Sacra & Sacrificia patebat aditus. Mitto quædam solis viris, alia mulieribus solis concessa. Apud Festum, in nonnullis Sacris Romanis, Licetor clamabat: *Hostis, vinctus, mulier, virgo, exesto.* Hoc est, interesse prohibebatur. Seruius in 4. Æneid. Iunonis Lucinæ ea Sacra fuisse testatur, *quæ non licet accedere nisi solutis nodis; & in Sacris nil solet esse præligatum.* Ad raiim vsque toties decantata formula,

*Procul, ô, procul este profani.*

rem istam planè conficit, quam non inuenustè imitatus est Gratius, Cynegetico, apud quem Sacerdos in Sacerò Vulcani.



—Procul hinc extorribus ire.

*Edico, praesente Deo, praesentibus aris,  
Quis scelus aut manibus sumptum, aut in pectore motum est,  
Inclamat.*

Antiquissima illa profanos à Sacris arcendi formula etiam ab Orpheo usurpata, cuius versus recensentur à S. Iustino Martyre, in exhortat. & Theodoretò, lib. i. de Curat. Græcar. affect. Quamquam Tatianus, aduersus Græcos, neget versus cuiuscemodi, qui Orpheo tribuuntur, esse Orphei, sed Onomacriti Atheniensis, qui tempore Pisistradarum vixit. De Profani voce plura dicemus postea. Interim, hîc *Profanus*, est non modo qui non initiatus, sed & qui minimè innocens. Lampridius, in Alexandro Seucro. *Iussit, quemadmodum in Elcusiniis Sacris dicitur. Nemo ingrediatur nisi qui se innocentem noñit.* Liuius lib. 45. *Omnis praefatio Sacrorum eos quibus non sunt pura manus, sacris arcet.* Apud Origenem, lib. 3. contra Celsum. In Sacris à præcone sic initiandos vocari ait. Quicumque est purus manibus & voce sapiens, vel quicumque est purus ab omni scelere, & cuicumque est anima nullius mali sibi conscia, & qui iustè vixit. Video apud Senecam Patrem, Controuersia 2. lib. 1. Piratas, gladiatores, lupas illas & publicarum libidinum victimas Templis exclusas. Aliter sentit Lactantius, lib. 5. c. 19. *Illuc, in Templo, veniunt, apud Gentiles, sine delectu, adultera, impudica, lenæ procaces, obscena meretrices; veniunt gladiatores, latrones, fures, venefici & precantur nihil aliud, quàm ut scelera impunè committant. Quid enim inquit latro sacrificans, in Templo, supple, aut gladiatur roget, nisi ut occidant? Lex erat Athenis, qua impudicis Templorum ingressus prohibebatur, ut auctor est Demosthenes, Oratione*

R iij

contra Timocratem. Refert Clemens Alexandr. lib. 3. Strom. in aditu Templi, quod erat in Epidaurō, inscriptum fuisse, Solis castis Templi ingressum esse concessum. Duodecim Tabularum lege id cautum erat. Gentilium certè in sua Idolomania puritatis studium apparet, quam suis Templis adeo religiosè inesse voluerunt, ac si impuri & flagitiis contaminati suorum Deorum oculos offenderent præsentes. Certè Imperatores iniuriosum sibi & probrosum denunciarunt. *Si qua, in publicis porticibus, vel in his ciuitatum locis, in quibus illorum solent imagines consecrari, pictura pantomimum veste humili, & rugosis sinibus agitatore aut vilem offerat (forte, referat) histrionem, & illico reuellendum statuerunt.* Rationem addunt, *Neque unquam posthac liceat in loco honesto inhonestas adnotare personas.* Cod. Theod. lib. 15. tit. 7. l. 12. Quidni hæc nostris Christianis pudorem incutiunt? Sed illud obseruatione dignum apud Gentiles, Templi aditum interdictum mulieri prægnanti, vt testatur Censorinus, lib. de die natali, c. 11. Imitatio quædam est Iudæorum, apud quos mulier recens à partu, aliquot diebus manebat in sanguine purificationis suæ, quo tempore ei Templum ingredi non licebat, Leuit. 12. Hæc exparta & effecta, illa prægnans Templo exclusa.

## §. 7.

Altera celandorum Mysteriorum ratio ab ipsis rebus petenda est: & ad initiationes atque in Sacris explicandis institutiones, vel denique inspectiones referenda est, cum in iis, seu initiati, seu initiandi soli admittebantur, & quidem occlusis foribus. Huius mysterij descriptionem habes apud Apuleium, Milesiarum lib. 11. Meminit Theodoretus lib. 1. de curat. Græcar. affect. & in eo cœtu Hic-



rophantam, qui Tertulliano, *Antistes Cæremoniarum* vocatur, cæteros docere memorat. Germanicus, in Arati *Φαινόμενα*, hæc habet: *Nigidius Deos Samothracas dixit, quorum argumentum nefas sit enumerare, propter eos qui mysteriis præsumunt.* Occultas penitus res Mysteriorum istud penitus euincit, quod vel recondenterentur, vel fierent in adytis. Seruio, in Virgilium, *Adytus* (alij Adytum enuntiant) est locus Templi secretior, ad quem nulli est aditus, nisi Sacerdoti. Clemens Alexandrinus Protrept. Adyta vocat, Ἀδύτα, penitus impia, quandoquidem in iis, opinione Gentilium, putatur esse Deus, qui nullus omnino est. Tertull. contra Valentinianos, *Tota in Adytis Diuinitas.* Magnam partem subterranea fuisse apparet ex Sacris nonnullis, vt Mithræ. De quibus Iulius Firmicus, lib. de error. profan. religion. *Sacra Mithræ in speluncis abditis tradunt, vt semper obscuro tenebrarum squalore demersi, gratiam splendidi ac sereni luminis non videant.* S. Iustinus Martyr, Dialogo cum Triph. ait, Mithræ mysteria & arcana Sacra atque initiationes fieri ἐν τοῖς σπηλαίοις, in Spelæo, vt vocant, siue specu. Meminit S. Hieronymus, Epist. ad Lætum. Tertullian. lib. de Corona milit. *Castra tenebrarum* appellat. Ac Clemens lib. 4. Strom. nocte ea fieri tradit. Ægyptiaca arcana Sacra potissimum iis locis subterraneis & fieri & recondi solita fidem facit Sozomenus, lib. 7. hist. Eccl. c. 15. dum describit Serapidis Templum, apud Alexandriam, in cuius adytis multa obscœna reperta sunt à Christianis, Arcadio Imperatore. Obiter Serapim illum non alium fuisse quàm Iosephum Patriarcham ab Ægyptiis pro Deo habitum narrat Iulius Firmicus, libro citato: *Septem, inquit, annorum collectis & seruatis frugibus alterius septenij egestatem Diuinæ manus prouidentia mitigat.*

uit. Genes. c. 41. Huic post mortem Ægyptij, patrio gentis suæ instituto, Tempia fecerunt. Et ut iustam dispensationis gratiam posteritas disceret, quo modio esurientibus & ementibus frumenta diuiserat, capiti, is superpositus est. Cassiodorus, lib. 6. Variarum, in formula Præfecturæ Prætorianæ, Præfectum Prætorio Pharaonis eam ob rem appellat, quod per sapientiam contulisset populis, id quod præstare non potuerat potentia dominantis, siquidem periclitanti populo prudentissime subuenisset. De variis gradibus initiandorum & mysteriorum generibus frustra sim, si de iis differere vellem, quandoquidem Nobilissimi, & in omni literarum genere summi, nostro sæculo, viri de iis abundè scripserunt.

## §. 8.

Nunc nobis inuestigandæ supersunt causæ, ob quas Gentiles tanta religione, tantoque studio suorum Sacrorum Mystera celari voluerint. Tres præsertim afferri posse apud me semper iudicaui. Prima est, ex illa occultatione, maiorem sui venerationem hominum animis indere & ingerere areana eiusmodi, cum nonnisi per symbola vulgo exprimantur, quorum interpretatio ab alio repetenda sit, & ut ait Clemens Alexandr. lib. 5. Strom. ubi aliquo interprete & duce opus est in re aliqua obscura intelligenda, futurum est ut maius in eam assequendam studium conferatur, ac minimè decipiantur qui eam discere percipiunt, cum accipiant ab iis qui rem accuratè norunt. Deinde omnia quæ ostenduntur per aliquod velamentum & externam quandam figuram ac speciem, maiorem quandam & excellentiorem veritatem latentem præ se ferre videntur. Nimisquam verum est istud Senecæ, Epistola 68. *Vile videtur quidquid patet.* Ita Seue-

rus



rus Sulpitius, lib. i. Histor. Sacre: *Mos vulgi, cui presentia fastidio, insueta desiderio sunt.* Non aliter Saluianus, lib. i. *Vsitatum hoc humanæ mentis est vitium, cum intueatur, illa magis semper velle quæ desunt.* Sic quo magis illa occultantur Mysteria, eo maiore cultu in ea ferantur ignari, adeo ut & maiori cupiditate illa noscendi, & initiationem assequendi incendantur, cum peruulgatum esset apud Gentiles, Mysteriis initiatos, post mortem in piorum cœtum recipi, ut post alios tradit Suidas, verbo, *Μεντωάα*. Secunda celatorum istorum Mysteriorum ratio est, ne si obscœna & propudiosa, quæ in iis fiebant aut conspiciantur, palam & apertè ab omnibus viderentur, illa homines ab huiusmodi religione penitus auocarent. Unde in arcanis Cereris Eleusina, peccen, Apuleio, *Fæminal*, de quo Theodoretus, lib. i. curat. Græcar. affect. Alij. In Sacris Bacchi, Phalli, Itriphalli. Apulei, magna, si Diuis placet, religio de iis agens in Apologia: *Nihil, inquit, insolitum, nihil incognitum dico, vel vnius Liberi patris Symmista, qui adestis, scitis quid domi conditum celetis, & absque omnibus profanis tacitè veneremini.* Hanc rationem acerrimè vrgent veteris Ecclesiæ Patres. Clemens Alexandr. Tertull. Athenagoras, Tatianus, Lactant. Iul. Firmicus, Theophilus, Theodoretus. Sed Arnobium de iis differentem nemo leget sine risu, imò sine rubore. Tertia nunc ratio nobis exponenda est, ob quam Gentiles tam anxie sua Mysteria celari voluerunt, nec alia, nisi quod, ut plurimum, Magica in istiusmodi initiationibus exercerentur. Clemens Alexandr. Protrept. coniungit Adyta Ægyptiorum cum Necromantia Hetruscorum. Psal. 119. ex versione Fœlicis Pratenfis: *Hei mihi qui incola fui Hetruriae.* Santes Pagninus vertit: *Hei mihi quia peregrinatus*

*sum Mesech.* Certum est Dauidem nunquam in has Occidentis regiones, utpote Italiam, commigrasse, sed indicare voluit, cum illum persequeretur Saul, coactum fuisse confugere ad gentes alienigenas, quæ rerum Magicarum infamia laborabant, non secus atque Hetrusci: Apud quos Magiæ studium maxime & perpetuo viguisse non modo historiæ Romanæ scriptores, sed etiam non pauci alij testantur. Vnicus Oratoris Principis locus lib. 2. de Diuinatione istud facile persuadet. Est autem huiusmodi.  
„ Tages quidam dicitur in agro Tarquiniensi, (in Hetruria) cum terra araretur, & sulcus altius esset impressus extitisse repente, & eum affatus esse qui arabat. Is autem Tages, ut in libris est Etruscorum, puerili specie dicitur visus, sed senili fuisse prudentia: Eius aspectu cum obstupisset bubulcus, clamoremque maiorem cum admiratione edidisset, concursum esse factum, totamque breui tempore in eum locum Etruriam conuenisse, tum illum plura locutum, multis audientibus qui omnia eius verba exceperint, literisque mandauerint. Omnem autem orationem fuisse eam qua haruspicina disciplina contineretur, eam creuisse rebus nouis cognoscendis, & ad eadem illa principia referendis. Fabulam esse dicitur Pitheo Romana. Ego reapse Dæmonem fuisse arbitror, qui postea non comparuerit, nec quid de eo actum sit deinceps, quidquam legitur, tum apud scriptores omnes de eo præter apparitionem illam altum silentium: & quæ principia rerum nouarum cognoscendarum nisi quæ cum Magia non minimam habeant consensionem. Nec mirum Dæmonem humana specie ista docuisse, cum apud veteres persimilia extent exempla, insigne apud Eunopium in Aedefio illud est de duobus Dæmonibus, qui senum



specie toto quinquennio Sospitram plurima, & arcana,  
& magica docuerunt. Qui legerit auctorem libri de Ori-  
ginibus Hetruriæ, de eadem non meliora suspicabitur. In  
cæteris Sacris aliarum gentium, etiam Magia sæpius  
principem locum obtinuit. De initiationibus Sacrorum  
Eleusiniarum notum illud est, & à pluribus expositum.  
Apuleius de se Sacris Ifidis initiando, ista narrat. *Accessi*  
*confinium mortis, & calcato Proserpinæ limine, per omnia*  
*uæctus elementa, remeavi nocte mediâ, vidi Solem candido*  
*coruscantem lumine, Deos inferos & Deos superos accessi*  
*eoram, & adoravi de proximo.* Synesius, in Dione, cum  
memorat Barbaros quosdam in suis arcanis & mysteriis,  
certos ad Diuinum Numen accessus habere, quispiam  
susplicari possit, nescio quid curiosarum artium hic latere.  
In Vulcani Sacro, quale describit Grætius, in Cynegetico,  
res est apertissima.

— *Struitur ramis fœlicibus ara.*

*Hic, dictu mirum, atque alias ignobile monstrum*

*Aduersis specubus, ruptoque è pectore montis*

*Venit ouans austris, & multo flumine flammæ*

*Emicat ipse.*

Sacerdos, qui sacris operabatur, Deum præsentem esse  
exclamat. Mitto cætera: Samothracum Deorum Sacra,  
duntaxat expendi velim. Sacra hæc ab Orphæo insigni  
Mago instituta sunt, vt refert Theodoretus, lib. i. Græ-  
car. affect. Aliter Clemens Alexandr. in Protrep. quid-  
quid sit, certum est Thraces, apud quos hæc sacra in vsu  
esse cœperunt, Magiæ valde studiosos extitisse. Notat  
Placidus Lactant. in i. Thebaidos Sarij. P. Nigidius figu-  
lus, qui ea probe nouerat. Magiæ insimulatus, Dioni lib. 45.  
prohibitis quibusdam studiis operam dedisse credebatur.

S ij

Apud Eunapium in vitis Philosophorum, Sacra Myſteria quæ memorat, bonam partem, Magica eſſe intelligenda peritus Lector aduerter.

## §. 2.

Sed antequam locum hunc de Myſteriis Gentilium, tam diligenter, tam anxie occultatis abſoluam, idem in veterum Philoſophorum dogmatibus vſuueniſſe obiter explicemus. Ad inſtitutam de noſtræ fidei Chriſtianæ myſteriis diſſertationem iſtud non parum conferre docet me Origenes, lib. 1. contra Celſum. Cum enim hic Epicureus Philoſophus Chriſtianam doctrinam clanculariam vocaret, quod non promiſcuè & paſſim euulgaretur: Reſpondet Origenes, iſtud minime mirum videri, quandoquidem etiam Philoſophi arcana quædam haberent dogmata, quæ non omnibus proponerentur. Idem habet Clemens Alexandr. lib. 5. Strom. ac docet non ſolos Pythagoreos & Platonem multa occultariſſe, ſed etiam Epicureos, qui ſua arcana non patiebantur ſcripta ab omnibus legi. Quin & Stoicos, quæ à Zenone ſectæ principe initio fuiſſent conſcripta, minime permiſiſſe ſuos diſcipuloſea legere, quin prius ipſorum Magiſtri periculum feciſſent, an illi germanè & ſyncerè philoſopharentur. De Ariſtotelicis ſcriptis res eſt notiſſima. Illic etiam habes duplex genus auditorum Pythagoræ. Syneſius, Præfatione in librum de Inſomniis, ſcribit vetuſtiſſimum eſſe Platonicum inſtitutum, ſub vilioris argumenti ſpecie, quæ ſunt in Philoſophia magna & præſtantia celare, ne in profanum vulgus edita, tandem corrumpantur & deprauata euadant. Maximus Tyrius, Sermone 23. arcana illa & abſtruſa Philoſophiæ dogmata cum Sacris Eleuſiniis comparat. Seneca Epiſtola 95. non aliter ſentit, apud



quem hæc legas. Cor illud quo manus viuunt, ex quo impetum sumunt; quo mouentur, latet. Idem dicere de præceptis possum, aperta sunt; Decreta vero sapientiæ in abdito. Sicut sanctiora Sacrorum tantum initiati sciunt, ita in Philosophia arcana illa admissis receptisque in Sacra ostenduntur. At præcepta & alia huiusmodi profanis quoque nota sunt. Addo & veteres illos Philosophos in illis dogmatibus reconditionibus, vel tradendis, vel scribendis, non vulgaribus & triuialibus vocabulis usos fuisse. Quod firmatur Agellij testimonio, lib. 4. c. 11. apud quem legere est, Pythagoram abstinuisse faba, quam Græci, *κῶα μὲν* dicunt. Vulgus existimat, *κῶα μὲν*, hîc pro fabæ legumine usurpari, sed aliud significatum illi attribuit Pythagoras, vt proles, cum Arnobio loquor, significet.

## §. 10.

Iudæorum nunc Mysteria excutiamus, & paucis, quæ duobus modis occultata fuisse deprehendimus, siue quoad ea quæ religionem & res credendas spectarent. Origenes, homil. 5. in librum Numer. copiose disserit de arcanis & mysteriis legis Mosaiicæ, non à quouis siue tractandis, seu conspiciendis. Exod. 9. & ceteri libri Mosis id perspicuè declarant. Clemens variis locis ac præsertim lib. 5. Strom. Mosaiica illa arcana & symbola diffuse & accurate explanat. Illud autem non otiose considerandum quod scribit Clemens, eo libro, obscuram & arcanam de Deo cognitionem significari cuiusdam Prophetæ actione, cum ipse sibi iussit parari panes azimos subcincitios, qui *ἐν κρυφαῖς*, id est, occulti dicuntur, significans, de Deo & eius varia atque infinita potestate, verè sacrum & mysticum verbum oportere celari. Quis autem fuerit Prophetæ iste, non exprimit Clemens. At ego existimo designari

S iij

Eliam Prophetam, qui iussu Dei, urgente fame, ad Sarcptam Sidoniorum profectus, mulieri viduæ, quam offendit, iussit, ut sibi panem subcineritium coqueret. 3. Reg. 17. Nota etiam Iudæorum religio in libris Mosais legendis, ut nulli fas esset ante trigessimum ætatis annum, legere primum caput Geneseos, tum Canticum Canticorum, deinde initium & postrema capita Ezechielis Prophetæ, ut auctor est B. Hieronymus, Præfatione in Ezechielem. Alio etiam modo sua voluerunt haberi occulta Mysteria Iudæi non modo, quia ad Sacra & sacrificia non omnibus pateret accessus, ac ne Iudæis quidem cæteris ipsa manifesta semper fierent. Quin & secreta erant loca, ut pote Sanctuarij, seu Sancti Sanctorum, quæ solus Summus Sacerdos adibat. Exod. 30. Heb. 9. & certa quadam hora, ut scribit S. Basilius, lib. de Spiritu Sancto, c. 27. Clemens Alexandr. 5. Strom. ait, quæ erant Ægyptiis adyta Hebræis velum extitisse in Templo, quod mysterij Sacrorum occultationem denotabat. Exod. 26. duplex statuitur velum, vnum exterius; noster vulgatus Interpres appellat Tentorium, Santes Pagninus, Operimentum, Arias Montanus, Aulæum: Et istud in introitu Tabernaculi, ne prætereuntes quidquam conspicerent. Alterum velum interius, de quo sic loco citato. *Facies & velum de hyacintho & purpura, coccoque bis tincto & bysso retorta, opere plumario & pulchra varietate contextum* (quia imaginibus Cherubin persparsum erat) *quod & Sanctuarium & Sanctuarij Sanctuaria diuidentur.* Neque vero contemnendum arbitror quod Hebræi Doctores tradunt, si quis Gentilium Iudaicam religionem amplecti veller, variis præceptionibus velut quibusdam gradibus instituebatur, antequam lex Mosais illi explicaretur. Primum enim



illum docebant septem præcepta, filiis Noe à Deo data, vt aiunt, quæ erant eiusmodi 1. Non colere Idola. 2. Benedicere Deum. 3. Cauere ab incestu. 4. Quoduis aliud peccatum carnis vitare. 5. Non fundere humanum sanguinem. 6. Non rapere aliena. 7. Non tollere membrum de animali viuente.

## §. II.

Tandem ad Christianæ Religionis Mysteria peruenimus, quorum occultandorum quamquam nulla alia ratio subesset, quàm ipsius dignitas & excellentia, qua ceteras omnes longo post se interuallo relinquit, illa maxime, & supra quam dici possit, abundè satisfacere videretur. Nostra siquidem cum Iudaica (nam ceteræ merè sunt præstigiæ, mera & detestanda figmenta) si componatur, tantum illa eminere videbitur, quantum lux umbræ, res ipsa figuræ præstat. At quod caput est, & præcipuum momentum, lex vetus & Mosaica religio imperfecta habita est, teste Apostolo, Hebr. 7. *Nihil ad perfectum adduxit lex.* Quæ quamquam fuerit huiusmodi, nihilominus sua habuit arcana & mysteria, quæ suis nec passim, nec omnibus patefaceret. De quibus cum antea differuerim, vnum subiiciam, quod valde mirandum. Numerorum 4. *Cum inuoluerint Aaron & filij eius Sanctuarium, & omnia vasa eius, in commotione castrorum, tunc intrabunt filij Caat (Leuitæ) vt portent inuoluta, & non turgent vasa Sanctuarij, ne moriantur.* Postea: *Alij nulla curiositate videant quæ sunt in Sanctuario priusquam inuoluantur, alioquin morientur.* Itanc sacris hominibus & cultui Diuino addictis Leuitis, tactus sacrorum vasorum capitalis fuit, aliis & prophanis solus visus. Tacitus, lib. de moribus Germanor. loquens de Idolo Terræ abluendo, & suffo-

catas abluentibus, ista subiungit verba, *Arcanus terror*: quæ de hoc religioso Iudæorum metu multo rectius usurpare licet. An non multo æquius magisque rationi consentaneum, ut Christiana Religio suis omnibus numeris absoluta sua habeat etiam tremēda Mysteria? Is est Sacra Scripturæ sensus, ut & veteris Ecclesiæ Patrum. Quod antequam explicemus, illud in primis aduertere oportet, Mysterium respectu personarum, duplicem sortiri notionem. Aut enim res est cum Infidelibus, qua ratione tota Religio Christiana vocatur *Mysterium*. Iuxta illud, Math. 7. *Nolite sanctum dare canibus, neque mittatis margaritas vestras ante porcos.* Tertull. lib. 2. ad uxorem, Christianas mulieres alloquens, quæ Gentilibus maritis nuplissent: *Nolite margarita vestra porcis iactare, ne conculcent ea, & conuersi vos quoque evertant. Margarita vestra sunt quotidiana conuersationis insignia. Quanto curaueris ea occultare, tanto suspectiora feceris, & magis cauenda Gentili curiositati.* Idem habet S. Cyprianus, lib. ad Demetrianum. Sic B. Basilus, in regulis breuioribus, c. 250. Infidelibus Christianæ fidei doctrinam non esse communicandam, seu ne contemnenda existiment dogmata Domini, siue ne ex iis prauè intellectis occasionem arripiant insectandi maiori audacia Christianos. Clemens Alexandr. libro 5. Strom. istud Seruatoris dictum, ex Euangelio quodam, forsan Nazoreorum, de quo B. Hieronymus, non vno loco, & Epiphanius. Est autem sententia huiusmodi. Precepit Dominus in aliquo Euangelio: *Mysterium meum mihi, & filiis domus meæ.* S. Hieronymus in c. 4. ad Ephes. Quod Paulus in Epist. 1. Corinth. 2. loquitur, *Sapientiam loquimur inter perfectos, hoc iubet ut unusquisque mystica quæque atque secreta, & ea quæ Dei veritate sunt plena, loquatur*  
cum



*eum proximo suo*, id est, cum fidei & Christiano, nimirum, cum Christiani sint alterutrum membra, & *sibi inuicem fide & virtute proximi*. Istud singulari cautione obseruatum legimus ad Constantini Magni vsque tempora, vt nullus, seu ad Cœmeteria & Conuenticula, seu Ecclesias, vt etiam vocat Tertullianus, Gentilibus ipsis pateret aditus. At post Constantinum M. Ecclesias ingrediebantur, & Sacræ Liturgiæ intererant, vsque ad missionem Cathecumenorum, quibuscum Ecclesia pellebantur vt apparet ex Concil. 4. Carthagin. c. 84. Est & altera *Mysterij* notio, si modo cum ipsis fidelibus res haberetur, non enim omnes quoequot erant fideles Mysteriorum quorumcumque capaces erant. Non enim frustra ab Apostolo dictum est, 1. Corinth. 12. *Quosdam posuit Deus in Ecclesia primum Apostolos, secundo Prophetas, tertio Doctores, deinde virtutes, &c. genera linguarum, interpretationes sermonum. Nunquid omnes Apostoli? nunquid omnes Prophetæ? nunquid omnes Doctores? nunquid omnes linguis loquuntur? nunquid omnes interpretantur?* Iam istud è Sacra Scriptura perspicuè intelligamus. Luc. 8. Christus summus Magister Discipulos ita monet, *Vobis datum est nosse Mysterium Regni Dei, cæteris autem in parabolis*. Marci, 4. *Non loquebatur Christus eis (turbis) sine parabola: Scorsim autem Discipulis suis differebat omnia*. Gentium Apostolus idem firmat. Epistolæ 1. Corinth. c. 2. *Sapientiam loquimur inter perfectos, sapientiam vero non huius sæculi, neque principum huius sæculi, quidestruuntur, sed loquimur Dei sapientiam, in Mysterio, quæ abscondita est*. Colossens. c. 1. *Non cessamus pro vobis orantes & postulantes, vt impleamini agnitione voluntatis eius, in omni sapientia & intellectu spiritali, vt ambuletis dignè, Deo per omnia placentes*. Clemens Alex. lib. 5. expli-

T

cans integrum hunc locum Apostoli, & præsertim hæc verba, *Exhibeamus omnem hominem perfectum in Christo Iesu*, docet nec infidelem, nec quemcunque fidelem nomine omnis hominis comprehendi, sed qui sit sanctificatus corpore & anima. Hoc aperte innuit Apostolus, 1. Cor. 3. *Non potui loqui vobis tanquam spiritualibus, sed tanquam carnalibus. Tanquam paruulis in Christo, lac vobis potum dedi, non escam, nondum enim poteratis; sed nec nunc quidem potestis, adhuc enim carnales estis.* Illustris locus Apostoli ad Hebræos, ad Christi fidem conuersos, epist. c. 5. postquam Apostolus docuit Christum esse appellatum à Deo, Pontificem iuxta ordinem Melchisedec, subiungit: *De quo nobis grandis (ex Syriaco, multus) sermo, & ininterpretabilis ad dicendum, quoniam imbecilles facti estis ad audiendum.* Interim, quod alij iam adnotarunt, legebatur antea, *interpretabilis*, sensu contrario, & emendatè legendum, *ininterpretabilis*. Ita Rom. 11. *Et ininuestigabiles viæ eius.* Ephes. 3. *Ininuestigabiles diuitias Christi.* Psalm. 118. *Præueni in immaturitate.* Septuag. ἐν ἀωείᾳ. Ex Hebræo, S. Hieronymus, *Surgebam adhuc in tenebris.* Santes, Fœlix, alij, *Præueni crepusculum, seu diluculum.* Prosper in Psalm. *Præueni intempesta nocte.*

## §. 12.

Ecclesiæ veteris Patrum apertiora & dilucidiora videamus de Mysteriis Christianis non passim, nec apud omnes vulgandis testimonia. Origenes familiam ducet, nam ex antiquioribus nemo melius Christianorum varios ordines, & Doctrinæ Christianæ tradendæ variam ac multiplicem rationem expressit. Apud hunc igitur lib. 1. contra Cellsum, ipsum inducit ludibrij causa vocantem Religionem Christianam, *χρύσιον τὸ δόγμα*, clandestinam do-



ctinam. Responder Origenes, falsum esse omnia doctri-  
 næ capita occultari: plurima enim quæ Gentiles irrideant,  
 palam tradi & communicari. Hinc illud Apostoli: *Nos*  
*Christum prædicamus crucifixum, Iudæis quidem scandalum,*  
*Gentibus autem stultitiam.* Quod si quædam non passim  
 omnibus non communicentur, id non magis reprehен-  
 dendum, quàm ipsorum Gentilium Philosophi, qui disci-  
 plinam suam diuidunt in *ἐκτέλεια*, quæ foras proferun-  
 tur, & patent omnibus; atquæ *ἐσωτέλεια*, quæ intra scholæ  
 fines continentur, suntque propria discipulorum selecto-  
 rum. Et lib. 3. Epicureus iste Christianos reprehendit,  
 quod è triuio sibi quærerent auditoria, Circulatorum &  
 Aggytarum exemplo. Responder Origenes, Christianos  
 sic se gerere erga omnes homines, vt minimè similes sint  
 Philosophis, qui propalam apud vulgus hominum disse-  
 rentes, non sunt curiosi in discernendis auditoribus, sed  
 promiscuè qui vult adstat, & auscultat. Christiani verò  
 quantum possunt, præexaminant animos audire se cu-  
 pientium, ac primò priuatim blandè & benignè persua-  
 sos, priusquam in cætum recipiantur, vbi videntur eò  
 profecisse vt honestam vitam amplecti percupiant, tum  
 demum introducunt, distinctis ordinibus. Vno recens  
 admissorum, necdum assecutorum expiationis symbo-  
 lum, altero iam professorum Religionem Christianam.  
 In posteriore ordinati sunt aliquot, qui inquirent in vi-  
 tam & mores accedentium, vt Religionis Candidatos  
 istos, si contra regulas peccauerunt, à suis Contentibus  
 arceant, reliquos horum dissimiles excipiunt ex animo.  
 Paulo post scribit, Christianos modis omnibus operam  
 dare, vt cætus ipsorum constet ex hominibus prudenti-  
 bus, & quidquid habeant egregium atque Diuinum, in

T ij

popularibus sermonibus proferant in medium, si modo præsto sit auditorum cordatorum copia, alioquin profundiores sensus celant & silentio prætereunt si adsunt qui opus habent lacte. Clemens Alexandr. lib. 1. Strom. ait, Deum Diuinorum Mysteriorum sanctam lucem & reuelationem jis impertiri qui ea possunt capere, neque multis ea quæ non erant multorum reuelasse, sed paucis, quibus sciebat conuenire qui & ea possent cõprehendere. Arcana enim, sicut Deus, verbo creduntur, non scripto. » Obiicit sibi, scriptum esse Math. 10. Luc. 11. Nihil occultum quod non manifestetur, nil opertum quod non reueletur. Respondet, ei qui occultè audit Mysterium, & occultum manifestatum iri, ita qui secretè ea quæ traduntur potest seruare, apertum iri quod opertum est. At cur omnes veritatem non norunt? Respondet, veritatem quidem esse omnium vt & iustitiam, & tamen non omnes veritatem, aut inquirunt, aut expetunt, seu quia odiosa est nonnullis, qui errore præoccupati fuerint, seu quia negligitur ab aliis. Eodem pacto non est ab omnibus amata iustitia, qui latrociniis assueti & aduocati nocturni, qui cædibus delectantur & cæteris flagitiis. Subiungit denique non omnes esse capaces intelligendorum Mysteriorum, & vt certamen est præludium certaminis, ita Mysteria quædam antecedere Mysteria. Alludit ad Eleusinia Mysteria, quorum alia erant minora, quibus Mystæ initiabantur; alia maiora, quæ erant Epoptarum, qui apertè & manifestè illa contemplabantur, vt, post alios scriptores, tradit Suidas. Lactantius, ad finem lib. 7. sic opus suarum Diuinarum institutionum concludit, conuerso ad Constantinum Magnum sermone. *Hæc nostra sapientia quam isti qui vel fragilia colunt, vel inanem Phila-*



sophiam tuentur, tanquam stultitiam vanitatemque derident, quia non defendere hanc publicè atque asserere non solemus, Deo iubente, ut quieti ac silentes arcanum eius in abdito atque intra nostram conscientiam teneamus: Ne pagani arguendi & illudendi gratia inclementer Deum ac Religionem eius impugnet. Abscondi enim tegiq; Mysterium quam fidelissimè oportet, maxime à nobis qui nomen fidei gerimus. S. Gregorius Nazianzen. orat. i. de Theologia, rem istam pluribus explicat, & ex eo Christianam Religionem nulla omnino ratione suis carere Mysteriis videri, cum Gentiles in sua illa detestanda religione sua habuerint pecularia Mysteria. S. Chrysostom. homilia 24. in Math. Mysteria, inquit, ideo clausis ianuis celebramus, & eos qui nondum initiati sunt, adesse prohibemus, non quia infirmitatem Mysteriorum aliquam deprehendimus, sed quia ad participationem eorum, illi adhuc quos arcemus, infirmi sunt. Extant quamplurima ipsius Sanctissimi viri in eam rem loca, à multis repetita. S. Gregorius Nyssenus, oratione aduersus eos qui differunt baptismum, illos tandem hortatur, ut sese adiungant populo mystico, seu fidelibus baptizatis, & discant verba arcana, λογισ ἀπορρήτους. Canant cum perfectis Christianis hymnum, ab ipsis Seraphin decantatum, ament Mysterium, quod modo non aspectabili senes & grandæuos transmittit ad iuuentutem. S. Hieronymus in c. 46. Ezechielis, Mysteria non vulgo proferenda monet, & Sacerdotes alia vti debere doctrina scribit ad vulgus ignobile, ac proinde alia apud peritiores & perfectiores. Aptè ad id facit quod tradit Eulogius Alexandrinus Patriarcha, apud Photium, Bibliothecæ numero 230. Earum, quæ in Ecclesia à ministris verbi Diuini traditæ sunt doctrinæ, quædam dogmata sunt, quæ-

T iij

dam præconia & differentia. Dogmata cum occultatione & sapientia declarantur, & obscuritati sæpe de industria inuoluuntur, ne profanis sint sancta exposita, & margaritæ porcis obiciantur. Præconia sine vlla obscuritate dicuntur, & ea præsertim quæ de præceptorum & Diuinæ reuerentiæ obseruatione tractant. Esse præterea dogmata quædam obscuriora, quæ omnino, vt ita dixerim, tacentur, solis verò illis mysticè tradita, qui fideles habent spirituales sapientiam, per verbum viuum. Alia vocat, *δὲ γὰρ*, alia *κρυπτα*, quæ aptius prædicationes, vt & Interpres S. Basilij, exponere malim, cum præconij vox paulò diffusioris significati existat. Interim aduertere licet Eulogium, totam hanc sententiam ex B. Basilio desumpsisse, vt postea indicabimus. Acutissimè, suo more, S. Augustinus, Tractatu 98. in Ioannem: *Non aequaliter mente percipitur etiam quod in fide pariter à carnalibus & spiritualibus recipitur. Illis tanquam lacteus potus, istis tanquam solidus cibus præbetur; non quia hoc carnales aliter in populis, spirituales aliter in cubiculis cognouerint, sed quod eodem modo utrique, cum palam diceretur, audiebant, pro suo modo quique capiebant.* Vnde illud B. Barnabæ, ex Epistola ipsius, apud Clementem Alexandr. lib. 5. Strom. Simplicius vobis scribo, vt intelligatis. S. Basilius, lib. de Spiritu Sancto, c. 27. diuinè ista explanat, cum ait, Initio nascentis Ecclesiæ, Apostolos, eorūque successores certos ritus præscripsisse, atque Mysteriis in occulto & silentio suam seruasse dignitatem. Neque enim omnino Mysterium est, quod ad populares & vulgi aures effertur. Hæc est ratio cur quædam citra scriptum tradita sunt, ne dogmatum cognitio propter assuetudinem, vulgo veniret in contemptum. Aliud autem est dogma, aliud prædicatio:



Nam dogmata silentur, prædicationes verò publicantur. Est autem silentij species etiam obscuritas qua utitur Scriptura, intellectu difficilem reddens dogmatum sententiam, idque ad utilitatem eorum qui in Sacris Scripturis versantur. Quod de Scripturæ obscuritate dixit S. Basilus, illustratur ex eo quod tradit Origenes in Psalm. i. & apud Epiphanium, Hæresi 64. Sacram Scripturam esse obsignatam Davidis sigillo, cui inerat hæc inscriptio: *Ἁγίασμα Κυρίου* .i. Sanctitas Domino. Eusebius lib. i. de demonstratione Euangelica, c. 8. illam S. Basilij sententiam adstruere videtur, dum ait, Apostolos quæcunque iis convenire arbitrabantur, qui animas adhuc affectibus obnoxias gererent, & curatione indigerent, ea ipsi ad imbecillitatem multorum se demittentes, partim literis, partim sine literis, quasi iure quodam non scripto, servanda commendarunt. Clementis Alexandr. lib. ii. Strom. singularis illa est sententia, Non solam traditionem publicam propositam esse ei qui sensit sermonis Divini magnificentiam, sed sapientiam quoque, quæ expressa est in Mysterio, quam docuit Dei Filius, occultandam esse. Videtur enim innuere duplicem esse traditionem, unam popularem & vulgarem, aliam secretiorem & mysticam; & quod postea subiicit de sapientia in Mysterio celanda, istud firmat. Ac id bellè congruit quod suprà propositum est ex B. Basilio, & Eulogio Alexandrino, de discrimine dogmatis & prædicationis, Omnes quidem videri idoneos prædicationis intelligendæ, quæ tota comparata videatur pro captu auditorum: At in dogmatibus explanandis non omnes pari intelligentia præditi intelliguntur. Vnde præclarè B. Augustinus, lib. de Catechizandis rudibus, non vno loco, Catechistem docet quomodo sese

gerere debeat in instituendis iis qui fidem & religionem Christianam amplecti cupiebant, aliter in doctissimis & summis quibusque ingeniis, alio modo in Rhetoribus & Grammaticis, aliter in idiotis seu urbanis, seu rusticanis. Potest & illud adici, fideles è vulgo aliter minus capaces videri Mysteriorum; aliter, qui nondum Baptismum, Græcis φωτισμα, illuminationem, sunt assecuti, illi quod possunt, capiunt, isti prorsus arcentur. Quoties SS. Patres ista usurparint, cum de Mysteriis differrent, aut scriberent, *Norunt fideles, Norunt initiati*; Etiam Catechumenis, quos Tertullianus, lib. de Pœnit. *Novitiolos* appellat, ista manifestare verebantur. Hos, ut ceteros Gentiles, Clemens Alexandr. lib. 5. Strom. vocabulo, λαϊκῆς ἀπιστίας, laicæ infidelitatis, expressisse videtur. Nemo enim Catechumenos necdum baptisatos fideles dixerit, de ceteris clarum illud est utrosque si infideles recte dixeris, eodem iure *Profanos* appellaueris, quinsi profanus etiam Imperitum & Indoctum significat, etiam qui è vulgo, *Profani* dicentur. Minutius Fœlix in Octauio, *studiorum rudes, litterarum profanos*, enuntiauit. 1. Reg. 21. nostra vulgata habet *via hæc polluta est*, Procopius in hunc locum ex versione Septuaginta, vel cuius, cuius sit, ἡ ὁδὸς αὐτῆς βέβηλος. & ait βέβηλον hic seu, *profanum* non pro ἀνεργόν, id est, pro impiato & impuro sumi, sed pro μὴ ἱερόν, id est, non sancto. De vocabulo *Idiotæ*, non aliter sentiendum, cum non vnius significati existat. Glossæ veteres, ἰδιώτης κοινός. *Privatus, Paganus, Plebeius*. Vna & altera notione Christianos veteres exprimi certum. Scio impium Lucianum in Peregrino, appellasse Christianos, Ἀθεῖστοις ἰδιώταις. Et de Ecclesiæ nascentis primordiis ista pronuntiauit S. Hieronymus, præfat. lib. 3. Comm. in Epistolam ad Galat.



Galat. Ecclesia Christi non de Academia & Lyceo, sed de vili plebecula congregata est. Hinc apud Prudentium in Romano,

*Illiterata credidit frequentia.*

Dioni Chrysostomo, orat. 12. ἰδιώται, Plebeius est; Mitto Suidam, voce vtraque, ἰδιώται & ἰδιώτης: qui & alia memorat significata. Iustiniano Nouel. 6. c. 1. Idiota idem qui Laicus. Iulianus Antecessor, Laici, vocem reposuit, ea Constitutione.


## §. 13.

Sed quoniam his nostris Mysteriis occultandis tantum veteris Ecclesiæ Patres religionem inesse voluerint, vt plures, vel indignos ab iis spectandis arcerent, nimirum Gentiles, Catechumenos, Energumenos, Pœnitentes, quemadmodum & Orientalis & Occidentalis Ecclesiæ Liturgiæ, ac prisci Canones fidem faciunt, vel iis capiendis & intelligendis minus idoneos indicarent, aliquam tamen, vt ego arbitror, ab ipsorum Mysteriorum conditione & natura tantam silentij fidem repetendam esse voluerunt, quin fidelibus ipsis in illis cernendis singularem quandam modestiam, metumque religiosum indixerunt. Synesio. lib. de Prouidentia, Ἀγνοῖα σεμνότης ἐπὶ τελεταῖν: Ignoratio Mysteriorum est illorum veneratio. Ex B. Basilio, lib. de Spiritu Sancto, c. 27. istud exscripsisse videtur Synesius. Ita enim scripsit, τῶν μυστηρίων τὰ σεμνὰ σιωπῇ ἀγασσέμεθα: Mysteriorum venerationem silentio conseruari. Quæ non modo in iis, vbi intellecta fuerint, minimè euulgandis locum habere videntur, verum etiam in iis spectandis peculiarem quandam ac planè religiosum metum, atque reuerentiam adhibendam esse admo-  
nent. Hinc in Liturgiis Græcis formulæ istæ; σιωπῇ μετ'

Φόβου, ἐν τῇ φόβῳ, State cum reuerentia, state cum timore.  
 Et quando istud acclamatum, ὥρα τῆς αἰαφόρου, hora  
 eleuationis. Sic enim Græci interpretantur. De qua re  
 post B. Chrysostomum Anastasius Sinaïta, oratione de  
 Sacra Synaxi. Agitur autem hoc loco, de SS. Eucharistiæ  
 eleuatione, quam S. Chrysostomus, homil. 45. in Ioan-  
 nem appellat, *Θεῶν μυστηρίων*, Miraculum Mysteriorum;  
 & *Φερόμενὰ τὰ μυστήρια τῆς ἐκκλησίας*, horrenda & tremenda  
 Mysteria Ecclesiæ. S. Epiphanius in fine Panarij, *εἰδοθέν  
 μυστήρια*, interna mysteria dixit. Atque Imperatores po-  
 tissimum totam hanc, circa SS. Eucharistiam, actionem,  
 quæ Liturgia vocatur, *Cælestia Secreta* nominarunt, Cod.  
 lib. 16. tit. 2. l. 40. vt & Ecclesiam Mysteriorum locum,  
 Cod. Theod. lib. 16. tit. 5. l. 6. Neque vero lectoris be-  
 nigni patientia velim abuti in congerendis SS. Patrum te-  
 stimoniis de fidelium religiosa modestia in Templis ad-  
 hibenda, vnius præsertim SS. Eucharistiæ gratia: Vnum  
 proferam Gentilem, quem de nostris rebus falsa scripsisse  
 non affirmat S. Augustinus, quamquam illi non satis ca-  
 perspectæ. Is est Maximus Madaurensis, Epistola ad B.  
 Augustinum, quæ est 43. A B. Augustino istud postulat:  
*Ipse re approbes quis sit iste Deus, quem vobis (Christiani) quasi  
 proprium vindicatis, & in locis abditis præsentem vos videre  
 componitis.* Verbo (*Componendi*) hac in re aptissimè vsus, vt  
 ad singularis venerationis & cultus formam Christianos  
 in locis abditis, hoc est, Ecclesiis, à quibus Gentiles arce-  
 bantur, comparatos esse indicare videatur. Non aliter de  
 suis Gentilibus ista protulit Seneca, lib. 7. Natural. Quæ-  
 stionum, c. 30. *Si intramus Tempia compositi, si ad Sacrifi-  
 cium accessuri, vultum submittimus, togam adducimus, & in  
 omne argumentum modestiæ fingimur.* Quintilianus, Decla-




matione 365. In Templo, in quo verbis parcimus, in quo animos componimus, in quo etiam tacitam mentem nostram custodimus, pulsare velut in solitudine, velut in secreto quodam, non est ferendum.



## CEREMONIÆ.

### §. 1.

OMO totus à Deo pendet, cui & animo & corpore venerationem conuenientem adtribuat. Corporeus & externus cultus Ceremoniis significatur. Ordinis ratio id postulat.

### §. 2.

Ceremonia pro Religione. Ceremoniis Religionem carere non posse. Ceremonias non vnius eiusdemque generis & dignitatis esse, nec etiam originis.

### §. 3.

Ecclesia, domus, ciuitas, nec nisi temporis progressu, quoad res externas, perfici potuit. Ex collatione cum Republica Iudeorum.

### §. 4.

Cur Sectarij nostras damnent Ceremonias. Quæ à Gentilibus in sua Idolomania factitata, quo pacto vel improbanda, vel non usurpanda à Christianis. Ex SS. Patribus.

### §. 5.

Imitatio Gentilium qualis. Veritas ubicunque reperitur, Dei est. Ex variis, Ceremoniæ tota Ecclesia & recepta & probata,

*non innumera. Religio Christiana non aestimanda à stoliditate vulgi.*

§. 6.

*Obiiciunt Ceremonias nostras partim à Gentilibus, partim Iudaicis depromptas. Ceremonias Gentilium bonam partem Iudaicarum imitatione, & nonnunquam nostrarum, post Constantinum M. institutas fuisse. Diabolus auctor præcipuus Ceremoniarum Gentilium. Numa institutor Romanarum.*

§. 7.

*In gratiam curiosi Lectoris, enumerata & expensæ aliquæ Gentilium Ceremoniæ, quas à Iudaicis originem sumpsisse demonstratum. Excelsa, de quibus Scriptura, quam fuerint. Item Luci, & cuius venerationis. Diabolus, quantum potest, res Dei æmulatur.*

§. 8.

*Sacrum Diti & Proserpinæ factum apud Romanos, mera fuit imitatio Iudaici Sacrificij à summo Pontifice, semel in anno procurati. Leuit. 16. Hebr. 9.*

§. 9.

*Codex Sacrorum apud Arcades ex duobus lapidibus compactus, exemplo duarum Tabularum Mosaicarum, in quibus lex descripta. In Templis Gentilium vel fontes, vel putei. Ex Iudaicis qua ratione istud petiit. Christianis veteribus ad fores Ecclesiæ. Vas aquæ lustralis. KepiGov.*

§. 10.

*In Templis Gentilium Veste ignis æternus. Iudaorum æmulatio. Lucerna apud Gentiles, ut apud Iudeos, & hæc multiplex, siue noctu, siue interdiu. Exploratio victimarum immolandarum apud Gentiles, exemplo ritus Iudaici. Sal in Sacris Gentilium, ut apud Iudeos.*

§. 11.

*In Sacris conuersiones variæ, & circuitus apud utrosque.*



*Christianis veteribus an istud v̄sitatum. Tertulliani locus expensus in verbo, Ambiendi. Tacitæ obiectiōni responsum. Verbis Procedendi, Pergendi, v̄si veteres. Solemni pompâ Sacra sua ferendi Gentilium ritus manauit à Iudæis. Iudæorum impietas in deserto, Idolo Moloch sacrificantium, & eius tabernaculum deferentium.*

§. 12.

*Principibus urbem aliquam ingredientibus, itum est obuiam à Cinibus, Sacra sua gestantibus. Gentilium, Iudæorum, Christianorum exempla.*

§. 13.

*Gentiles Christianorum ritus imitari voluisse. Formulæ Ecclesiasticæ à Gentilibus in suis Sacris v̄surpatæ. Saluiani locus explicatus.*

§. 14.

*De Sacrificulis Gentilium. Pontifices Maiores in quaque Pro-  
uincia constitutos. Iudæorum imitatio. Formulæ Christianæ à  
Gentilibus v̄surpatæ. Gentiles, Philosophos auctores suarum  
opinionum, Patres, Antistites, vocant.*

§. 15.

*De signo Crucis. An aliquid persimile factitatum apud Gen-  
tiles. Tertulliani locus valde obscurus, tentatus. Huic lux fa-  
cta ab eodem Tertulliano, ex coniectura.*

§. 16.

*An apud Iudæos Ceremonia aliqua in v̄su fuerit, quæ quam-  
dam signi Crucis speciem referret. V̄nctio Regia in capite, in  
modum Coronæ. V̄nctio Sacerdotalis in modū litteræ Græcæ X.  
& quæ significatio.*

§. 17.

*De signo Crucis, siue vno, siue tribus digitis efformando. Hi-  
storia ad eam rem insignis. Philonis Iudæi pro suis Ceremoniis  
retinendis quæ rationes, nostris maximè congruentes. Conclusio  
ex S. Augustino.*

V iij



## Ceremoniæ.

### §. 1.



OMO totus Dei est & quouis tempore. Apostoli Gentium ea doctrina est, Rom. 14. *Siue uiuimus, siue morimur, Domini sumus.* Quo pietatis æstu Deum ut maximum ita verè optimum sic compellat B. Augustinus, Confessionum lib. 1. c. 2. *Non essem, Deus meus, non omnino essem, nisi esses in me; An potius non essem, nisi essem in te, ex quo omnia, per quem omnia, in quo omnia.* Solens & pro sui ingenij acumine istud de homine idem ita explanat, de Ciuitate Dei, lib. 22. c. 24. *Ipsè, Deus, operatione qua nunc usque operatur, facit ut numeros suos explicent semina, & à quibusdam latentibus atque inuisibilibus inuolucris, in formas visibiles huius, quod aspiciamus, decoris euoluant.* Ipsè incorpoream corporeamque naturam, illam prepositam, istam subiectam, miris modis copulans & connectens animantem facit. Hæc de Deo, de nobis aliter cogitare non possumus, quin nisi mens nostra sua sede penitus dimota fuerit, simul nos à Deo omnino pendere, & quidquid simus vel habeamus, id totum à Deo consecutos esse agnoscamus. Neque vero eiusmodi agnitio alia vel excogitari, vel deprehendi potest, quàm si Dei summum in nos imperium & dominium pari, hoc est, summo cultu profiteamur. Arnobius, lib. 7. istud nos docet. *Honos omnis, inquit, qui haberi ab aliquo dicitur, &*



*reuerentia potioris attribui, relatiui est ad alterum generis, & constans partibus duabus, ex concessione tribuentis & amplificatione sumentis.* Cùm igitur in homine nihil omnino reperiatur quod ex Dei suprema Maiestate & benignitate non proficiscatur, tanti tamque immensi beneficii non modo recordatio, sed sensus, hominem ipsum, vel inuitum, ad supremum hunc auctorem suum beneficentissimum summa veneratione & omnium maxima prosequendum impellit. Sed quoniam totum quidquid sit hominis, duabus absoluitur partibus, animo & corpore, supremum hunc Diuini Numinis cultum non animo tantum, hoc est, singulari mentis apprehensione, & propensissima ad hanc Diuinam Maiestatem recognoscendam atque colendam voluntate, verum etiam corpore, id est, externis & corporeis signis perfici debere ratio ipsa iure optimo suadet. De mentis humanæ circa ea quæ Diuini Numinis beneficentia homini contingunt comprehensione, alius est dicendi locus. De corpore, seu sensibus & externis illis ritibus, nobis hoc tempore dicendum est: Ceremonias vocant, quarum vsus adeo necessarius, vt eo cultus Diuinus, quem nos Religionem dicimus, carere non possit, huiusque non contemnendam partem efficiat. Quis enim ritè & rectè institutum Dei cultum atque Religionem comminisci potest absque ordine? Vnde merito Apostolus Corinthios admonuit, 1. Corinth. 14. iis verbis, *Omnia honestè & secundum ordinem fiant in vobis.* Neque verò existimandum est, Apostoli præceptum ad solam Corinthiorum Ecclesiam spectare, cùm amantissimos Discipulos suam Ecclesiasticam regulam, in Ecclesiis à se institutis receptam, sequendam esse admonet. Theodoretus hæc refert ad leges Eccle-

siasticas, quas suprà memorauit Apostolus, & quas ordinis nomine comprehendi & intelligi ille idem innuit. Aptè id quidem, cum ex Platone, 6. de legibus, quidquid in Republica ordine & lege fiat multa bona afferat. Ordine vero & lege, mutuo veluti nexu, fieri dixit Plato, quoniam ipsa mutuo sese stabiliant & defendant. Siquidem in lege, ordinis conseruatio consistit, & à conseruatione ordinis lex vim suam roburque obtinet. Certè ordinis in publicis Christianorum conuentibus, atque adeo in Ecclesia studiosissimè retinendi, eam curam & sollicitudinem esse voluerunt veteris Ecclesiæ Patres, vt propter delicta non admodum graua, nonnulli excommunicentur, quandoquidem illa *Αταξία*, hoc est ordinis in Ecclesia seruandi perturbationem inducant, vt videre est in nonnullis Canonibus, qui Apostolorum nomine circumferuntur. Ceremonias vero ad ordinem pertinere nemo fani capitis dubitabit, & hac voce ab Apostolo intelligi etiam aduersarij magni apud eos nominis vltro fatentur.

## §. 2.

Neque verò illud prætermittendum apud probos auctores, *Ceremoniarum* vocem, pro Religione vsurpari. Suetonius in Iulio, c. 5. *Ceremonias Deorum*, pro Religione dixit. Æmilius Probus in Themistocle, *Summam Ceremoniam*, pro Religione nominauit. Actus passionis B. Cypriani, cuius meminit Pontius Diaconus eiusdem Sanctissimi Martyris, Proconsulem inducit exprobrantem istud Beatissimo Martyri, iis verbis: *Inimicum te Diis Romanis & sacris Religionibus constituisti, nec te pij sacratissimique Imperatores ad consensum Ceremoniarum suarum reuocare potuerunt.* Apud Minutium Fœlicem, in Octauio, Cæcilius



Cæcilius Gentilis Christianos infectatur, quoniam *Cru-  
cis ligna feralia*, eorum *Ceremonia*, i. Religio, *fabuletur*.  
Iudith, c. 5. vetus interpres ita habet. Achior Dux Am-  
monitarum de Iudæis differens ait, *Deserentes Ceremonias*  
*patrum suorum, quæ in multitudine Decorum erant, unum Deum*  
*Cæli coluerunt*. Seruius in 4. *Æneidos*, hoc versu,

— ubi audito stimulant Triceterica Baccho. |

Sanè sciendum, inquit, *Orgia*, apud Græcos, dici, *Sacra om-  
nia*, sicut apud Latinos, *Ceremoniæ* dicuntur. In veteri pas-  
sione B. Cypriani, hæc leguntur. *Iusserunt te*, Cyprianum,  
*Sacratissimi Imperatores, Ceremoniari*, id est, eandem cum  
ipsis religionem profiteri. Sed ut è diuerticulo in viam,  
quantum ad religionis Christianæ dignitatem & maiesta-  
tem *Ceremoniæ* conducant nunc videamus. S. Gregorius  
Nyssenus, libro de vita Mosis, res illas exteriores & *Cere-  
monias*, lac Ecclesiæ, vocat. Et ne quis putet iam adultos  
lacte non indigere, sed solido cibo, intelligat necessum  
est, *Ceremoniis* religionem & Diuini Numinis cultum  
nulla omnino ratione carere posse, quemadmodum supra  
à nobis demonstratum est. Et vnum hunc, nimis quan-  
tum vulgatum, B. Augustini locum abundè satisfacere  
existimo, lib. 19. contra Faustum Manichæum, c. 11. *In nul-  
lum nomen Religionis seu verum, seu falsum, coagulari homines*  
*possunt, nisi aliquo signaculorum vel Sacramentorum visibi-*  
*lium consortio colligentur*. Verum non propterea omnes  
illas *Ceremonias* quas nunc seruandas habet Ecclesia, aut  
paris dignitatis & reuerentiæ existere, aut iam vel ab ipsis  
Ecclesiæ incunabilis usu receptas affirmare velim. Discrimen  
illarum satis apertum est & perspicuum, sunt enim  
*Ceremoniæ Sacramentales*, quæ Diuinis Christianæ reli-  
gionis Sacramentis administrandis sunt coniunctæ, sunt

& non Sacramentales multiplicis generis, quæ sunt vel incolumitatis humanæ remedia, aut ad pietatem Diuinam præparant, vel pietatis siue modestiæ Christianæ exercitia. De quibus omnibus singillatim & copiosissimè à grauissimis & doctissimis Theologis, nostro æuo, disputatum est. Nos generatim de tota re disserere institimus, atque illas omnes Ceremonias non ab ipsis Apostolorum temporibus in Ecclesia institutas & vsitatas, sed sensim, pro vario in Dei cultum animorum motu ad pietatem ardentiorē & vehementiorē excitandam, diuersis seculis excogitatas, vniuersim affirmamus.

## §. 3.

Istud nemini dubium videri debet, quandoquidem in Scriptura, Ecclesia vocatur *Domus*, 1. Timoth. 3. 2. Timoth. 2. *Ciuitas*, Math. 5. At nec domus, vno ac breui momento ædificari, nec Ciuitas suis omnibus partibus, ordinibus, statutis, legibus illicò perfici solet. Aristoteles, 2. Elenchorum, ait, omnium rerum principia exigua esse. Et istud confirmat à simili, de artibus quæ progressu temporis perfectionem consecutæ sunt. Seneca, lib. 6. *Quæstion. Natural. c. 5. Nulla res consummata est dum incipit.* Paulo antea. *Noua omnia erant primo tentantibus, post eadem illa limata sunt, & si quid inuentum est, nihilominus referri debet acceptum.* Elegans extat de ea re B. Epiphaniij dissertatio, hæresi 75. quæ est Aërij, vbi Ecclesiæ Christi collationem cum Republica Iudaïca instituit. Deus primum vocauit Mosem solum, & virgam, Diuinæ potentiæ instrumentum, illi adtribuit. Deinde Aaron fratrem addidit, tum Principes familiarum ac Tribuum quasi Senatū aliquem conuocari voluit, vt communi consilio res quæque alicuius momenti gereretur. Ita Ecclesia Christi



pro temporum successione varia incrementa & dispositiones suscepit. Tria, ni fallor, tempora licet animaduvertere, quibus Ecclesia Christi, vel nouos instituit, vel prioribus alios adiunxit ritus: Ab Apostolis ad Constantinum Magnum, de quibus B. Dionysius, S. Ignatius, Clemens Alexandrinus, Origenes, Tertullianus, B. Cyprianus, S. Zeno Veronensis, alij. A Constantino Magno ad B. Gregorium Magnum, à B. Gregorio ad nostrum seculum. De his omnibus singillatim dicere, nec est huius loci, nec propositi ratio id postulat, quia etiam res est à summis viris confecta. Sed quam ob causam Sectarij adeò acerbè in nostras Ceremonias inuehantur, discutiamus.

## §. 4.

Non placent seu quia innumeræ videantur, seu magnam partem à Iudæis atq; Gentilibus petita sint. Posteriori isti querelæ, SS. Patres aptissimè fecerunt satis, nec propterea repudiandas censuerunt, quamuis aliquid ipsis Iudaicis, vel Ethnicis persimile repræsentarent. De priori postea videbimus. S. Augustinus, epistola 49. *Hoc nec praterendum est, quod Templum, Sacerdotem, Sacrificia, & alia quacunque adhuc pertinentia, nisi uni vero Deo deberi, nossent Diij falsi, hoc est, Demones, qui sunt prauaricatores Angeli, nunquam hæc sibi à cultoribus suis, quos decipiunt, expetissent.* Ille idem Sanctissimus Episcopus lib. 22. de Ciuitate Dei, c. 10. *Illi, .i. Pagani, talibus Diis suis & Templata edificauerunt, & statuerunt aras, & Sacerdotes instituerunt, & Sacrificia fecerunt. Nos autem Martyribus nostris non Templata, sicut Diis, sed Memorias, sicut hominibus mortuis, quorum apud Deum viuunt spiritus, fabricamus, nec ibi erigimus Altaria, in quibus sacrificemus Martyribus, sed uni*

X ij

Deo, & Martyrum & nostro, Sacrificium immolamus. Paulo post. Deo, non ipsis sacrificat Sacerdos, quamvis in memoria sacrificet eorum, quia Dei Sacerdos est, non illorum. Ipsum vero sacrificium corpus est Christi, quod non offertur ipsis, quia hoc sunt & ipsi. Hoc est ipsi Martyres sunt de corpore mystico Christi, quod est Ecclesia. S. Hieronymus aduersus Vigilantium: Qui cereos accendunt ad sepulchra Martyrum, Idololatrius appellas huiusmodi homines. Non dissiteor omnes nos qui in Christo credimus, de Idololatria errore venisse; non enim nascimur, sed renascimur Christiani, & quia quondam colebamus Idola, nunc Deum colere non debemus? ne simili eum videamur cum Idolis honore venerari? Illud fiebat Idolis, & idcirco detestandum est, hoc fit Martyribus, & idcirco recipiendum est. Quam appositè S. Gregorius Nazianzenus, Oratione 20. in laudem S. Basilij, istud urget, non ideo nos debere detestari & aspernari Cælum, aërem, & cœtera id genus, quoniam Gentiles illa quondam adorarint, sed horum Creatori summo honos reddendus sit. Ita S. Augustinus, lib. 20. contra Faustum Manichæum, c. ultimo: Etsi usus quarundam rerum similis videtur esse nobis cum gentibus, sicut cibi & potus, tectorum, vestimentorum, lauacrorum, & qui ex nostris coniugalem vitam gerunt, uxorum ducendarum & habendarum, filiorum gignendorum, nutriendorum, hereditandorum, longè tamen aliter his rebus utitur, qui ad alium finem usum earum refert, & aliter qui ex his Deo gratias agit, de quo praua & falsa non credit. Hanc ex Tertulliano rationem desumpsisse videtur B. Augustinus. Sic autem habet Septimius Florens lib. de Corona militis, Admittens quidem utensilium communionem, sed prouocans eam ad rationalium & irrationalium distinctionem, quia passivitas rerum fallit, obumbrans corru-



ptelam conditionis, qua subiecta est vanitati. Dicimus enim ea demum & nostris, & superiorum vsibus, & Dei rebus, & ipsi Christo competisse, quæ meras vtilitates, & certa subsidia, & honesta solatia necessariis necessitatibus vitæ humanæ procurent: ut ab ipso Deo inspirata credantur propiore prospectore, & instructore, & oblectatore, si forte hominis sui. Quæ vero hunc ordinem excesserint, ea non convenire vsibus nostris, præsertim quæ propterea scilicet nec apud seculum, nec in Dei rebus, nec in conuersationibus Christi recognosci est. Et si nihil aliud occurreret quod Ceremoniarum nostrarum iniquis reprehensoribus reponeremus, quàm quod à B. Augustino proditum est, lib. 2. de Doctrina Christiana, c. 20. illud cuique moderatori sufficere arbitrarer. Sic autem habet: Superstitiosum est quidquid institutum est ab hominibus, ad faciendâ & colendâ Idola pertinens, vel ad colendam, sicut Deum, creaturam, partemue nullam creaturæ. Quis in nostris Ceremoniis, ab Ecclesia institutis & probatis aliquid persimile deprehendat, nisi meris mendaciis & calumniis fidem omnino adhibendam affirmet?

## §. 5.

Totum hoc de Gentilium imitatione, quàm lepidè, quàm acutè explanat S. idem Augustinus, lib. 2. de Doctrina Christiana, c. 18. Nos, inquit, non propter superstitionem profanorum debemus Musicam fugere, si quid inde utile ad intelligendas Sanctas Scripturas, rapere poiuerimus; nec ad illorum Theatricas nugas conuerti, si aliquid de Citharis & de Organis quod ad spiritualia capiendâ valeat, dispuemus. Neque enim & literas discere non debuimus, quia earum repertorem dicunt esse Mercurium: Aut quia Iustitiæ Virtutisque Tempia dedicarunt, & quæ corde gestanda sunt, in lapidibus adorare maluerunt, propterea nobis Iustitia Virtusque fugienda est: Imò

X iij

verò quisquis bonus verusque Christianus est, Dominum sui esse intelligat, ubicumque inuenerit, veritatem, quam confitens & agnoscens etiam in literis Sacris, superstitiosa figmenta repudiet, doleatque homines atque caueat, qui cognoscentes Deum, non ut Deum glorificauerunt, aut gratias egerunt. S. Augustini locus hic non otiosè & perfunctoriè legendus mihi videtur, ut potè qui ad quæstionem, qua de agitur, & explanandam, & illustrandam plurimum conferat. Si enim veritas ubicumque reperiatur, seu apud Gentiles, seu apud alios, Domini Dei esse dicatur, non minus eiusdem esse dicetur quidquid actum & institutum fuerit, quod suapte natura vnius Diuini Numinis honori congruere videatur, licet, praua hominis voluntate, creaturæ potius quam Deo tributum sit. Hanc B. Augustini sententiam mirum in modum illustrat quod Origenes, lib. 6. contra Celsum disse-rit. Postquam enim docuit Platonem præclara multa scripsisse, ut potè primum bonum esse ineffabile, & similia, quæ nos cum audimus, non assentire non possumus. Deus enim & hoc, & quidquid aliud Plato & cæteri Philosophi bene dixerunt, eis manifestauit. Mitto cætera quæ sequuntur ab ipso Origene elegantissimè disputata. Lactantius, lib. 6. c. 8. paucis rem expressit: Ego, inquit, eos qui vera imprudenter loquuntur, sic habendos puto, tanquam diuinent: spiritu aliquo instincti. Congruit istud B. Augustini sententiæ, Epist. 28. A quocumque verum dicitur, illo donante dicitur, qui est ipsa veritas. Et aptissimè Epistola 52. Luculentis ingenii non desit resplendentia veritatis. Sed illud præcipuum est quod scribit, Præfatione lib. 1. de Doctrina Christiana. Nonne, inquit, cum Moïse Deus loquebatur, & tamen consilium regendi atque administrandi, tam magni populi à socero suo, alienigena scilicet homine, & maximè pro-



uidus & minime superbus accepit? Nouerat enim ille vir, ex quacumque anima verum consilium processisset, non ei, sed illi, qui est veritas, incommutabili Deo tribuendum esse. Primasius, Prologo Commentariorum in Apocalypsim: Sicut pretiosa in stercore gemma à prudente debet curari, colligi, & re-  
perta dignitati ingenuæ reuocari, ita undecumq; veritas clareat, Catholica deferenda est unitati. Iustè namque fides à perfidis collegit, quod sui iuris esse cognouerit, nec prodesse potest alienis usurpatum, sed filiis, cum veræ matri fuerit redditum. Si qua fuerint Ecclesiasticis utilitatibus profutura, nostris sunt instructionibus applicanda, neque attendenda persona dicentis, sed qualitas consideranda est dictionis, licet undecumque proficere & doceri, aiebat S. Hildebertus Epistola 16. Incredibili certè pietatis affectu ista scripsit B. Paulinus, Epistola 4. ad Seuerum: Quoniam Spiritus ubi vult spirat, & audio vocem eius, & nescio unde veniat. Igitur ubique auram eius captabo, undecumque vel tenuem halitum legam, vel in domo indigni, vel Pharisei audiam iustum venisse, contendam præripere hospitii gratiam, præripere si possim Regnum Cælorum. Vbicumque mihi resonauerit Christi nomen, accurrā; ad cuiuscunque interiorē domum Iesum intrare cognouero, & ipse properabo. Si quid igitur obsequij, venerationis, reuerentiæ erga Diuinum Numen, in Gentilium vel scriptis, vel ritibus expressum, non tanquam imitatione praua mihi vendicabo, sed velut ab iniustis possessoribus merito repetam: denique summa impietate & scelere obscuratum, conspurcatum, suo germano ac natiuo splendori, atque nitore restituam.

## §. 6.

Tandem de semita in viam. Innumeras esse conque-  
runtur Cereimonias, quarum numerus vel iniri, vel ratio

reddi non possit. Illud citra controuersiam vllam asseuerare possumus, quæ ab Ecclesia vniuersa & vsu receptæ & probatæ fuerint, Ceremonias facile numerari posse. At singularum, quæ in toto orbe existunt, Ecclesiarum Ceremoniæ peculiæres, iam non vniuersam Christi Ecclesiam obstringunt. Is est cuiusque populi vnaquaque Diœcesi singularis deuotionis affectus, qui alteri populo & Diœcesi legem non dicat vel præscribat, vt ex B. Augustino, Epistola 118. colligere est. Neque vero abnuo plebeios, & plus æquo simplices ac rudiores nonnullos homines, sibi multa persuadere quæ Diuino honori, & Sanctorum venerationi maximè congruere videantur, quæ tamen nec Ecclesia in Conciliis generalibus, nec vlla Prouincia, Metropolitano Præsidente, nec quilibet Episcopus sua in Diœcesi probet. Quin ea in horum hominum animis, tam altas egerunt radices, vt nullis legibus Ecclesiasticis, atque adeo politicis & ciuilibus aut vix euelli possint. Quid de istis statuendum sit, nos docet S. Augustinus, libro de moribus Ecclesiæ Catholicæ, c. 34. Sic Manichæos alloquitur: *Nolite consecrari turbas imperitorum, qui vel in ipsa vera religione superstitiosi sunt, vel ita libidinibus dediti, vt obliti sint quidquid promiserint Deo. Noui multos esse sepulchrorum & picturarum adoratores, noui multos esse qui luxuriosissimè super mortuos bibant, & epulas cadaueribus exhibentes, super sepultos seipsos sepeliant, & voracitates ebrietatesque suas deputent Religioni. Noui multos esse, qui renunciantur verbis huic seculo, & se omnibus huius seculi molibus opprimi velint, oppressique latentur. Vno verbo satisfecit Isidorus Pelusiota, lib. 2. Epist. 241. dum ait Religionem Christianam non esse æstimandam à stoliditate vulgi. Maioriani Imperatoris vox Christianissimo Principe*



Principe digna, Tit. 8. Nouellarum: *Religionis sacrosanctę  
venerationem, lędi commentis mortalium figmentisque prohi-  
bemus.*

## §. 6.

Nunc Ceremoniarum reprehensionis caput præci-  
puum excutiamus. Ceremonias nostras vel à Iudęis, vel à  
Gentilibus profectas dicunt, meramque illarum imita-  
tionem esse pronuntiant. De Iudaicis non est quod hoc  
tempore particulatim magis & copiosius dicamus, quan-  
doquidem generalis duntaxat de iis omnibus instituta sit  
disputatio. De Gentilium itaque Ceremoniis præsertim  
dicendum est, easque vel Iudaicarum, vel, quod miran-  
dum, nostrarum praua quadam æmulatione institutas  
fuisse demonstrandum. Ac Dęmonem istarum Ethnica-  
rum & auctorem & suasorem principem extitisse nullus  
dubito: veterum Patrum ea sententia est. Vnicū mihi satis  
erit Iulij Firmici, lib. de errore profanarum Relig. testi-  
monium: *Omnia, inquit, symbola profanę Religionis per or-  
dinem suggerantur, ut probemus nequissimum hostem generis  
humani de sanctis hæc venerandisque Prophetarum Oraculis  
ad contaminata furoris sui scelera transtulisse.* In veteri Te-  
stamento, Prophetę, Diuino afflatu, res mirandas à Mes-  
sia venturo perficiendas prænuntiarant, ista omnia Dę-  
moni non ignota, inde imperium suum euersum iri intel-  
ligens, sibi in posterum satis cauisse arbitratus est, si par-  
tim per Poetas ista omnia de Christo prædicta referri oc-  
cuparet, & ea meris fabulis, & commētitiis figmentis in-  
uoluta, eo quidem astu & singulari calliditate, vt cū à  
Christo vero Messia, postea veniente, illa fieri cernerent  
homines Gentiles, anticipata quadam opinione, hæc non  
pluris facerent quàm Poëtarum nugas fictitias, iam mul-

Y

tis antea seculis decantatas. Nam Paccuij dicto, *Poëta pro sua parte falsa conficta canunt, qui causam humilem dictis ampliant.* Pacc. Teucro. Ista est elegans disertatio B. Iustini Martyris, Apologia secunda. Et quidem Poëtas à Dæmonibus inspiratos fuisse tradit Theophilus ad Autolyicum, lib. 2. Non ago hîc de iis actionibus, quæ ipsi Christo peculiare extiterint, ut quod ex Virgine natus, quolibet ægritudines persanarit, in Cælum ascenderit, quibus quid apud suos opposuerit, unico dempto Crucis supplicio, perditissimus desertor, explicat sanctissimus Christi Martyr. At ritus ipsos à Christo & ab Apostolis institutos, insigni sacrilegio, suis in Sacris nefandis usurpatis præsertim, expendere licet. Nouerat Prophetarum oracula, de rebus in noua lege à Christo condenda instituendis, quarum figuræ in veteri lege haberentur, has à Iudæis acceptas vel oraculorum responsis à se confictis, vel priuato quodam instinctu & suggestionem, vel ludicris quibusdam & ridiculis prodigiis, vel denique ementito læsarum religionum prætextu, aliquantum & nonnunquam interpolatas suis seruandas proposuit. Quod in Romanorum superstitione deprehendere est. Numam Romanarum Ceremoniarum auctorem primarium nemo nescit, de quo nos ex instituto differuimus, Commentario de Idololatria Magica. Vnum hoc subiiciam ex Tertuliano, lib. de Præscriptionibus, Diabolum, Numæ Pompilij opera, tot tamque varia sacrorum & rituum genera instituentis, morositatem illam Iudaicæ legis imitatum fuisse. Addo & istud Minutij Fælicis, in Oëtauio: *Romani vniuersarum gentium Sacra suscipiunt.* Et paulo post: *Speçta de libris memoriam, iam eos deprehendes imitasse* (sic editio Gelenij & nota vox Varroni apud Nonium) *ritus*



*omnium Religionum. Quamquam non parum ab illa sacro-  
rum suorum veteri disciplina deflexerint postea, teste do-  
ctissimo togatorum, Satyra, τὰ φεῖ Μενίππου, iis verbis:  
Hæc Numa Pompilius fieri si videret, sciret suorum instituto-  
rum nec volam, nec vestigium extare.*

## §. 7.

Verùm vt natura fert hominum, cuipiam aliquan-  
tulum curioso gratificari desiderans, pauca attingam  
Gentilium Sacra, quæ cum Iudæorum ritibus aliquam  
nec leuem habeant consensionem. Quod antequam ag-  
grediar, non minimi momenti quæstio prius explicanda  
venit. Constat Iudæos & Gentiles lucos velut sacra qua-  
dam domicilia, & Diuinitatem quandam complexa co-  
luisse. De Iudæis istud notum est. Ecclesiastici 49. scri-  
ptum est: *Præter David & Ezechiam & Iosiam, omnes Re-  
ges peccatum commiserunt. Attramen, vt alios omittam, de  
Rege Asa istud pronuntiat Scriptura, 3. Reg. 15. Fecit Asa  
rectum ante conspectum Domini, sicut David pater eius, &  
abstulit effæminatos de terra, purgavitque vniuersas sordes Ido-  
lorum, quæ fecerant Patres eius. Excelsa autem non abstulit.  
Idem de Iosaphat scriptum, 3. Reg. c. 22. Et ambulauit in  
omni via Asa patris sui, & non declinauit ex ea, fecitque quod  
rectum erat in conspectu Domini: Veruntamen Excelsa non  
abstulit, adhuc enim populus sacrificabat, & adolebat incen-  
sum in excelsis. Cuiusmodi autem fuerint Excelsa illa, intel-  
ligere est ex c. 23. lib. 4. Regum, vbi narrat Scriptura Io-  
siam Excelsa contaminasse, lucos succendisse, Altaria  
euertisse. Vt hæc tria coniuncta intelligamus, quæ maxi-  
mam in Deum impietatem arguebant. Nec alius, aut cer-  
tè non multum dissimilis, Iudæorum cultus hic, ne reli-  
giosus quidem, imo potius profanus, quàm Gentilium*

Y ij

venerantium montes & lucos. Lucianus, Dialogo de Sacrificiis, hanc Paganismi originem tradit, quod prisca illi homines Diis lucos primum adtribuerunt, tum montes dicarunt, deinde aues consecrarunt. Origeni, lib. 5. contra Celsum. Persæ montem pro Ioue venerantur. Sic Maximus Tyrio, Serm. 38. Apud Lycios Olympus in veneratione erat, & ignis quem ille eructabat, Templi & statuæ loco habebatur. Similiter apud Cappadoces, mons, & Deus, & Iusiurandum erat ac statua. In Africa, eodem auctore, inter Atlantem montem & mare, medium iacebat nemus, Lybicum hoc Templum, hic Deus erat, hunc iuriurando testem inuocant, hanc habent statuam. Lucorum non minor veneratio. Tacitus, de moribus Germanorum: *Lucos ac nemora consecrant, Deorumque nominibus appellant, secretum illud quod sola reuerentia vident.* Apud Romanos etiam, Orator Princeps, 2. de Legibus: *Constructa à patribus delubra habento. Lucos in agris habento.* At quales haberentur, docet lex 7. D. 18. tit. 6. & l. 51. tit. 1. eiusdem libri, nimirum eiusdem generis atque viæ publicæ, limites, littora, loca sacra, religiosa, hoc est, nullius priuati iuris, quia ipsi luci sacri sint. Seruius in hunc locum Virgilij, 1. Æneid.

— *Lucus in vrbe fuit.*

*Vbicunque, inquit, Virgilius Lucum ponit, sequitur consecratio. Dicuntur enim Heroum animæ Lucos tenere. Et in tertio Æneidos ait, in Lucis habitare Manes piorum, qui Lares viales sunt. Et in 9. Æneid. Nunquam est Lucus sine religione. Procopius, in lib. 1. Regum, c. 7. Vbi Luci sint, ibi statuas esse affirmat. Et libri 4. c. 17. Lucos Dæmonum Excelsa interpretatur. Idem etiam in caput 18. Altaria in excelsis consecrata exponit. Hinc Tacitus, de moribus Germa-*



norum, ait, Germanos ad bellum proficiscentes è Lucis, effigies & signa quædam velut Numinum suorum educere. De iis Aggenus Urbicus ad Frontinum, ita differit: *In Italia autem multi, crescente Religione sacratissima Christiana, Lucos profanos, siue Templorum loca occupauerunt & serunt. Profanos autem appellat, id est, pollutos & contaminatos, & postea idem exponit. Profanum dicitur, quod dum sanctum fuisset, postea in usu hominum factum est.* Cur verò Sacra Scriptura hos damnet Lucos, ratio aperta est, non modò quia ibi Altaria & prohibita sacrificia, sed quoniam loca erant ad omnem lasciuia & luxuriam comparata, & meræ peccandilatebræ. Hinc Horat. lib. 1. Ode 12. *Parum castos Lucos* dixit. Item Tertullianus, lib. de pudicit. Mæchiam seu fornicationem ita differentem inducit: *Sciunt Luci mei, & mei montes, & viuæ aquæ, ipsaque in urbibus Tempia, quantum evertendæ pudicitie procuremus.* Nunc quæritur, an Iudæi à Gentilibus, an contrà Gentiles à Iudæis, Lucorum & montium cultum impium didicerint, nefandæ istius superstitionis non alius fundus & auctor quàm Diabolus, Dei æmulus, quod toties inculcat Tertull. Nouerat Deum, Genes. 22. præcepisse Abraham, vt filium suum Isaac illi sacrificaret super vnum montium quem monstraturus esset. Deinde Exod. 3. Deus Mosi sibi sacrificium offerri præcipit super montem Oreb. Istud idem tum Gentilibus, tum Iudæis impiis sibi præstari voluit ille Dei simia, & persuasit. Quamquam vt de Lucis aliquid dicamus, docet me Origen. lib. 3. contra Celsum, Ægyptios fana additis Lucis constructa habuisse, quam ab ipsis impietatem Hebræos didicisse facile mihi persuaserim, Liceat & istud Auctarij loco adiuicere, quoniam de Abrahamæ sacrificio in monte, incidit mentio, apud Iulium

Firmicum, lib. de err. profan. religion. *Arborem suam Diabolus consecrans, intempesta nocte arietem in caſe arboris facit radicibus immolari.* Nouerat veterator summus, Abrahæ immolaturus filium iuſſu Dei, arietem ſuppoſitum & in vicinæ arboris radicibus alligatum, poſtmodum victimæ prioris paratæ loco maſtatum. Genef. 22.

## §. 8.

Poſtea dicendum eſt de eo ritu, qui omnium maximè obſeruatione dignus, apud Romanos Plutoni & Proſerpinæ huiuſmodi ſacra fiebāt in agro Terentino. Zoſimus, Tarentinum vocat iuxta Tyberim, in foueam viginti pedum altitudinis deſcendebat Pontifex, huic ſcrobis imponebatur tabulatum foraminibus plenum, in quo, ſiue bos, ſiue iuuenca furua collocata, telis multiſque ictibus conſiciebatur & ita immolabatur. Pontifex ibi deliteſcens vndique rimis & foraminibus effluentem ſanguinem toto corpore & veſtitu excipiebat, qui inde egrediens, magna veneratione à populo colebatur, vt qui ſanguine totus tinctus, Deos Inferos placaret. Eius rei extat elegans deſcriptio, apud Prudentium, in Hymno S. Romani Martyris; vt & Zoſimum lib. 2. qui hæc ſacra ad ludos ſeculares referre videtur. Gentiles, ſiue à Dæmone edocti, ſeu lectione librorum Sacrorum, illud repræſentare voluerunt quod apud Iudæos, Dei præcepto, factitatum fuit, Leuitic. 16. & paucis explicat Apoſtolus, Epistolæ ad Hebræos, c. 9. Summum Pontificem ſemel in anno intrare ſolitum in Sancta Sanctorum, non ſine ſanguine immolatæ hoſtiæ, quam ipſe obtuliſſet pro ſe & populi delictis, adhibita ſolemni ſanguinis aſperſione pro ſui ipſius & totius populi expiatione.



## §. 9.

Nunc de femita in viam. Ordiam itaque à Codice Sacrorum. Apud Pausan. in Arcadicis, Græci Arcades, qui Phæneatæ vocantur, duos asseruabant lapides sibi inuicem ritè aptatos, in quibus conclusus erat Codex, continens ritus & Ceremonias quibus vtendum erat in sacris Cereris, quæ fiebant exemplo Eleusiniorum Sacrorum. Annon istud erat repræsentare duas tabulas lapideas, Mosi, à Deo datas, quibus vniuersa in Deum religio continebatur? Ad sacra accessuris mundities ac proinde expurgatio aliqua, adhibita præsertim aqua, præcipiebatur. Hæc sunt notissima. Et illud tantum adiiciam, Gentiles in Templis suis, vel fontes, vel puteos habuisse, istius purificationis gratia. Apud Plautum, in Rudente, illud obseruare licet, & meminit S. Augustinus, epistola 153. Seruius in 2. Æneidos ex Cincio, ait, *Delubrum esse locum ante Templum, ubi aqua currat.* Fortè lacum non locum, legendum esse aliquis suspicetur, quandoquidem Seruius idem, in 4. Æneidos Delubrum dictum ait, *propter lacum in quo manus abluuntur.* Isidorus lib. 15. Originum, c. 4. ait *Delubra esse Temples fontes habentia, quibus ante ingressum (Gentiles) diluebantur, hoc est, purgabantur.* Vnde Vitruuius lib. 1. c. 2. In construendis Fanis suorum Deorum istud monet, *Primum omnibus Templis saluberrimæ regiones aquarumque fontes in his locis idonei eligentur, in quibus Fana constituentur.* Eximie Lactantius lib. 5. c. 19. *At illi infælices nec ex sceleribus suis intelligunt quàm malum sit quod colunt, quandoquidem flagitiis omnibus inquinati, veniunt ad precandum, & se piè sacrificasse opinantur, sicutem lauerint, tanquam libidines intra pectus inclusas illi amnes abluant, aut vlla maria purificent.* Adde Iul. Firmic. lib. de eri. prof. relig. Narrat Sozomenus lib. 6.

hist. Eccles. c. 6. Valentinianum, qui postea Imperator creatus est, sub Iuliano Parabata tum Imperatore, Templum Gentilium ingredientem, à Sacerdote Fani, ritu Gentili aqua adpersum, rami oliuæ instrumento, allusum fortè ad illud Virgilij 6. Æneidos:

*Spargens rore leui, & ramo felicitis oliuæ.*

S. Iustinus Martyr, Apolog. 2. existimat Gentiles ex Iudæis, id est, libris Prophetarum, istud didicisse, præsertim ex c. 1. Esaia: *Lauamini, mundi estote.* Exod. 30. *Facies & labrum æneum cum basi sua, ad lauandū: & missa aqua, lauabunt in ea Aaron & filij eius manus suas ac pedes, quando ingressuri sunt tabernaculum testimonij, & quando accessuri sunt ad altare legitimum sempiternum erit ipsi & semine eius per successiones.* Singulare istud de Ægyptiis Sacerdotibus apud Ælianum, lib. 7. de animalibus, c. 45. Illi namque non quauis aqua sese expurgabant & lustrabant, nec ex alia quàm ex qua Ibidem rauem bibisse credant, verè siquidem norunt hanc auem nunquam gustare aquam sordidam, aut ullis venenis inquinatam. Christianis in veteri Ecclesia, ablutiones vñtatas fuisse, ab aliis adnotatum est: Et addo, vas, in quo aqua huiusmodi lustralis habebatur ad fores Ecclesiæ, appellari *χρησός*, Sinesio, ep. 121. quæ vox apud Athenæum legitur, lib. 9. c. 18.

§. 10.

Gentiles in Templo Vestæ ignem æternum asseruabāt. Virgil. 2. Æneid.

*Sic ait, & manibus vittas, Vestamque potentem,*

*Æternumque adytis effert penetralibus ignem.*

Seruius ad hunc locum: *Vestæ ignis æternus est. Ecce ipse exposuit quid est Vestæ, hoc est, ignis perpetuus.* Virgilius quarto Æneidos, *Vigilem ignem* dixit. Pindari Scholiastes, scribit,



bit, apud Græcos, loca in quibus ignis ille perpetuus as-  
 seruabatur, *πρυτανεία* nominari, quæ nihil aliud erant  
 quàm domus publicæ, in quibus ignis ille sempiternus re-  
 ligiosè seruabatur; in quibus etiam Magistratus habita-  
 bant, & ciues de suis bene meriti, publico sumptu aleban-  
 tur. Auctarij vice istud adiiciam, in Græcorum Prytanea  
 nonnulla ingredi, mulieri vlli fas non fuisse, Athenæo,  
 lib. 4. c. 13. Sed vnde Gentiles ignem istius generis excogi-  
 tarint, hinc apparet, quod habetur Leuitici, c. 6. *Ignis in*  
*Altari semper ardebit.* Paulo post: *Ignis est iste perpetuus, qui*  
*numquam deficiet in Altari.* Sunt qui ignem illum perpe-  
 tuum, præsertim apud Græcos, nihil aliud fuisse affir-  
 mant quàm lucernam perpetuò ardentem. Sacerdotes Io-  
 uis Ammonis in Africa habebant lucernam inextingui-  
 bilem in Templo, quæ toto duraret anno, vt refert Plu-  
 tarchus, lib. de defectu Oraculorum. Germana hæc Iu-  
 daici ritus imitatio. Exod. 27. *Ardeat lucerna semper in ta-*  
*bernaculo testimonij extra velum, quod oppansum est testimonio.*  
*Et collocabunt eam Aaron & filij eius, vt vsque mane luceat*  
*coram Domino.* Idem repetitur eiusdem libri c. 30. *Mane*  
*Aaron componet lucernas, & collocabit eas ad vesperam.* Et  
 mentio habetur, 1. Reg. c. 3. Iosephus, lib. 3. Antiquita-  
 tum, c. 9. ait, septem lucernas extitisse, quarum tres tan-  
 tum per noctem accensæ, die verò reliquæ quatuor adij-  
 ciebantur. Procopius in libros Reg. vnam memorat lucer-  
 nam sanctam, quam vesperi accendere solerent, & media  
 nocte oleum imponere. Lib. 4. c. 17. c. 18. 1. c. 3. Gentiles victi-  
 mam immolandam prius explorabant, ne quid virij huic  
 inesset, quod suorum Deorum oculos offendere videretur,  
 quod à permultis hætenus explicatum, pauca hæc  
 adiungam. Orator Princeps, oratione 2. contra Rullum:

Z

*Erant hostiæ maiores in foro constitutæ, quæ ab his Prætoribus, de Tribunali, sicut à nobis Consulibus de consilij sententia, probatæ, ad præconem & ad tibicinem immolabantur. Seruius in illud Virgilij 4. Æneid.*

--- *Maçant lectas de more bidentes.*

*Moris, inquit, fuerat, ut ad sacrificia eligerentur oves, quibus nihil deesset. Ut in sexto:*

*Nunc grege de intacto septem maclare iuuenos.*

*Eodem pacto Plinius, lib. 8. Hist. c. 45. Nec claudicante, nec aliena hostia Deos placari dixit. Meminit Aristophanes Lystrata. Philo lib. de Agricult. Lucian. Dialogo de Sacrif. Aristoteles apud Athenæum, lib. 15. c. 5. Mutuum nil Diis offerendum ait, sed quod integrum ac perfectum sit. Hinc victimæ coronatæ; quæ res integritatem & perfectionem denotabat. Iudeis a Domino datum præceptum, Leuitici, c. 22. Immolandus masculus immaculatus erit ex bobus, ex ouibus, & ex capris. Si cæcum fuerit, si fractum, si cicatricem habens, si papulas, aut scabiem, aut impetiginem, non offeretis ea Domino. Malachiæ, c. 1. repetitum. Ritus hunc in hostiæ immolatione Gentiles seruasse leguntur, de quo Seruius in illud Virgilij 2. Æneidos:*

*Et falsa fruges, & circum tempora vitæ.*

*Sal & far, quod dicitur mola falsa, quæ & frons victimæ, & foci aspergebantur & cultri. Fiebant autem de horna fruge, & de harno sale, ut ait Horatius, Et horna fruge. Cuius confectioem declarat ipse idem Seruius ad versum, Sparge molam, Ecloga 8. quem hornum salem priore loco dixit, salem coctum & durum nominat posteriore: Hornam frugem, Acron, nouellam seu messis huius anni exponit. Plinius, lib. 31. c. 7. Maxime in Sacris intelligitur salis auctoritas, quando nulla conficiuntur sine mola falsa. Salem Sacrum*



dixit eam ob rem Homerus, vt vulgo explicant, & eadem mente Ptolemeus Hephæstion, apud Photium in Bibliotheca numero 190. τοῦ ἁλὸς ἀλάς. De sale plura dicturi sumus in Appendice lib. i. Selectorum. Iudæis præceptum hoc datum, vt nullum Sacrificium fieret absque Sale. Leuitici, c. 2. *Quidquid obtuleris Sacrificij, sale condies, nec auferas Sal fœderis Dei tui de sacrificio tuo.* Marci cap. 9. Christus dixit Discipulis, *Omnis victima sale salietur.*

## §. II.

In Sacrificiis nonnullis, quin & precationibus Gentiles varias conuersiones & Circuitus edebant, vt potè si lustratio agebatur, de qua re plus satis qui antiquos illos Romanæ superstitionis ritus explicarunt. Et postea ex collatione expendemus. Iudæorum illa religio fuit, cum iussu Diuino, Iosue, c. 6. Sacerdotes Arcam illam Sacram gestantes, totis septem diebus urbem Hiericho circue- runt. Quorum exemplum secuti sunt Christiani etiam in veteri Ecclesia. Ita enim sine vlllo præiudicio Tertullianum explicare liceat. Tertullianus Apologetici, c. 39. *Coimus in Catum & Congregationem, vt ad Deum quasi manu facta, precationibus ambiamus orantes.* Cum bona eruditionum venia, *Ambiendi* vocem excutere nobis fas sit. *Ambire*, hoc loco pro, *Circuire*, vsurpatum videri potest. Mitto Festum, in verbo, *Ambitus*. Macrobius, lib. 1. Saturnal. c. 14. in voce, *Ambire*, *am* particulam idem valere ait, ac, circum. Manilius lib. 2.

*Non esset statio terris, non Ambitus astris.*

Audio quempiam eiusdem Tertulliani auctoritate & manifestis verbis istud pernegantem. Sic enim habet, libro de cultu fœminarum, dum illas iam factas Christianas, atque eiurato paganismo, sic alloquitur. *Nec Templâ cir-*

Z ij

*cuitis, nec spectacula postulatis, nec festos dies Gentilium nostis.* Ita Cod. Theodos. lib. 16. tit. 10. de Paganis Sacrificiis & Templis, l. 11. Impp. Gratian. Valentin. Theodos. *Nulli sacrificandi tribuatur potestas, nemo Tempia circumeat.* Nodum ex eodem Tertulliano soluo, non scindo. Quo sensu Tertullianus eo loci negavit Christianos celebrare festos dies Gentilium, eosdem Tempia circuire diffitetur. Nec tamen ille ipse vetat Christianos pro Natalitiis Martyrum, oblationes annua die facere, quin istud apud fideles fieri asseuerat, libro de Corona militis. Neque vero Christianos eodem ritu, Beatorum suorum natales dies coluisse, ac Gentiles suorum Deorum festos dies credere par est, hinc longe aliam & multum dissimilem apud Christianos veteres, seu Cæmeteria, seu Conuenticula, seu alia publicæ orationis loca, circumeundi siue ambiendi rationem extitisse, atque apud Gentiles, sua Tempia. Quamquam, ut verum fatear, Christiani verbo, *Circumeundi*, abstinuerint, sed *procedendi* vsi sint, quod vnam eandemque rem repræsentat. Tertulliano vox illa usurpata, & vulgari quo nos utimur significato, lib. 2. ad uxorem, quam difficile vxor Christiana Gentili marito omnino in re familiari satisfacere possit, inter cætera istud recenset. *Si procedendum erit, nunquam magis familiæ occupatio adueniat.* Sanctis Patribus retenta vox eadem notione, ut & illa, *Pergerendi*. S. Hieronymus Epist. 22. Ad Eustochium: *Rarus sit egressus in publicum, Martyres tibi quærantur. In cubiculo tuo nunquam causa deerit, Procedendi, si semper, quando necesse est, processura sis.* Et Epistola 61. aduersus errores Ioannis Hierosolymitani. *Cum de Avasdor, (hoc est, de Ecclesia Resurrectionis D.N.) pergeretis ad Crucem, & ad eum omnis ætatis & sexus turba conflueret.* S. Ambros.



Epistola 29. loquens de Monachis, à quibus Fanum Valentinianorum hæreticorum incensum asserebant. *Psalmos canentes ex consuetudine vsuque veteri, pergebant ad celebritatem Machabæorum Martyrum.* Gentiles pompâ quadam publicâ suos circumferebant Deos: Insignis istius descriptio habetur apud Athenæum lib. 5. c. 7. & Apuleium, Milesiarum lib. 11. & Lampridium in Commodio Antonino, Anubin Ægyptiorum Deum portante, & capita depilata Isiacorum grauitè obtundente ore simulachri. Meminit & Herodianus lib. 5. similis pompæ, Helio gabalo Imperatore illius auctore & actore præcipuo. A Iudæis hæc petita, qui ossa Iosephi Patriarchæ ex Ægypto in terram promissam variis mansionibus peragratis asportarunt. Quin & Arcam illam plane Cœlestem, in qua Deus requiescere dicebatur toties, siue in castris, seu variatis sedibus circumtulerunt. Et Arca ab ipsis Philistæis Deus vocatur, 1. Regum, c. 4. cum in castra Hebræorum adducta esset Arca & istud nossent Philistæi dixerunt, *Venit Deus in castra.* Est & illud de Iudæis in deserto totis quadraginta annis erroribus diligenter notandum, qui insanè valdè in Idololatriam propensi vicinarum quas attingebant gentium, seu consuetudine, seu æmulatione, Deos & colerēt, & eorum simulachra in ipsis etiam castris sanctis deferrent. Auctor mihi Amos Propheta, apud quem legere est istud, c. 5. Et portastis tabernaculum Moloch Deo vestro, & Imaginem Idolorum vestrorum, Sydus Dei vestri Repham figuras quas fecistis vobis adorare eas. Sanctus Hieronymus in hunc locum scribit hinc nobis constare Israelitas impios & prauaricatores etiam in deserto ipsi Moloch, siue Melchom, siue Melech, quasi Melech dixeris hostias & sacrificia obtulisse

Syds Dei vestri Repham cuius meminit S. Stephanus, Actor. 7. Sanctus Hieronymus Hebraicè vocat בֹּכֶב & Luciferum, seu Veneris stellam Græcis, Φωσφορος interpretatur, quam Sarraceni .i. Arabes, suo tempore venerantur.

## §. 12.

Addam & illud Auctarij loco, Gentiles Principibus urbem aliquam, sui præsertim Imperij, ingredientibus obuiam ire solitos, non sine Sacris suis. Antoninum Caracallam Imperatorem Alexandriam ingredientem excipere Sacerdotes Ægyptij, cum suis Sacris, auctor Xiphilinus, in Caracalla. Idem etiam præstitum Vespasiano Imperatori, eandem Alexandriam subeunti, ac tum Sacerdotes illi Ægyptij non tantum Sacra sua prætulērunt, verumetiam & memorandum Codicem, continentem leges suorum mysteriorum, vt narrat Philostratus, lib. 5. de vita Apollonij, c. 9. Exceptus est eodem ritu & pompa Rex Attalus Athenas adueniens, apud Liuium lib. 31. & Polybium Eclogis legationum, Eclog. 3. Iam pridem istud à Iudæis factitatum, vt cum Iaddus Summus Iudæorum Pontifex, religioso ornatu & apparatu maximo, non longe ab vrbe Hierosolymitana, Alexandro Magno iuit obuiam, vt describit Iosephus lib. 11. Antiquit. c. 8. Non aliter Hierosolymitani, Agrippam illum Augusti generum, Herode magno deducente, aduentantem exceperunt, apud eundem Iosephum Antiquit. lib. 16. c. 2. Christianos nostros non iam Gentilium, sed potius Iudæorum hac in parte imitatores esse dixero. Quod si quis reprehendat, maximo scelere & impietatis nota sese obstringere intelligat. Seruatori Christo, vero Regi Messia, Hierusalem ingredienti itum est obuiam, à maxima Ciuium



multitudine, incredibili & festiua celebritate, acclamatum à viris, à pueris, ab omnibus deducantibus, in Templum vsque: *Osanna filio David: Benedictus qui venit in nomine Domini, Rex Israel*; Totum hoc approbavit Christus, Phariseis, Principibus Sacerdotum, & Scribis istud ægrè ferentibus, & minimè probantibus. Matth. 21. Ioan. 12. Marci 11. Religiosum hoc exemplum pridem nostri Franci, vt cæteros sileam, æmulati sunt. Chilpericus Rex Lutetiam Parisiorum ingrediens, exceptus est ab omnibus ordinibus, Sanctorum Reliquiis, & vexillis præcedentibus, quemadmodum scribit Gregorius Turonensis lib. 6. historiæ Franc. c. 27. Itidem Guntrannus Rex Aureliam adueniens, susceptus, vexillis & signis præcedentibus, variis nationibus, pro cuiusque lingua & idiomate, Chorum cantantium instituentibus, Latinis, Syris, Iudæis, addita generali acclamatione, *Vivat Rex*. Episcopo nouo urbem suæ Diocæseos in qua sedere deberet, ingredienti, pari festiuitate itum est obuiam. Itidem & Duci Regio in urbem suæ curæ & administrationi commissam aduentanti, vt videre est apud Gregorium Turonensem, lib. 6. historiæ Francorum, c. 11. & lib. 10. c. 9.

## §. 13.

Ad secundam huiusce Syntagmatis disputationem peruenimus, qua contendimus etiam Gentiles Christianorum ritus imitari voluisse. Quod antequam explicemus, non possum prætermittere quod de ea re generatim proditum est Constitut. Apostolicarum, lib. 2. c. 28. Gentiles nimirum in illis suis sceleratis & detestabilibus Sacris vsque in hunc diem Sancta, & quæ olim à Deo præcepta, atque vno nomine quæcunque sanctitatem & religionem habeant imitari. Narrat Sozomenus, lib. 5. cap. 15.

Hist. Eccl. Iulianum Imperatorem, & Christianæ fidei desertorem nefandissimum, Epistolâ ad Arsacium, Pontificem Galatiæ, scripta, præcepisse Gentiles ea omnia peragere & factitare, quæ apud Christianos fieri consueverant, videlicet, Tempa exornanda, ordines instituendos Doctorum & Lectorum, distinctorum per varios gradus & subsellia, tum preces adsignandas in certas horas, & dies, necnon Monasteria virorum ac mulierum instituenda, itidem Xenodochia: Pœnitentiæ pro delictorum varietate varias leges & formas constituendas: Similiter à suorum Gentilium Antistitibus, literas pacificas, seu formatas, per similes Epistolis Christianorum Episcoporum, conscribendas: Denique easdem regulas pro disciplina suorum Sacerdotum statuendas, quæ apud Christianos nil aliud erant quam Canones Nicœni, & aliorum particularium Conciliorum, ut pote Laodicensi, Antiocheni, & similium. Sed hoc vnum dubitationem omnem tollit, quod de Afris Gentilibus memoriæ proditum est: Illi siquidem in Sacris cœlestis Deæ, quæ ab iis singulari religione colebatur, (seu Astarte Sidoniorum fuerit, siue Luna, seu Venus aut Iuno, quæ aliàs Vrania dicta est) usurpabant formulas Ecclesiasticas Christianorum, *Pax vobis*, vel, *Dominus vobiscum*, quas didicerant à Christianis, & iis utebantur in veneratione Idoli istius. De quibus ista scribit Saluianus, lib. 8. *Quis non eorum, Afrorum, qui Christiani appellabantur, cœlestem illam, aut post Christum adoravit, aut, quod est peius, multo antequam Christum.* Paulo post: *Nam etiam ipsam quodammodo Ecclesiæ salutationem Idolo præstiterunt, quia secundi loci officiositas honori illius proficit, cui principalia deferuntur. Ecce quæ Afrorum, & maxime nobilissimorum fides, quæ religio, quæ Christianitas fuit,*  
dice-



*dicebantur Christiani ad contumeliam Christi. Si quis argutus ex iis verbis me antea non rectè Afros illos appellasse Gentiles contendat, cum disertè Christiani vocentur à Saluiano. Nec à vero abhorret, & ita existimo, Gentiles, qui in illo cœlestis Deæ Templo versabantur, & Sacris aderant, cum audirent Christianos in eodem Templo & Sacris præsentibus, huiusmodi formula vtentes, eorum exemplum secutos. Quin illos Christianæ professionis, vt videbatur, homines, pseudo-Christianos, & ipsis Gentilibus hac in parte magis impios & detestabiliores testatur idem Saluianus iis verbis: Quis illi Idolo (cœlestis Deæ) non initiatur? Quis non à stirpe ipsa, forsitan & natiuitate deuotus? Nec loquor de hominibus, sicut vita, ita etiam professione ac vocabulo Paganis; & qui sicut prophani erant errore, sic nomine. Tolerabilior quippe est, & minus nefaria Gentilitas in hominibus professionis suæ, illud perniciosius ac scelestius, quod multi eorum qui professionem Christo dicauerant, mente Idolis seruebant.*

## §. 14.

Et quoniam Sacrificiorum apud Gentiles nunc iniecta est mentio, non longiusculè à proposito digrediar, si de ipsorum Sacrificulis istud monuero, Gentiles præter singulares cuiusque Templi Sacerdotes, habuisse etiam Pontifices Majores, & in vnaquaque Prouincia Summum, qui Prouinciæ Sacerdos vocabatur. D. lib. 27. tit. 1. l. 6. ex Modestino. Vulgata lectio habet: *Gentium præsidatus Asia, Bythinia, Cappadocia.* Corruptam illam esse docet vir vè dignitate, ita & eruditione clarissimus Antonius Augustinus, ad Modestinum, & *Prouinciæ Sacerdotium*, repouendum esse contendit, quandoquidem Pandectarum Florentinarum vera & genuina lectio sit, *ἑθνῶν ἱεργον.*

A a

Nam quæ dicuntur Asiarchia, Bithyniarchia, Cappado-  
carchia, Sacerdotia sunt. D. lib. 50. tit. 5. l. 8. *Asia Sacerdo-*  
*tium* nominatur. Sic Constantinus Magnus, Cod. lib. 5.  
tit. 27. l. 1. *Phœniciarchia*, vel *Syriarchia Sacerdotia* dixit.  
Basilicorum lib. 38. tit. 1. Lex illa superius allata, D. lib. 27.  
tit. 1. ita ex interpretatione repræsentatur. *Sacerdotes Pro-*  
*uinciarum*, hoc est, Asiarchæ & reliqui, quamdiu hoc ho-  
nore funguntur, vacationem habent. Scholiastes, *Perfe-*  
*ctissimos* appellat, quæ res Antonij Augustini correctio-  
nem, *Perfectissimos*, pro *Præfectis*, emendantis firmat.  
Scholiastes, Sacerdotia eiusmodi vocat, *Ciuiilia munera*,  
cùm Sacerdotes isti munera, hoc est, spectacula, ludosq;  
suis impensis edere tenebantur, vt apparet Cod. Theodo-  
siani, lib. 15. tit. 9. de expensis ludorum, l. 2. in cuius fine  
hæc rem declarant, *Quorum, Alytarcharum, Syriarcharum,*  
*Asiarcharum*, &c. nomen, *totius festiuitatis solemnitas de-*  
*dicabit*; & festiuitatem initio legis oblectamenta populorum  
appellauit. Porro *Alytarchæ*, qui hîc memorantur, Sacer-  
dotes erant Syriæ primæ, cuius Metropolis Antiochia.  
Apud Eunapium in Maximo, Chrysanthus Pontifex Ly-  
diæ nominatur. Tertullianus, lib. de Idolol. Sacerdotes  
Prouinciales dixit. Nec alius existimandus est Arsacius  
ille Galatiæ Pontifex, ad quem Iulianus A. scripsit, vt an-  
tea indicauimus. Mitto apud Romanos Curionem Maxi-  
mum, & Curiones minores, qui in singulis Curiiis sacrifi-  
cabant. Totum hoc ad exemplum Iudæorum compo-  
situm est, apud quos, præter Summum Pontificem, alij  
erant Pontifices minores, erant & Leuitæ, ceterique in-  
feriores ministri. Illud vnum præ ceteris discrimen erat,  
quod apud Gentiles, illi Prouinciarum Pontifices non-  
nisi certo & stato tempore, Sacerdotio istius generis fun-



gebantur, At Iudæorum Pontifices erant perpetui. Et quoniam Ceremoniarum nostrarum & ofores & reprehensores in iis vellicandis nimium quantum sese oblectant, ac singula quæque supra modum anxie excutunt, quidni formulam illam in priscis Liturgiis Latinis (vt Græcas idem sua lingua exprimentes omittam) vsitatam, *Gratias agamus Domino Deo nostro*, explodant, vt pote à Seneca petitam, Epistola 12. *Agamus Deo gratias, maledicte parricida*, Annon locutio merè Christiana illis, vt ceteris omnibus recta sentientibus videbitur? At eâ vsa est Iulia Seueri Imperatoris vxor gentilis, cùm Caracalla allatum ouum purpureum, quod gallina in aula pepererat, applosum ad terram fregisset, quod erat velut omen Getæ à fratre suo Caracalla occidendi. Illa siquidem tunc exclamauit: *Maledicte parricida, fratrem tuum occidisti*. Auctor Spartianus in Geta. Belli homines, quidni grauitè nostros carpant quod Sanctissimos Ecclesiæ Doctores, vulgari verbo, *Patres* vocent? Quoniam Lucretius lib. 3. initio, *Epicuri Patrem* vocet:

*Tu pater & rerum inuentor, tu paria nobis*

*Suppeditas præcepta.*

Cicero 3. de Natura Deorum, Zenonem Stoicorum *Patrem* dixit. Idem legere est apud Horatium, de Chrysippo, .i. Sermonum, Satyra 3.

*Cur optas quod habes? Non nosti quid Pater, inquit,*

*Chrysippus dicat?*

Seneca lib. 7. Natural. Quæst. c. 32. seu Scholæ, seu Sectæ Magistrum & Doctorem, appellat *Antistitem*. Ab hac voce nescio qua religione abstinere voluit, qui suæ Sectæ Reuerendos in Christo Patres Symmistas & delegatos nominauit. Ante annos sexaginta, si quis aduersarum

A a · ij

partium suos Doctores his exornasset elogiis, mirum ni-  
 fuorum zelotam aliquem reperisset, qui has cerebri  
 æstuantis verminationes esse affirmasset, testes libelli fa-  
 mosi eo tempore editi. Sed iam serio nobis tandem agen-  
 dum videtur.

## §. 15.

Cæteris prætermisiss, vnus nobis præsertim exami-  
 nandus est ritus, qui omnium longissimè patet, & cuius  
 vsus cæteros omnes antecedit, imo & concludit, cuius  
 vim & energiam non modo singulis horis, quin potius  
 momentis experimur. Signi Crucis ritus ille est, cuius  
 vsus, an solis Christianis cognitum, cæteris tum Iudæis  
 cum Gentilibus ignotum, expendere opere præmium vi-  
 detur. Tertulliani aduersus Marcionem, lib. 3. ea dispu-  
 tatio est & digna vox. *Nihil à Deo subitum, quia nihil à Deo  
 non dispositum.* In noua Christi Messiae lege signum Cru-  
 cis frequenter vsitatum videmus, istud itaq; & præuisum  
 & prænunciatum oportuit, in veteri Testamento, à Pro-  
 phetis, qui de Messia, & nouo ab eo condendo fœdere,  
 cæterisque ad illud spectantibus, satis accuratè vaticinati  
 sunt. Ista vero, à Prophetis de aureo Messiae seculo præ-  
 dicta, Dæmones non ignorasse contendit S. Iustinus  
 Martyr, Apologia 2. Quin & Philosophos & Poëtas, illo-  
 rum suggestione ex Prophetis, hæc prænunciata mutua-  
 tos commemorasse. De qua re fusissimè Iulius Firmicus,  
 lib. de errore profanarum religionum, & ante illum Eu-  
 sebius libris de præpar. Euangel. Sed vt antea monuimus,  
 cum Diabolus suis præstigiis & Poëtarum figmentis,  
 actiones præclaras & admirandas Messiae venturi in non-  
 nullis repræsentasset, intellecto Crucis supplicio à Messia  
 subeundo, & illud exhorruit, & indignum eo, qui Deus



habendus erat, iudicauit, & quoniam de Christo prædictum fuerat, Psalmo 95. *Dominus regnauit à ligno* (postrema hæc verba (*à ligno*) Dæmonis impulsu Iudæi eraserūt, teste B. Iustino, Dialogo cum Triphone.) Diabolus istud apud Gentiles in ludibrium vertit, ac si Messias futurus esset quasi *Rex quidam lignarius*, vt loquitur Tertullianus. Sed de Crucis signo videamus, & omisiss figuris, quamquam istud Iulij Firmici lib. de error. profan. religion. mihi nusquam lectum nec auditum, Mosem Crucem sibi fecisse ex virga dum cum Amalechitis prælium ab Hebræis commissum est, Exod. 17. An quid hinc persimile in Mysterijs Gentilium, vel Iudæorum deprehendi possit, prædictum fuisse certum est, nec Iudæus diffitetur. Ezechielis, c. 9. Tertullianus sic locum expressit, & ad res nostras aptauit. *Dicit Dominus ad me, Pertransi in medio portæ, in media Hierusalem, & da signum Tau, in frontibus virorum. Ipsa enim est litera Græcorum Tau, nostra autem T. species Crucis, quam portendebat futuram, in frontibus nostris, apud veram & Catholicam Hierusalem, in qua fratres Christi, filios scilicet Dei, gloriam Patri Deo relatueros.* Psalmus 21. canit, ex persona ipsius Christi ad Patrem. Isidorus lib. 1. Originum, c. 3. id habet. *T. figuram demonstrans Dominica Crucis, unde & Hebraicè signum interpretatur, de qua dictum est in Ezechiele per Angelum c. 9.* Deinde post allatas aliquot prophetias, & eam præsertim quæ est Malachiæ, c. 1. de Sacrificio noui Testamenti, ista subiungit ipse Tertullianus. *Quæ omnia cum in re quoque deprehendantur, & signaculum frontium, & Ecclesiarum Sacramenta, & munditiæ Sacrificiorum* (paulo antea has explicat, *Gloriæ relationem, & benedictionem, & laudem, & hymnos, quæ Missæ periphrasis est*) *debes iam erumpere, vt dicas spiritum Creatoris tuo Christo*

Aa iij

prophetaſſe; agit autem in Marcionem. Imitationis ſpeciem aliquam apud utroſque nunc exquiramus. Veteratoris iſtius ab initio Apoſtata, artes & dolos mirificè repræſentat Tertullianus, libro de Præſcriptionibus. Illic ergo ipſas res, de quibus Sacramenta Chriſti adminiſtrantur, tam emulanter affectauit exprimere in negotiis Idololatriæ, utique & idem & eodem ingenio geſtuit, & potuit; Inſtrumenta quoque Diuinarum rerum, & Sanctorum Chriſtianorum, ſenſum de ſenſibus, verba de verbis, parabolas de parabolis profanè & emulè fidei attentare. Paulo antea ſpeciatiim iſta explicat: Diaboli ſunt partes interuertendi veritatem, qui ipſas quoque res Sacramentorum Diuinorum, in Idolorum myſteriis emulantur. Tingit & ipſe quosdam utique Credentes & fideles ſuos, expiationem delictorum de lauacro repromittit, & ſic inſtat Mithræ: Signat illic in frontibus milites ſuos, celebrat & panis oblationem, & imaginem reſurrectionis inducit, & ſub gladio redemit Coronam. Exiis illud tantum nobis eſt excutendum, quod cuiuſmodi verbis expreſſit, Signat illic in frontibus milites ſuos, An ad Crucis ſignum hæc pertineant, inueſtigandum eſt. Interpretes Tertulliani hoc loco nihil nos docent. Nam Sacramentum Confirmationis repræſentari à Diabolo, non facile conceſſerim, cùm de vnctione nulla hic penitus mentio, ſed de puro ſignaculo. Eſt qui ad Magos ſeu maleficos beſtiæ caracterem aliqua ſui corporis parte geſtantes referat. Priſca obſignatio Dæmoni vſitata, erga ſibi addictiſſimos. Nota Epimenidis Cretenſis hiſtoria apud Heſychium Illuſtrium, cùm mortuus eſſet, eius corporis pellis litterata notis que compuncta reperta eſt. Quis Magum illum fuiſſe dubitet, cùm ipſius anima, pro arbitrio & nutu, corpore excederet, & cum vellet, regrederetur? At hoc nihil ad frontes à Dæ-



mone signatas. Tertulliano non aliunde quàm ab eodem Tertulliano lux, etsi non integra nec plane splendens, dicam tamen ex coniectura, eruditiores docebunt me, quibus idcirco gratiam habere velim. Tertullianus, lib. de Corona militis, ad finem, hæc scribit, *Mithræ miles cum initiatur in speleo, in castris vere tenebrarum, Coronam interposito gladio sibi oblatam, quasi Mimum Martyrij, dehinc capiti suo accommodatam, mouetur obuia manu capite depellere, & in humerum, si forte, transferre, dicens, Mithram esse coronam suam.* Quid sibi hæc volunt, obuia manu Coronam capiti accommodatam capite depellere? quid est in humerum transferre? forsan modo hunc illum, & vno nomine Mimum, seu imitamentum Martyrij repræsentare. Mimicam mortem dixit Petronius Arbiter. Et certè, ni fallor, gesticationes illæ manus, ad frontem scilicet, obuiæ, hoc est, seu cancellatis manibus. Seneca de Tranquillit. c. ii. Manibus oppositis ferrum recipi dixit, seu modo in dextram, modo in læuam, modo sursum, modo deorsum, quid aliud quàm Crucis figuram exhibebant. Non sunt ista Prætoris edicta sed coniectanea, quæ benignum lectorem boni contulere, pro sua comitate summo opere percipio.

## §. 16.

Nunc verpos nostros obstinatissimos dispiciamus, & an in Sacris suis, signum Crucis & quo ritu adhibuerint, exquiramus. In lege veteri hostiæ eleuatio in actione Sacrificij multoties imperatur. Leuitic. 18. 23. Numer. 5. 6. 8. & Exod. 29. præsertim iis verbis iuxta vulgatâ. Post commemoratum sacrificium Arietis secundi hæc habet, *Tortam panis vnius crustulam, conspersam oleo, laganum de canistro azimorum quod positum est in conspectu Domini, poneq; omnia su-*

*per manus Aaron & filiorum eius & sanctificabis eos, eleuans coram Domino.* Postrema hæc verba Santes Pagninus ex Hebræo ita vertit. *Et agitabis ea agitationem, siue, in eleuationem coram Domino.* Alij vertunt, *Ventilabis ea in oblationem ventilationis.* Et ex sensu vocis Hebraicæ, agitare, seu ventilare idem valent atque in sublime aliquid porrigere: hinc inde ad quatuor mundi plâgas mouere, & quasi ventilare. Hanc agitationem vocant Thenupha. Septuaginta ἐπιμύω. B. Hieronymus eleuationem, interpretatur. Est autem ex Iudæorum sententia motus à dextra sinistrorsum, ante & retro, ab Oriente in Occidentem, à Septentrione in Meridiem, quod satis apertè signum Crucis repræsentat. De qua re Petrus Alphonsus Hispanus, lib. de Concordia legum, tit. 4. c. 5. Vide Oleastrum in c. 5. Num. & Scholiastem Onkeli Paraph. in c. 29. Exodi. Fabianus Foghius Romanus, ex Iudæo Christianus, quem senem, & quidem humanissimum hominem, Romæ postremo itinere meo Romano noui, in Catechismo à se edito, c. 54. scribit in Talmud, non vno loco, & præsertim in capite ubi agitur de compositione olei, referri benedictionem à Pontificibus Hebræis iam olim, etiam hoc tempore, dari solitam populo, quatuor digitis, secluso pollice, in duo diuisis, in formam Crucis, non rectæ & huic nostræ per similis. Siquidem tradunt Doctores Hebræi, vñctionem Regis in capite fieri, circulari forma, in modum coronæ, & vñctionem Sacerdotum in capite, in modum literæ Græcæ Chi. X. quæ est forma Crucis apud veteres. S. Hieronymus, in c. 31. Hieremiæ; Decussare, est per medium secare, veluti si duæ regulæ concurrant ad speciem literæ X. quæ figura est Crucis. Isidorus lib. 1. Originum, c. 3. X. litera, & in figura Crucem significat, & in numero decem



decem demonstrat. Illud quidem pro comperto est in quibusdam numis Constantini Magni, literâ X. Crucem denotari, aut vt alij malunt, Christum, cum apud Græcos prima litera huius nominis sit X. Iulianus Parabata, in Misopogone, scribit Antiöchenos ipsi exprobrasse Chi X. & Cappa, K. id est, Christum & Constantium nihil illis nocuisse. Nonnulli in ea litera Græca, cuius figura vngebant suos Pontifices Iudæi, mysterium istiusmodi obleruant, quod nimirum Messias nomen Græcum habiturus esset, cuius prima litera sit Chi X. vt significaretur illum futurum originem & principium Sacerdotij Nouæ legis à se instituenda. Mitto locum Platonis in Timæo, quem profert S. Iustinus Martyr, Apolog. 2. & de filio Dei, qui Christus est, suo quidem iudicio venit intelligendus, ἐχάσεν αὐτὸν ἐν τῷ πνεύματι. Decussauit eum in vniuerso. Decussationis formam litera Chi X. repræsentat, nec alia Decussatio ista existimanda sit quam virtus, quæ primo & principi Deo proxima. Sed de his plus satis, quandoquidem multò copiosorem sermonem alioquin ista desiderarent.

## §. 17.


Non ingratum illud futurum arbitror, aliquid de signo Crucis efformando subtexere: Nobis Christianis mos est vel manu integra, vel tribus digitis Crucis signum efformare, & aliquando vnico digito vetitum: saltem Christiani Catholici ab ea forma abstinuerunt nonnunquam propter Monophysitas hæreticos, qui vnico digito Crucem effingebant, quandoquidem ipsi in Christo post vnionem duarum naturarum Diuinæ & humanæ, has in vnam coaluisse affirmabant; quod dum se vno digito signabant, satis apertè indicare viderentur, vt refert Ni-

R<sub>h</sub>

cephorus, lib. 18. c. 53. Nobilis illa historia est Meletij Antiocheni Episcopi, apud Nicetam, lib. 5. c. 21. Thesauri Orthodoxæ fidei. Illi filium Patri Consubstantialem in Concione docenti, Archidiaconus Arrianæ factionis qui aderat manu os occlusit, at ille tribus digitis expansis singillatim, tum in vnum adductis, quod voce non potuit, signo declarauit, se Trinitatem Personarum Diuinarum, & vnicam Diuinam essentiam credere. At nos tandem huic dissertationi finem imponamus. Philonis Alexandrini, libro de migratione Abrahæ, disputatio mihi maximè probatur, qua docet Iudæis non satis esse præcepta Ceremonialia, de Circuncisione, de Festis, & similibus, secundum sensum mysticum obseruare, sed etiam secundum formam & ritum externum ac sensibilem, triplici quidem ratione. Prima, ab auctoritate eorum qui illas Ceremonias instituerunt. Secunda ab utilitate quæ eis inest, cum sit exercitatio religiosa & pia. Tertia ad vitandum scandalum. Si de Iudæis ista dicta sunt, quibus omnia in figura contingebant, 1. Corinth. 10. & qui Heb. 10, vmbra non imaginem rerum habebant, nobis, certè quibus gratia & veritas per Iesum Christum facta est, teste Apostolo amantissimo, Ioann. 1. nulla maior cura, studium, & sollicitudo esse debet, quam Deum & quæ Dei sunt, omnibus pietatis officiis colere. Sacramentales, quas diximus Ceremonias, ab Apostolis traditas, ab vniuersa Ecclesia probatas, suæ sanctitatis origine commendatas nouimus, *quarum contemptus sacrilegos faciat, impiè siquidem contemnitur sine quo non potest perfici pietas*, vt asserit B. Augustinus lib. 19. contra Faustum Manichæum, cap. II. Quarum vt & reliquarum omnium celebratione atque functione, *non Deo, sed nobis utilia pietatis officia exercentur*,



vt docet idem S. Augustinus, epistola 3. ad Marcellinum. Rectissime ab eodem Sanctissimo Episcopo, epistola 86. ad Casulanum, illud pronunciatum esse credamus. *In his rebus, de quibus nihil certi statuit Scriptura Diuina, mos populi Dei, vel instituta Maiorum pro lege tenenda sunt.* Et ante B. Augustinum sic B. Hieronymus epistola 28. *Vnaquæque prouincia abundet in suo sensu, & præcepta maiorum leges Apostolicas arbitretur.*



## CANTVS ECCLESIAE.

## §. 1.



**C**ANTANDI in publicis conuentibus Christianorum mos vel ab ipsis Apostolorum temporibus inualuit. Varroni Musica duplex Assa voce & Organica. Platoni, Aristoteli, aliis, Musica triplex, & qua. Gentilium alij, voce simul & saltatione, alij sola saltatione Deos suos venerabantur.

## §. 2.

Canendi in Sacris, ritus à Iudeis manauit. Gentilium in Sacris Cantus non sine harmonia. Christianorum veterum quis Cantus. Explicatio loci apud actus passionis S. Cypriani, Schola Cantorum.

## §. 3.

Tertulliani locus variè explicatus. Explicationum qua magis ad Tertulliani mentem faciet, indicet lector.

## §. 4.

Musica vocalis qualis in Ecclesia. Clementis Alexandrini locus subobscurus dilucidè expensus. Donatistarum qua Cantica.

Bb ij

## §. 5.

*Chorus. Cantores multiplicis generis & variorum ordinum pro temporum varietate. Canonis Laodicensi explicatio & emendata versio Latina.*

## §. 6.

*Lectores, adolescentuli, pueri, infantuli Cantores. Historia. Puerorum vocalium Ecclesie Carthagenensis, eorumque pro fide Catholica Martyrium.*

## §. 7.

*Vocalis Musica cuiusmodi fuerit apud Christianos, nec nisi grauis. Gentiles in suis Sacris graues sonos adhibebant. Spondæus cur Pontificius dictus.*

## §. 8.

*Franci veteres parum expoliti, & eorum Cantus aliquantum agrestior, à Pipino Rege primum, Romanum Cantum multo suauiore & gratiore suscipiunt. Cantum Romanum videri aliquando emendatum.*

## §. 9.

*Principes olim Chorum Cantorum in comitatu habuisse.*

## §. 10.

*Musica organica etiam in usu apud Christianos veteres: sequentibus deinde seculis.*

## §. 11.

*Canticum, Te Deum laudamus, quando decantari cœptum, vocali & organica Musica.*

## §. 12.

*Quæ vocalis Musicæ species à Christianis probata; Chromatica damnata à veteribus. Vinnulata vox. S. Hieronymi locus forsan, nec sine ratione emendandus. Voces secabiles, collisibiles. Canon Concil. Nicæni 2. illustratus. Molliculæ vocalis Musicæ grauius reprehensio.*





## Cantus Ecclesiasticus.

## §. I.



AM ab ipsis Ecclesiæ nascentis primordiis, & quidem in publicis Christianorum conuentibus, Psalmos, Hymnos, & Cantica fuisse decantata, fidem facit Gentium Apostolus non vno loco, Ephes. c. 5. Coloſſ. c. 3. Morem hunc perpetuò in Ecclesia Dei retentum, Historiæ Ecclesiasticæ Scriptores apertissimè produnt, nec Sectarij diffitentur. S. Augustini à multis prolata sententia est, tacitè in ea B. Pauli loca digitorum intendentis, Epistola 119. c. 18. *De Hymnis & Psalmis canendis, cum & ipsius Domini & Apostolorum habeamus documenta, & exempla, & præcepta, de Scripturis defendi potest.* Idem habet Concilium Toletan. 4. c. 12. Sed quoniam res huiusmodi à viris & pietate & eruditione præstantissimis abundè pertractata est, nos quasi spicilegium agentes, quis & qualis fuerit Cantus ille, disquirere instituimus. Quod antequam præstemus, vniuersim de Cantu aliquid prælibandum arbitror, vt certam de tota re disserendi viam ac rationem incamus. Varro in Catone, seu de liberis educandis, duplicem statuit Musicam, vnā, quæ sit assa voce; alteram, quæ organica vocatur. Assam vocem ipse idem sic explicat: *Assum existimandum est, vt in obsoniis, siue pigmento saporis alieni, quemadmodum merum dicitur solum.* Aristoteles lib. 8. Politicorum, c. 5. Musicæ duo

B b iij

genera facit, vnum quod vocat *Μέλοις*, id est, concentus vocum; alterum *Ρυθμῶν*, hoc est, numerosos corporis motus. Columella, Præfatione librorum de re rustica, mensuras & numeros in Musica dixit. Aristoteles idem libro de Poëtica, triplicem facere videtur Musicam. Primam, quæ constet *ῥυθμῶν*. Secundam, quæ *μέλει*, harmonia, seu concentu: Martiano Capellæ, lib. 9. *Melos est actus acuti aut grauioris soni*. Tertiam, quæ *μέτρω*: quam nos vulgò recitationem appellamus, sunt qui interpretentur, quàm rectè ipsi viderint. Ex Platonis lib. 3. de Republica, tres melodiæ species discimus, Orationem, quam cum Poësi eandem esse vult; Harmoniam, & Rithmum. Aliter describit Martianus Capella, lib. 9. Meminit Athenæus libro 8. & libro 14. non vno loco: nec non Fulgentius lib. 3. Mytholog. fabulâ Apollinis & Marsiæ. Cassiodorus, tractatu de Musica, ad id alludere videtur, cum Musicæ tres partes adsignet, Harmonicam, Rythmicam, Metricam. Aliter distinguit, lib. 2. variarum, Epistola 40. Rythmo, *ῥυθμῶν*, motum corporis coniunctum esse, sed ad numerum, vt modo breuior & leuior, modo grauior & productior sit, contendit Plato, vt & Aristoteles. Hæc omnia fusissimè tractat Lucianus, Dialogo, *περὶ ὀρχήσεως*, de saltatione. Scribit eo loci, Gentilium alios, voce simul, & saltatione, seu numero corpore motu, Deos suos precari. Plato, lib. 7. de legibus, istud exponit; & Agellius, lib. 20. c. 2. *Saltabundi*, inquit, *olim canebant, quæ nunc stantes canunt*. Alios, vt Indos, silentes, sola saltatione Deos apprecari, adeo vt qui voce non possent, saltem saltatione illos venerarentur. Hinc tritum apud nos vulgi sermone prouerbium: *Il ne sçait ny chanter, ny baller*. Virgilius vtrumque coniunxit, 1. Georgic. loquens de rustica iuuentute,



*Det motus incompósitos, & carmina dicat.*

Seruius, ibi, explicat motus illos incompósitos, id est, saltationem aptam religioni, nec ex vlla arte venientem. Paulo antea, vbi explicat quid sit Chorus, Cantum cum saltatione coniungit. Apud Aufonium, Edyllio 4.

--- *Et genitrix modulorum Musica triplex,*

*Mista libris, secreta astris, vulgata theatris.*

Sed partitio hæc ad nostram dissertationem nihil confert. Aristoxenus apud Vitruuium, lib. 5. c. 4. modulationum tria genera facit. Primum genus Harmoniam vocat, Ἀρμονία. Secundum, Χρῶμα. Tertium, Διάτονον. Latini, Harmonicam, Chromaticam, Diatonicam Musicam dixerunt. Harmoniæ modulatio ab arte concepta, & ea re cantio eius maxime grauem & egregiam habet auctoritatem. Chroma subtili solertia ac crebritate modulorum, suauiore habet delectationem. Diatoni verò, quod naturalis est, facilius in intervallum distantia.

§. 2.

Nunc qualis, & cuiusmodi fuerit in Ecclesia Christi Cantus vsu receptus videamus, & Varronis togatorum doctissimi distinctionem secuti, de vocali primum, deinde de organica dicemus; ita tamen, vt de aliis generibus nonnihil subiungamus. Isidorus. Officiorum Ecclesiast. c. 14. à Iudæis petum hunc canendi modum indicat: Scribit enim veteres Iudæos cantare solitos, quando victimæ immolabantur; Profertque eius rei firmandæ gratia, locum Ecclesiastici, cap. 50. Sic enim porrexit Sacerdos manum suam in libationem, & libauit de sanguine vna, & fudit in fundamentum altaris odorem Diuinum excelsi Principi, tunc exclamauerunt filij Aaron in tubis ductilibus, & sonuerunt, & auditam fecerunt vocem magnam in memoriam

coram Domino. Verba sunt versionis Latinæ tempore Isidori, & in Hispania usitata. Addi potuit & versus non proximè sequens. *Et amplificauerunt psallentes in vocibus suis, & in magna domo auctus est sonus suauitatis plenus.* Non displicet versio ex varia lectione contextus Græci. *Et collaudarunt Cantores Psalmorum vocibus suis, multiplici sono carminum modi dulcuerunt.* Variantem lectionem expressit doctissimus Hæschelius, & alij. Plato in Theæteto, & refert Suidas, voce, *Ἀναλαμβάνειν*, ait Hymnos Deorum cani solitos secundum aliquam verborum harmoniam. Christianis quis cantandi modus adhibendus sit, Clemens Alexandrinus ex collatione Gentilium demonstrat. Apud Græcos veteres, in conuiuiis ad compotandum comparatis, & irrorantibus poculis ad Hebræicorum psalmorum similitudinem canebatur Canticum, quod appellabatur, *σκόλιον*, id est, obliquum, communiter omnibus pæanâ simul voce clamantibus. Non ita apud Christianos, sed duplex sit nostra in potu inuitatio, ex lege, & quidem beneuolentiæ gratia, siquidem diligas Dominum Deum tuum, deinde proximum tuum. Prior quæ est in Deum beneuola inuitatio, fiat per gratiarum actionem & psalmodiam. Secunda, quæ est in proximum, per honestam vitæ consuetudinem. Cætera quæ hîc attingit Clemens, postea expendemus. Porro satis apertè innuit quando & quo tempore Christiani, velut communi consensu, canere consueverint, cum videlicet publica illa & solemnia conuiuia celebrabant, quæ Agapæ nominabantur. Quod confirmat Tertullianus Apologet. c. 39. *Cæna nostra de nomine rationem suam ostendit, vocatur Ἀγάπη, id quod dilectio penes Græcos est. Nil vilitatis, nil immodestiae admittit; non prius discumbitur quàm oratio ad Deum prægustetur,*



stetur, editur quantum esurientes capiunt, bibitur quantum pudicis est utile, ita saturantur, ut qui meminerint etiam per noctem adorandum Deum sibi esse. Ita fabulantur, ut qui sciunt Dominum audire. Post aquam manualet & lumina, ut quisque de Scripturis Sanctis, vel de proprio ingenio potest, prouocatur in medium Deo canere, hinc probatur quomodo biberit. Videntur prisci illi Christiani hanc sibi constituiisse regulam ex verbis Apostoli, Ephes. 5. Nolite inebriari vino, in quo est luxuria, sed impleamini Spiritu Sancto, loquentes vobismetipsis in Psalmis, Hymnis, & Canticis spiritualibus, cantantes & psallentes in cordibus vestris Domino. Istud firmat S. Cyprianus. epistola 2. ad Donatum, cum ait, Sonet psalmos Conuiuium sobrium, & ut tibi tenax memoria est, & vox canora, aggredere hoc munus ex more. Eusebius lib. 2. c. 17. loquens de primis Christianis in Ægypto, (Sic enim Therapeutas cum ipso Eusebio, & B. Hieronymo, tum antiquitatis veneratione, cum eruditionis publica laude insignibus, quam nescio quos Iudæos minime Christianos, cum recentioribus, parum piè, antiquitatem suggillantibus, interpretari malo) ita differit, ut doceat illos Cantica & Hymnos, constantes omni metrorum genere, *ἄφ' ὧν πάντα μέτρων καὶ μέλων ῥυθμίς*, in Dei honorem decantantes. Hæret mihi aqua, in eo quod apud Actus passionis S. Cypriani scriptum est, Beatissimum Martyrem, martyrio consumpto, cum Cereis & Scholaribus sepultum. Certè Scholares isti Psalteria videntur. S. Gregorium, primum, omnium scholas Cantorum instituisse, ac si istud antea inusitatum & ignotum fuerit, nemo tantisper Ecclesiasticæ historiæ gnarus asserere audeat, cum ab Ecclesiæ primis seculis, præsertim in Ecclesia Orientali, Scriptores Ecclesiastici istud vsu receptum fuisse testentur. B. Gre-

Cc

gorius, huic instituto & ordini nouam quandam formam & distinctionem adsignasse videtur, vt pote excogitata & constituta duplici Cantorum schola, vna ad S. Petrum, altera in Patriarchio Lateranensi. Ita refert Ioannes Diaconus in eius vita, lib. 2. c. 6.

## §. 3.

Sed ad priscum illum veteris Ecclesiæ vocalem Cantum redeo, & absoluo vno Tertulliani loco, libro de Oratione, sic autem habet: *Nos vero non attollimus tantum, sed etiam expandimus, & Dominica Passione modulantes & orantes cōfitemur Christo.* Nicolaus Rigaltius, pari pietatis orthodoxæ & eruditionis singularis commendatione apud bonos omnes Clarissimus, aliam è suo, siue Agobardi, Tertulliano, paulò aliter legit: *Nos vero non attollimus tantum, sed etiam expandimus & Dominica Passione modulatum.* Deinde grauius eos errare contendit, qui *Modulantes* hîc accipiunt, quasi canentes aut psallentes. Nam cum de priuata, inquit, oratione sit sermo, quam sono vocis summissio atque subiecto fieri debere, ait Tertullianus, nihil opus fuit modulis musicis. Nos, ait idem, *Modulatum* interpretamur imaginem, figuram scilicet seu gestum orantis: hoc est, orantes non tantum attollimus manus, sed etiam expandimus *modum, seu modulum*, vel, vt ait Tertullianus, *modulatum*, quem exhibuit Dominus noster Iesus Christus, expansis in cruce manibus. Per humanitatem Rigaltij optimi liceat istud tantisper disquirere. B. Hieronymus ad B. Augustinum scribens, *In Scripturarum campo, si placeat, sine nostro inuicem dolore ludamus*, quanto rectius & securius, in vnius Tertullianici loci explicatione, innoxie digladiari licet? In primis non de sola oratione priuata Tertullianum hoc libro agere contendo: Nam præter



quam quod Oratio Dominica, non tantum in priuatis, verumetiam in publicis precibus recitabatur, quod omnes norunt. Tertullianus multa hinc congerit, quæ non nisi ad publicos Christianorum conuentus vix referri videntur. Omitto quod de manibus abluendis ante orationem scribit. Nam quanquam domi oraturi id facerent, at multo magis in publica Synaxi, in qua, si non sumpturi, saltem in manus SS. Eucharistiam accepturi erant, ut hinc tradit Tertullianus, & morem hunc expressit S. Chrysostom. homil. 52. in Mathæum, & 61. ad Pop. Antioch. S. Augustinus sermone 152. de tempore. Deinde ritum post orationem adsidendi, non ad domesticam tantum sessionem, sed publicam in Ecclesia referendum esse grauiissimi auctores produnt. Addo & istud, quum ita scribit: *Quid amplius referent isti, qui clarius adorant (adorare veteribus pro orare) nisi quod proximis obstrepunt?* Sed illud, quod sequitur, omnem ni fallor dubitandi rationem adimit, cum illam exagitat consuetudinem, qua ieiunantes habita oratione cum fratribus, solemnibus Christianorum cœtu, subtrahebant osculum pacis, quod est signaculum orationis. Quid igitur vetat *Modulatum*, seu modulationem illam Tertulliani, suo, hoc est, genuino significato, explicare, cum certum sit, etiam profanorum scriptorum testimonio, ut Plinij Iunioris, Christianos in suis conuentibus cecinisse, ac Martiano Capella auctore, *Modulatio est soni multiplicis expressio*. Glossæ veteres, *ᾠδὴ μίξις* *Modulo, formo*, quæ voces concentum Musicum indicat. Addam & istud quod arbitrarium esse cupio, Tertullianum hoc libro Sacrificium disertè commemorare, in quo Christi Corpus accipiatur, & istud quidem publica Synaxi ac cœtu fidelium. At hoc, seu Orientalis, seu Occidentalis

Cc ij

Ecclesiæ iudicio, aliud non est quam Liturgicum, quodque *Passio Christi* appellatur, ut scribit B. Cyprianus, epistola 63. ad Cæcilium: *Passio est Domini sacrificium quod offerimus.*

## §. 4.

Nostram Musicam vocalem in Ecclesia postea visitam videamus. Socrates lib. 2. c. 8. narrat cum Syrianus Dux cum militibus Gregorium Arrianum in Ecclesia Alexandrina collocare & inducere pro Episcopo tentaret, & S. Athanasium eiicere, tum Sanctissimum Episcopum, illis in Ecclesiam irruentibus, imperasse Diacono ut Psalmum inchoaret, quod cum suauius & cum concentu fecisset, hinc Beatum virum unà cum populo per aliam Ecclesiæ portam euasisse. De Cantu Christiano mihi certe perobscurus occurrit locus Clementis Alexandrini, lib. 2. Pædagogi c. 4. Versio Latina est. Diuinum ministerium separans, psallit spiritus. Primo loco λειτουργία ἁγία memorat, quam, Græcæ Ecclesiæ more, intelligendam arbitror, pro externo illo Corporis Christi Sacrificio. Sed quid sibi vult, spiritus separans hanc Diuinam Liturgiam & psallens? Gentianus Heruetus, vir de Christi Ecclesia optimè meritus, iis verbis nihil aliud significari ait, quam concentum illum voce prolatum, in hoc Diuinæ Lyturgiæ ministerio & officio, ipsum discernere & distinguere à prophanis ministeriis. Ego vero, si in re obscura coniecere licet, arbitror Clementem exprimere voluisse discrimen harmoniæ & Canticorum, quibus Gentiles in suis comessionibus utebantur, & eorum quæ Christiani in Diuina Liturgia adhibebant. Nam illi omnes velut temulenti, quasi victorale carmen simul canebant, ac postmodum per Cantici vices propi-



nationem circumagebant. At longè aliter apud Christianos, cum omnia ad omnem modestiam & temperantiam comparata essent. Ita enim lib. 6. Stromatum, c. 5. ait, Christianos psallendo in conuiujs sibi inuicem propinare, prauos affectus incantantes, & Deum glorificantes, nec sit concentus ille continuus, sed religionis ergò intermissus, vt tradit Concilium Laodicenum, Can. 17. Quod eleganter representat S. Augustinus, Epistola 119. c. 18. *Quando, inquit, non est tempus, cum in Ecclesia fratres congregantur, Sancta cantandi, nisi cum legitur, aut disputatur, aut Antistites clara voce deprecantur, aut communis oratio, voce Diaconi, indicitur. Et quod discrimen adsignat Clemens inter Cantica Gentilium & Christianorum, idem B. Augustinus statuit inter Christianos Catholicos & Donatistas, etiam in Diuinis officijs. Donatista, inquit, nos reprehendunt quod sobriè psallimus in Ecclesia Diuina, Cantica Prophetarum, cum ipsi ebrietates suas ad Canticum Psalmorum, humano ingenio compositorum, quasi tubas exhortationis inflamment.*

§. 5.

Nunc Cantorum ordinem dispiciamus, & quoniam, vulgari verbo, *Chorum* appellamus; B. Augustinum vocem illam explicantem audiamus. In Psalmum 149. *Chorus*, ait, *quid significat? Multi nouerunt Chorum & quia in ciuitate loquimur, prope omnes norunt: Chorus est consensio cantantium: si in Choro cantemus, concorditer cantemus.* Seneca epistola 84. Nonne vides quam multorum vocibus *Chorus* constet? Vnus tamen ex omnibus sonus redditur, aliqua illic acuta est, aliqua grauis, aliqua media, accedunt viris foeminae, interponuntur tibiae, singulorum illic latent voces, omnium apparent. Idem S. Episcopus in Psalmum

Cc iij

148. Quid in Choro Christiano agendum sit ita declarat: *Hymnus scitis quid est, Cantus est cum laude Dei. Si cantas & non laudas Deum, non dicis hymnum. Si laudas aliquid, quod non pertinet ad laudem Dei, & si cantando laudes, non dicis hymnum: hymnus ergo tria ista habet, & Canticum, & laudem, & Dei.* Cantores isti varij generis extiterunt pro temporum varietate. Quamquam multa iampridem de ea re ex SS. Patribus descripta sint, & à quamplurimis, velut serie quadam, usurpata, ne ingrata repetitione lectori sim molestus, ab eiusmodi abstinerebo, nisi forte dicendorum ordo me in eam deducat necessitatem, ut iam dictum referre oporteat, quod & raro & pudèter faciam. Cantandi qui olim mos in veteri Ecclesia extiterit, ex vno duntaxat B. Basilio intelligi posse arbitror. Epistola 63. ad Neocæsarienses, docet vir sanctissimus, toto Oriète, apud Ægyptios, Thebeos, vtriusque Libyæ accolas, Palestinos, Phœnices, Syros, Arabes, Christianos, communes Psalmodias in usu & pretio fuisse, & vnum quidem has inchoare, ceteros prosequi ac succinere, quin aduersus reprehenses ritus huius generis, contendit doceri non posse istud factitatum non fuisse tempore S. Gregorij Taumaturgi, Neocæsariensis Episcopi, hoc est, ante Constantinum Magnum. Lectores, (sic enim eos nominare veteribus placuit) canendi in Ecclesia olim, & in primis munus sustinuisse innuere videtur Martinus Braccarensis Episcopus, in Collectione Capitulorum Græcarum Synodorum, c. 45. *Non liceat in pulpito psallere, aut legere, nisi qui ab Episcopo Lectores sunt ordinati.* Desumptum Capitulum ex Canone 15. Concilij Laodiceni, cuius versio Latina Dionysij Exigui est huiusmodi. *Quod non oporteat amplius, præter eos qui regulariter Cantores existunt, qui & de*



*Codice canunt, alios in pulpitum conscendere, & in Ecclesia psallere.* In primis obseruandum est, voces has Græcas, *ἐκ τῆς διφθέρας ψάλλονται* (ex membrana legunt) Latine Gentianum & alios vertisse, cum (*Psallentes seu Cantantes* vertendum fuit) quod in Zonaræ scholiis obseruatum est. Synodum Laodicenam, non multo post Nicænam primam habitam fuisse in confesio est, ex qua corruptelam illam superiorum temporum intelligimus, qua Laici cantandi, seu Diuina Cantica inchoandi, vt habet Balsamo, munus in Ecclesia sibi arrogasse dicuntur, istud emendari vult Synodus, vt nonnisi *ἑκκlesiastici ψάλλοντες*, Cantores Canonici, hoc est, in Clerum adscripti, canendi ius habeant. Apud nonnullas gentes, Lectores longe postea hunc morem retinuisse, docet Concilium Braccarense primum, c. ii. *Placuit vt Lectores in Ecclesia, in habitu seculari ornati, non psallant, neque granos Gentili ritu dimittant.* Non vetat Concilium Lectores in Ecclesia canere, sed habitum secularem in hoc Diuino ministerio gestare minime probat, & ferio prohibet. Quod hîc de *granis* dicitur, Loaisa aptè ex Isidoro indicat: sed an locum Isidori intellexerit subdubito, quandoquidem ex ingenio plane ridiculam affert interpretationem, eruditissimo Sirmundo hac in parte meritò vapulauit Loaisa. Postmodum Diaconi cantandi in Ecclesia ius sibi vendicarunt, quod B. Gregorio minimè placuit, nam Concilio Romano, sub hoc Sanctissimo Pontifice, c. i. ita statutum est: *Presenti Decreto constituo, vt in sede hac sacri altaris ministri (Diaconi) cantare non debeant, solumque Euangelicæ lectionis officium inter Missarum solemnias exoluant. Psalmos vero ac reliquas lectiones censeo per Subdiaconos, vel si necessitas exigit, per minores ordines exhiberi.* Sic Canon hic conceptus est in Con-

ciliorum nonnulla editione, sed apud B. Gregorium, lib. 4. epistola 44. seu c. 88. Caput hoc paulo diffusius habetur eiusmodi: *In Sancta Romana Ecclesia dudum consuetudo est valde reprehensibilis exorta, ut quidam ad sacri altaris ministerium Cantores eligantur, & in Diaconatus ordine constituti, modulationi vocis inserviant, quos ad predicationis officium & eleemosinarum studium vocare congruebat.* Postea sequuntur quæ descripsimus antea.

## §. 6.

Lectores deinde qui inter minores ordines recensentur, Cantorum officio functi sunt, imo & *Adolescentuli*, ut iam alij monuerunt, ex B. Hieronymo, in c. 5. ad Ephesios, quin & *Pueri*. Hinc nostris in Capitularibus, lib. 1. c. 72. *Ut scholæ legentium puerorum fiant, Psalmos, Notas, Cantus, Compositum, Grammaticam, per singula Monasteria, vel Episcopia, discant.* S. Gregorius, auctore Ioanne Diacono in eius vita, lib. 2. c. 6. scholam Cantorum duplicem instituit, ut supra dictum. Sed addit Diaconus, suo tempore, hoc est, sub Ioanne 8. P. R. & Carolo Caluo, Imperatore, asseruatum flagellum, quo pueris discantibus Sanctissimus Pontifex minabatur. In Ecclesia Parisiensi *pueros* inter Cantores, nominatos fuisse tradit Fortunatus Episcopus Pictauiensis, & nos postea istud pluribus explicabimus. Sed illud sempiterna dignum memoria videtur, quod narrat Victor Vticensis, lib. 3. de persecutione Vandalica, de pueris phonscis Ecclesiæ Carthaginensis. *De multitudine, inquit, pergentium Confessorum* (hoc est Christianorum Catholicorum in exilium actorum, edicto Hunerici Vandalorum Regis Arriani in Africa) *id est, Ecclesiæ Carthaginis Clericorum, suggerente quodam ex lectore Teucharis perduto, quos ille nouerat vocales strenuos, atque aptos modulis*  
*Cantilenæ,*



*cantilenæ, designatione sua debere dicit duodecim Infantulos separari, quos ipse, dum Catholicus esset, tunc discipulos habuit. Statim, illo suggerente, sub festinatione, viro dimittuntur & vi barbarici furoris, bis senus numerus puerorum de itinere reuocatur. Segregantur corpore, non spiritu, à grege Sancto-  
rum. Qui timentes præcipitium (hoc est, defectione à fide Catholica,) cum suspiriis lachrymarum, ne diuellerentur, constringebant manibus genua sociorum. Quos violentia tamen heretica, minacibus separans gladiis, Carthagini reuocauit. Postea indignantur ob hoc grauiter Arriani, & se superatos à pueris erubescunt. Vnde accensi, subdi fustibus iubent, quos iam, ante paucissimos dies, variis verberibus dissipauerant. Imprimuntur vulneribus vulnera, & rursum pœna restaurata crudeſcit. Factum est, Domino confortante, vt nec ætas minor deficeret in dolore, & magis animus cresceret roboratus in fide. Quos nunc Carthago miro colit affectu, & quasi duodecim Apostolorum, Chorum conspiciit puerorum. Vnà degunt, simul vescuntur, pariter psallunt, simul in Domino gloriantur. Mihi certè nunquam temperare potui, quin tam illustrem, tamque incredibilis Christianæ constantiæ in pueris historiam integram recenserem.*

## §. 7.

*Pergamus nostram excutere Musicam vocalem in Ecclesia, & vt ego existimo, non vnius generis & modi fuisse videtur iste concentus musicus, siue harmonicæ, siue diatonicæ Musicæ aptus & conueniens, nam Chromatica repudiata est, vt postea demonstrabimus. Ad duas itaque priores illas referenda sunt ista B. Augustini, Confessionum lib. 10. c. 33. Eloquentia Diuina cum suauis & artificiosa voce cantari. Tum quod eodem loco scribit, B. Athanasium Episcopum Alexandrinum iussisse lectorem Psalmi*

Dd

tam modico flexu vocis sonare, vt pronuntianti vicinior esset quàm canenti. Cui rei respondet quod tradit Martianus Capella, lib. 9. c. de voce: *Carmina neque continuo modo, neque diuisione frequenti recitari.* Aut qualis erat leuis illa Musica Mœcenatis, hominis discincti & soluti, de qua ita Seneca, libro de Prouidentia, c. 3. *Mœcenas somnium capiebat per Symphoniarum cantum, ex longinquo lenè resonantium.* Vt vt sit, non est dubitandum non aliam in Ecclesia vocalem Musicam vsu receptam fuisse, quam quæ Christianam grauitatem, cum omni pietatis sensu coniunctam, redoleret. Istud apertè testatur Clemens Alexandrinus, lib. 2. Pædagogici, c. 4. dum ait, Christianis dignam videri Musicam, quæ sit, *Ἀγνήτη καὶ σωφρονικὴ μέλη*: Modulatio grauis, & temperantiæ plena. S. Chrysostomus, homilia in illud Esaïæ, *Vidi Dominum*, grauius perstringit eos, qui in Ecclesia Cantica Diuina non pluris quàm prophana & vulgaria facientes, inconditas voces emittebant, tumultuantes & velut in furorem conuersi, manus indecenter iactarent, pedibus subsultarent, toto corpore circumacti, quæ in Theatris aut audierint aut spectarint in Ecclesiam inducere cogitarent. Et certè Gentiles olim in suis Sacris graues quosdam sonos adhibebant, qui magna parte spondæo constabant, & hic propterea Pontificius dictus est, auctore Terentiano Mauro, lib. de literis, &c. c. de pedibus dissyllabis:

*Quidquid in Templis canorus à sono vocis male,  
Auribus libantis obstat & fauet concordios est.*

Plebis inconditam canendi rationem nil moror. De Romana plebe istud pronuntiauit B. Hieronymus, Præfatione in lib. 2. Commentariorum in Epistolam ad Galatas: *Romæ ad similitudinem cælestis tonitruï amen roboat.*



## §. 8.

Nostros veteres Francos ante Carolum Magnum, verè rupicones, & quasi in scrupula canendi schola instructos vltro fatendum. Apud B. Hieronymum, Præf. lib. 2. Comment. in Epist. ad Galatas. S. Hilarius, Gallus, Pictavius genitus, Gallos indociles vocat in Hymnorum carmine. Carolus, ab itinere Romano, voluit Cantores suos edificere *Notam Romanam*, quam nunc vocant *Notam Franciscam*, quam non plenè & perfectè poterant exprimere Franci naturali voce, frangentes in gutture voces potius quàm exprimentes. Sic habet Chronicon Engolismense. Sed Gallici seu Franci Cantus emendationem, & cum Romano consensionem, longè antea à patre suo Pippino procuratam fuisse, ipsemet testatur Carolus Magnus, Capitularium lib. 1. c. 80. *Monachi ut Cantum Romanum pleniter & ordinabiliter per nocturnale & vel gradale officium peragant, secundum quod beatæ memoriæ genitor noster Pippinus Rex decertavit ut fieret, quando Gallicanum Cantum tulit, ob unanimitatem Apostolica Sedis, & Sanctæ Dei Ecclesiæ concordiam.* Nec certe Cantus iste Romanus semper suis omnibus numeris absolutus fuit, si vera & legitima est illa Damasi, P. R. Epistola ad B. Hieronymum, qua ipsum rogat, ut ad se Græcorum psallentiam mittat, ac si concinnior & perfectior esset ipsa modulatione Romana: Siquidem ut habet Epistola huiusmodi, *Nec psallentium mos tenetur, nec Hymni decus in ore nostro cognoscitur.*

## §. 9.

Et quoniam de vocali Musica sermo est, non iniucundum videbitur, si velut parergon aliquod, istud subiiciamus. Principes Cantorum Chorum apud se habere solitos, non est quod Dauidem ipsum Divinorum Cantico-

Dd ij

rum auctorem commemorem. Certum est Psalmi 4. titulum esse eiusmodi ex Hebræo, Victori in melodis. Camius exponit, Præfecto Cantorum seu Præceptori, qui modum dabat, & voce cantantibus, & instrumenta Musica pulsantibus. Sozomenus, lib. 7. c. 23. narrat Theodosium Magnum valde Antiochenis ciuibus iratum, eo quod seditione populari statuas Imperatoris & coniugis eius illi deiecissent, & fune iniecto per urbem traxissent, non aliter placatum fuisse, quàm cum ipsius Cantores, qui ad eius mensam canere solebant, cantilenas, Antiochenis euenturas miseras ob culpam admissam, denuntiantes & deplorantes, decantarunt, concentu & modulatione adeo lugubri, ut ipsi Theodosio lachrymas extorserint, unde illico placatus ignouit Antiochenis. Forſan & ea causa fuit, ut Musicæ audiendæ studio ita teneretur Theodosius Magnus, quod vndique conquiri & inuestigari iuberet omnes qui eleganter voce canere nossent, ut tradit Suidas, voce *φωνασκεῖν*. Si quis de Theodosio Iunior canendi valde studioso, istud Suidæ explicare malit, non repugnabo. Gregorius Turonensis, lib. 8. historiæ Franc. cap. 3. meminit Clericorum cantantium in Regis prandio. Is erat Rex Guntrannus. Posteriora tempora non attingo.

## §. 10.

Haftenus de Musica vocali, nunc de organica videndum, & paucis, cum alij iam pridem occuparint. Clemens Alexandrinus, Pædagog. lib. 2. c. 4. non censet reprehendendum esse Christianum, qui in publicis illis Christianorum Agapis seu conuiuiis ad lyram & cytharam, si modò artem nouerit, cecinerit, quandoquidem Dauidem Regem imitetur, qui Deo vel maxime gratus fuit. Vni-



cum proferam & illustre vsus istius organicae Musicae exemplum, in Ecclesia Parisiensi, hoc est, omnium Gallianarum, vt nobilissima, ita clarissima. Sic habet Fortunatus Episcopus Pictaueusis, lib. 2. Elegia 10. ad Clerum Parisiacum, tum B. Germano Parisiensium Episcopo:

*Hinc puer exiguis attemperat organa cannis,*

*Inde senex largam ructat ab ore tubam.*

*Cymbalinae voces calamis miscentur acutis,*

*Disparibusque tropis fistula dulce sonat.*

*Tympana rauca senum puerilis tibia mulcet,*

*Atque hominum reparant verba canora lyram.*

Antea Clerum & Chorum describens Parisiensem, praesentemque S. Germanum, ista refert:

*Celsa Parisiaci Cleri reuerentia pollens,*

*Ecclesiae genium, gloria, munus, honor.*

*Carmine Dauidico Diuina poemata pangens,*

*Cursibus assiduis dulce reuoluit opus.*

*Inde Sacerdotes, Leuiticus hinc micat ordo,*

*Illos canicies, hos stola pulchra tegit.*

*In medio Germanus adest Antistes honore,*

*Qui regit hinc iuuenes, subrigit inde senes.*

§. II.

Ac quoniam in Ecclesiis nonnunquam vocalem Musicam organicae subiungi in vno eodemque Cantico contingit, quod nos vulgò, *Te Deum laudamus*, nominare solemus, de huius antiquo vsu pauca dicamus. Concilio apud Theodonis villam, sub Carolo Magno, anno Christi 812. in Capitulo Ecclesiastico, memoratur, quo pacto finito Concilio, Ecclesiastici Hymnum, *Te Deum*, decantarunt. Vitae Ludouici Pij Imperatoris incertus auctor, sed qui eo tempore vixit, narrat cum Stephanus

D d iij

Papa Remos, vbierat Ludouicus Pius, venisset, Papa Ecclesiam ingrediente, comitante illum Ludouico Imperatore cum Antistibus & Proceribus, decantatum fuisse, *Te Deum laudamus*. Concilio Triburiensi, sub Arnulpho Imperatore, anno Christi, 896. initio Synodi, post orationem ab Imperatore habitam ad Patres Concilij, & post acclamationes, *Exaudi Christe*. Arnulpho magno Regi vita, sonantibus campanis, *Te Deum laudamus*, decantatum fuisse. Hactenus Musicæ vocalis vsum vtrique Ecclesiæ communem explanauimus, eumque à SS. Patribus laudatum ostendimus, cum teste B. Augustino, Epist. 119. c. 18. *Res sit tam utilis ad mouendum pie animum, & accendendum Diuinæ dilectionis affectum*. Addo eiusdem Sanctissimi Episcopi eximiam sententiam, lib. 10. Confess. cap. 33. cum exponit quid distent Psalmi Dauidici cantati à non cantatis, & quem fructum ex illis colligamus: *Aliquando, inquit, amplius mihi videor honoris eis (Psalmis & Canticis Ecclesiæ) tribuere quam decet, dum ipsis sanctis dictis religiosius & ardentius sentio moueri animos nostros in flammam pietatis, cum ita cantantur, quam si non ita cantarentur; & omnes affectus nostri spiritus, pro sui diuersitate habere proprios modos in voce atque cantu, quorum nescio quæ occulta familiaritate excitentur.*

## §. 12.

Nunc quid in illo concentu Patres reprehendendum censuerint, videamus. Clemens Alexandrinus, lib. 2. Pædagog. c. 4. Musicam Chromaticam omnino damnat, atque à Christianis nullo pacto vsurpandam. Ac si Diatonicen & harmonicen prober. Plato lib. 3. de Republica, ab illa quam constituit ciuitate, amandat Lydiam mixtam, Lydiam acutam, Ionicam, Doricam, Phrygiam.



modulationem, quia molles & effœminatæ sint. Atque idem lib. 4. de Repub. cauendum esse ait, ne noua Musica species inducatur, siquidem nusquam Musicae modum mutantur, absque maximarum Legum Ciuium mutatione. Certum est ex eorum sententia, qui de Musica scripsere, Chromaticen nimium delicatam, mollem, ac veluti clumbem canendi rationem continere. Illa enim est quæ *vinnulata* voce exprimitur, quæ Isidoro 3. Originum, c. 19. Leuis, mollis atque flexibilis exponitur, sic dicta à *vinno*, hoc est, cincinnis molliter flexo. S. Hieronymus, in c. 5. Epistolæ ad Ephesios, *In isto canendi modo haberi*, scribit *guttur* & *fauces dulci medicamine colliniendas*. Interim istud obseruandum, cum Beatissimus, his verbis, Persium imitari voluerit, eo loco Satyræ 1.

— *Liquido cum plasmate guttur*

*Mobile collueris.*

Emendandum videri, *colluendas*, non, *colliniendas*, & forsam *modulatione* non *medicamine*; nec enim huic loco Persij, aut medicamen, aut vlla porio quidquam facit, Turnebo altero Galliarum oculo auctore. *Vinnulas* voces illas, Chronicon Engolismense, *Collisibiles*, vel *secabiles* appellat. Balsamo in Canonem 15. Concilij Laodiceni, *μινυλισματα* vocat. Zonaras in Canon. 22. Concilij 2. Nicæni, explicat vocem illam Canonis, *λυγισματα*, quæ damnantur, atque significare, vel *ἀσέμνους ὀρχήσεις*, vel *τὰς ὁδὰς λυγισματα τῶν φωνῶν*, seu inhonestas saltationes, aut vocum in cantilenis modulationes, seu flexiones. Sed ante hos omnes Clemens Alexandrin. lib. 2. Pædag. c. 4. *καὶ τῶν φθόγων κακοτεχνούτες*, flexuras, seu flexiones vocis improbè efficientes. Quamquam non negem in Harmonica & Diatonica, canendi mollitiem eiusmodi

ipsius Cantoris, seu artificio, seu lenocinio, aliquando deprehendi. Alij ad modos musicos ista referunt.

## §. 13.

Ioannes Sarisberiensis Episcopus Carnotensis lib. 1. de Nugis Curialium, c. 6. postquam asseruit ad mores instruendos, & animos exultatione virtutis traiciendos in cultum Domini, non modo concentum hominum, sed & instrumentorum modos, Sanctos Patres Domino applicandos censuisse, cum Templi seu Ecclesiæ reuerentiam dilatarent, ac præterea Ecclesiæ triumphatricis exemplo proposito; Subiungit, *Nihilominus, Phrygium modum & cætera corruptionis lenocinia, sanæ institutionis non habere usum, sed prodere malitiam abutentis, ipsum cultum pietatis incestare, quandoquidem ante conspectum Domini in ipsis penitralibus Sanctuarij, lasciuiantis vocis luxu, quadam ostentatione sui, muliebribus modis notularum articulorumque casuris, stupentes animulas emollire Cantores id genus nitantur.* Interea quæ de Phrygio modo scribit, tanquam enervato & molli, non omnibus istud probabit. Ac ne Senecæ quidem potissimum, apud quem de Phrygij modi efficacia ista scribuntur, epistola 108. *Quidam ad magnificas voces excitantur, & transcunt in affectum dicentium, alacres vultu & animo, nec aliter concitantur, quàm Phrygij tibicinis sono semiviri, & ex imperio furentes.* Aristoteles lib. 8. Politic. c. 5. Phrygium Diuino furore affare dixit. Scio modos Lydium, Dorium, Phrygium, plurimum à primæua sui origine & institutione deflexisse: Quod eleganter demonstrat Athenæus, lib. 14. c. 5. Nec istud Apulei in floridis, *Æolium simplex, Asium varium, Lydium querulum, Phrygium religiosum, Dorium bellicosum, semper & constans, & verum fuit.* Sed ad nostrum Sarisberiensem redeo. Interim quæ




quæ de sui sæculi his in nugis corruptela, hoc loco prodit, obiter describere non incongruum videbitur, imo non sine fructu eius, quem sincerus & sine fūco cultus delectat Diuinus. *Quæ mentes emolliunt moresque subuertunt, à nostra ætate undique adsciscuntur, licet ipsa ultra quam satis est vitiis suis abundet.* Subiungit historiam memorandam. *Quidam venerabilis vir circiter septingentarum Monialium pater, hanc Monasteriis suis præscripsit legem, ut omnia earum Cantica totius melicæ pronuntiationis exuant modos, & ut sola Psalmorum & laudum sint significatiua pronuntiatione contentæ.* Suspecta equidem fuit sancto viro voluptati cognata mollities, eo quod voluptas parens libidinum est. Iuuenalis Satyra 6.

— Quod enim non excitat inguem  
Vox blanda & nequam.


Absoluo vnus Isidori viri optimi eleganti oratione lib. 3. Sentent. c. 7. dum Christianum non vocis modulatio, sed tantum verba Diuina quæ ibi dicuntur debeant commouere, nescio quo tamen pacto modulatione canentis maior nascitur compunctio cordis. Multi enim reperiuntur, qui Cantus suauitate commoti, sua crimina plangunt, atque ex ea parte magis flectentur ad lachrymas, ex qua psallentis insonuerit dulcedo suauissima.

Ec

## CONSCIENTIA.

ONSCIENTIÆ definitio multiplex. Conscientiæ actus varij. Conscientia iuxta regulam iudiciorum expendenda. Conscientia monentis exemplum, *Eua*, *Genes.* 3. Conscientia vice Numinis. Deum nil latere. Conscientia nostri comes perpetuus, nostra omnia nouit. Conscientia testis; Iudex. An propria Conscientiæ iudicio standum, an aliorum existimationi. Conscientiæ examen quotidie constituendum. Auctores ad id, qua Sacri, qua Profani. An Iudex reprehendendus si innocens damnetur. Innocens male damnatus an infamis. Conscientia vltrix malefactorum. Exemplum ex *Genes.* 42.

## CONSCIENTIA.

OD à Plinio de hominis, si non calamitoso, saltem parum læto, nec satis boni ominis, in hanc vitam ingressu & ortu pronunciatum est, vere equidem illud dictum, lib. 7. Præfat. *Hominem tantum nudum, & in nuda humo natali die abiicit (natura) ad vagitus statim & ploratum, nullumque tot animalium aliud ad lachrymas & has protinus vitæ principio. Ab hoc lucis rudimento, quæ ne feras quidem inter nos genitas, vincula excipiunt & omnium membrorum nexus: At homo infelicitèr natus iacet, manibus pedibusque destitutis, flens, animal cæteris imperaturum, & à suppli-*



*eius vitam auspicatur, unam tantum ob culpam, quia natum est.*  
 Quid si Plinius Christianæ fidei mysteria nouisset, non  
 humanæ natiuitati culpam hanc adsignasset, sed originali  
 noxæ & primi parentis à Deo præpotente ingratissimæ  
 defectioni : Quin multo periculosiorem & grauiorem  
 hominis ab ipsa natiuitate, in postremū vsque vitæ diem  
 conditionem intellexisset, cum triplici iudicio sit obno-  
 xius, Diuini Numinis, legum humanarum, & Conscien-  
 tiæ propriæ. Sed duobus prætermisissis prioribus, tertium  
 nobis est discutiendum. De Conscientia, Iudice dome-  
 stico, dicturis nobis prius ab ipsius vocis explicatione &  
 descriptione initium ducendum videtur. Dorotheus Græ-  
 cus scriptor, ex cuius lectione nemo nonnisi melior redi-  
 re debet, Doctrina 3. scribit Deum, cum formaret homi-  
 nem, illi inspirasse nescio quid Diuinum, mentem vide-  
 licet, illustrem, seu lumine aliquo præditam ac feruidam,  
 hoc est, ad agendum alacrem, quæ hominem perspicue  
 edoceret, malum à bono discernere, quæ *Conscientia* voce-  
 tur, quæque lex naturalis dicenda sit. Apud Ioannem  
 Abbatem Raythu, suis in Ioannem Clymacum notis, lon-  
 ge clarior & accuratior extat Conscientiæ descriptio: nam  
 in illa Dorothei aliquid desideratur, est autem eiusmodi.  
 Conscientia est scintilla Diuini luminis, in homine con-  
 dito subseminata à principio, quasi quædam cogitatio  
 feruentior & illuminatiua, rationem lucis in se continens,  
 & ostendens ei bonum & malum. Quod à Deo homini  
 inditam vterque dixit, Tertulliano, *Anima à primordio*  
*Conscientia Dei dos vocatur*, lib. i. contr. Marcion. Scintil-  
 læ istius Diuini luminis ita meminit S. Augustinus lib. ii.  
 ciuit. c. 27. *Lucem illam incorpoream (Diuinitatis) contingere*  
*nequeunt (animantia) qua mens nostra quodammodo irradiatur,*

Ec ij

*ut de his omnibus rectè iudicare possimus.* S. Basilii in principium libri Prouerbiorum Salomonis istud exponit, quod homo apud se iudicium quoddam naturale habeat, per quod bona à malis, iusta ab iniustis facile discernat, cui necesse sit in agendorum electione & optione, rectas & iustas rerum differentias constituere. Iudicium naturale vir Sanctissimus appellauit, quando quidem menti seu rationi vis quædam & energia indita sit, quæ nos vel benefactorum, vel secus, admoneat, non tantum, verum etiam rectè facta vel improbè, certissime iudicet & damnet. Sed quoniam hæc non sunt vnius generis & temporis, nulla faciliiori via & ratione explicari possunt, quàm eà quæ à B. Thoma, Scholæ nostræ Principe, tradita est; & quidem Conscientia in primis aliquid faciendum vel non faciendum iudicat, monet, stimulat, quod futurum respicit, & hanc Conscientiam ligantem atque incitantem vocamus: De qua Clemens Alexandr. lib. i. Stromat. Aut in memoriam reuocat quicquid à nobis actum est, & de actione præterita testimonium profert. Tertio sub examen aduocat quod actum est, ac tum an rectè & iustè, an contra iustitiæ regulam admissum fuerit, diiudicat. Ex quibus Conscientiæ descriptionem huiusmodi constituere licet. Conscientia est actus rationis, quo applicamus nostram cognitionem seu scientiam, ad id quod agimus, istud præscribendo, monendo, suadendo; vel egimus, per recordationem, vel faciendum iudicauimus, approbando, vel minime faciendum, damnando. Hinc multiplicem Conscientiam licet colligere. Sed ne in immensum excreseat oratio, & quæ sunt Moralis Theologiæ singula quæque, huic quæstioni conuenientia, anxie nimium, nec sine tactu, inuestigemus; in Conscientia expendenda iu-



diciorum ordinem & rationem sequemur. Est autem huiusmodi, vt primum aliquis constituatur reus, cuius causa in iudicium deducta disceptari debeat. Reus. vel crimen admissum fatebitur, aut negabit. Si primum, aut seipsum auctorem culpæ agnoscet, aut in alterum velut impulsorem & consultorem culpam trāferet. Si negauerit, testes adhibendi, quibus auditis Iudex vel excusat & absoluit, vel damnat, hinc supplicium & pœna irrogatur. Est igitur nobis exequenda Conscientia, primum quidem mouens & incitans, deinde accusans & testis, tum Iudex absoluens vel damnans. Extra controuersiam illud est, rem obiectā iudicium, seu dictamen rationis mouere, adeo vt nobis suadeat ipsam assequendam. Huius rei nulla vel expressior, vel conuenientior imago statui potest, quàm quæ Genesis 3. describitur. Cū Eua vidisset *quod bonum esset lignum ad vescendum, & pulchrum oculis, aspectuque delectabile, & tulit de fructu illius & comedit, deditque viro suo*, illecta mulier Dæmonis oratione, necnon fructus pulchritudine ac suauissimo gustu, comedit, virumque qui pari voluptate frueretur, impulit. At vbi illicò aperti sunt oculi amborum, & se nudos esse cognouerunt, necnon sese à facie Domini Dei abscondere tentauerunt, tum accusantem & testem defectionis Conscientiam vltro senserunt. Ac quanquam in alium culpæ partem maiorem transferre conarentur, nihilominus & Dei æquissimi Iudicis, & propriæ Conscientiæ sententiam acerbissimam experti sunt. Sed testem Conscientiam vniuscuiusque nostrum, paulò fusius explicemus. Mamertinus, Panegyrico ad Iulianum A. vere illud dixisse vitus est. *Ad vicem Numinis nobis nostra Conscientia est.* Quis vero tam à ratione alienus est, qui non intelligat Deum nihil latere;

E c iij

S. Irenæus, i. aduersus hæreses, c. 6. *Deus totus est cogitatus, totus sensus, totus oculus, totus auditus, & totus fons omnium bonorum.* Clementi Alexandrino, lib. 7. Stromatum, & aliis idem visum. Sed reliquos lubens omitto, quos recensere facillimum est, si de Diuina Prouidentia instituta esset dissertatio, vnum aut alterum addam duntaxat. S. Augustinus, epist. iii. *Deus totus oculus est, totus manus est, totus pes est: Totus oculus est, quia omnia videt: Totus manus est, quia omnia operatur: Totus pes est, quia ubique est.* Sibylla, apud Theophilum ad Antolycum, Deum vocat, *πᾶσι παντὶ μάρτυρα πάντα*, Omnia videntem, & testem omnium. Tertullianus, lib. de Pœnitent. *Quanta scumque tenebras factis tuis superstruxeris, Deus lumen est.* Sic Iuuenalis Satyra 8.

*Carpento rapitur pinguis Damasippus & ipse,  
Ipse rotam stringit multo sufflamine Consul.  
Nocte quidem, sed Luna videt, sed sydera testes  
Intendunt oculos.*

Tantum non Christianè Quintilianus, Declamatione 314. *Licet nulli hominum prospexerint oculi, licet nulla cuiusquam mortalium Conscientia interuenerit, sub cælo tamen fecistis, & ille fusus per omnes rerum naturæ partes spiritus adfuit, erat illic potentior testis.* Non alia nostræ Conscientiæ conditio, quam nemo nostrum fallere potest, quæque non tantum actiones nostras peruideat & contempletur, imo iis sese vltro immiscet. Seneca solens & more suo grauissimè ita censet, lib. de Tranquillitate, c. 2. *Sequitur se ipse, & urget grauissimus comes.* Ea certè Conscientia est, quæ nos dies noctesque, & vbiuis locorum comitetur; Illam idcirco pædagogo comparat Epictetus, apud Stobæum, Sermon. 106. Parentes pædagogo, inquit, nos pueros tra-



dunt, qui vbiq̃ue obseruent ne quid lædamur. Ita Deus insitæ Conscientiæ nos tradit, quæquidem custodia & conseruatio nequaquam contemnenda est, quoniam & Deo displiceret, & Conscientiæ nostræ ipsi hostes essemus. *Sceleratis naturale est alienam Conscientiam fugere*, aiebat Quintilianus, Declamat. 381. *At tuam quæ effugies? Tegunt nos parietes, non abscondunt. Vix quemquam inuenies, qui possit (aut velit) aperto ostio viuere. Ianitores Conscientia nostra, non superbia opposuit. Sic viuimus, vt deprehendi sit subito aspici. Quid autem prodest recondere se, & oculos hominum auresque vitare? Bona Conscientia turbam aduocat; mala etiam in solitudine anxia & sollicita est. Si honesta sunt quæ facis, omnes sciant; si turpia, quid refert neminem scire cum tu scias? Te miserum, si contemnis hunc testem. Aptissimè hæc Stoicus Romanus, epist. 43. B. Hieronym. epist. 47. Bona Conscientia nullius oculos fugit. Præclare B. Ambrosius, Sermon. 46. & quidem Tertulliani imitatio est lib. 2. contra Marcionem: *Velut latenti & celanti, à Diuinitate Adæ dicitur: Adam ubi es? Non quod Adam conspectum Domini latere potuerit, sed quod peccatrici Conscientiæ nullus locus tutus vel certus sit, dum metuit deprehendi. Senecæ ita visum, epist. 27. Scelera etiam si non sint deprehensa cum fierent, sollicitudo non cum ipsis abit. Et ea ipsa Conscientia est testis flagitij. Senecæ eidem, 1. de Ira, c. 14. Nemo inuenitur qui se possit absolvere, & innocentem quisque se dicit, respiciens testem non Conscientiam. Seneca ipse apud Lactantium, lib. 5. c. 24. Quid machinaris? Quid abscondis? Custos te tuus sequitur, alium tibi peregrinatio subduxit, alium mors, alium valetudo: hæret hic, quo carere nunquam potes. Quid locum abditum legis, & arbitros remoues? Putas tibi contigisse vt oculos omnium effugias demens? Quid tibi prodest non habere conscium**

*habenti Conscientiam?* Minutius Felix, in Octauio: *Vos confcios timetis, nos etiam Conscientiam solam, sine qua esse non possumus.* S. August. epist. 15. *Cum malum perpetratur, hostis est intimus, etiamsi nullius intimi loquacitate, aut lite vulgetur.* Non probo istud Calpurnij, Declamat. 47. *Etsi interim euasit alicuius criminis conscius quispiam, inueniet illum postremo vel fama.* Imò à propria iam deprehensus Conscientia, quamquam alioquin, humano quodam vicio, *Multi famam, pauci Conscientiam vereantur,* vt scribit Plinius Iunior, epist. 20. lib. 3. Verùm vt est apud B. Ambrosium, epist. 44. *Abundat sibi locuples testis Conscientia.* Eorum quæ à nobis aguntur, testem Conscientiam vidimus, nunc domesticum Iudicem dispiciamus. S. Chrysostomus, concione 4. de Lazaro, ait, Deum nobis in animo Iudicem perpetuò vigilantem & attentum constituisse, longè humanis Iudicibus dissimilem. Hi siquidem pecuniis corrumpuntur, assentationibus delinuntur, metu permouentur, multaque alia occurrunt, quæ rectum illorum iudicium deprauant. At Conscientiæ tribunal nulli hominum cedit, sed de nostris & actionibus, quin etiam cogitationibus iustam illa fert sententiam, adeo vt qui peccatum admisit, seipsum condemnet, etiamsi nullus alius accuset. Iuuenalis, Satyra 13.

*Exemplo quodcunque malo committitur, ipsi  
Displicet auctori, prima hæc est ultio, quod se  
Iudice, nemo nocens absolvitur, improba quamuis  
Gratia fallacis Prætoris vicerit urnam.*

Ita B. Ambrosius, epist. 44. *Sibi ipsum unusquisque animum suum seuerum Iudicem, sui ultorem sceleris, & vindicem criminis habet.* Sed nobilis ista quæstio moueri solet: *An vnus duntaxat Conscientiæ iudicio standum sit, an præterea*



præterea famæ & aliorum existimationis aliqua ratio habenda sit. Sunt qui vni & soli Conscientiæ totum tribuendum esse putant. Seneca, i. de Clement. c. 15. *Quilibet nostrum aduersus opiniones malignas, satis fiducia debet habere in bona Conscientia.* Sanctus Augustinus, epist. 15. *Cum falsum quid à maledico fingitur, aut omnino non creditur, aut certe integra salute, sola fama vexatur.* Ac si famæ vel nullam, vel exiguam sollicitudinem haberi velit vir planè Diuinus. Vnde eiusdem istud est, lib. contra Secundinum Manichæum, c. 1. *Senti de Augustino quidquid libet, sola me in oculis Dei Conscientia non accuset.* Eodem pacto ille ipse in Psalmum 37. *Custodi intus innocentiam tuam, ubi nemo opprimit causam tuam. Præualebit in te falsum testimonium, sed apud homines.* Taciti consilium ea in re, lib. 2. *Relinquendum rumoribus tempus quo serecant, plerumque innocentes recenti inuidiæ impares.* Apud B. Hieronymum, epist. 30. *Celata virtus & Conscientiæ fota secreto, Deum solum Iudicem respicit.* Ita S. Zeno, Sermon. de Susanna. *Sufficit pudiciæ Conscientia, testis est Deus.* Ista non placet exceptio B. Hieronymo, epist. 22. apud quem, *Illa, quæ, sub virginali nomine lucrosius pereunt, solent dicere, Omnia munda mundis. Sufficit mihi Conscientia mea.* Quàm grauitè Ageruchiam dehortatur ab ea sententia, epistol. ii. *Nec paratum habcas illud è triuio: Sufficit mihi Conscientia mea, non curo quid de me loquantur homines.* Et certè Apostolus providebat bona, non tantum coram Deo, sed etiam coram hominibus, ne per illum, nomen Dei blasphemaretur in gentibus, 2. Corinth. 8. Ita SS. Patribus visum est, non vni duntaxat Conscientiæ propriæ consulendum, verumetiam famæ & existimationi. Tertull. lib. de Cultu fœminarum. *Pudiciæ Christianæ satis non est esse, verum & videri.* S. Augustinus, lib. de bono

viduitatis, c. 22. *Non sunt audiendi, siue viri sancti, siue foeminae, quando repressa in aliquo negligentia sua, per quam sit ut in malam veniant suspensionem, unde suam vitam longe abesse sciunt, dicunt sibi coram Deo sufficere Conscientiam, existimationem hominum, non solum impudenter, verumetiam crudeliter contemnentes, cum occidant animas aliorum. Concludit tandem. Nobis necessaria est vita nostra, aliis fama nostra. Eodem sensu ille idem, c. 9. Tractatu de Oibus. Conscientia tua coram Deo est, conuersatio tua coram fratre tuo. Sic epist. 225. Nostra purganda vobis est fama, si est Domino purgata Conscientia. Abunde pertinaci cuilibet, qui aliter senserit, ista eiusdem Beatissimi Episcopi sufficient. Post allatum Apostoli locum 2. Corinth. 8. de quo supra: subiungit Serm. 49. de diuersis. Propter nos Conscientia nostra sufficit nobis, propter vos fama non pollui, sed pollere debet in vobis. Tenete quod dixi, atque distinguite; Duae res sunt, Conscientia & fama. Conscientia tibi, fama proximo tuo. Qui fidens Conscientiae suae negligit famam suam, crudelis est. Ita S. Ambrosius, epist. 44. Fugiat Conscientia etiam mala opprobria; etiamsi se credat non posse conuinci. Lactantius lib. 5. c. 12. Istud Carneadis damnat, qui affirmabat malle sapientem malum esse cum bona existimatione, quam bonum cum mala. Seneca optimè, epist. 70. Vitam aliis approbare quisque debet: Nam nemo non benignus est sui iudex, aiebat ille idem lib. 2. de Benef. c. 26. Quanquam nostra haec Conscientia saepius iudicio Diuino aliter sit obnoxia atq; humano. Sic apud Senecam Patrem, lib. 1. Controu. 2. Aliter Deorum Numini subiecta vniuscuiusque Conscientia est, aliter nostrae aestimationi. Illud certè in primis cogitandum esse nemo nescit, vniuscuiusque nostrum Conscientiam ad Dei nutum & voluntatem componendam esse.*



De quare Senecæ locus elegans extat apud Lactantium lib. 6. c. 24. Senecæ mirabilis sententia; *Magnum nescio quid, maiusque quam cogitari potest, Numen est, cui viuendo operam damus. Huic nos approbemus. Nam nihil prodest inclusa Conscientia, patemur Deo. Cælestis prorsus oratio, nisi antecederet ignorantia confessio, nihil prodest inclusam habere Conscientiam, patemur Deo. Nullus ergo mendacio, nullus dissimulationi locus est, quia parietibus oculi hominum submouentur, Dei autem Diuinitas nec visceribus submoueri potest, quominus totum hominem prospiciat & norit. Et quanquam rectè & ad Dei iussu nostram constituerimus Conscientiam, pusillorum tamen scandalum vitandum est, nec quidquam à nobis vel agatur, vel instituatur, quod non sit ad adificationem proximi. Diuinè, vt solet, B. Bernardus, lib. 3. de Considerat. c. 4. Intereſt malas res, & malas species deuitare: In altero Conscientia, in altero fama consulendum. Quanquam optimus quisque, & qui sua omnia ad omnem honestatem & virtutem, addo & vtilitatem publicam, instituit & refert, non tam hominum existimationi laborasse, quàm officio suo, & publicæ saluti, ac Reipublicæ non defuisse videri malit. Vnde Plinius Iunior, epist. 8. lib. 1. Maiore animo honestatis fructus in Conscientia, quàm in fama reponatur. Senecæ præceptum est, lib. 3. de Ira, c. 41. Conscientiæ satisfiat, nil in famam laboremus. Et lib. 4. de Benef. c. 21. Conscientia (propositi boni alicuius agendi) etiam obruta delectat, quæ concioni ac famæ reſclamat, & in se omnia reponit, & cum ingentem ex altera parte turbam contra ſentientium aspexit, non numerat suffragia, sed vna ſententia vincit. Verum equidem illud Senecæ in Hyppolito, Fama vix vero fauet, Peius merenti melior & peior bono. Haſtenus Conscientiam nostram Iudicis officio fungi demōstrauimus, nunc*

Ff ij

quo pacto vel nos absoluat, vel damnet videamus. S. Chrysostomus, in Psalmum 50. Conscientiam nostram Codici, in quo rationes quotidianas describamus, persimilem esse dixit; at singulis diebus, si sapimus, hunc domesticum Codicem examinare debemus, ut accepti & expensi ratio certa constet: Idem quotidie in Conscientia nostra excutienda faciendum. Vnde os istud verè aureum vnumquemque admonet, cum in lectum se coniicit antequam somnus irrepat, Codicem hunc Conscientiæ consulat, & peccata in eo descripta examinet, & quid vel opere, vel sermone, vel cogitatione admisit diligenter expendat, opportunum tempus istud nobis oblatum cogitemus. Nam interdiu ob ingruentia vndique negotia, seu domestica, seu externa, non licet. Antea illud idē scripserat, S. Basilius, Sermonē priore de Institutione Monachi, & S. Ephrem, Sermonē ascetico, seu de vita Religiosa, singulis diebus, mane & vespere, cum nostra Conscientia ineundam esse rationem contendit. Istud iam olim à Gentilibus, & profanis hominibus factitatum esse legimus. Pythagoræorum dogma fuit, ut refert Iamblicus, de vita Pythagoræ, c. 35. necnon B. Hieronymus, Apolog. 3. aduersus Ruffinū. *Duorum, inquit, temporum quammaximè habendam curam, manè & vespere*, id est, eorum quæ acturi sumus, & eorum quæ gesserimus. Ac forsancius rei exemplum peti potest ex c. 24. Genes. vbi habetur Isaac inclinatus iam die egressum in agro ad meditandum: Alij ex Hebræo vertunt ad orandum. Ausonius Edyllio 8. virum bonum ita describit, ex Pythagoreorum doctrina, vulgaribus carminibus expressa.

*Non prius in dulcem declinat lumina somnum,  
Omnia quàm longi reputauerit acta diei.*



*Sic dicta & facta per omnia*

*Ingrediens, ortoque à vespere cuncta reuoluens*

*Offensus prauis, dat palmam & præmia rectis.*

Ab his non longè abeunt, quæ Chiloni, Sapientum vni tribuit Aufonius:

*Noctu diuque quæ geras, quæ gesseris*

*Adusque puncti tenuis instar, querere.*

Aurea planè sunt ista Senecæ, lib. 3. de Ira, c. 36. *Animus* quotidie ad rationem reddendam vocandus est. Faciebat hoc Sextius, ut, cōsummato die, cū se ad nocturnam quietem recepisset, interrogaret animum suum: Quod hodie malum tuum sanasti? cui vitio obstitisti? qua parte melior es? Desinet ira, & erit moderatior, quæ sciet sibi quotidie ad Iudicem esse veniendum. Quid ergo pulchrius hac consuetudine excutiendi totum diem? Qualis ille somnus post recognitionem sui sequitur, quàm tranquillus, altus ac liber, cū aut laudatus est animus, aut admonitus, & speculator sui, censorque secretus cognoscit de moribus suis. Vtor hac potestate, & quotidie apud me causam dico. Cū sublatum ē conspectu lumen est, & conticuit uxor, moris iam mei conscia, totum diem mecum scrutor, facta ac dicta mea remetior. Sed quis huius nostræ Conscientiæ discussionis fructus ad nos perueniat, indicant SS. Ephrem & Chrysostomus, cū ex illa quotidiana & vespertina peccatorum repetitione & recordatione, lachrymarum non tenuis exoritur copia, quæ nobis ad absolutionem viam parat, tanto faciliorem, cū Confessioni adiuncta fuerit. Siquidem Tertulliano auctore, libro de Pœnitentia: *Tantum releuat Confessio delictum, quantum dissimulatio exag-  
gerat. Confessio enim satisfactionis consilium est, dissimulatio contumaciæ.* Sed quoniam de Conscientiæ nostræ iudicio differere cœpimus, non abs re videbitur illam excutere

F f iij

quæstionem, an Iudex ex Conscientia iudicare debeat, an ex rationum & probationum momentis. Non leue est, inter nonnullos Iuris Ciuilis, & Pontificij Scriptores, de ea re dissidium, de quo copiosissimè Didacus Couarruias, Episcopus Segobiensis, vir summus, variat. lib. 1. c. 1. Addo Iulium Clarum, Sententiar. lib. 5. quæst. 8. qui contendit Iudicem non posse damnare eum, quem propriis oculis flagitium aliquod perpetrantem conspexerit, nisi aliter probetur. Veteris Scholiastæ, apud Harmenopulum, lib. 1. tit. 4. Scio istud, *Leges, non facta, Iudicem cognoscere debere.* Ac quamquam Iurisconsultorum nostri æui facile princeps obseruat lib. 12. c. 19. in eam propendat sententiam, vt ex actis & probatis iudicandum esse videatur: contrariam tamen acutissimè, & certè vehementissimè tuctur Ioannes Corasius, Iurisconsultus magni nominis, lib. 4. Miscellaneorum, c. 20. Siquidem affirmat, nullo casu ex actis contra Conscientiam, hoc est, certissimam scientiam eius rei quæ in animo nostro versatur, iudicandum esse. Rationes quas affert, tanti ponderis & momenti esse puto, vt facile dissolui nequeant. Addo Cod. lib. 2. tit. 11. l. vnica, istud firmari, quandoquidem ita statuit: *Non dubitandum esse, Iudicem, si quid à litigatoribus, vel ab his qui negotiis adstant, minus fuerit dictum, id supplere, & proferre quod sciat, legibus & iuri publico conuenire.* Et certè à Liuiο, lib. 32. verè pronuntiatum est, *A veritate Ius nimis sæpe laborare, extingui nunquam.* Rei, aut inter reos delati, reapse infontis, innocentia firmis probationibus si caruisse visa fuerit, quidni ergo Iudex, cui res optimè cognita fuerit ex Conscientia, innocenti subsidium ferat? Etenim, *non ius, sed probatio deficit,* ait Paulus I. C. Censuit humanissimè Trajanus, D.



lib. 48. tit. 19. l. 5. *Satius esse impunitum relinqui facinus nocentis, quàm innocentem damnari.* Quin iis adtexere licet, quod scripsit B. Chrysostomus, homil. 2. Oper. Imperf. in Mathæum, Iustius esse iniustum iustè euadere, quàm iustum iniustè perire, quia etsi reus semel euaserit, iterum potest perire; innocens autem si semel perierit, iam non potest reuocari. *Iudicem in probationibus & nonnunquam in damnatione Innocentis caligare, falli, labi, hominis miseriam appellat S. Augustinus, lib. 19. de Ciuit. Dei, c. 6. & quamquam totum caput ad hanc quæstionem faciat, ex eo quod præcipuum videtur, subiiciam. Quid quod aliquando & ipsi qui arguunt (accusatores) humane societati, fortasse ne crimina impunita sint, prodesse cupientes & mentientibus testibus, reoq; ipso contra tormenta durante immaniter, nec fatente, probare quod obiciunt non valentes, quamuis vera obiecerint, à Iudice nesciente damnantur. Hec tot & tanta mala non deputat esse peccata. Non enim hec facit sapiens Iudex nocendi voluntate, sed necessitate nesciendi, & tamen, quia cogit humana societas necessitate etiam indicandi. Hec est ergo, quam dicimus, miseria certè hominis, etsi non malitia sapientis. Quanto consideratius & homine dignius agnoscit in ista necessitate miseriam, eamque in se odit, & si pie sapit, clamat ad Deum: De necessitatibus meis erue me.* Absoluo tandem propositam quæstionem de Iudice, non ex actis, sed ex Conscientia pronuntiante, nouo quodam Iacobi Menochij, alioquin Iurisconsulti Clarissimi, commento, lib. 1. de arbitrar. Iudicum causis, qu. 8. dum scribit Iudicem non propriam in iudicando, sed communem & publicam sequi posse Conscientiam. Distinctionem istam Conscientiæ in propriam, seu priuam, & communem, seu publicam examinandam relinquendo Lytis Iustinianeis. Neque vero istud omittere pos-

sum, non semper in Iudices conferendam culpam, si innocens ab iis damnetur, siquidem, ut habet Quintilianus, Declamat. 266. *Aliquando testis corrumpitur, aliquando parum diligenter causa defenditur, aliquando reo nocet ipsa fiducia.* Apud Tacitum, & alios historiae scriptores, non desunt harum rerum exempla. Sed illud observatione dignum maximè, Innocentem malè interemptum veterum iudicio, infamem idcirco non videri. Ita censet Arnob. lib. 1. *Nemo unquam innocens malè interemptus, infamis est. Nec turpitudinis alicuius commaculatur nota, qui non suo merito poenas graues, sed cruciatoris perpetitur sauitatem.* Sic Plautus Captiuis, Act. 3. *Qui per virtutem perbitat (perit) non interit.* Epictetus, apud Arrianum, lib. 3. c. 18. *Iudicis sententiâ pro impio damnatus es? An id de Socrate iudicatum non fuit? Nunquid ad te pertinet quid Iudex de te pronuntiet? Nam damnari, vel non damnari, ut alterius est opus, ita quoque malum est alterius. Te damnabit iniuste? Igitur miser censendus, qui fert sententiam.* Plato, epist. 7. ad Dionis propinquos, Dionem licet interfectum, honestè periisse affirmat, quandoquidem viro, qui praestantissima quæque sibi patriæque affectat & molitur, nil unquam nisi rectum pulchrumque potest accidere. Nihilominus tamen, *Sera post damnationem Innocentiae defensio est,* ait Quintilianus, Declamat. 372. Philetas, apud Curtium, lib. 6. *Vincti hominis (addo & de quo pronuntiatum sit) non superuacanea tantum, sed etiam inuisa defensio est, quæ Iudicem non docere videatur, sed arguere.* Seneca, Medea: *Vox constituto sera decreto venit.* Postremam, quæ superest de Conscientia damnante & vltice disputationis partem, breuiter attingemus; res enim notissima est, & quæ in Rhetorum scholis non sine tædio amplissimam declamandi



mandi materiam suppeditare consuevit. Seneca, epist. 97. *Prima & maxima peccantium est pœna peccasse, nec ullum scelus, licet illud fortuna exornet muneribus suis, licet tueatur ac vindicet impunitum est, quoniam sceleris in scelere supplicium est. Sed nihilominus & hæc & illa, secunda pœnæ premunt ac sequuntur, timere semper & expauescere, & securitati diffidere. Illud antea docuerat, ut & epist. 105. Tuta scelera esse possunt, secuta non possunt. Quandoquidem pro fortunæ amplitudine & dignitatis splendore, alicui improbo & facinoroso vis facile inferri non potest, ita ut ab inferiorum conatibus tutus sit, apud se vero securus nullo modo existat. Vnde subiungit. Consentiamus mala facinora Conscientiâ flagellari, & plurimum illi tormentorum esse, eo quod perpetua illam sollicitudo urget ac verberat, quod sponsoribus securitatis suæ non potest credere. Multos fortuna liberat, metu neminem. Epist. 105. Confusam vitam & perturbatam impotentes agunt; tantum metuunt quantum nocent, nec ullo tempore vacant. Trepidant enim cum fecerunt: Hærent. Conscientia aliud agere non patitur, ac subinde respicere ad se cogit. Dat pœnas quisquis expectat; quisquis autem metuit, expectat. Tertullianus libro quarto contra Marcion. Nullum maleficium sine formidine est, quia nec sine Conscientia sui. Sic Apuleius, Apolog. Quod si à ceteris silentium est, ipsi sibi met conscij sunt, posse se merito increpari. Elegans ad eam rem B. Zenonis Veronensis locus, Serm. 2. ad Neophyt. Peccator pœdorem suum secum carceris portat, qui carnificem sentit antequam videat, qui nomen Iudicis pertimescit, qui sicundè susurrus ingruerit, se queri, se existimat inueniri, cui securitati profectus est nullus, etiamsi contingat ei accusatore carere, teste conscio, cum seipso carere non possit, quia violentior omni tortore Conscientia, nunquam*

Gg

*suum deserit peccatorem.* S. Augustinus epist. 259. loquens de iniquo Iudice, qui duos fratres supplicio affici iusserat, ubi alterius fratrum, quem à probitate morum, religionis sinceritate, cæterisque virtutibus mirificè commendat Sanctissimus Episcopus carcerem, cum honore seu dignitate Iudicis minime comparandum esse contendit, ista subiicit: *Cum ille fureret sublimatus, iste gauderet inclusus, horrendis & pœnalibus tenebris omnes non tantum carceres, sed etiam inferos vincit scelerati hominis Conscientia.* Ultricis Conscientiæ exemplum singulare adducit S. Chrysostomus, epist. 7. & magistrum secutus Isidorus Pelusiota, lib. 3. Epist. 115. Simeonis Patriarchæ, Iacob filij, Isiubente Ioseph, in Ægypto, coniectus est in carcerem, & dum illi parantur vincula, ad fratres, qui aderant, conuersus, ait, Genes. 42. *Meritò hæc patimur, quia peccaui in fratrem nostrum, videntes angustias anime illius, dum deprecaretur nos, & non audiimus, idcirco venit super nos ista tribulatio.* Simeon, post Ruben primogenitum, cæterorum natu maximus fuit, qui si se Ruben, ipsum Ioseph ab aliorum iniuria liberare cupienti, adiunxisset, facilè reliquos in suam pertraxisset sententiam, & eo facilius, cum in fratrum serie quartus Iudas, idem sentiret cum Ruben. Tradit autem S. Chrysostomus Simeonem istum auctorem & assertorem fuisse apud Patrem Iacob Patriarcham, fabulæ, de Ioseph à fera pessima deuorato. Meritò itaque in vincula coniiciendus, meditati & peracti in fratrem Ioseph sceleris, grauissimas in animo & ultrice Conscientia pœnas sensit. Rectè Pacatus Drepanius, Panegyrico: *Habet nescio quos internos mens scelerata carnifices, aut ipsa sibi carnifex Conscientia.* Luculentissimus huius rei testis Tyberius Imperator, sua ad




Senatum Epistola, apud Suetonium in Tyberio, c. 67. *Quid scribam vobis, Patres Conscripti, aut quomodo scribam, aut quid omnino non scribam. Hoc tempore? Dij me Deaque peius perdant, quàm quotidie perire sentio, si scio. Præclara quæ sequuntur apud Tacitum Annal. 6. Adeo facinora atque flagitia sua ipsi quoque in supplicium verterant, Tyberium non fortuna, non solitudines protegebant, quin tormenta peccatoris, suasque ipse pœnas fateretur. Istud alio loco delibauimus. De Nerone & Domitiano, qui Neronis portio vocatur Tertulliano, Apologet. c. 5. Apud Suetonium nimis multa, & Tacitum Annal. 15. Istud de Gallo Cæsare, Iuliani Apostatae fratre, à Marcellino, lib. 14. grauiter expressum. Galli Cæsaris perinducias naturæ conquiescentis sauciabantur sensus, circumstridentium terrore larvarum, interfectorumq; cateruæ, Domitiano & Montio præuiis, correptum eum, ut existimabat in somnis, uncis furialibus obiectabant. Nec illud silentio prætermittendum quod narrat Eunapius, in vita Maximi Philosophi, Festum, qui Maximum ipsum supplicio affecisset, asseuerare, sibi visum Philosophum hunc, qui numella collo iniecta, ipsum ad Orcum pertraheret, sistendum Plutonis iudicio. Non sunt ista Quintiliani, Declamat. 314. spernenda, Sunt illa vera quæ extremo miseri spiritu dicebantur: Dabis mihi scelerate pœnas, persequar quandoque & occurram. Nec illa mihi vana quorundam videtur esse persuasio, qui credunt non extrinsecus has Furias venire, nec vllius Deorum impulsu, hanc mortalibus incidisse dementiam, sed nasci intus, Conscientiam esse, quæ torqueat, animum esse, qui urat. Seneca Hyppolito.*

*Quid pœna præsens, conscius mentis pauor,  
Animusque culpâ plenus & semet timens?  
Scelus aliqua tutum, nulla securum tulit.*

G g ij

Mellitissimi B. Bernardi ardentissima ad Deum precatione absoluo, lib. de Interiori domo, c. 31. *Eripe me ab homine malo, id est à meipso, à quo recedere non possum. Nam quocumque me verto, vitia mea me sequuntur; ubicumque vado, Conscientia mea non me deserit, sed præsens adsistit, & quidquid facio scribit. Idcirco quanquam humana subterfugiam iudicia, iudicium propriæ Conscientiæ fugere non valeo. Et si hominibus celo quod egi, mihi tamen, qui novi malum quod gessi, celare nequeo. Proprij reatus Conscientia me non requiescere sinit, sed de die in diem vehementer me torquet, & de die iudicij vehementius terret. Nam in die illa cum Dominus ad Iudicium venerit, uniuscuiusque Conscientia ad testimonium adducetur, & aperto libro Conscientiæ, omnis culpa ante oculos reducetur, atque ita cogente Conscientia, unusquisque erit accusator & Iudex suus.*



## REGIA MAIESTAS Sacro-Sancta.

### §. I.

**R**ELIGIO metu constat, ita Maiestas & honor Regi, & honor simul & timor exhibendus.

### §. 2.

*In eos qui maledictis & libellis famosis Reges ac Principes insectantur: Principes licet hæc non attingant: an Poëtis, quibus mentiri peculiare, istud liceat. Nonnullis infeliciter istud cessit.*



## §. 3.

*Historicis quibus pro scopo veritas, an istud permissum, & quomodo.*

## §. 4.

*Fanaticorum hominum in Principes etiam defunctos scribendi audacia & proteruita, quid de scriptis eiusmodi statuendum. In parricidas Regum stylus stringendus.*

## §. 5.

*An Princeps liberas populi voces prohibere debeat. Verborum aut scriptorum petulantiam olim leges coercuerunt. Quid de lege Theodos. Arcad. Honor. Impp. Cur adeo benigna Magistratus pro legum veterum seueritate agat, nec Princeps id curet.*

## §. 6.

*Quid si Princeps sua potestate abutatur, scripto læsus, an Reipublicæ, an priuatam ulcisci debeat iniuriam. Magnificè contemnet. Attamen libero monitore eoque familiari, si sapiat, carere non potest.*

## §. 7.

*Principem lædi non posse sine Diuini Numinis læsa religione.*

## §. 8.

*Formula Sacramenti militaris præstiti Imperatoribus à militibus Christianis. Rex Francorum, Rex Sacerdotalis, vel Pontificalis.*

## §. 9.

*Principes parentes publici, in quos non aliter affectus populus quam liberi erga parentes. Parentes etiam paulò morosiores ferendi.*

## §. 10.

*Principes tutores publici, subditi pupilli, quibus in tutores*  
Gg iij

nefas moliri quidquam. Quid unctio Sacra, & cuius energia in Regibus. Principis salus omnium salus, & contrà.

## §. 11.

Quid Principi agendum, si quis suorum res novas moliat. Principibus innata quodammodo Clementia. Principem suspicacem esse decet, nec motiuncula illum rerum caput omittere cogat.

## §. 12.

Princeps non tantum sibi sed etiam fidissimis Consiliariis prospicere debet. Non perfecta modo verum & cogitata scelera, maxime in Principem, vindicanda.

## §. 13.

Publica administratio non est absque Invidia. Princeps cuncta exploret, sed omnium potissimum tacitus & silens. In ingratos seuerus. Est misericordia puniens, est crudelitas parcens.

## §. 14.

Principi quo pacto Ecclesie benignitas proposita. Qualis hæc describitur. Et quousque illam Princeps æmulari debeat. Princeps cui Superiori subiicitur.

## §. 15.

Apostolorum quodnam in fideles imperium. Ecclesia Dei placatrix est, non exacerbatrix. Quid de turbone potentissimo agendum, an iudiciorum mos & forma seruanda. Princeps sibi simul ac toti Imperio confestim caueat.

## §. 16.

Principis tutela certissima eaque multiplex à Cælo, ab innocentia, à pietate.





## REGIA MAIESTAS

### Sacro-Sancta.

§. I.

**I**N CREDIBLEM huius seculi stuporem non possum non vehementer mirari, neque placent, quanquam ingenio & doctrinâ præstantes viri, qui illud ad summam perductum solertiam pronuntiarunt. Ac quamuis de ipsis disciplinis & artibus aliquis esset dubitandi locus, cum eas sic excultas, sic illustratas hoc tempore videamus, ut meras, à maioribus pro luce oblatas nobis esse, magnâ parte, tenebras, non immeritò asseuerare audeamus. Sed si Religionis & sinceri cultus Dei ratio habeatur, nescio quo veterno hominum, qui nunc sunt, mentes non leuiter & occupatas & oppressas faciliè deprehendemus. Ecclesiæ veri ac germani filij veram se religionem spirare existimant; abdicati filij, nil nisi passim religionem iactant: hos tandem aliquando sanates nominari magnopere exopto & percupio. Fortes verò illos Catholicos Christianos adeò parum de religione cogitare quis credat? aut quomodo illud ipsum agnoscatur, præsertim videndum est. Religio metu constat. Ita Septimius Florens: *Dominum simul cognoueris, timoribus; simul inspexeris, reuereris.* Tertull. de Pænit.

*Lactant.* ornatiùs istud explicat: *Quomodo*, inquit, *religio ipsa sine*  
*de ira Dei,* metu teneri aut custodiri potest? *Quod enim non metuitur, cor-*  
*c. 8.* temnitur; quod contemnitur, utique non colitur: ita fit ut re-  
*Lactant.* ligio, & maiestas, & honor metu constet. Et alio quidem lo-  
*Epitom.* co, sapientiam & religionem ita coniuncta esse affirmat,  
*c. 2.* ut sapientia spectet ad filios, quæ exigit amorem; religio  
*1 Petr. 2.* verò ad seruos, quæ exigit timorem. Inde loci istius Apo-  
 stolici, *Deum timete*, interpretatio petenda est, ut nemo,  
 quâ par est pietate, Deum præpotentem colere existime-  
 tur, nisi qui eundem pertimescat. Quemadmodum *Pro-*  
*Tertull. de* merendi artificium, obsequium est, ut Tertulliano placet:  
*Patient.* ita religiosi metus hoc certissimum argumentum. Quàm  
 diuinè, quàm sapienter, non Iudæis modò, sed vniuersis  
*Math. 22.* mortalibus istud edixit Seruator Christus: *Reddite quæ*  
*sunt Cæsaris Cæsari, & quæ sunt Dei Deo.* Et quanquam  
 gentes plurimæ Cæsari, hoc est, Romano Imperatori, mi-  
 nimè tunc temporis subessent, suos nihilominus Cæsares,  
 id est, Reges & Principes habebant. Etiam multi hoc  
 tempore, Patris æternam Sapientiam Christum Domi-  
 num audiendum magis quàm auscultandum censent.  
*Rom. 13.* Nec pluris faciunt quæ à B. Paulo tam disertè, tam accu-  
 ratè differuntur: *Nullam esse potestatem nisi à Deo; & qui*  
*resistat potestati, Dei ordinationi resistat; tum quisquis resistat,*  
*ipse sibi damnationem acquirat:* Principem Dei ministrum  
 esse, vindicem in iram ei qui malum agit; ipsi itaque sub-  
 ditos necessariò esse debere Christianos omnes, non so-  
 lum propter iram, sed etiam propter conscientiam, non  
 tantum quia vi quadam externâ & legitimâ, cùm Dei vi-  
 ces agant, animaduertendi in facinorosos potestate co-  
 gantur, verumetiam interno conscientiæ foro, & ipsa di-  
 ctante conscientia obligentur. Apostolorum Princeps  
 vno



vno & altero verbo rem totam complexus est: *Deum timere, Regem honorificare*. Siquidem diuini metus nomine, omne illud quod ad religionem, & in Deum pietatem spectat, ex iis quæ à nobis superius proposita sunt, facile intelligitur: Quod autem de Rege honorificando subiungitur, à priori illa, de Deo timendo, sententia, nullâ omnino ratione seiungi potest. Sic enim apud B. Paulum ista copulantur, vt qui potestati timorem, eidem & honorem tribuendum præcipiat. Ac certè Tertulliano, quasi in hunc locum digitum intendenti, ita visum his verbis: *Timor hominis, Dei honor est*. Nec aliter de Regibus ac Principibus sentiendum: quin quod de Deo Opt. Max. scripsit Christianus ille Cicero, ad Principes ipsos meriti-  
*ssimè transferri posse, nemo nisi planè secors negauerit, Deo ab homine duplicem honorem, id est, amorem cum timore, deberi*. Vt igitur Deum timere, hoc est, summâ nos veneratione & honore prosequi profiteamur; ita vicissim Regem honorificare, id est, pro ea quam è cælo accepit potestate, & veluti diuina legatione, illum, iuxta regulam Apostolicam, reformidare debemus.

1. Petr. 2.

Tertull. de  
Pœnit.Lactant.  
Epit. 2.

## §. 2.

Ecquis igitur religionis sensus in iis deprehendi potest, qui omni contumeliarum & conuictorum genere Reges insectantur? An Deum timere existimandi sunt, qui Regi præcellenti, qui Potestatibus sublimioribus, qui Dei ordinationi obluantur? sic enim ista duo inter se connexa sunt apud Apostolos istos primarios, vt qui ab horum altero diuortium fecerit, alteri repudium dixisse necessum sit. Quamobrem ex his quæ à nobis hætenus dicta sunt, apertissimè constat, dum Reges & seculi Potestates incredibili contemptu proscinduntur, reli-

Hh

gionem ipsam Christianam grauitè labefactari, ac penè conuelli. Istud paulò latius explanare par est, ac videntum Reges & Principes non vno modo oppugnari ab iis, quos vel cæca ambitio, vel immanis furor penitus dementauit, aut enim stylum stringunt in eos, aut parricidale scelus meditantur. De stylo prius videndum: sic enim cogitant fanatici homines, vbi eorum maledica scripta in manus hominum, quos plus æquo vaniores dixeris, quàm stolidiores, peruenerint, fore vt postpositâ omni erga Principem obseruantia & metu, ad quiduis audendum & audaciores, & paratiores euadant. Libros istos pestilentissimos expendamus. Cremutij Cordi, apud Tacit. l. 4. Tacitum, nonnullis placet illa sententia: *Carmina Bibaculi & Catulli referta contumeliis Cæsarum leguntur, sed ipse D. Iulius, ipse D. Augustus & tulere ista & reliquere, haud facile dixerim moderatione magis, an sapientiâ: namque spreta exolefcunt, si rascare agnita videntur.* Nec enim ista Principes excelsiore loco positos attingunt, nec magis conspurcant, quàm si quis Solem conspuat. Principem maiorem esse quàm vt cuiusquam contumeliâ minui possit, aiebat Seneca. Poëtarum impulsioni nonnihil donandum aiunt. Poëtis & fallere & mentiri familiare. Seneca appositè: *Poëta non putant ad rem pertinere verum dicere, sed aut necessitate coacti, aut decore corrupti, id quemque vocari iubent quod bellè facit ad versum.* Hinc Dion Chrysostomus Homerum dixit, lenocinio versuum suorum homines *κατα-γυναικίζειν*, incantare; Ita enim Lactantius interpretatur, quis sit Poëticae licentiæ modus, & quousque fingendo progredi liceat. Sed seu furere, seu lasciuire Poëtis concessum esse dicunt, ab ipso Principe, si sapiunt, abstineant omnino; Meminerint Pollionis istius Romani, in

Senec. 1. de Clem.

Senec. 1. de Benef. 3.

Dio Chrysost. Orat. 12.

Lactant. 1. c. 19.

Macrob. l. 2. Satur.

c. 4.

Macrob. l. 2. c. 4.



quem cùm Augustus fescenninos scripsisset, prudenter respondit: *At ego taceo; Non est enim facile in eum scribere, qui potest proscribere.* Verissimè & aptissimè dictum,

*Nunquam sunt grati qui nocere sales.*

*Catalect.*

Infœlicissimus Sotadis Poëtæ exitus, supra cæteros fidem facit. Is cùm importunam quandam scribendi libertatem in Reges aliquot exercuisset, ac potissimùm Ptolemæum Philadelphum, ob incestas cum sorore Arsinoë nuptias, grauissimè perstrinxisset, Alexandriâ ejectus, à Ptolemæi duce aliquo comprehensus, in amphoram plumbeam coniectus, in mare præcipitatus est. Taciti aurea sententia: *Acerbarum faceriarum apud præpotentes in longum memoria est.* Huius rei historia insignis habetur apud Hesichium Illustrum. Daphidas Telmissæus Grammaticus vnumquemque conuitiis laceffebat, ipse, irrisuonis gratiâ, Pithiam Apollinis Sacerdotem interrogauit, an equum esset inuenturus, cùm nec amisisset, nec quæreret, respondit illa, non multò post equum esse ipsum repperit. Quod cùm irrisisset, accidit vt inde digrediens, obuium haberet Artalum Regem, qui eum exosum habebat ob perpetuum maledicendi studium, cuius iussu è rupe confestim præceptus est, & huic loco nomen erat, *Equus.*

*Tacit. l. 5.  
Annal.*

§. 3.

Historiæ scribendæ ratio longè diuersa, quamquam paucos videam, quos partium studia non inflexerint aliquantulum. Verè Tacitus: *Obtrectatio & liuor pronis auribus accipiuntur: quippe adulationi fœdum crimen seruitutis, malignitati falsa species libertatis inest, hinc veritas pluribus modis infracta; primum studio politiæ nouandæ, mox odio aduersus dominantes, aut libidine assentandi.* Meo quidem iudicio rectè

*Tacit. l. 1.  
Histor.*

Hh ij

Senec. Com-  
solat. ad  
Marc.

Seneca, & nos Commentario de Idololatria politica, copio-  
sius disseruimus: *Fama liberrima Principum Index*. Non  
quæuis tamen, non infima plebecula & imperita sermo-  
nibus constans: sed peritiorum, sed qui rerum gerenda-  
rum causas & momenta non ignorent. Si quid à Principe  
summæ authoritatis arbitrio peccatum sit, doceat Histo-  
ricus, at verbis minimè contumeliosis. Verùm ut cuius  
historiam scribere non est concessum, ita & Principum  
vitia insectari cuilibet historiæ scriptori non licet, si modo  
licet. Deinde quæ nonnullis vitia videntur, aliis minimè  
ea censentur reprehensione digna: quin & externi, & ciuis  
dispar atque dissimilis ratio est, & scribendi scopus non-  
nunquam discrepans. Tum aut Principis vita functi, aut  
qui adhuc in communi hominum luce & consortio ver-  
setur, historia textitur, nec parem in utroque scribendi li-  
bertatem admiserim. At qui ferendi qui in omni scriptio-  
ne, etiam ab historica narratione omnino aliena, in quos-

Senec. epist.  
115.

Senec. 1. de  
Clem.

Cod. ad l.  
Iul. Ma-  
iest.

uis Reges & Principes incurrunt. Scitum istud Seneca:  
*Nullum sine venia placuit ingenium*. Iam homines quis non  
fateretur? Et apud eundem Senecam: *Peccauimus omnes;*  
*alij grauiora, alij leuiora, alij ex destinato, alij forte impuls, aut*  
*aliena nequitia ablati*. At Principis Majestas seu facto, seu  
dicto, aut scripto, ne quidem leuiter lædi debet. Scio le-  
gem illam clementissimam Imperatorum Theodosij, Ar-  
cadij, & Honorij: *Si quis modestiæ nescius & pudoris ignarus,*  
*improbo petulantique; maledicto nomina nostra crediderit laceffen-*  
*da, ac temulentia turbulentus obtrektor temporum nostrorum*  
*fuerit, eum pœnæ nolumus subiugari, neque durum aliquid, neq;*  
*asperum volumus sustinere: quoniam si id ex leuitate processe-*  
*rit, contemnendum est, si ex insania, miseratione dignissimum, si*  
*ab iniuria, remittendum.*



§. 4.

Conuitium ab vna trium harum caularum profectum  
 veniâ dignum censent Augusti: sed non est quod quis id-  
 circo in Principem libellum maledicentissimum exornet:  
 non est simplex & temerè effusum maledictum: cura, stu-  
 dium, & meditatio in scribendo adhibentur. Adde, quod  
 est omnium grauissimum, in demortuum Principem de-  
 bacchari, id planè belluinum esse censeo. Vidimus nostro  
 æuo tot libros editos, quibus Regum vita, nomine Tyran-  
 norum & deuotorum, vniuersim quidem oppugnabatur.  
 Caium Cæsarem Caligulam aiunt duos habuisse libellos, *Sueton.*  
 quos Protogenes crudelissimus eius scelerum administer *Calig. 49.*  
 circumferebat; nomen vni Gladius, alteri Pugio erat.  
 Iam non duo, sed permulti, iique varii, nostris tempo-  
 ribus editi sunt libelli, quibus edocetur quo iure, qua  
 via & ratione maleferiati homines iugulum pectusque  
 Principum sicâ & pugione petant. Eleganter Varro; alia *Varro i.*  
 sunt quæ facilius intra parietes, in schola, quàm extra, in *rer. diuin.*  
 foro, ferre possunt aures. De Tyrannis quàm sæpè in  
 scholis declamatorio more habentur controuersiæ? hæc  
 scriptis mandare isto seculo parricidarum feracissimo,  
 nullo modo fas esse putem. Si quis obiter, si quis præ-  
 ter rem subiectam, stylo currente, nonnihil de hac quæ-  
 stione delibauerit, impunè illi cedat. Nam, vt cum patre *Senec. præ-*  
 Seneca dicam, *Multi donanda ingeniis puto, sed donanda* *fat. lib. 10.*  
*vitia, non portenta sunt.* Annon maximum istud porten- *Contr.*  
 tum est, omnes illas de Regibus è medio tollendis quæ-  
 stiunculas & dubitatiunculas indagare, perscrutari, euul-  
 gare? Volunt se lectoribus diligentes, accuratos, & pla-  
 nè eruditos, atque adeò exactissimi iudicij homines pro-  
 bare, si in eiusmodi quæstionibus nihil intentatum

H h iij

Seneca  
contro. g.  
l. 2.

intactumque relinquunt. Audiant à Seneca patre; *Non sunt commiseratione digni, qui tanti putant caput potius quàm dictum perdere.* Damnandos esse libellos id genus, nullus, nisi cui parricidium arrideat, dubitabit.

Iuven.  
Satyr. 1.

— *stulta est clementia, cum tot ubique*

*Vatibus occurras, peritura parcere charta.*

Senec.  
Praef. l. 10.  
contr.

De libris istis ex hominum usu & memoria abolendis grauitè Seneca pater, loquens de Labieni oratoris Romani (qui à perpetuo maledicendi studio, per adliterationem, Rabienus nominatus est) libris, primis omnium igne damnatis; *Bono herclè publico ista in pœnas ingeniosa crudelitas post Ciceronem inuenta est.* Sed verendum, aiunt, ne ex hoc de libris improbatis supplicio, vt est hominum natura, maius illorum visendorum desiderium excitetur;

Tacit. l. 14.

Quandoquidem, ait Tacitus, *Veientonis libri*, postquam illos exuri Nero iussit, *conquisiti, lectitatieque, donec cum periculo parabantur, mox licentia habendi obliuionem attulit.* Istud quidem in famosis duntaxat libellis ferendum nonnulli arbitrantur; si modò probra tantum, & conuitia etiam è triuio petita, quæ tranquillitati non officiant publicæ, complectantur. At vbi in iis multa differuntur aduersus vitam salutemque Principum, suorumq; Statuum, omni operâ & studio enitendum est, vt totum hoc, quidquid sit, Vulcano tradatur, repetitâ læsæ maiestatis lege, quâ in auctores libellorum, tum eos venales exhibentes, quin etiam lectores seuerissima & grauissima cognitio exerceatur. Discant homines, non modò qui Principum Maiestatem violarint acerbissimis pœnis coercendos, verum etiam de ipsis studiis, licet innoxiiis, attamen infœlicibus, supplicium sumi. Verum enimvero historiæ scriptores qui absolutam suisque omnibus numeris constantem



historiam scripsisse videri volunt, cur non maiorem diligenti-  
 am & vberiore dicendi differendiq; copiam adhibeant in exagitandis aduersus Principes coniurationibus. Cur non Theopompino stylo hominum postremissimos illos insectantur, qui de Principe è medio tollendo nefanda ineunt consilia? Cur non ipsos diris furiisque vltimis obsessos iri, iratas minacesque umbras ob os oculosque illorum fumantes infernis ignibus tædas & crepitantia torto angue flagra quatientes affuturas apertè demonstrant. Cur non istis legem parricidarum ob oculos ponunt? Est autem huiusmodi, *ut lucem viuo, fluctuanti mare; naufragi portum, morienti terram, defuncto sepulchrum neget.* *Historiæ lex illa est quam Liuius indicat, ut inde nobis quod imitemur, capiamus, inde fædum inceptu, fædum exitu quod vitemus.* Eleganter Pacatus Drepanius, *Pertinet ad securitatem omnium seculorum quod ad factum videri, ut si quis unquam (aduersus Principem & Rempublicam) nefaria vota conceperit monumentis nostrorum hominum recensitis, per oculos hauriat innocentiam.*

Panegy.

Quintil.

Declamat.

29.

Liuius l. 1.

Pacat.

Paneg.

## §. 5.

Sed quoniam totum hoc maledicendi genus non vnius modi est, nam liberè loquendi alia ratio est, & liberè scribendi altera; Ne ille fallitur Princeps, qui vulgo stolido & insanienti loquendi libertatem adimere cogitat. Quàm acerbè Tacitus de sui seculi infelicitate istud scripsit in vita Agricola. Verus ætas vidit quid vltimum in libertate esset, ita nos in seruitute, adempto per inquisitiones loquendi audiendique commercio. Apud Ælium, Tyrannus quidam, nomine Tryzus, cum vellet omnes coniurationum & insidiarum vias intercludere, legem tulit, ne quis ciuium cum altero, seu priuatim seu publicè, col-

Æliar.

l. 14. c. 22.



Suet. Tib.  
28.

Arnob.  
l. 4.

Tacit. l. 2.

Paul. 5.  
Sent. 5. t.  
29.

loqueretur. Cives animi sui senſa, miro quodam artificio, mutuo ſibi aperire excogitarunt, oculorum videlicet ac manuum geſtibus. Tyberius Principum omnium callidiſſimus, in ciuitate libera linguam mentemque liberam eſſe debere iactabat. Sed quoniam iſtam ſilendi omninò neceſſitatem ſuis Princeps imperare non poteſt, niſi in deſperationem ſubditos adducere velit: quod quàm periculolum exiſtat, omnium ferè gentium hitoriis & publicis monumentis edocemur. De maledictis & obloquendi petulantia multa olim, ſeu duodecim tabularum legibus, ſeu ab Auguſto & poſterioribus Imperatoribus ſancita ſunt, quæ Arnobius generatim ita complexus eſt; *Maieſtatis ſunt, inquit, apud vos rei, qui de veſtris ſequiſ obmurmurauerint aliquid Regibus. Magistratum in ordinem redigere, Senatorem aut conuitio proſequi, ſuis eſſe decreſtis periculoſiſſimum pœnis. Carmen malum conſcribere, quo fama alterius coinquinetur & vita, Decemuiralibus Scitis euadere noluiſtis impune. Ac ne veſtras aures conuitio aliquid petulantiore pulſaret, de atrocibus formulas conſtituiſtis iniuriis.* Quibus Arnobij verbis ſatis apertè intelligimus, non modo priuatis actionibus, famoſa carmina & ſcripta vindicata eſſe, verum etiam, vt eſt à Tacito proditum, ſpecie legis Maieſtatis Auguſtum exercuiſſe eam cognitionem de famoſis libellis, & quidem publico iudicio. Paulus Iurisconſultus eò reſpexiſſe videtur, cum ait, crimen iſtud imminutæ Maieſtatis, non ſolùm factis, ſed & verbis impiis, aut maledictis maximè exacerbari. Et quanquam Theodoſij ac filiorum lex, de qua nos ſuprà, totum hoc quidquid ſit condonaſſe videatur, ita nec alia mente ab iis Auguſtis lata eſt lex eiufcemodi clementiæ & benignitatis pleniffima, niſi quòd eo tempore id ita ſuis rebus con-

ducere



ducere existimabant. Nihilominus nouis quotidie fuc-  
 crescentibus insidiis & in Principes coniurationibus, ve-  
 terum legum læsæ Maiestatis seueritatem repetendam &  
 retinendam, nemo sanæ mentis dubitabit. Symmacho, *Symmach.*  
*Tantum denuò legibus seueritatis addendum est, quantum flagi-* *l. 2. Epi. 23.*  
*ria creuerunt.* Principi, vt in eam curam, ac sollicitudinem  
 incumbat, minimè conuenire arbitror. Tyberij, alioquin *Suet. Tib.*  
 truculenti Imperatoris, hâc in re & patientem & ciuilem *28.*  
 animum laudo vehementer, qui Senatu ab eo de conuitiis  
 & maledictis in ipsum vulgatis cognitionem flagitante,  
 in hæc verba respondit; *Non tantum otij habemus, vt impli-*  
*care nos pluribus negotiis debeamus. Si hanc fenestram aperue-*  
*ritis, nihil aliud agi sinetis: omnium inimicitia hoc prætextu ad*  
*nos deferentur.* Principem cuiuslibet Magistratus officium  
 & munus implere penitus indecorum. De his famosis  
 libellis Principi neque honestum silere, neque proloqui  
 expeditum, quia non Ædilis, aut Prætoris, aut Consulis  
 partes sustineat: maius aliquid & excelsius à Principe  
 postulatur. Ita prudenter apud Tacitum censuit idem *Tacit. l. 3.*  
 Tyberius. Probra id genus & maledicta in Regem vltum  
 eat quilibet Magistratus, alioquin & suæ in Principem  
 fidei, & muneri suo defuisse proculdubio videbitur. Rex  
 interim si satisfieri sibi percupiat, tantaque maledicendi  
 petulantia eius animo aliquantùm insederit, eumq; com-  
 mouerit, Mæcenatis consilium Augusto datum sibi  
 dictum putet. Sic ille, apud Dionem, alloquitur Au- *Dion. l. 52.*  
 gustum. *Quod conuitium aliquis tibi fecerit, aut tibi obtrecta-*  
*uerit, neque deferente aliquo audire, neque ulcisci debes,* Turpe  
 enim fuerit te credere, iuuentum, qui te, neminem læden-  
 tem, omnibus benefacientem, ignominia affecerit: idque  
 soli faciunt mali Principes, qui ex cōscientia sua veritatem

dictorum colligunt. Deinde iniquum est egrè ferre vel-  
le, quæ, si vera sunt, præstat non admisisse; sin falsa,  
disimulare expediat: cum multi hæc vindicantes pluri-  
bus, ac grauioribus de se sermonibus occasionem præ-  
buerint. Nec decet hanc opinionem hominibus de te  
subiicere, reperiri qui in te contumeliosus esse ausit, vt  
iam idem de te quod de Deo immortalī, esse te vene-  
randum, iudicetur. Princeps optimus, & qui ad omnem  
virtutem efformatus videtur, suæ sibi innocentia & rectè  
factorum conscius, ista conuitia nulla omnino ratione  
reformidare debet. Istud Senecæ cogitet, *Vt quisque con-*  
*temptissimus, & ut maximè ludibrio est, ita solutissima lingua*  
*est.* Tito beneficentissimo & moderatissimo Imperatori  
apud Tranquillum ita visum, Bonum Principem iniu-  
ria affici non posse. Sed addo & istud grauius dictum  
à B. Paulino, *Maiore impietate leditur, qui nescit offendi.*  
*S. Paulin. Ep. 13.*

## §. 6.

Quid si Princeps multa contra ius & æquum admittat,  
subditos miris diuexet modis? Istam ne insectandi &  
maledicendi licentiam impunem esse patietur? Minimè  
omnium, sed vt *fulmina paucorum periculo cadunt, omnium*  
*metu,* ac veluti totius exercitus tumultus & seditio, mili-  
tum aliquot decimatione sedatur, non aliter in homines  
procacissimæ linguæ, sed præcipuos animaduerti placet.  
Nec quisquam istud excipiat, eum qui nocentem infam-  
marit, non esse bonum æquum ob eam rem condemnari:  
*Peccata nocentum nota esse & expedire, & oportere.* In ho-  
mine priuato illud vtrumque concedi potest, quanquam  
nec semper, nec de quouis delicto legem explicare par  
sit. At in Principe legitimo, suæ alioquin potestate abu-  
tente, locum nulla omnino ratione habere potest, qui si



huiusmodi probra dissimulet, homines credant non tam clementia, quàm conscientia mala ad contumelias illas conuiuere? Ita est profectò cum hominum communis sit sententia, priuato omnes iniurias esse prosequendas, ne vel contemptui habeatur, vel opprimatur: Principem verò debere ea quæ in Rempubicam peccantur vlcisci, priuatim in se admissa tolerare, quum qui ita deliquerint neque ex contemptu, neque ex incurfu, possent ipsum tanta scriptum custodia damno afficere, vt Augusto suo prudentissimè Liuiam apud Dionem indicabat; Stultis quidem quasi negligere videatur, exemplo Claudij Imperatoris, indulgeat, vel quoniam vbi furor adest, ibi intellectus abest, furentes istos ac mente captos ad agnatos, & gentiles remittat, ac vno nomine innocentissimus Princeps canes istos latrantes, & regiè & magnificè contemnat. Eximiè S. Chrysostomus, nihil adeò maledicos mordet & frænât quàm illatæ contumeliæ contemptus; Neque verò Principem conuitiandi morbum istum despicientem ita fingimus, aut à magistratu grauissimè coërcendum affirmamus, vt Princeps ipse omnino loquendi & consulendi apud se libertatem interdicat. Fidelissimo quoque consultore Rex, si saluus esse velit, carere non potest, huic monendi liberam potestatem faciat. Discat vnus Alexandri Magni exemplo, post Clytū, ab eo, minimè sobrio, interfectum etiam seruatorem suum, quàm necessum sit aliquos penes se habere, quorum prudentiæ & fidei se suæque omnia committat, quos non leuissimis suspicionibus, aut maleuolorum & inuidorum falsis criminationibus facillè ab se segreget, sed constantissimè retineat; nec horum frequentes mutationes sibi vsui fore, quin potius certissimo exitio futuras sibi persua-

Dion. l. 55.

S. Chrys.  
ho. 22. Ep.  
ad Rom.

Curt. l. 3.

deat. Quis enim iam liberè aut Principem audeat, aut quod è re illius suiue Imperij fuerit, eloqui audeat? Dicam istud Curtij, neminem cum ipso sociare sermonem potest ausurum; *Viendum esse in solitudine, velut fera bestia, terrenti alias, alias timenti.* Augustus, Iuliæ filia adulteria non tam vindicanda Principi quàm tacenda parum potens iræ publicauerat: cum in locum iræ subiisset verecundia, gemens quòd silentio non illa pressisset, sæpe exclamauit, *Horum mihi nihil accidisset, si aut Agrippa, aut Mæcenas vixisset;* ita tot habenti hominum millia, duos fidissimos consiliarios reparare difficilè est. *Principes cætera omnia facilius quàm sua cognoscunt, apud Dionem.*

Senec. 6. de  
Benef. 6.  
22.

Xiphil.  
August.

## §. 7.

Haftenus conuitia, probra, & vno nomine maledicta Principi obiecta excussumus: de maleficiis nunc agendum. Apud Tacitum, Lepidus, *Vana à scelestis, dicta à maleficiis differre* dixit, Quintiliano aliter visum, *qui maledicum à malefico, non nisi occasione distare affirmat:* sed maledicum huius generis intellige, qui solens, suo more, id est, perpetuò, alterius famam passim vellicare consueuerit, cui innatum quodammodo obtrectandi studium. Equidem nemini recti iudicij dubium esse potest, qui postposito omni pudore, imò & veneratione erga Principem, in illum & sermone & scripto inuehi solet, ipsum ad nefandum aliquod scelus patrandum satis procluem videri; vnde enim sempiternum de Principe malè, vel scribendi, vel dicendi studium, nisi ex acerbissimo in eum odio, quod non nisi ipsius Principis perniciæ expleri potest? Veruntamen homines id genus, quibus mens tantummodò mota sit, non omnino erepta, istud in primis expendere velim, non nisi læsa Diuini Numinis religione,

Tacit. l. 3.  
Quintil.  
12. c. 9.



Regem aut Principem lœdi posse. Quemadmodum enim  
 prisci illi Gentiles Deos suos Regis nomine velut hono-  
 rifico compellarunt, ita vicissim Reges Dij nominati  
 sunt, quod ex Sacris literis perspicuum est, vt omnes in-  
 telligant Regiam dignitatem cum Dei optimi maiestate, *Iliad. 2.*  
 non minimam habere cognationem. Hinc illud Homeri *Vulcar.*  
 de Rege *πῦν δ' ἐκ δῖος ἐστίν*, honor à Ioue summo. Diui- *Auid.*  
 nitùs dari Imperia, idcirco aiebat Imperatorum vt doctif- *Cass.*  
 simus ita sapientissimus M. Antoninus Philosophus: sic *Cassiod. 10.*  
 Vitiges Gothorum Rex in Italia, apud Cassiodorum; *ep. 31.*  
*Omnis prouectus, potissimum Regius, ad Diuinitatis munera*  
*referendus est.* Nos plura quæ ad id faciunt, alio loco con- *Cassiodor.*  
 gessimus. Cuius rei insigne habemus exemplum in veteri *10. ep. 31.*  
 Testamento, cùm Samuel Dei iussu Saülem, in caput *1. Reg. 10.*  
 eius effuso oleo, Regem populi Israëliti constituisset,  
 vt ipse electionem & consecrationem suam, non nisi Di-  
 uino mandato factam esse intelligeret, signo seu euentu  
 triplici totum hoc comprobari voluit Propheta, Diuinæ  
 reuelationis beneficio; Primum signum fuit, quod Saül  
 ad suos rediens, obuios habiturus esset duos seruos patris,  
 ipsum quæritantes; Secundum, eidem Saüli tres occur-  
 suros, ad Deum in Bethel, religionis ergò, proficiscentes,  
 & ei duos panes oblaturus. Tertium, Saülem tandem  
 obuium habiturum cœtum Prophetarum, cum quibus  
 ipse pari modo Numine Diuino afflatus prophetaturus  
 esset; quæ omnia reapse contigerunt.

## §. 8.

Quin iurisiurandi seu sacramenti militaris, sub Chri-  
 stianis Imperatoribus formula, eadem religione, & Diui-  
 num Numen, & Principis Maiestatem simul cõplectitur.  
 Ista sunt Vegetij, *Iurant (milites) per Deum, & per Christum,* *Veget. c. 25.*

Ii iij

& per Spiritum Sanctum, & per Majestatem Imperatoris,  
 quæ secundum Deum humano generi diligenda est & colenda.  
 Nam Imperatori, cum Augusti nomen accepit, tanquam præ-  
 senti & corporali Deo fidelis est præstanda deuotio, & impen-  
 dendus peruigil famulatus. Deo enim vel priuatus, vel mili-  
 tans seruit, cum fideliter eum diligit, qui Deo regnat authore.  
 Si Imperatori nomen Augusti adtributum duntaxat, præ-  
 sentem & corporalem Deum quempiam refert: quid in  
 nostro Christianissimo Rege sacra illa ac planè cælestis  
 vnctio efficiet? An non veluti Deum aliquem, sed mor-  
 talem repræsentabit? quin longo post se interuallo cæte-  
 ros omnes orbis Christiani Reges relinquere, nullus sanæ  
 mentis dubitabit. Non immeritò itaque Gersoni Chri-  
 stianissimo Doctori, Rex Francorum dicitur *Rex Sacer-*  
*dotalis, vel Pontificalis*, per miraculum consecratus, per  
 sanctam Vnctionem, quæ venit de cælis, cuius rei gratia,  
*Rex Christianissimus paulum ab Angelis imminutus*, ab eo-  
 dem pronuntiatur. Quæ vna res Ludouicum Christianis-  
 simum Regem nostrum omninò sacrum nos dicere com-  
 pellit, hoc est nulla penitus vi iniuriaque violandum,  
*Cassiod.* *Hoc sacrum est, quod nulla permittitur commo-*  
*tione violari.* Addo & supra omnem admirationem, in  
 ipso Rege & ea quidem ætate ad omnem licentiam ni-  
 mium quantum procliui, vnà cum summa potestate, cui  
 omne quod lubet licet, incredibilem moderationem,  
 continentiam, qualem in nullo alio Principe parem repe-  
 ries, quin & reliquarum virtutum chorum vniuersum,  
 quæ omnia illum planè suspiciendum, utpote supra hu-  
 manæ sortis fastigium collocatum, cuilibet non suorum  
 modò, sed etiam extraneorum propositum esse testantur,  
 ita ut qui hæc aspernetur minusve cogitet, in belluam

*Gerson. præ-*  
*hosp. Paris.*

*Cassiod.*



hunc commigrasse credendus sit. *Rarum omnino bonum est*, ait Cassiodorus, *Dominum triumphare de moribus*, & hoc Cassiod. l. 3. *consequi in florida etate, ad quod vix creditur cana modestia* *ep. 4.* *peruenire.* Hic est Regiæ dignitatis cum cælo consensus, hæc Regiæ venerationis & obseruatiæ cum ipsa in Deum pietate connexio, quam qui dirimere tentat, maximo impietatis scelere sese obstringit.

## §. 9.

Proximus in Deum pietatis gradus ille est, qui ad parentes spectat, & *secunda post Deum fœderatio nominatur* à B. Hieronymo, quin & Hierocli Pythagoreo, parentes *S. Hieron. ep. 47.* nihil aliud sunt quam *θεοὶ καὶ θεοὶ*, terreni Dei. Ita præstantissimus ille Philosophiæ magister Aristoteles parentibus itidem ac Deo honorem esse tribuendum; sic oratori summo, parens non multò secus liberis sit quam Deus. Vnde Plato Philosophorum Princeps: parentes negligere, neque Deum, neque hominem mentis competentem cuiquam vnquam aut suasisse, aut impulsisse pronuntiavit. Sed illud Senecæ condonandum dum ita scribit: *Nulla lex amare parentes, indulgere liberis iubet: superuacuum est enim qua natura imus impelli.* Vt enim veri Dei cognitionem minimè habuit, aut, vt nonnullis placet, dissimulauit, alioquin præter à natura inditam ingentemque de honorandis parentibus impulsione, Diuinum illud præterea de ea re præceptum edictum est. At illa magis placent eiusdem Senecæ, *Parentes suos non amare, impietas est; non agnoscere, insania.* Ita Petrus Chrysologus: *A se migrat, & ab homine totus transit in bestiam, pater pietatis immemor, gratiæ genitoris oblitus; & hunc ad extremum impietatis gradum de Deo explodendo peruenisse* affirmat S. Gregorius Nazianzenus. Vnde non im-

*Arist. 9.**Eth. 2.**Plato 11. de leg.**Senec. l. 4. de Benef. c. 17.**Senec.**Chrysol. serm. 2.**Nazianz. distich.*

Quintil.  
declamat.  
377.

meritò istud à Quintiliano pronuntiatum est: *Ad tantum nefas parricidij magna oportet serie parricida veniat, & per hominum Deorumque contemptum ad ultimum nefas conscendat.* Principes omnium publicos esse parentes, veterum quam multi grauitè & copiosè demonstrarunt, & nos de ea re aliquantum Commentario de Idololatria politica disseruimus. Ecquis igitur in Reipublica parentem quidpiam nefandi sceleris molietur? quis probum & munificum Principem de medio tollendum iudicabit, nisi qui planè hominem exuerit? De malo Principe neid quidem cogitandum. Latinæ elegantia Princeps quàm verè istud,

Cicer. pro  
Cluent.

*Non modò reticere homines parentum iniurias, sed etiam æquo animo ferre oportere.* At longè elegantius Epictetus ipse:

Epictet.  
Enchir. 37.

*Pater est, precipitur curam eius agendam, cedendum ei in omnibus, si conuitietur, si verberet, ferendum esse.* At pater malus est, nunquid igitur naturâ cum bono patre coniunctus es? Non, sed cum patre. Tu igitur munus tuum erga ipsum tuere, nec quid ille agat considera, sed quibus rebus agendis tuum institutum naturæ futurum sit consentaneum. Hoc Simplicius mirum in modum illustrauit, cùm scripsit:

Simplic.

*Verbera patrum æquiori animo filiis ferenda, quàm seruis dominorum.* Itaque veteres Romanorum leges, tum excellentiâ naturæ consideratâ, tum expensis laboribus quos filiorum causâ parentes suscipiunt, liberos omnino patriæ potestati subiecisse, & vendendi illos, si vellent, potestatem dedisse parentibus, quin & impunè occidendi. S. Ioannis Chrysostomi inde petita est illa sententia:

S. Chrysost.  
hom. 21. ad  
Tim.

*Patrem qui habet, etsi mille patiatur incommoda, omnia patris reuerentia conteget.* Sed alio loco ista copiosius & suo more eleganter explicat: *Naturæ leges & ab hominibus institutæ sic præscribunt, etiamsi flagris cedat pater, si à mensa depellat,*



pellat, si adibus exigat, si quocumque modo puniat, inbent omnia fortiter perpeti filium, nec ullam ipsi veniam concedunt, ni paruerit & pertulerit, ac quantumvis filius ejulabundus conqueratur, illi ab omnibus istud reponitur: Pater est qui cedit ac Dominus, habetque potestatem in te quidvis faciendi. Neque verò propterea quispiam suspicetur iustam aliàs in patrem sibi actionem concessam esse: nam parentes in ius vocare prohibitum legibus omnium Gentium. Eutyphron apud Platonem, aduersus patrem instituere homicidij actionem, impium esse dixit. Plato Euthym.

## §. 10.

Quis laudet pupillum, in tutorem suum velut alterum parentem, fauientem? & Principes Regesque seu quocumque alio nomine, sunt tutores status publici, itaque nil mirum ipsos amari ultra priuatas etiam necessitudines, hoc est, supra liberòs, & eos etiam à quibus procreati sumus. Addo & multò magis ultra eos qui nobis quocumque agnationis vel cognationis iure coniuncti sunt. Stupendam illam & admirabilem vocem cœlestem exaudiant & reformident mortales omnes, & ij præsertim qui Christo nomen dederunt: *Nolite tangere Christos meos.* Id Psal. 104. omnium optimè quo pacto ad Reges ipsos referendum sit, ex Eusebio discere possumus: Ait enim, ipse, Prophetas Dei iussu Reges oleo perfundentes, Christos, id est, Euseb. 1. hist. Eccl. vnctos effecisse, velut Christum siue Messiam specie representantes, quandoquidem illi effigiem & imaginem Regiæ ac primariæ Potestatis, quæ in vero Christo Messia ac Verbo Diuino suapte natura inest, per se ipsi exprimerent. Sed quoniam vniuscuiusque actionis finis ac scopus spectari debet, quid vtilitatis ex Principis parricidio ad ipsam redeat Rempubicam vniuersam, expendamus.

Kk

S. Chryso-  
stomus. 1. ad  
Timoth. 1.

Seneca. 1. de  
Clement. c. 3.

Themistius.  
orat. 5.

Agellius. 7.  
c. 3.

Nam si quis priuatus priuatam à Principe acceptam vltum eat iniuriam, is sibi maximum accerlit malum, & ipsi Reipub. grauissimum inflixit vulnus. S. Ioan. Chrysostomus istud non obscure indicat, cum ait: *Si quis ouem iugulet, gregem quidem imminuere; at qui pastorem de medio sustulerit, totum simul gregem dissipare.* Quibus ista Senecæ copulanda sunt: *Non hic est sine ratione populis vrbibusque consensus sic protegendi amandique Reges, & se suaque iactandi, quocumque desiderauerit imperantis salus. Nec hæc vilitas sui est aut dementia, pro vno capite tot millia excipere ferrum, ac multis mortibus vnā animam redimere, nonnunquam senis & inualidi (addo & pueri.) Nec immerito: quandoquidem, Hæc immensa multitudo, vnius animæ circumdata, illius spiritu regitur, illius ratione flectitur, pressura se ac fractura viribus suis, nisi consilio (ynius) sustineretur.* Sic Themistius rectè dixit, *Regiam potestatem à Deo in terras è cælo transmissam, vt ab immota constantique lege, ad spirantem atque viuam hominibus esset perfugium constitutum.* Qua in re plurimum esse discriminis apparet inter alicuius priuati hominis cædem, & Principis. Neque si cuiuspiam Princeps iratus sit, & de eo necando cogitare videatur, idcirco priuatus ipse prior id facere occupet. Siquidem vt praeclare Agellius: *Humana vitæ negotia, & actiones, & officia vel occupandi, vel differendi, vel etiam vlciscendi, vel cauendi, similia esse pugnae gladiatoria: nam gladiatori composito ad pugnandum, pugna hæc proposita fors est, aut occidere si occupauerit, aut occumbere si cessauerit.* Alludit Petronius:

*Et qui non iugulat, victor obire solet.*

§. II.

Hominum autem vita non tam iniquis, neq; tam indo-



mitis necessitatibus circumscripta est, ut idcirco prior iniuriam facere debeas, quam, nisi feceris, pati possis. Et quamquam in reliquis hominibus istud probari queat, at in Principe nullo pacto concedi potest. Sit aliquis maximæ existimationis cui cuncta Principis displiceant, opes non mediocres comparet, qui apud militum præfectos & strenuos quosque duces nomen sibi rerum gestarum magnitudine & gloriâ parauit, quem ipsi milites libenter audiant, libenter videant, ac proinde in Regni affectati suspensionem veniat; infelix, quid tam auidè & ambitiosè persequatur, ex Petro Chrysologo sanctissimo Archiepiscopo discat: *Regnum velle, inquit, seruum crimen est; adire, periculum, temeritas non timere*: Nam ut habet Tacitus, *Imperium cupientibus nihil medium inter summa & præcipua*. Ac quantumuis ille boni publici & publicæ libertatis causam tueri populumque ab intolerandis nec non grauissimis indictionibus subleuare se velle, e mentito certe prætextu, non iam tacitè profiteatur, quod omnibus cuiuslibet regni perduellibus familiare est, ut discit Themistius; hinc multi & imprimis credulum vulgus iam sibi veluti blandientem fortunam somniet, attamen Ennodio Ticinensi, *Minus diligo prospera quæ sumunt à desperatione principium*. Addo & istud Taciti falso libertatis vocabulum obtendi ab iis qui priuatim degeneres, in publicum exitiosi, nihil spei nisi per discordias habent. Princeps & si minime cunctandum ratus, sibi suoque Imperio quam primum consulere apud se statuat. Qui sui conscius, à Rege sibi cauendum esse ducet, quandoquidem ut visum est S. S. Hildeb. Hildeberto Turonensi Archiepiscopo, *Semper suspecta est offensa potestas*, illumne idcirco interficiendum curabit? ac si non nisi capitis alterius periculo, vitam suam tueri

Petr.  
Chrys.  
Serm. 23.

Tacit. l. 2.  
hist.

Themist.  
orat. 9.

Ennod.  
Panegy.

Tacit. lib.  
11.

S. S. Hildeb.  
Ep. 50.

K k ij

*Themist.  
orat. 9.*

*Tacit. li. 3.*

*Tacit. li. 1.*

queat! hoc enim prius cogitare debet, innatam ingenii-  
tamque ipsis Principibus clementiam, nec facile proinde  
familiarium sermonibus exasperari, quorum aspectus  
benignitatem spiret, nec illos, tanquam malum aliquod  
vel noxium animal è cubili profiliens, refugiant subditi,  
quin potius tanquam ad clarum & beneficum sydus cer-  
tatim aduolent. Elegantissimè pauculis verbis istud ex-  
pressit ex Platone Themistius Principes rationi persimi-  
les esse, milites vero iræ. Quidni igitur quisquis ille sit  
Principem ad ignoscendum magis quàm ad perdendum  
suòpte ingenio, procliuem suspicabitur? Ponat sibi ante  
oculos hunc Regis casum publicæ pacis exitium futu-  
rum hunc florentissimi Regni fortunam in ruinas actu-  
rum, nec se tantæ cladi superstitem fore speret. Quantò  
rectius Principem suspicacem esse decet, cuius vnus vita  
tot insidijs, coniurationibus, factionibus, non tam suo-  
rum quàm externorum odio & malignitate petitur: Sa-  
gacem & prouidum ista demonstrant, cum Cassiani illi  
& Nigriani non iam apertè sed rectè & obliquè Principi  
pestem exitiumque moluntur, vel domesticis seditioni-  
bus vel alicuius Prouinciæ aut Ciuitatis nefariâ defectio-  
ne. Taciti eà in re consilium vltro amplectatur. *Non de-  
corum, addo nec tutum videri Principi, si una alterave ciui-  
tas turbet, omisâ vrbe, unde in omnia regimen.* Prudentis-  
simè Tiberius apud eundem Tacitum, auditâ seditione  
militari Germanicâ & Pannonicâ, *immutum fixumque ipsi  
Tiberio fuit, non omittere caput rerum (Romam Imperij se-  
dem) neque se remque publicam in casum dare.*

§. 12.

Neque verò Rex pro sua tantummodò, sed etiam suo-  
rum salute excubare, credendus est, & eorum præsertim



qui maximo fidei suæ experimento illi sunt à consilijs.  
 Tacitus eleganter, *nomina summa cura & medicamenta vo-* Tacit. l. 15.  
 cat. Quorum opera & fide Princeps nullo modo carere  
 potest, si quidem Tacito pleraque in *summa fortuna auspi-*  
*cijs & consilijs quàm telis & manibus geri.* Illud autem vel in  
 primis Imperatores Arcadium & Honorium ad legem Cod. 9. tit.  
 Iuliam cauisse videmus ijs verbis: *De nece etiam virorum il-* 8.  
*lustrum qui consilijs & consistorio nostro interfunt, Senatorum* Tacit. l. 13.  
*etiam (nam & ipsi pars corporis nostri sunt) vel cuiuslibet po-*  
*stremi qui nobis militat, quisquis cogitauerit, (eadem enim se-* Ad l. Iul.  
*ueritate voluntatem sceleris: quâ effectum, puniri iura volue-* Maiest.  
*runt) ipse quidem, ut pote Maiestatis reus, gladio feriat. In-* Cod. l. 9.  
 terim liceat id quod hoc loco de voluntate interferitur  
 obiter & paucis excutere. Voluntatem sceleris non secus  
 ac effectum puniri iura ciuilia & Romana voluisse ait lex,  
 quò referenda sunt ista Apuleij, in maleficijs etiam cogitata Apul. Flo-  
 mala, non perfecta adhuc, vindicantur, cruentâ mente, purâ rid. 4.  
 manu. B. Basilus id firmat à simili, de eo qui lorica armatû, s. Basil. l.  
 gladio interficere voluerit, nec idcirco potuerit: neque de Virginit.  
 enim opustantum, sed & voluntatem iudicat lex. Tertul- Ter:ull. l.  
 liani imitatio est. *Voluntas ne tunc quidem liberatur cum ali-* de Panit.  
 qua difficultas perpetrationem eius intercept. Seneca pater, Senec li. 4.  
 Scelera quanquam citra exitum subsederunt, puniuntur. Quin- Contr. 7.  
 tilianus, *Lex mentem punit.* Seneca filius, exercetur & ap- Quintil.  
 ritur opere nequitia, non incipit. Prosper Aquitanicus. declam.  
 372.

Cui nimis hoc solum quod voluit, nocuit.

Paulus Iuriconsultus, *Consilium vniuscuiusque non fa-* Senec. 5. de  
*ctum puniendum est.* Ille idem alio loco. Sollicitatores aliena- benef. c. 13.  
 rum nuptiarum, itemque matrimoniorum interpellatores, etsi Paul. sent.  
 effectus sceleris potiri non possint, propter voluntatem perniciosæ l. 5. tit. 29.  
 libidinis, extra ordinem puniuntur. Quanto æquius in om- Paul. 5. r.  
 4.  
 sentent. ti

Kk iij

nium atrocissimo & grauiſſimo ſcelere quod in caput Principis conceptum eſt, iſtud exerceri congruit? Nec enim ſimplex cogitatio aut pura voluntas cuiuſmodi fingi aut excogitari poteſt, cum ea in re vel verba ipſa minus cogitatè prolata, vel leuiſſimi quique rumores captandi ſunt, neque diſſimulandi. In ſuo quemque periculo magnum animum habere, cùm de ſalute Regis timetur, nos credulos eſſe debere; vana quoque deferentes admittere, prudentiſſimè monet Curtius;

Curt. l. 6.

§. 13.

Hæc nos ſeriò pro Principe tangat ſollicitudo, quem pro ſuis, ac præſertim fidiffimis conſultoribus, quibus arcana Imperij committat, non minimum ſollicitum eſſe conuenit. At cò magis ſi quem nactus ſit, cuius fides turbulentiffimo rerum ſuorum ſtatu comprobata fuerit, & omnium voce ac præconio perſpecta ſapientia, de qua publicum iſtud votum libenter meritò auditum ſit: *Vnius ſit cura viri quodcumque rubefcit Occaſu, quodcumque dies ſublimior ambit.* Et ſi illum, dum publicæ rei integerrimè & generoſiſſimè conſulit, multis diſplicere audit Princeps. Iſtud Quintiliani cogitet; *hanc eſſe conditionem omnium qui adminiſtrationem Reipublicæ aggrediuntur, vt ea quæ maximè pertinent ad ſalutem communem, cum quadam ſui inuidia (& ſæpius odio) efficere cogantur.* Et quanquam Rege indignum eſſe ſcripſerit Ariſtoteles, inquirere in ſermones vulgi, veruntamen nihil prætermittendum videtur, quominus hominum de ſe ſtudia exploret, quibus facile dignoſcat, qui vel Rege inſcio læſi, aliqua vlciſcendi cupiditate, vel rerum nouarum ſtudio ducantur, quibus cautioribus magis quàm acrioribus conſiliis propiciat, nec ſe loquendi facilitate prodat, ac dum tectum &

Quintil.  
declam.

348.

Ariſtot.  
Polit. 5 c.

11.



obscurum illius ingenium, qui illum circumsistunt obser-  
 uarint, non tam facile ab obsequio & fide in Principem  
 desciscant, cum nihil eorum quæ moliantur, Principem  
 latere posse, sibi persuadeant. Neque verò ut confestim  
 in iracundiam prorumpat, si quid machinamenti fuerit  
 nuntiatum, committendum est; ita nec omnem clemen-  
 tiæ & moderationis rationem repudiassè, videri debet.  
 Senecæ istud sibi ob oculos ponat: *Facilius esse excludere* Senec. l. 1.  
de Ira, c. 7.  
*pernitiosa, quàm regere; & non admittere, quàm admissa*  
*moderari.* Quamquam non vnius generis sint, qui in il-  
 lum peccent. Non dico qui oderint: *Nam malevolentie* Senec. lib.  
de int. beat.  
c. 18.  
*quid inuiolatum esse potest, cui sacer nec Rutilius fuit, nec Cato?*  
 Seneca auctore. Cum eo qui semel lapsus sit, benignius  
 agendum esse nemo nescit. At obstinatioribus, in quibus  
*seminatum delictum*, ut loquuntur Iurisperiti, deprehen-  
 sum fuerit; Et in quos maxima atque quamplurima ab  
 ipso Principe collata fuerunt beneficia, legum seuerita-  
 tem omnino experiantur. Ad horum omnium præci-  
 pios & sacrilegæ factionis primarios duces ista Pacati Pac. Pan.  
 Drepani Galli eloquentissimi spectant: *Publici parricidæ*  
*qui oblita fide, Dominorum sceptrâ cepistis, & periculo non*  
*minori quàm scelere, Imperium (Regnum) vita paciscentes,*  
*sanguinis pretio nomen emistis.* Præclarè & verè dictum:  
 Nam illi auide Regna desiderant, quos soluta legibus delectat  
 vita, quorum crudelitas indamnatos (inauditos, indefensos)  
 necandi, cupiditas priuata capiendi, libido honesta fadandi ins  
 atque impunitatem requirunt. Istis adnumerentur, qui par-  
 ricidio inferendo destinati, vicariam sibi quarunt ope-  
 ram, de quibus ista pronuntiat Tacitus: *Puniendos re-* Tacit. l. 13.  
*rum atrocium ministros, ubi pretia scelerum adepti, scelera ipsa*  
*alijs delegant.* Præclarè B. Augustinus: *Sicut est aliquando*

*Plin. Pan.* misericordia puniens, ita & crudelitas parcens. Vt Plinius Iu-  
*Cassiod. l. 3* nior, Mitis seueritas, non dissoluta clementia. Sic apud Cas-  
*Epist. 8.* siodorum, Quodammodo nascitur de pietate crudelitas, si quem  
*Cod. Theo.* negligis admonere, postea cogaris exigere. Audiendi præsertim  
*l. 1. tit. 10.* hac in re Imperatores, Valentinianus, Theodosius, Arca-  
*l. 3.* dius. Crimina impunitate coalescere: Remoueantur itaque pa-  
*Cassiod. l. 1.* trocinia, quæ fauorem reis & auxilium scelerosis impertiendo,  
*Epist. 30.* maturari scelera fecerunt. Antea Diocletianus & Maximia-  
*Senec. l. 2.* nus AA. Non remitti penam facile publicè interfit, ne ad male-  
*de benef. c.* ficia temere quisquam prosiliat. Et prudenter quidem Cassio-  
*14.* dorus: Benigni Principis est non tam delicta velle punire, quàm  
 agendo putetur improvidus. Sed audiendus Seneca. Exorari in  
 perniciem rogantum, scæua bonitas est. Nam quod sui exitium  
 vocat reus supplicio afficiendus, publica medicina est.  
 Castigatio non nocet, ait Seneca, sed medetur specie nocendi,  
 siquidem permultis & aliquando toti Regno illos perire,  
 vel maximè interfit. Ita vnius scelestissimi proditoris sup-  
 plicio, tot populorum strages, tot ciuitatum direptiones  
 & euersiones, tot innocentium vitæ, tot denique quæ sacra  
 quæ prophana redimuntur; cui venia concessa, non modo  
 toti Imperio, sed ipsi procul dubio Principi pestem per-  
 nitentemque allatura sit.

## §. 14.

Scio Christianum Principem, Ecclesiam communem  
 nostrum omnium parentem sibi imitandam proponere  
 debere. Ea certè pia mater audit, cuius est incruenta disciplina,  
*Cod. de Ep.* teste B. Augustino. Et lepidum istud Iuliani Apostata di-  
*& Cler. l.* ctum, apud Socratem; cum enim prohibuisset lege latâ,  
*10* ne Christiani in Prouincijs villos Magistratus gererent, ra-  
*So. rat l. 3* tionem subjunxit Urbanus Scurra, nam lex illorum vetat gla-  
*c. 11.* dio



dio *utendum*, contra eos qui scelera digna morte admiserint.  
 Ad clementiam Ecclesiasticam redeo, quam lex nos do-  
 cet, cuius ea vox est: *Episcopo sanctitas ignoscendi gloriam* *Cod. de Ep.*  
*dereliquit.* Ennodius Ticinensis ita Regem suum Theo- *Ecd. l. 10.*  
 dericum commendat: *Exhibet robore, vigilantia, pro-* *Ennod.*  
*spertate, Principem, mansuetudine Sacerdotem.* Hinc illa Ma- *Panegy.*  
 cedonij ad B. Augustinum: *Officium Sacerdotij est interue-*  
*nire pro reis.* Reos intelligit qui in leges peccent. Vnde ipse  
 B. Augustinus respondet: *Iudices non irā propria concitatos,* *S. Augus.*  
*sed legum ministros; nec suarum, sed alienarum examinatorum* *epist. 54.*  
*iniuriarum vindices esse debere.* Ista est Ecclesiae mansue-  
 tudo, quam eatenus Princeps emulari debeat, quatenus  
 & status publici tranquillitas, & leges ipsae patiantur.  
 Quamquam alioquin Principis existat, legum seuerita-  
 tem mitigare. Hoc loquitur Valentinianus tertius A. *Im-* *Valentin.*  
*peratoriae vis maior laudis est, aliqua decreta mollire.* Elegan- *Novell. 16.*  
 ter Themistius: *Aliam Regis, aliam Iudicis laudem ac vir-* *de Afr.*  
*tutem, esse prodit.* Quandoquidem Iudex secundum le- *Themist.*  
 gum praescriptum pronuntiare debeat, Regis verò sit le- *orat. 5.*  
 ges interdum emendare, earumque seueritatem & acer-  
 bitatem temperare. Libanius, idcirco, *Principes legum do-*  
*minos esse dixit: Leges autem maiestate sua ipsos potentiores*  
*efficere.* Merito itaque Vlpianus, *Principem legibus solu-*  
*tum esse* scribit, & fatetur B. Augustinus. De poenariis le- *D. de legib.*  
 gibus Graeci hanc explicant, quin & Latini scriptores sa- *S. Aug.*  
 cri. Arnobius Iunior, dum istum ex Psalmo illo Dauidi- *epist. 69.*  
 cae poenitentiae versum, *Tibi soli peccaui*, interpretatur, *Arnob. in*  
 ista refert: *Omnis qui sub iudicio vivit, cum deliquerit, peccat* *Psalm.*  
*Deo, peccat & legibus mundi: hic autem Rex sub nullo alio nisi*  
*sub Deo solo agens, ipsum solum super potestatem suam metuens,*  
*Deo soli peccavit.* Non aliter Cassiodorus, ut alter ab al- *Cassiod.*  
*ibid.*

Cassiod. ep.  
31. l. 10.

tero desumpsisse videatur. Apud eundem Cassiodorum Vitiges Rex, *causa Regiæ potestatis supernis est applicanda iudiciis, quandoquidem illa è cælo petita est, ita soli cælo debeat innocentiam.* Nec est quod quisquam mihi litem moueat de Ecclesiæ (cuius Rex filius est) auctoritate: nam illa tota spiritalis est, atque à cæde & sanguine omnino abhorreere certum est. Cuius rei apertissimum argumentum cernere est in Clerico, qui grauioris alicuius criminis conuictus & damnatus, ab Episcopo exauctoratus, & ordine Ecclesiæ spoliatus, nos degradatum vulgari vocabulo appellamus, Magistratui Politico, extremo afficiendus supplicio traditur. Elegans de hac re Canon extat

Conc. Tol.  
II. c. 6.

Concilij Toletani vndecimi: *His à quibus Domini Sacramenta tractanda sunt, iudicium sanguinis agitare non licet, & ideo magnopere talium excessibus prohibendum est, ne indiscreta præsumptionis motibus agitati, aut quod morte plectendum est, sententiâ propriâ iudicare præsumant, aut truncationes quaslibet membrorum, quibuslibet personis, aut per se inferendas præcipiant. Quod si quisquam horum immemor præceptorum, aut Ecclesiæ suæ familijs, aut in quibuslibet personis tale aliquid fecerit, & concessi ordinis honore priuetur, & loco suo. Quàm piè, quàm clementer B. Gregorius ad Sabinianum: Si in morte Longobardorum me miscere voluissem, hodie Longobardorum gens nec Regem, nec Duces, nec Comites haberet, atque in summa confusione esset diuisa. Sed quia Deum timeo, in mortem cuiuslibet hominis me miscere formido.*

S. Greg. I.  
7. ep. 1.

§. 15.

Hinc illos frustra esse contendimus, qui defendunt Apostolos merum imperium & ius gladij in corpora exercuisse, quandoquidem B. Petri voce & execratione Ana-



nias & Saphira repentina morte occubuerint, ac B. Paulus Elymam Magum excecavit. Aptissimè, ut ego arbitror, Gratianus: *Miracula sunt admiranda, non in exemplum nostræ actionis trahenda.* Quis non hæc extraordinaria fuisse animaduertit, solius Dei motione ac spiritu administrata, ita ut in argumentum non magis adduci debeant, & ad alios homines transferri, quàm factum Phinees Sacerdotis interficientis, & vno ictu conficientis Zambri Principem, cognationis & Tribus Simeonis, simul cum Cosbi filia Sur Principis nobilissimi Madianitarum? Nihil igitur causæ est, quod Rex ab Ecclesia omnis benignitatis & lenitatis scaturigine sibi timeat aut caueat, nisi ipsa Neronianum, vel Domitianicum seculum reuocasse videatur: quod tam ab Ecclesiæ mansuetudine abhorret, quàm materna pietas ab odio nouercali. Saluiano: *Ecclesia Dei placatrix est, non exacerbatrix.* Neque ullus tam parum de pietate Christiana cogitans, qui Christum neget Ecclesiæ formam & regulam cum suis agendi tradidisse. Christus quàm ab omni sœuitia & diritate alienus esset, apertissimè profitetur, cum omnium, id est, fidelium pastorem se affirmet, ac proinde minime furem, qui non venit nisi ut furetur, & mactet, & perdat; Ille verò ut oves propriæ vitam habeant, & abundantius habeant. Addit & lupo multo magis se dissimilem esse, cuius est rapere, & dispergere oves. Sic B. Paulus vult spirituales, cæteros qui lapsi fuerint, *in spiritu lenitatis* corrumpere & instruere. Ista hætenus Regi ab Ecclesiæ Christi sponsæ benignitate sit securitas. Externis, præsertim æmulis, nullam omnino fidem adhibeat, nisi quantum illorum fidem punicam & subleſtam æstimandam iudicauerit. Suorum si quos turbones, rebelliones, & Impe-

Act. 5.

Act. 13.

2.9.7.6.41.

Salu. l. 3. de  
gubern.

Galat. 6.



rij audios, quibus nulli vnquam status publici caruerunt, fortè deprehendat, in eos lege agi sinat, nec exorari aut fleeti se patiat, cum illorum absolutio Regem ipsum in suæ vitæ certissimum discrimen adducat necessum sit, & eorum salute, Principis salus periclitetur. Auo nostro parricidarum Regionum ferocissimo, amplectenda Aurelij Victoris sententia: *Ea delictorum quæ grassari immodicè ceperint, plus pena quàm seuerè excitanda esse. Quamquam si in immensum excreuerit eorum numerus, Antonini Pij Imperatoris congruum videri consilium, Necesse non esse sceleris in Principem cupidos pertinacius indagari. Ne fortè in tanta multitudine aliquis deprehendatur eius criminis conscius, vel suspectissimus, vt lex loquitur, ob quem in custodiam tradendum non modo Princeps, verumetiam vniuersum eius Imperium in apertissimum discrimen adducatur. Tum enim ista non erit longi subsellij iudicatio & mora, quandoquidem, si Vlpian. D. plano credendum, Seditio prærupta, factioque cruenta, vel 28. tit. 3. l. alia iusta causa moram non recipiant, non penæ festinatione, sed 6. §. 9. præueniendi periculi causa; tunc enim punire permittitur, deinde scribere. Sic enim auctore Tacito, Securitati, antequam Tacit. l. 11. vindiçtæ consulendum est. Istud idem docent nostri Theologi. Etiamne, inquires, nondum conuictus, nondum confessus hostis, sapienter Tacitus: Opportunos magnis conatibus transitus rerum, nec cunctatione opus, vbi perniciosior sit quies, quàm temeritas. Merito Quintilianus: Quadam Quintil. decla. 260. sunt Reipublice lese ad quorum pronuntiationem soli oculi sufficiunt. Vno nomine apud Senecam, Tutela certissima ex Seneca ep. 121. proximo est, sibi quisque commissus est. Quatis ratione sibi consulat Princeps, & minimo quoque momento pestem perniciemque à parricidis sibi imminere credat. Et quam-*




quam citra exitum cogitata subsederint, attamen imprimis caueat ne desperati hominis ista vox exaudiat: *Tu* Quintil. declam.  
*fortuna facies quod occurrerit, iam non potes efficere ut paniteat.* Cogitet Princeps ex vnus vel alterius patricidæ supplicio quantum emolumenti ad ipsum eiusque statum vniuersum perueniat. Tertuliani vera vox: *Miserum secari* Tertull. l. de pœnit.  
*& cauterio exuri, & pulueris alicuius mordacitate anxari: tamē*  
*men quæ per insuauitatem medentur, & emolumento curationis*  
*offensam sui excusant, & præsentem iniuriam superuenturæ*  
*utilitatis gratia commendant.* Sic vnus aut alterius impij patricidæ vltima necessitate & exitio sibi totique statui fœliciter cauissē, saluum se saluamque Rempublicam permansissē certissimè Princeps existimet.

## §. 16.

Audiant cæteri quod in persona sapientis, omnium mortalium sapientissimus Salomon, vnumquemque subditorum nosse voluit, atque ad eò profiteri: *Ego os Regis obseruo, & præcepta iuramenti Dei* (hoc est sacrum iusiurandum: Ecd. 8.) *Ne festines recedere à facie eius, neque permancas in opere malo, quia omne quod voluerit faciet, & sermo illius potestate plenus est, nec dicere ei quisquam potest, quare ita facis?* Ridicula Imperatorum Gentilium opinatio, qui se à vi qualibet & iniuria tutos existimabant Tribunitiæ potestatis dignitate susceptâ, quandoquidem ipsi Tribuni plebis sacri, hoc est, inuiolabiles haberentur, Rex Christianus sibi longè melius & certiùs cauissē putandus est, cum præter externum quo vallatus sit præsidium, tutelam videlicet sui peculiaris, & quidem potentissimi Angeli, qualis Principibus, Deo iubente, assignari solet, atque Angeli totius Regni custodis, qualem è numero Principum Angelorum existere, nemo qui sapiat dubitare au-

deat; domesticum apud se comparet, sempiternum videlicet omnib. in rebus agendi Diuini Numinis metum. Quibus validissimis adiumentis nixus ac sustentatus, multò rectius quàm M. Antoninus Imperator ista vsurpet, *Vulcat. Ant. Cass.* DEVS ME TVETVR, DEO PIETAS MEA CORDI EST. Quàm lubens itaque acclamationum veterib. vsitatarum formulas illas vsurpem, quibus *Amal. pref. l. de off. Eccle.* Amalarius Fortunatus Episcopus Treuerensis Ludouicum Pium Caroli Magni filium excepit. Sic igitur quantâ vocis contentione poterò, vt me omnes boni & verè Galli exaudiant, Henrici Magni filio Ludouico Pio occinam. DIVO HLVDVICO VITA. NOVO DAVID PERENNITAS. DA PRINCIPI DOMINE VITAM. IPSI NOVO SALOMONI FOELICITAS. PAX MVNDI VOS ESTIS. PIO PRINCIPI PROSPERITAS. DOMINE VITAM IPSI CONCEDE. VESTRA FIDES VOS SERVET. CHRISTVS QUEM VOS HONORATIS IPSE VOS SERVET. POTESTATEM VESTRAM DEVS CONSERVET. DEVS PACIFICET REGNV M VESTRVM. VITA VESTRA TVTELA OMNIVM EST. VESTRA FIDES ECCLESIVM EST GLORIA.





# VXOR IVSTA.

## CAPVT PRIMVM.

**V**XOR. Iusta quæ dicatur. Vxor columna quietis. Prius Sperata, Pacta, Sponsa. Sponsalia aliquando Matrimonio equata. Adulterarum triplex genus apud Hebræos, & suum cuique adsignatum supplicium. Apud Græcos Sponsalia penè iuris eiusdem cum nuptijs. Quàm pudicè Sponsus erga Sponsam se gerat. Perit mente virginitas. Matrimonium à Diuini Numinis inuocatione auspicandum, Publicè in Ecclesia celebrandum. Latinis, Græcis. Apud Græcos Sponsalia benedictione sacra peragi. Matrimonium publicè in Ecclesia celebrandum.

## CAP. II.

Nuptiarum aliæ legitimæ aliæ prohibita, & hæ in triplici differentia. Matrimonij definitio. Vxor quæ iusta, quæ legitima. Matrimonij bonum triplex.

## CAP. III.

Consensus in Matrimonio qualis. Magnatibus Rege inconsulto uxorem ducere non licet. De Matrimonio inter personas disparis cultus. Quæ legitimæ personæ ad Matrimonium contrahendum. Auaritiæ ratio nulla habenda ex varijs. De vetulis nupturientibus. De formæ studio.

## CAP. IV.

Matrimonij bonum primum quod est fidei explicatur. Mulierum delicta ex duplici fonte præsertim, Ambitionis & Auaritiæ. Mulierum habitus vel ad Cultum vel ad ornatum refer-

*tur. Mundus muliebris diuersus ab ornatu. Luxus vestium muliebrum reprehensus. Etiam impudicarum pudor aliquis. De gemmis & coma. Medea prima pilos tingere excogitauit. De unguentis. Mulieres quo pacto viris suis placeant. Mos patris quis seruandus. Calis Græcæ nobilissimæ luxu perditæ mors infelix.*

## CAP. V.

*Vxorum ornatus immoderatus quantum fidei coniugali officiat. Argumentum deformitatis pudicitia, vulgi sententiâ. Andronici Comneni Imp. historia. Fœmina amissâ pudicitia, ad peiora audacior. Moderatus mariti erga uxorem amor.*

## CAP. VI.

*Coniuges sibi mutuam pudicitia, & fidei coniugalis legem debent. Explicatio loci Apostol. i. Corinth. 7. Mulier sui corporis potestatem non habet, sed vir. Ad id insignis historia ex B. Augustino. Marito non licet, quod uxori non licet. Mariti in uxorem quale imperium. Ex Pythagora, quo pacto uxor in viri potestatem venit. Seruendi verbum, in uxoribus à B. Augustino usurpatum, benignè explicatum. Penes uxores domus cura. Mulieres olim solæ panem pinsebant.*

## CAP. VII.

*Bonum prolis. Nuptias non concubitus, sed consensus facit. In veteri Testamento. Cur Matrimonio tantum tributum fuit, quadruplex ratio. De Esæis. Adamo duæ filię, nuptæ Cain & Abel, ex B. Chrysost. An proles aut expectanda, aut concupiscenda. Matrimonium à matre non à patre dictum, & cur. Puerpera non nisi cum vitæ discrimine. An mater proprios lactare debeat liberos. Græci Μαῦρας, Matres ita Latini vocarunt. Mamma Ægyptijs primum matris lac. Liberi cuiusque familie firmamentum.*

CAP.



## CAP. VIII.

*De secundis nuptijs. Debiti coniugalis appellationes varieg. Aduersus repetitas nuptias Scriptores quæ sacri, quæ prophani aliquantum acerbiores. Mense Maio cur veteribus nuptiæ improbatæ. Secundæ nuptiæ SS. Patribus cur minùs laudatæ. Maritus etiam seruus appellatus.*

## CAP. IX.

*Sacramentum, bonum tertium Matrimonij quale sit, Nexus inter coniuges quanti faciendus. Benedictio nuptialis cuiusmodi, & varius inde ritus. Quandiu vxor absentem maritum expectare debeat antequam alteri nubat.*



## VXOR IVSTA.

## CAPVT PRIMVM.

**Q**UÆ vna res apud nos Christianos Catholicos plus venerationis & firmitatis, seu sacros religionis ritus, seu communem patrum conuentorumque fidem spectes, obtinere debuit, ea hoc tempore & pietatis & constantiæ non leuem fecisse iacturamprehenditur. Matrimonium dico, quod in dies singulos vel leui de causa, vel ementita quæsi iuris imagine nullo negotio solui perspicimus. Neque verò de Matrimonio vniuersim differere animus est: plus satis & nostris Theologis, & Iurisconsultis res ista pertractata est, nos alia via & ratione, Iustæ Vxoris solidam & expressam ima-  
Mm



ginem repræsentare instituimus, vt inde quod optimum firmissimûmque matrimonium existimandum sit, quiuis vel mediocri ingenio præditus intelligat. Est igitur primo loco quid sit Iusta Vxor explicandum, quæ meo iudicio non alia existimari debet, quàm quæ iure, & prout leges dictitant, alicui viro nubit, quæque secundum iusti & honesti rationem in ipso matrimonio sese gerit. De priore illa parte primûm dicamus. Veterum non-nemo Matrimonium iuuentutis portum esse dixit: nec abludit Scriptura Diuina, quæ Matrimonium Requiem appellat, & Vxorem, columnam quietis. Rem ita se habere omnibus perspicuum est, cû post tam varios, tamque multiplices adolescentiæ & iuuentutis æstus ac iactationes, tandem aliquis in tutissimum coniugij, quod sibi quæsiuit, portum sese recepit, vbi placidissimâ reliquo vitæ tempore quiete fruatur ac conquiescat. Requiæ & securitatis illius assequendæ spes non aliunde affulget quàm à sponsalibus: hinc enim quæ expetitur, *Sperata* nominatur, dehinc interposita stipulatione, *Pacta*, *Sponsa*, quamquam *Sperata* nomen retineat, vsque dum, vt olim, vsu, farre, coemptione, nunc verbis præsentibus & conceptis, sacro præeunte Ministro, adhibitis testibus nuptiarum fœdere iungatur. Ridet Arnobius Deorum Gentilium coniugia, *Vxores Dij habent; atque in coniugalia fœdera conditionibus veniunt antequasitis? vsu, farre, coemptione, genialis lectuli sacramenta condicunt? habent Speratas, habent Pactas, habent interpositis stipulationibus Sponsas?* Sic B. Augustinus: *Et institutum est vt iam Pacta, Sponsa, non tradantur statim, ne vilem habeat maritus datam, quam non suspirauerit Sponsus dilatam.* Atque vt ne quis leuem, nec satis certam conquiescendi spem ex Sponsaliorum conditione suspicetur,

*Eccles 36.  
Ruth. 3.*

*Non sperata.*

*Arnob. 4.*

*S. Aug.  
Confess. 8.  
cap. 3.*



illud obseruandum est, Sponsalia aliquando matrimonio æquata fuisse. Tertulliani acumen, *Desponsata quodammodo nupta, tamen inter quodammodo & verum satis interest.* Concilio Trullano istud firmatur. Cuius Canon inter postremos est eiusmodi: *Qui alteri desponsam mulierem, eo adhuc viuo cui desponsa est, in nuptiarum ducit societatem, adulterij crimini subijciatur.* Quærit Balsamo cum Zonara quo pacto adulterium in ea admittere aliquis possit, quæ nondum sub potestate mariti existat. Respondent Zonaras & Balsamo, Olim si osculum à viro in Sponsalibus cum arris sponsalitiis mulieri præbitum esset, iure fiebat, vt qui viro superstitie hanc Sponsam duxisset, adulterij reus ageretur, ac tum Sponsalia rescindere, & mulctam ex condito præfinitam exigere licebat. Nondum verò rescissis Sponsalibus Sponsa adhuc erat, quam qui sibi matrimonio copularet, adulterij crimine non immerito damnabatur. Addit insuper Balsamo, in lege Mosaica Sponsalia pro nuptiis reputata fuisse, & Sponsæ nomen etiam post nuptias retentum. Siquidem in Deuteronomio habetur: *Deute. 22. Si puellam Virginem desponderit vir, & inuenerit eam aliquis in Ciuitate, & concubuerit cum ea, vtrumque educes ad portam ciuitatis illius, & lapidibus obruentur; puella, quia non clamauit cum esset in Ciuitate; Vir, quia humiliavit Vxorem proximi sui. & auferes malum de medio tui.* Quibus verbis iam intelligimus quæ tantummodo Sponsa esset & Pacta, Vxorem nominari, & vitium illi factum, adulterium vocari, & supplicij genus adulteris destinatum: quanquam, vt adulteræ omnes eiusdem conditionis non erant, ita non eodem supplicij genere afficiebantur. Hebræorum Doctores triplex adsignant pro triplici adulterarum genere, siquidem mulier matrimonio copulata, adulterij

*Tertull de  
vel. Vir-  
gin.  
Concil.  
Trull. 29.*

*Balsa.  
Concil.  
Trull. Zo-  
nar. ib.*

*Deute. 22.*

M m ij



*Novell.  
Alex.  
Com.*

rea præfocabatur, mappa collo iniecta, & faucibus præclusis, testibus hinc & illinc eam distrahentibus, donec præfocaretur. Secundi generis erat adultera, Sponsa illa de qua locus allatus Deuteronomij agit. Tertiij generis adultera dicebatur filia Sacerdotis quæ alicui nupta, si adulterium admisisset, viui-comburium patiebatur. Sed ut ad nostra Sponsalia redeamus, etiam apud Græcos illa ferè in omnibus perfectis Nuptiis æquivalere cognoscimus, ex Nouella Alexij Comneni Imperatoris Constantinopolitani. Ex qua quæ ad rem præsentem faciunt, ista licet commemorare: *Cum Ius Vetus Sponsalia duntaxat in contrahentium voluntate constituat, nec quicquam amplius, quàm de consensu & subsequentibus hunc instrumentis ac Sponsalitiis arris sollicitum sit, ut habet Nouella Leonis Imperatoris, Nobis autem per Dei gratiam ad multò elegantius atque sanctius incrementum vitæ negotia peruenerint, ideoque non in nuptiis tantum, verum etiam in Sponsalibus sacra preces concipiantur & adiungantur.* Tandem definit illa esse propria Sponsalia, ac proculdubio eandem cum nuptiis vim habentia, secundum Synodalis subtilitatis considerationem,

*Novell.  
Leon. Ius  
Græco  
Rom. l. 2.*

quæcunque tempus illud, quod Imperatoris Domini Leonis Constitutio determinauit, integrum habuerunt, sacrasque preces comitantes agnouerunt, quibus in Sponsalibus tomi Synodalis observatio locum habere debet.

*Ius Græco  
Rom. 4.*

Porro tomus ille Synodalis nihil aliud indicat quàm sententiam de Sponsalibus pronuntiatam à Ioanne Xiphilino Patriarcha Byzantino, in Synodo habita Constantinopoli, qua definit Sponsalia loco Nuptiarum habenda, variasque ad id firmandum affert rationes. Sed illud non leue habendum est, quod omnes qui aderant Metropolitani & Episcopi communi consilio statuunt: *Qui alteri:*



desponsatam, necdum matrimonio copulatam, in uxorem duxerit, eum pro bigamo habendum, nec unquam ad Sacerdotij gradum promouendum. Haecenus de Sponsalibus secundum posteriores Græcorum sanctiones, quamquam Balsamoni hac in re aliquantisper varium animaduerto, ut videre est in Scholiis ad epistolam B. Basilij ad Amphilo-  
Balsam. in ep. S. Basil. ad Amph.  
 chium. Interim operæ pretium videtur, ut Sponsaliorum honestatē & modestiam repræsentemus, quatenus Sponsus erga pactam & Sponsam adeò purè pudicēque se gerat, ut ipso solemni, in Ecclesia, ritu, celebrati matrimonij die, planè signatam, & à viro integram se Virginem nactam esse gloriatur. Quam in illa sua Sperata integritatem desiderat, eam ille doceat, nec intemperanter, & immodestè cum ipsa versetur. Nouerit istud S. Hieronymi,  
S. Hieron. in vita S. Hilari.  
*Tactus, iocos, nutus, esse moritura Virginitatis principia.* Videat ne his blanditiis & illicitis, Sponsæ animo rei maritalis cupiditatem inferat inducātque. Iam illius Virginitatem hoc impudico affectu grauissimè labefactatam, imò, si priscis Ecclesiæ Patribus credendum est, extinctam & intermortuam esse dicemus. Lactantio: *Etsi corpus nulla sit labe maculatum, non constat tamen pudicitia ratio, si animus incestus est: nec illibata castitas videri potest, ubi conscientiam cupiditas inquinauit.* S. Hieronymo: *Perit & mente Virginitas.* S. Ambrosio: *Non sola carnis Virginem facit, sed etiam mentis integritas.* Apud Senecam patrem: *Incesta est etiam sine stupro, quæ stuprum cupit.* Hanc perfectam castimoniam & Sponsus & Sponsa, à Dei singulari benignitate sibi contingere credant, nec aliam sibi uxorem concessumiri Sponsus persua-deat, quàm eam quam suis meritis congruere præpotens Deus iudicauerit: *Si iratus, malam, ut aiebat Menander, si propitius, bonam, auctore B.*

M m iij.



S. Hilar.  
in Psal. 117

S. August.  
serm. 46.  
de verbis  
Dom.

Capit. 7.  
c. 300.

S. August.  
civit. 4. c.  
11. 6. c. 9.  
Plato 8. de  
legibus.

Tertull. 2.  
ad uxor.

Hilario. Neque verò Sponsus ipse & Speratus aliud sibi licere credat quàm quod in sua Sperata tantoperè expectit, meminerit dicti S. Augustini: *Si ducturi estis uxores, servate vos uxoris vestris: quales vultis eas inuenire, tales & ipsæ inueniant vos: intactam queris, intactus esto; puram queris, noli esse impurus.* Sic in Capitularibus: *Sciendum est omnibus, & firmiter retinendum, quod hi qui ducere uxores voluerint, sicut eas castas & incorruptas cupiunt inuenire, sic ad eas casti & incorrupti debent accedere, easque cum benedictione Sacerdotis, sicut in Sacramentario continetur, accipere, sed prius eas dotali titulo debent conligare.* Sed quoniam in superioribus nonnulla facta est mentio Sacerdotalis benedictionis in nuptiis adhibendæ, de ea paulò fusius & accuratius differere hoc tempore necesse videtur, quandoquidem cō prolapsi sunt mores nostri, vt qui matrimonium contrahunt, mutuo illi consensui adeo sint addicti, vt Paræci sui benedictionem nonnisi dicis causa expetant. Verum matrimonij rite ineundi nulla vel sanctior, vel iustior ratio vnquam visa est quàm à Diuini Numinis inuocatione. Etiam Gentiles ipsi nuptiis faciendis nonnullos Deos Deasque inuocabant, & adesse credebant, de quibus S. Augustinus. *Quin Platoni nupta mulier cum Diis & sacris nuptiis in domum mariti venit.* Sed hac veterum missa credulitate, iam istud à veteris Ecclesiæ temporibus in more positum fuisse legimus, vt nuptiæ nunquam sine benedictione sacerdotali, eaque peculiari componerentur. Tertulliani vel locus vnicus id apertè & abundè confirmat, dum mirificè commendat fœlicitatem matrimonij: *Quod Ecclesia conciliat, confirmat oblatio, & obsignatum Angeli renuntiant, Pater rato habet.* Hanc Ecclesiæ conciliationem innuere videtur B. Igna-



tius, cum scribit eos qui Sponsalia contrahant approban-  
 te Episcopo coniugium inire debere. Concil. Carthagi-  
 nensi 4. *Sponsus & Sponsa cum benedicendi sunt à sacerdote,*  
*& parentibus suis vel Paranympis offerantur, qui cum bene-*  
*ditionem acceperint, eadem nocte pro reuerentia ipsius benedi-*  
*ctionis in Virginitate permaneant.* S. Ambrosius eadem ha-  
 bet: *Coniugium velamine & sacerdotali benedictione sancti-*  
*ficari oportet.* Et alio loco: *Eodem iugo benedictionis utriusque*  
*coniugum colla sociari dixit.* Omitto locum Epilogi Concil.  
 Romani sub Syluestro, quo habetur, *Vt Presbyter ordi-*  
*netur, qui sit vnius uxoris vir, quæ tamen à Sacerdote sit bene-*  
*dicta.* Alij aliam habent huius Decreti lectionem, quam  
 non vrgeo. Extat Decretum Hormisdæ Papæ, relatum à  
 Gratiano: *Nullus fidelis, cuiuscumque conditionis sit, occultè*  
*nuptias faciat; sed benedictione accepta à Sacerdote, publice nu-*  
*bat in Domino.* Interim quod ad vocem illam benedictio-  
 nis attinet, explicanda videtur in Concilij Aurelianensis  
 tertij Canone eiusmodi, ne incautum lectorem in erro-  
 rem inducat. Ita verò se habet: *Clerici qui cum uxores non*  
*haberent, benedictione suscepta, coniugia crediderint eligenda.*  
 Benedictio eiusmodi explicatur Concilio Aurelianensi 5.  
 pro ordinis susceptione, vel ordinatione, seu adsignatio-  
 ne ad titulum, seu locum certum, secundum Canonem  
 sextum Concilij Chalcedonensis. Capitularium lib. 7. sta-  
 tuitur: *Vt quisquis uxorem legitime ducere cogitet, per consilium*  
*& benedictionem Sacerdotis, & consultu aliorum bonorum ho-*  
*minum eam sponsare, & legitime dotare debeat.* Idem repeti-  
 tum alijs locis. Additione quarta, initio: *Si quis Christia-*  
*nus & Christiana nouiter nuptiale festum celebrare voluerint,*  
*non aliter quàm cum premissis dotis titulo, quo in Christianis sa-*  
*lubri institutione præceptum est, & Sacerdotali benedictione*

S. Ignat. ep.  
2 ad Poli-  
carp.  
Conc. Car-  
thag 4. c.  
13.

S. Ambr.  
epist. 70.  
Idem 5.  
hexam. c. 7.  
Concil.  
Rom. 2.  
Epil.

V. q. 5. c. 2.

Concil. 3.  
Aurel. c. 7.

Conc. Au-  
rel. 5. c. 4.

Capit. 7.  
c. 127.  
Ibid. c. 358.

Addit. 4.



(intra sinum sanctæ Ecclesiæ) *percepta, coniugium cuiquam ex his adire non permittimus.* Græcis non aliter visum: Si-  
 quidem Harmenopulus in suo iuris promptuario hoc  
 tempore matrimonium nudo consensu minimè contrahi  
 contendit, sed sacris & Sacerdotum precibus interpositis  
 corroborandum esse; alioquin nec contractæ nuptiæ  
 habeantur, nec prohibentur qui ita contraxerint, à se in-  
 uicem disiungi. Istud firmat ex Nouella Leonis Impera-  
 toris, cognomento Philosophi, tum alia Alexij Comne-  
 ni. Balsamo de ea re ista scripsit, ut quos in matrimonio  
 non coniungat Deus, per sacram Sacerdotum benedi-  
 ctionem assumptus, siue aduocatus, hos omnes ad pecca-  
 tum conuenire affirmet. Quo pacto necessaria sit in nu-  
 ptiis ista *ιεργλογία*, ut vocat, seu benedictio sacra, alio lo-  
 co demonstrat, sed istud addit præterea ad Nomocano-  
 nem Photij, non modò nuptias, sed etiam ipsa sponsalia  
 benedictione sacra peragi. Extat sanctio Basilij Macedo-  
 nis Imperatoris, aduersus Sacerdotes qui clā & secretò no-  
 uos coniuges benedicerent. Athanasius Patriarcha Con-  
 stantinopolitanus, epistola ad Episcopos proficiscentes  
 ad suas Dioceses, verat ne noui coniuges ante benedictio-  
 nem sacerdotalem vna cubēt. Nicephorus Chartophylax  
 de seruorum coniugio istud respondet: *Si serui sine sacra*  
*benedictione cum ancillis coniuncti sint, scito nisi benedictione*  
*initientur, non debere Diuinorum Sacramentorum fieri partici-*  
*pes, sed ut scortantes ab ijs prohiberi.* Sacri Concilij Triden-  
 tini Oraculum peruiacissimo cuique satisfacere, si mo-  
 do existat Christianus Catholicus, necessum est, quo præ-  
 cipitur *Matrimonium contrahentibus, benedictionem Sacer-*  
*dotalem in Templo suscipiendam esse.* Omitto alia, quæ hoc  
 Syntagmate sparsim obseruari possunt.

CAP. II.

*Harmen.*  
*l. 4. tit. 4.*  
*in Schol.*

*Nouell. 89.*  
*Nouell.*  
*Alex.*  
*Comm. 3.*  
*Balsalm.*  
*ad ca. 8.*  
*Coc. Trull.*

*Balsam.*  
*c. 38. ep. 1.*  
*S. Basil. ad*  
*Amphil.*  
*Balsam.*  
*Nomoc.*  
*Phot. tit.*  
*13. c. 2.*  
*Ius Græc.*  
*Rom. 2.*  
*Nouell.*  
*Basil. Mæ-*  
*ced. tit. 4.*  
*Athanas. ep.*  
*ad Episcop.*  
*Niceph.*  
*Chartoph.*  
*respons.*  
*Coc. Trid.*  
*sess. 24. c. 1.*



## CAP. II.

Nunc ad Matrimonium explicandum sermonem conuertamus, ut quæ sit Iusta Vxor dicenda inde facilius appareat. Sed antequam matrimonij seu definitionem, seu descriptionem proferamus, illud non vnius generis esse in primis videndum est. Latinis scriptoribus nuptiarum vox pro matrimonio vsurpari solet, ut alia significata omittam; quemadmodum *γάμος* apud Græcos quæ sæpe occurrit in epistola S. Basilij ad Amphilochium. Nuptiarum autem alia sunt legitimæ, alia prohibitæ: hæc in triplici sunt differentia. Aut enim sunt nefariæ, quæ contra legem scita conficiuntur, ut si quis eam cuius tutelam gerit, vel ipse, vel pater ipsius vxorem ducat, vel eam quæ sit sub tutela patris: Aut sunt damnatæ, ut si quis matrimonium contrahat cum Nonna siue Sanctimoniali, aut alia Deo dicata: Aut incestæ, cum consanguinea intra gradum quartum. Ita differit Balsamo ad epistolam istam S. Basilij. Neque me latet ex nostris, nec non etiam ex Iurisconsultis, nonnullos aliam instituere partitionem, scilicet si modò nouerimus seu Matrimonij, seu Nuptiarum, ut generatim dicam, alias esse legitimas, alias illegitimas. has mittamus, & quæ sint illæ legitimæ, quas alio nomine Matrimonium vocamus, dispiciamus. Apud Græcos matrimonium est coniunctio maris & fœminæ in totius vitæ confortium, Diuini & humani iuris communicatio, siue per benedictionem, siue per coronationem, siue per instrumentum contrahatur. Latinis verò, & nostris præsertim Theologis, Matrimonium est viri & fœminæ legitima coniunctio, indiuiduam vitæ consuetudinem reti-

S. Basil. ep.  
ad Amphi.

Balsam. ad  
cap. 2. epist.  
15.

Basil. ad  
Amphi.

Ius Græc.  
Rom. l. 8.

N n



Quintil.  
declam.  
6.247.

nens. Coniunctio dicitur, quandoquidem licet multa perfecto matrimonio inesse debeant, videlicet consensus interior contrahentium; pactum externum verbis expressum, obligatio, & vinculum quod ex eo pacto efficitur, & coniugum copula, qua matrimonium consummatur: nihil tamen eorum matrimonij vim & rationem propriè habere dicitur, nisi obligatio illa & nexus qui coniunctionis vocabulo exprimitur. Particula ista (*legitima*) apposita est ut sciamus personas illas matrimonium contrahere posse, quæ nullo iure, siue Diuino, siue humano prohibentur. Quod superest, fusius postea explicabimus. Et quanquam non erat mens mea Theologica hæc attingere, tamen faciam obiter, & velut suspensa manu, ac quandiu ista iis quæ à nobis dicenda sunt, adlucere videbuntur. Modò videndum est que sit Vxor Iusta dicenda, non alio certè sensu, quàm iustæ nuptiæ, & iusta proles, iusti liberi nominantur apud Iurisconsultos. Quintilianus in suis declamationibus, uxorem definit, *Fæminam viro per nuptias collocatam & traditam, quæ in societatem vitæ venit*. Sed aut ignorauit, aut dissimulauit non omnes fæminas idoneas videri, quæ nuptui tradi possunt, cum in nonnullis etiam reclamet natura, quatenus cum hominibus sola lege naturæ utentibus res ageretur. Etsi gentes nonnullæ eo usque deprauatæ extiterint, ut in iis nullum discrimen agnouerint, quod de Persis scribitur, & quod hoc prouerbio tacitè indicatur, *Athenis dimidium, Alexandria totum*: At tamen gentes reliquæ omnes ab ea re tanquam insigniter nefaria & detestanda, vehementer abhorruerunt. Quod de societate vitæ dixit Quintilianus, perpetuam & constantem minimè intellexisse visus, ob repudiij usum apud Romanos, aliosve populos receptum.



Sed quale sit iustum Matrimonium, vnde Iusta Vxor, speciatim dispiciamus. Quod re vera iustum existat, illud idem perfectum videri, nemo tantisper in lectione summi præceptoris Aristotelis versatus negabit, neque aliter existimandum est legitimum Matrimonium concipi posse, quàm quod sui natura & conditione perfectum sit, & hoc apparet maximè, quod matrimonio eiusmodi bonum insit non leue & simplex, sed multiplex, tum boni ac perfecti communis ratio sit. Quale verò bonum in matrimonio deprehendatur, sic docet S. Augustinus: *Bonum* S. August.  
*nuptiarum per omnes gentes atque omnes homines in causa ge-* 1.9. de Gen.  
*nerandi est, & in fide castitatis. Quod autem ad populum Dei* ad litterā.  
*pertinet, etiam in sanctitate Sacramenti, per quam nefas est,* c. 7. & de  
*etiam repudio discedentem alteri nubere, dum virei viuit, nec* bon. coniug.  
*saltem ipsa causa pariendi. Quæ cum sola sit qua nuptiæ fiunt,* c. 24.  
*nec eare subsequente propter quam fiunt, soluitur vinculum nu-*  
*ptiale, nisi coniugis morte. Generationis itaque causa fieri nu-*  
*ptias Apostolus ita testis est. Volo, inquit, iuniores nubere. Et*  
*quasi ei diceretur: Vt quid? Continuo subiecit, filios procreare,*  
*matres familias esse. Ad fidem autem castitatis illud pertinet:*  
*Vxor non habet potestatem corporis sui, sed vir: Similiter & vir*  
*non habet potestatem corporis sui, sed mulier. Ad Sacramenti*  
*sanctitatem illud; uxorem à viro non discedere, quod si discesse-*  
*rit, manere innuptam, aut viro suo reconciliari, & vir uxorem*  
*non dimittat. Hæc omnia bona sunt, propter quæ nuptiæ bo-*  
*næ sunt, proles, fides, Sacramentum. Quàm concinnè paucis*  
*verbis ista expressit alio loco sanctissimus Episcopus:*  
*Quod bonum habent Nuptiæ, tripartitum est, Fides, Proles, Sa-*  
*cramentum. In Fide attenditur ne præter vinculum coniugale*  
*cum altera vel altero concumbatur. In Prole, ut amanter susci-*  
*piatur, benignè nutriatur, religiosè educetur. In Sacrament*

Nn ij

*autem, ut coniugium non separetur, & dimissus aut dimissa, nec causa prolis, alteri coniungatur. Multò paucioribus verbis hæc tria complexus est S. Fulgentius: Fatemur à Deo esse nuptiarum fidem, coniugum charitatem, naturæ fecunditatem.*

*S. Fulgent.  
epist. 3.*

## CAP. III.

**Q**Vandoquidem Matrimonij à nobis antea prolata definitio, aliquanto prolixiorum eius explicationem postulare videatur, nihilominus cum res à nostris & Iurisconsultis abundè pertractata est, de ea nonnihil strictim & velut saltuatim dicendum videtur. Consensum in Matrimonio contrahendo tanquam principium & fundamentum requiri, omnibus in confesso est. Theologis & utriusque Iurisconsultis verbum vulgatum, consensum non concubitum Matrimonium efficere. Qui consentire possint vel debeant, examinandi sunt. Non impuberes certè, de quibus Nostri plus satis, sic Græci recentiores in Iure Græco-Romano, & Nouella Leonis sapientis Imperatoris. Addo Historiam nobilem infœlicissimi matrimonij impuberum. Honorius Imperator uxorem duxerat Mariam, Stiliconis filiam, & eam impuberem, inuestem: Vxor Stiliconis artibus cuiusdā veneficæ, quoniam puella non esset legitimæ ætatis, Honorium Imperatorem ad vsum matrimonij impotentem effecit: Sed Maria mortua, alteram Stiliconis filiam Thermantiam uxorem accepit, ex qua mater prole nasci tum mopere desiderabat, sed frustra, veneficio remanente, postmodū Stilico Imperatoris socer eiusdem iussu interfectus, & Thermantia repudiata. Sunt & alij præter impuberes, qui sui iuris non sint, sed sub alterius potestate, cuius in primis consensus expectandus.

*Ius Græco-  
Rom. l. 4.  
8,*



Ad hanc classẽ pertinent cuiusque Regni Magnates, qui quamquam ætate grandiores, attamen, Rege inconsulto, quamcumque ipsi voluerint vxorem ducere nequeunt, quod ex B. Bernardi Epistolis apparet. Ipse verò consensus adeo liber esse debet, vt nulla omnino vis aut necessitas adhibeatur. Et quis coactas nuptias non damnat? S. Ambrosius in Epistolam priorem ad Corinthios, dum explicat istud Apostoli, vbi agit de vidua Christiana. Cui vult nubat tantum in Domino, hæc habet. *Id est quem sibi aptum putauerit, illi nubat, quia inuita nuptiæ solent malos prouentus habere.* Elegans Quintiliani locus de ea re in declamationibus. *Nusquam libertas tam necessaria quàm in matrimonio est. Ego eligam cum qua victurus sum, ego comitem laborum, sollicitudinum, curarum ipse perpendam. Quis enim amare alieno animo potest?* Sic Iustiniano, *Ex affectu omnes introducuntur nuptiæ.* Et quidem Concilium Toletanum tertium statuit, *Seu viduas, seu virgines propria voluntate maritos habere.* De viduis hoc addit, *Ad nuptias iterandas venire, non esse cogendas.* De virginibus vero, *Ne extra voluntatem parentum, vel suam cogantur maritos accipere.* Et apud Quintilianum alio loco. *Compositis ætatibus coacta matrimonia tamen faciliè fastidiunt, siue non habet omne quod licet voluntatem, seu continuis vicina satietas, siue durum est quod necesse est.* Quin experientia ipsa docuit istud S. Hieronymi verissimum esse. *Nullam maiorem inimicitiam quàm amicitias necessitate sociare.* S. Cypriano auctore, *Quis illi (Virgini) in nuptiis locus est, cui animus ad nuptias non est?* De cæteris legitimis personis aliquid videndum: & quamquam de iis, qui planè repugnantem & omnino disparem religionis cultum profitentur, matrimonio minimè copulandis, plures copiosè scripserint, attamen illud vnicum addam

S. Ambrosius  
in epist. 1.  
ad Cor. 7.

Quintilianus  
declam.  
306.

Cod. de  
Nupt. l.  
26.

Conc. Tolet.  
3. c. 10.

Quintilianus  
declam.  
257.

S. Hieronymus  
Dialog. 2.  
contra Pelag.  
S. Cyprianus de  
hab. Virgin.

N n iij



B. Zeno.  
Serm. de  
contin.

B. Zenonis Veronensis Episcopi, de coniugio Christianæ mulieris cum Gentili & Idololatra, quod ad Catholicæ mulieris cum hæretico matrimonium aptè referri posse, nemo sanæ mentis dubitabit, quandoquidem peruulgatum istud apud Ecclesiæ Patres antiquos, quæ Græcos, quæ Latinos, hæresim, Idololatriam, & hæreticos Idololatrias esse, ac solo nomine Christianos. *Proponamus*, inquit, *ut sepe contingit, in unum sibimet conuenire diuersæ religionis diem, quo tibi Ecclesia, illi adeundum est templum, quo genere unusquisque suum sacrificium procurabit? quo sumptus? quibus uasis? quibusue ministris? At si discretè fiunt ista, nihil prodest, ex uno enim proficiscendo, & in unum remeando, si non confusione vel errore, fiunt una. Quid quod illius sacrificium publicum est, tuum secretum, illius à quouis liberè tractari potest, tuum etiam à Christianis ipsis minimè consecratis, sine sacrilegio videri non potest. De hac quæstione Græci recentiores satis abundè disserunt in suo iure Græco-Romano. At reliquas legitimas personas expendamus, quas esse existimamus cuiusmodi quæ sibi inuicem respondeant & pares sint. Amplissimus dicendi campus hoc tuo infœlicissimo, quo vni studetur auaritiæ, & quod de sui sæculi vitio dixit S.*

Ius Græc.  
Rom. 8.

S. Hieron.  
aduers.  
Iovin.

Hieronymus, quanto rectius & verius de nostro pronuntiare licet, *Multi non oculis sed digitis uxores ducunt homines, & iudicij expertes, & rationis, qui non aduertunt amplissima, & lautissima dote sibi grauissimam seruitutem & iugum, uxoribus libertatem & imperium quæri. Varro longe antea de suis ista refert, Doti dato Insulam Chium, agrum cœcubum, seplassia Capuæ, macellum Romuli. Lepidum istud est cum*

Plutarch.  
Demetr.

Demetrius Rex filio suaderet viduam verulam, sed diuitem ducere uxorem, versumque Euripidis deprauatum eius rei gratia proferret.



*Vbi lucrum suadet, reluctetur licet natura, ducas coniugem.*  
Filius contra, qui hoc renuebat, verum Euripidis versum  
reponcbat.

*Vbi lucrum suadet, reluctetur licet natura, seruius coniugi.*  
Apud Plautum siquidem vera dixit qui ista profert: *Ar-*  
*gentum accepi, dote imperium vendidi.* Sic Martialis:

*Vxorem quare locupletem ducere nolim,*

*Quaritur? uxori nubere nolo mea.*

*Martial.*

8.

*Epigr. 12.*

Diuitem vxorem ferre, tormentum appellabat Theophras-  
tus apud S. Hieronymum.

*S. Hier. 1.*

*in Iovin.*

*Iuuenal.*

*Satyr. 6.*

*Quis ferat vxorem cui constant omnia,*  
aiebat Iuuenalis. Archidamus Rex Sparta ab Ephoris  
multatus, quod deformem duxisset, sed diuitem. Et So-  
lonis Lex, ne Sponsa ad Sponsum afferret plusquam tres  
vestes, & supellectilem non magni precij. Recte Plato-  
nicus Madaurensis, *Virgo formosa, & sisit oppido pauper, ta-*  
*men abunde dotata est, affert quippe ad maritum nouum animi*  
*indolem, pulchritudinis gratiam, floris rudimentum. Ipsa vir-*  
*ginitatis commendatio iure meritoque omnibus maritis acceptissi-*  
*ma est. Nam quodcumque aliud in dotem acceperis, potes cum*  
*libuit, ne sis beneficio obstrictus omne ut acceperas retribuere.*  
*Sola virginitas cum semel accepta est, reddi nequitur, sola apud*  
*maritum ex rebus dotalibus remanet. Sed hac protrita & mi-*  
*rum est vnus avaritiae studio nonnullos vxores ducere,*  
*non dicam deformes admodum, nigricantes, vel quae*  
*cum bona valetudine perpetuum fecerint diuortium, &*  
*forfan tales, quales sine horröre mariti attrahere non au-*  
*deant. Aeditio edicto serui, proterui, dementes, me-*  
*lanchoici, aleatores, vinarij, gulosi, impostores, men-*  
*daces, timidi, auari, iracundi, litigiosi improbantur, &*  
*probantur eius generis vxores modo locupletes? Sapiēter*

*Plutarch.*

*Solon.*

*Apul.*

*Apolog.*

*D. 21. tit.*

*1. l. 1. 2. 3.*



Aufon.  
Lud. Sap.  
Calpur.  
declam.  
29.

Solon apud Aufonium: *Par pari iungatur coniux, quidquid impar dissidet.* Apud Calpurnium: *Si vir diues puellam pauperem uxorem velit ducere, inimicum appellatur matrimonium.* Ne pecora quidem, inquit, iugum nisi paria succedunt. Sed quis non rideat, imo stomachosè detestetur Anus, quia sibi ingentes coaceruarunt nummorum cumulos nupturientes. At iuvenes florida ætate, corpore vegeto, anus illas recoctas sibi matrimonio copulare, aut Itupor est, aut infania mera. Audire licet S. Zenonem de vetulis istis nuptias ambientibus eleganter differentem iis verbis: *Pudet me dicere in populo gravi anus sæpe videri novas nuptas, quarum penè plures sunt nuptiæ quàm natales, quæ non rogantur, ut nubant, sed ut dormiant, inuitantur propiores sepulchro quàm thalamo.* Audiendus monitor Quintilianus, *Non amatur anus uxor nisi memoria,* Adde quantumuis illa sese ornct, & ad speculum componat, suasque veneres pristinas ex nartheciis suis accersat, etiam vetulæ puellascunt, aiebat Vârro:

*Merus hic ludus est, nec quidquam ad verum.*

*Anus cum ludit morti delicias facit.*

Syr. Mim.  
Plutarch.

Aiebat Syrus ille Mimographus. Peruulgatum istud est, Dionysium Tyrannum matri nupturienti dixisse. O mater, iura ciuilia violari possunt, iura naturæ nequaquam. Sic Poëta veterum nescio quis,

Catalect.

*Casum Cascam duxisse non mirabile est,  
Quoniam Charon eas faciebat nuptias.*

Clem. A-  
lex. 2.  
Pedag. c.  
10.

Non immeritò itaque Clemens Alexandrinus dixit naturam quoad liberorum procreationem, temporis rationem habuisse, quatenus illam pueris denegarit & senibus, quibus idcirco interdictum sit matrimonium. Satyricè & tamen aptè Iuuenalis de anu nupturiente,

Iuuen.  
Saty. 6.

Tuné



Tuné etiam quam sextus & octogesimus annus  
Pulsat, adhuc Græcè?

Neque vero sunt prætermittendi qui solo formæ studio  
ducti vxores sibi iungunt. S. Hieronymus illos graphice *S. Hier. 1.  
in Iouin.*  
describit: *Amor formæ rationis obliuio est, & infantæ proxi-  
mus, fœdum minimèque conueniens animo sospiti vitium, tur-  
bat consilia, altos & generosos spiritus frangit, à magnis cogita-  
tionibus ad humillimas detrahit, querulos, iracundos, temera-  
rios, durè imperiosos, seruiliter blandos, omnibus inutiles ipsi  
nouissime amori facit: nam cum fruendi cupiditate insatiabili  
flagrat, plura tempora suspicionibus, lachrymis, conqueſtioni-  
bus perdit, odium sui facit, & ipse nouissime sibi odio est.* *Iuuen.  
Sat. 6.*  
De il-  
lis nihil aliud pronuntiandum quam quod dixit Iuuenalis,

— Facies, non vxor amatur.

## CAP. IV.

**M**atrimonij quod primo loco bonum constituitur, *S. Aug. de  
bo. viduit.  
c. 4.*  
fidei bonum vocant, aliàs ex B. Augustino, bonum  
pudicitiae & castitatis quo coniugum vterque sibi mutuo  
secundum Iustitiæ regulam, actum debitum reddere te-  
netur. Istud explicat ille idem sanctissimus Ecclesiæ Do-  
ctor. *Vides coniugalem pudicitiam & thori Christiani matri-  
monialem fidem donum esse, & hoc à Deo, vt illud quod vltra  
liberorum procreandorum necessitatem, modum concumbendi ali-  
quaenus concupiscentia carnalis excedit, non nuptiarum sit hoc  
malum, sed veniale sit, propter nuptiarum bonum. Sed quæ  
tantum bonum, vel funditus euertant, vel saltem grauif-  
simè labefactent, disquirendum est. A sequiori sexu or-  
diri placet, quandoquidem multò sæpius in legem Iuliam* *Tacit. 3.  
Annal.*  
ille committat, quam sexus melior. Valerius Messalinus

O o

Sen. 2.  
Contr. 7.

Linus  
libr. 34.

Tertull. de  
hab. mul.

apud Tacitum, mulierum delicta ex duplici fonte arcescere videtur, Ambitionis & Auaritiæ. At ne in immensum excreseat oratio, pro instituti ratione, de utroque pauca dicam. De Auaritia postea videbimus, & in quem usum, sat sit dixisse cum Seneca Patre, *Muliebrium vitiorum fundamentum esse avaritiam*. Ambitionem muliebrem qui non exagitarunt, seu Græci, seu Latini? vnus præsertim audiendus Cato ille Censorius, summus vt rectè viuendi, ita benè sentiendi apud Romanos magister. Romanæ matronæ legem Oppiam, qua cautum erat ne qua mulier plus semunciam auri haberet, abrogari incredibili studio & pertinacia contendebant. Cato grauissimè aduersus hanc mulierum proteruiam dixit: *Maiores nostri, inquit, nullam ne priuatam quidem rem agere fæminas sine auctore esse voluerunt: In manu esse parentum, fratrum, virorum, nos (si Dis placet) iam etiam Rempublicam capeßere cas patimur, & foro quoque & concionibus & comitijs immisceri. Date frenos impotenti nature, & indomito animali, nec sperate ipsas modum licentiæ facturæ nisi vos faciatis: Minimum hoc eorum est quæ iniquo animo fæminæ sibi aut moribus aut legibus iniunctum patiuntur: Omnium rerum libertatem imo licentiæ, si vera dicere volumus, desiderant.* Ambitionem muliebrem quantumcumque sese diffundat, non est huius loci singillatim recēdere. De vxorum ambitione agitur, cuius certissimum argumentum est sese exornandi cura immodica, & incredibilis, quæ quid mali pariat postea indicabimus. Tertullianus habitus fæminæ duplicem speciem statuit, cultum & ornatum. *Cultum dicimus, inquit, quem mundum muliebrem vocant: Ornatum, quem immundum muliebrem conuenit dici. Ille, in auro & argento, & gemmis & vestibus, deputatur: Iste in cura capilli & cutis, & carum partium corporis quæ ocu-*



los trahunt. *Alteri ambitionis crimen intendimus, alteri prostitutionis.* Bona verba, Tertulliane, quis maritus suæ uxoris illuuiem, imbalnitiem, imperfundiem, incuriam velit amplexarier? Quin ille idem, alio loco ista paulo duriora ita mitigasse videtur; inquit, *Non ad crudam in totum & ferinam habitudinem insinuandam vobis suggerantur, nec de bono, corporis squalorem, sed de pudoris suademus, sed de modo & cardine, & iustitia corporis excolendi.* Malo Iuriconsultorum sententiam, quos ut sibi notissimos sequi *Pa. l. sc̃.  
3. in. 7.* debuit Septimius ipse. Ipsi mundum muliebrem ab ornatu rectè secernunt. Munda mulier à mundo muliebri dicta est, cultum vocauit Tertullianus. Est autem mundus muliebris, speculum, conchæ, situli, item pyxides, vnguenta & vasa in quibus ea sunt. Item sella balnearis, & cætera eiusmodi, quibus mundior lautiorque mulier efficitur. Ornamenta verò sunt, quibus ornata dicenda est, & per quæ ornatio efficitur mulier, veluti annuli, catenæ, reticula, & cætera quibus collo vel capite, vel manibus mulieres ornantur. Nec me latet Tertullianum responsurum, seu Iuriconsultorum responsa, seu vulgò apud Gentiles receptum morem, apud Christianos locum non habere, à quibus penitus abhorreat Christiana disciplina. Attamen omnem omnino ornatum à Christiana muliere reiiciendum esse, non omnes veteris Ecclesiæ scriptores affirmant, quod mox videbimus: luxum, exquisitam & sumptu sæpius detestando comparatam munditiem ornatumque damnamus. Et quidem Tertullianus paulo durior de studio incredibili mulierum in effingenda vultus pulchritudine ista scribere non dubitauit, *Lenocinia formæ nunquam non prestituto corpori coniuncta esse.* Neque abnucrim ut non om-

*Tertull. de  
cult. fam.*

Cornel.  
Cels. 6.  
Athen. 12.

Clem. A-  
lex. 2. P.e-  
dig. c. 10.

Amm.  
Marc.  
lib. 14.  
Tertull. de  
cultu fœ-  
min.  
S. Hier.  
Epist. 7.  
ad Latam.

nes vxores vnius eiusdemque conditionis existunt: nam plebeia sunt, & quidem multo plures, alia generis nobilitate, aut mariti magistratum gerentis splendore conspicua, sic non pari ornatu exornari æquum est. Luxum istum excutiamus, cui amplectendo adeo proclius est mulierum natio, ut huius vnus gratia, sexus muliebris animus à natura effectus efformatusque videatur. Cornelius Celsus vere istud: *Eripi fœminis cura cultus sui non potest.* Apud Syracusanos, lege lata, sancitum fuit ne auro fœminæ sese ornarent, ne vestes gestarent floridi coloris, aut quibus attexta assutave purpura esset, nisi fortè aliqua esset quæ se vulgare scortum esse profiteretur. Non valde absimile est quod habet Clemens Alexandrinus, vestes floribus similes Bacchicis mulieribus, hoc est, furentibus, conuenire. Eiusdem generis sunt, & illæ apud Ammianum Marcellinum, *Tunica effigiata in species animalium multiformes.* Quidni addam vestes muliebri luxu excogitatas, adeo pertenuis, *Ut in ijs non dico nullum corpori auxilium, sed nullum pudori est, quibus sumptis mulier parum liquido nudam se non esse iurabit.* S. Hieronymus sic pudicam Virgunculam instruit: *Talia vestimenta paret quibus pellatur frigus, non quibus vestita corpora nudentur.* Carpi hoc apud Petronium Publius Mimographus.

*Æquum est induere nuptam ventum textilem,  
Palam prostare nudam, in nebula linea.*

*Matrona nostræ, aiebat Seneca, sic ornata ne adulteris quidem plus sui in cubiculo, quam in publico ostendunt.* Etiam in perditis, & ad omne dedecus expositis, tenerima est oculorum verecundia. Cùm & olim publicarum libidinum victimæ, in publicum prodeuntes, velo sese obregerent.



Iuuenalis de Messalina Claudij Imperatoris vxore, ad lupanar properante, hæc scribit:

*Ausa palatino tegetem præferre cubili;  
Sumere nocturnos meretrix Augusta cucullos  
Linquebat, comite ancilla non amplius vna.  
Et nigrum flauo crinem abscondente galero,  
Intrauit calidum veteri centone lupanar.*

*Iuuenal.  
Sat. 13.*

Apud Tertullianum, ex Genesi, Thamar illa, quia se expinxerat, idcirco Iudæ suspicioni visa est questui sedere, adeo quia sub velamento latebat, habitus qualitate questuariam mentiente. Illud ex Chrysippo memoria dignum refert Origenes, & quidem accommodatè ad historiam Thamar. Olim & primum quidem meretrices, extra vrbes, nec nisi personatas libidini prætereuntium sese prostituisse, deinde deposuisse personam, attamen mansisse extra vrbes, tandem deprauata disciplina intra vrbes penetrasse. Notum illud Martialis:

*At meretrix abigit testem veloque seraque,  
Rarâque summani fornice rima patet.*

*Martial.  
1. Ep. 35.*

Quid si veteres, huius æui nonnullas cernerent planè nudato pectore & sororiantes papillas ostentantes, quid aliud pronuntiarent quàm merum mel videri, sed ponticum, hoc est, veneni præsentanei. De gemmis, margaritis & similibus, Clemens Alexandrinus adulterij signa esse affirmare non dubitat. Tertullianus id totum ambitioni mulierum attribuit, & votum gloriæ nuncupat: Grande scilicet votum, inquit, quod non natura, nec veritas, sed vitiosa animi passio concupiscentia commendauit, & alia vitia ambitionis & gloriæ, sic & pretia rebus inflammavit, ut se quoque accenderent. Breuissimis loculis patrimonium grande profertur. Vno lino decies sestertium inseritur. Saltus & insu-

*Clement.  
Alex. 2.  
Padag.  
Tertull. de  
hab. fam.*

O o iij

Varr.  
Marcip.

las tenera ceruix fert. Graciles aurium cutes calendarium expendunt, & in sinistra per singulos digitos, de saxis singulis ludit. Hæ sunt vires ambitionis tantarum usurarum substantiam, uno & muliebri corpusculo bajulare. Quin & Varro iam suo æuo luxum eiusmodi muliebrem perstrinxit: Altera exorat patrem libram occellatorum, altera virum, semodium margaritarum. Et alio loco, Hymenæus qui primo lauere (id est, lauare) aluum marsupio solet. Iuuenalis eleganter istud describit:

Iuuen.  
satyr. 6.

Inde faces ardent, veniunt à dore sagittæ,  
Libertas emitur.  
Interea calet & regnat, poscitque maritum,  
Pastores & ouem Canusinam vlmosque falernas,  
—— pueros omnes, ergastula tota.

Tertull. de  
oult. fœm.

De coma & capillitio muliebri, Tertullianus hæc scribit: Si non pudet enormitatis, pudeat inquinamenti, ne exuuias alieni capitis, forsitan immundi, forsitan nocentis & gehenna destinati, sancto & Christiano capiti suppare. Et quidem vno verbo quis non scæua forsitan suspitione rideat mulierem quampiam madido torquentem cornua cirro. Mariti est istud præcauere. Quàm vereor ne in his nimis multus sim. Totus Tertulliani liber vnus & alter, non secus ac S. Cypriani describendus esset, vt cæteros Patres omit- tam, absoluo vnico Clementis Alexandrini loco, quo prodit Medeam, apud omnes Poëtas Græcos Latinosque veneficiis clarissimam, primam omnium pilos & crines tingere excogitasse. Præclarum ad imitandum exemplar! Addam nihominus istud eiusdem Clementis de vnguentis, quæ boni odoris causa adhibentur, non videri ea omnino Christianis repudianda, quandoquidem alioquin vulturibus aut scarabeis persimiles erimus, quos rosacco

Clement.  
Alex. 1.  
Strom.

Clement.  
Alex. 2.  
Pedag. c. 8.



unguento perfusos mori testantur. Multum autem differt unguento esse delibutum, ab eo quod est ungi unguento: illud enim est effœminatorum, ungi autem unguento, nonnunquam est utile. Istud explanat ex variis adiunctis, ac tandem concludit, etiam Scripturæ auctoritate, Christianis unguentorum vsum esse concessum ad utilitatem quidem, non ad suauem sensuum titillationem. Sed quibus exceptionibus aduersus hanc aliquanto rigidiorum ornatus muliebris increpationem occurrendum esse nonnulli existimant, dispiciamus. Mulieres viris suis placere debere nemo tam ferus est qui non fateatur, cum Scriptura id apertè doceat. Deinde patrium morem nemo damnabit. Primum illud iam olim examinavit Tertullianus hoc pacto: *Vos solis maritis vestris placere debetis, in tantum autem placebitis eis, in quantum alteris placere non curaueritis; Secura estote, benedicta. Vxor nulla deformis est marito suo, satis placuit cum electa est, seu moribus, seu forma commendata. Ne qua vestrum putent, si temperauerint à compositione sui, odium & auersionem maritorum persecuturam. Omnis maritus castitatis exactor est; formam verò fidelis non expectat, quia non iisdem bonis quæ Gentiles putant, capimur. Non supergrediendum ultra quam quod simplices & sufficientes munditiæ concupiscunt, ultra quam domino placere. In illum enim delinquant, quæ cutem medicaminibus ungunt, genas rubore maculant, oculos fuligine collinunt.* S. Cyprianus eo alludens ex magistro Tertulliano, flauum colorem, nigrum puluerem, aut denique colorem rubeum dixit. Et Tertullianus hac in re etiam minimè pepercit viris, qui nimis curiosè barbam curare, & pulueris cuiusdam asperitudine læuigare, & vno nomine barbam acrius cadere, interuellere, circumdare capillum, disponere, etiam colo-

*Tertull. de  
cult. fam.*

*S. Cyprian.  
Tertull. de  
cult. fam.*

S. Augst.  
epist. 73.  
1. Cor. 7.

rare canitiem, solebant. Denique S. Augustinus appositè explicat illud Apostoli: *Quæ nupta est, cogitat quæ sunt mundi, quomodo placeat viro. Fucari, inquit, pigmentis, quo vel rubicundior, vel candidior appareat, adulterina fallacia est, qua non dubito etiam ipsos maritos se nolle decipi, quibus solis permittendæ sunt fæminæ ornari secundum veniam, non secundum imperium. Nam verus ornatus maximè Christianorum & Christianarum non tantum nullus fucus mendax, verum ne auri quidem vestisque pompa, sed mores boni sunt.* S. Ambrosius vno verbo rem expediisse videtur: *Ars desit, nullum est crimen decoris, illecebra faceßat, inoffensa est species & formæ gratia.* Quanquam licet vxores in gratiam maritorum sedulò & studiosè sese ornent, istud nihilominus Clemens Alexandrinus violentum & iustum medicamentum appellat. Quàm pudicè, quàm generosè casta coniux, apud eundem Clementem Alexandrinum, ei qui dixerat: *Pulcher est cubitus, sed non publicus: Respondit: Pulchræ sunt tibiæ, sed quæ sunt mei mariti: pulchra facies, sed eius tantum qui me vxorem duxit. Morem patrium quod addunt citra vllam videri reprehensionem, nollem ego, quod de viris qui suæ comæ crispandæ nimium quantum erant curiosi, enuntiauit S. Ambrosius, de fæminis illud idem asserere: Illi vulgarem patriæ usum pretendebant, Respondet Sanctus Episcopus: Habeant excusationem qui patrios usus sequuntur, sed tamen barbaros, ut Persæ, ut Gothi, ut Armenij. Maior quidem est natura, quàm patria. Quidni Christianis fæminis illud etiam inculcem, maior est religio & disciplina Christiana quàm patria; neque tamen negauerim ritum sese ornandi, patrium potius quàm peregrinum & exoticum mulieres consecrari debere, modo cultus ipse, modestiæ Christianæ*

S. Ambrosius  
epist. 44.

Clemens  
Alex. 1.  
Pedagog.

Clemens  
Alex. 2.  
Pedagog.

S. Ambrosius  
epist. 15.

næ



ñe terminis circumscribatur. Sed dum patriæ morem  
 adeo pertinaciter urgent, illud ita intelligendum venit,  
 vt modestiores & moderatiores quæque sint imitandæ,  
 non earum omnis cura & sollicitudo in eo versatur,  
 vt quibusvis lenociniis expolitæ & exornatæ intuen-  
 tium oculos remorentur. Sanctus Augustinus, quis mo-  
 dus hac in re adhibendus sit, docet iis verbis: *Quisquis re-*  
*bys prætereuntibus restrictius vititur quam sese habent mores*  
*eorum cum quibus viuit, aut temperans, aut supersticiosus est:*  
*Quisquis verò sic eis vititur, vt metas consuetudinis bonorum,*  
*inter quos versatur, excedat, aut aliquid significat, aut flagi-*  
*tiosus est.* Neque possum illas prætermittere, ita luxu dif-  
 fluentes, toto corpore elanguidas, marcidas, vt suis deli-  
 tiis vel natura ipsa deesse videatur, ac proinde arte sint  
 illæ conquirendæ, cum ab iis quæ cæteris mortalibus na-  
 turæ instinctu in vsu sunt, sic abhorrent, vt suo corpori  
 nulla omnino ratione ista velint adhiberi, aquam dico  
 seu fluminum, seu fontium, aut similium, quidni vni-  
 uersi Opifex peculiarem aërem quem respirent, aut singu-  
 larem aliquam terram producat, quæ illas sustineat. Insi-  
 gne Diuinæ Iustitiæ exemplum in fœmina id genus ma-  
 gni nominis: Ea fuit Calis Græca, soror Nicephori Im-  
 peratoris Constantinopolitani, nupta Dominico Syl-  
 uio Duci Venetiarum, quæ incredibili mollitie & lasci-  
 uia, communi aqua vri nolebat, sed tandem tanta fœti-  
 dissimi puris copia ex eius corpore manare cœpit, vt  
 nulla aqua etiam naturali mundari & abluï posset, & sic  
 cum isto horrendo fœtore ex hac vita migravit.

*S. Aug. 3.  
 Doct. Chr.  
 c. 12.*

*Græz.  
 Chron.*

## CAP. V.

**S**ed quantum fidei & pudicitiae coniugalis bono immoderatus ille ornatus vxorum officiat, paulo fufius expendamus. Nemo ibit inficias mulierem comptam, ornata, expictam, in oculos intuentium incurrere, à qua si qui vultum oculosque auertant, & Diuini Numinis metu, & suae infirmitatis conscij, alij tamen vt nec oculos, sic nec mentem cogitationemque ab illa facile auocant, & quandiu illorum obuersatur oculis, tandiu ex huius lenocinantis formae admiratione, eiusdem desiderio capiuntur. Neque verò credendum est venustam & lepidam id genus minus ista curare, quae quantumvis dissimulet, attamen suam elegantiam & pulchritudinem attentè spectari & prädicari summoperè exoptat. Nec maiorem iniuriam se accipere existimat, quàm si inter deformes, turpículas & sordidas habeatur. Hinc audaciores facti petulantés isti iuuenes, vbi commodum est, post formae commendationem non leuem, preces minus honestas adiungant. Nec ista supplicatio huic venustulae & floridæ displicet, cum suae pulchritudinis certissimum hoc argumentum esse arbitretur. Ita visum B. Hieronymo: *Virgo etsi rogata non fecerit, tamen formae putat testimonium si rogetur*. Et certè cultus iste immodicus etiam formae venustati additus, magna est ad peccandum illecebra. Tertullianus paulò seuerius istud scripsit: *Proprie usus & fructus pulchritudinis corporis, luxuria*. Non deerunt quibus ista magis arrideat sententia. Inter pulcherrimam foeminam & deformissimam, mediam quandam formam esse, quae à nimiae pulchritudinis periculo, & à summo deformitatis odio va-

S. Hieron.  
epist. 47.

Tertull. de  
cult. foem.



cet, quæ ab Ennio, *Stata forma* vocatur, quam Phauorius ille Gallus modicam & modestam appellabat vxoriam, qua quæ vxores essent præditæ, eas incolumi pudicitia esse dictitabat, idem Ennius. Multo magis isto periculo deformes liberantur. Hinc auctore Seneca: *Argumentum est deformitatis pudicitia*. Est tamen quod in istis pertimescendum, si S. Hieronymo credendum est: *Pulchra cito adamatur, inquit, fæda facile concupiscit*. Ex Seneca patre istud expressum, apud quem hæc legas: *Quæ malam faciem habent sapius pudica sunt, non animus illis deest, sed corruptor*. Non audio ingeniosum Poëtam.

Agell. 5.  
cap. 11.

Senec. 3.  
benef. c. 16.

S. Hier. 1.  
in Iovin.  
Senec. 2.  
contr. 1.

Ovidius  
Am. El. 8.

*Ludunt formosæ, casta est quam nemo rogauit.*

Romanas suas non paucas, quanquam rogatas, illasam & illibatam suis maritis pudicitiam seruasse reperiet. Nostras Christianas longe ab ea suspicione abhorreere debere, ipsa religio suadet. Sed ad nostrarum mulierum luxum redeamus & quanto ipse non modo animæ & famæ detrimento, verumeriam rei domesticæ retineatur, palam est. Cum enim mariti quæ huic insanix fouendæ & augendæ pro seculi infœlicitate, necessaria sunt, non suppeditant, aliunde expiscari necesse est. Frustra lèges sumptuariæ, frustra maritus pro imperio illas coërcere tentat:

--- *Faciunt grauiora coacte*

*Imperio sexus, minimumque libidine peccant.*

Iuuenal.  
Sat. 6.

Iuuenali teste. Nec enim tam libidine peccant, quàm vt habendi cupiditatem expleant. Sic ille idem Iuuenalis:

--- *Nullam inuenies quæ parcat amanti,*

*Ardeat ipsa licet, tormentis gaudet amantis,*

*Et spoliis.*

Maritorum indulgentiam non vocem, potius ignauiam & stuporem. Quisquis fiet, veruex maritus apud veteres

Pp ij

Nicet. 2.  
de Imp.  
Andron.

audit: Mittō Artemidori Cornutos, non adeo trita Andronici Comneni Imperatoris Bizantini historia. Princeps hic luxu & lididine perditus, cornua Ceruorum, quos venatu cœperat, quæ grandiora & insigniora essent, in porticibus fori suspendebat, specie quidem ostentandæ magnitudinis ferarum, quas cœpisset; at re ipsa ut ciuitatis Constantinopolitanæ mores & vxorum, quas ipse corruppebat, lasciuiam notaret. Interim vxores cum sibi aliunde quàm à maritis, mundioris cultus & ornatus subsidia suppetere vident, facto pudoris naufragio audaciores effectæ, ac maritos iam apertè ludibrio habeant, quid non in caput illorum moliantur? Apud

Tacit. 4.  
Annal.  
Iuuen.  
Sat. 6.

Tacitum: *Fœmina, amissâ pudicitia, alia non abnuat.*

Quintil. 5.  
c. 10.  
Xiphil.  
Tiber.

*Fortem animum præstant rebus, quas turpiter audent.*  
Aiebat Iuuenalis. Vetus verbum Catonis: *Adultera eadem & venefica.* Rhetores sæpè istud vsurpant in suis declamationibus: Nota Liuillæ Drusi vxoris à Sejano temerata historia, cuius etiam opera Drusus maritus veneno sublati. Et nescio an non aliquando debellatos in vteris maternis paruulos, ex furtiua consuetudine conceptos suspicari licet: Hæc conscientia vis, hic tortor domesticus & familiaris. Cum Beato Zenone Veronensium Episcopo liceat exclamare: *Sepelitur noua odij rabie (quin & propriæ conscientia reatu) antequam nascatur matris iam non in utero, sed sepulchro, incognitum pecus, quod legitimum nec mortem potuit sentire, nec vitam.* Neq; vero alia maritorum incontinentia dissimulanda est, quam S. exagitat Hieronymus, hoc pacto: *Quorundam matrimonia adulteriis cohaeserunt, & o rem improbam, iidem illis pudicitiam præceperunt qui abstulerant. Itaque cito eiusmodi nuptias satietas soluit cum primum lenocinium libidinis abscessit, quod libebat*

S. Zeno  
serm. de  
Contin.



euiluit. Et fortèan mariti dum totas libidini in ipso coniugij vsu habenas laxauerint, ipsis vxoribus viam ad adulterium struant, vt quæ toties irritatæ, Messallinæ tentiginem expleri insanum percupiant. Iam ipsi mariti eo modo adulteri vxorum appellantur: Xistus Pythagoreus apud S. Hieronymum: *Adulter est in suam uxorem amator ardentior. In aliena quippe uxore omnis amor turpis est, in sua nimius. Sapiens vir iudicio debet amare coniugem non affectu. Reget impetus voluptatis, nec praeceptum feretur in coitum. Nihil est foedius quam uxorem amare quasi adulteram.* S. Ambrosij eadem vox: *Est enim, inquit, velut quidam adulter, incontinens in matrimonio.* Ita Sixtus P. R. *Quisquis vel matrimonij sui semper incontinens est, castus quomodo dici possit ignoro.* Quam piè & pudicè S. Fulgentius: *Iustitia vtendi coniugij hæc est; vt non explenda libidinis, sed substituenda prolis obtentu, sibi coniuges congruo tempore misceantur.* Intemperantes eiusmodi mariti non probabunt, quod etiam mihi non placeat, dictum Elij Veri, *Vxor dignitatis nomen est, non voluptatis.* Quod comprobasse ferunt Theudiselum Gothorum in Hispania Regem à suis propter crebra adulteria miserè strangulatum.

S. Hier.  
1. Ioum.

S. Ambr.  
epist. 82.

Sixtus. 3.  
de Castitate.

S. Fulgent.  
epist. 1.

Spar. Ver.

Rod. Sanct.  
p. 2. c. 15.

CAP. VI.

**S**ed quoniam ex illa immodici luxus cupiditate qua nonnullæ vxores flagrare videntur, adulteria nonnunquam promanare diximus, de adulteriis & maritorum & vxorum nonnihil subiiciamus, vt cum vterque coniugum communi fidei & castitatis lege teneatur, hac in parte maritus, si cum alia quam cum vxore consueuerit, in legem

P p iij

non minus quam vxor adultera committere intelligatur.  
 „ Ita docet Apostolus. Mulier sui corporis potestatem non  
 „ habet, sed vir: Similiter autem & vir sui corporis potesta-  
 „ tem non habet, sed mulier. Huius rei historiam refert S.  
*S. Aug.* Augustinus, quam Valentis Imperatoris temporibus,  
*1. de Ser.* Antiochia quinquaginta ferme annos cum hæc scriberet  
*D. in mōt.* antea cōtigisse memorat. Achindinus tunc Præfectus vr-  
*cap. 16.* bis qui etiam Consul fuit, cū à quodam fisci debitore  
 bram auri exigeret, & aliquanto commotus, quod ple-  
 rumque in istis potestatibus perniciosum est, quibus quod  
 libet licet, aut potius putatur licere, comminatus est iu-  
 rans quod si certo die quem constituerat memoratum,  
 aurum non exolueret, occideretur. Itaque cum ille tene-  
 retur immani custodia, nec posset se debito illo expedire,  
 dies metuendus propinquare capit. Illi erat vxor pulcher-  
 rima, sed pauper, quam homo quidam locuples deperi-  
 bat, qui mulieri significauit se libram auri daturum pro  
 vnus noctis concubitu; respondit ipsa sui coporis pote-  
 statem sese non habere, sed virum, à quo id se impetratu-  
 ram speraret. Tandem morem gerit diuiti ad illius villam  
 profecta. Sed diues postridie pro auro promisso & tradi-  
 to, postquam fraudulentè illud substraxisset, simile liga-  
 mentum cum terra dedit mulieri, illa domum reuerfa,  
 & fraude cognita, Præfectum adit, fatetur omnia, quam  
 fraudem passa esset ostendit. Tum Præfectus primo se  
 reum quod suis minis ad id ventum esset pronuntiat, &  
 tanquam in alium diceret sententiā de Achindini (i. suis)  
 bonis auri libram fisco inferendam edixit, & mulierem in  
 possessionem villæ diuitis ac terræ, vnde pro auro terram  
 accepisset, velut Dominam mitti & induci constituit. In-  
 signis istius mulieris innocentia & simplicitas in lege illa



Apostolo commendata intelligenda, videlicet ingruente necessitate, vt si maritus de vita periclitetur, & ipsius consensus obtineatur, sui copiam tum innoxie facere possit. S. Augustinus soluet. *Quid etiam si nostro adulterio liberari aliquis de morte, ideone machandum? nullum est flagitium quod non eadem conditione suscipere cogamur.* Sanctus Bernardus. *Adulterium quocumque modo, quocumque perpetres animo, turpe flagitium est ac criminale peccatum.* Veterem illam legem cuius meminit Cato Censorius, nullo modo probare possum, de qua sic apud Agellium. De iure autem occidendi vxores ita scriptum est: *In adulterio vxorem tuam si deprehendisses, sine iudicio impune necares, illa te, si adulterares, digito non auderet contingere, neque ius est:* Apud Antoninum Imperatorem agebatur de diuortio cuiusdam cum vxore de viro conquirente, vt apparet, ita ille rescripsit, *Habebunt ante oculos inquirere an cum tu pudice viueres, illi quoque (vxi) bonos mores colendi auctor fuisti. Periniquum enim mihi videtur esse, vt pudicitiam ab vxore exigat, quam ipse non exhibet; Quæ res potest & virum damnare, non ob compensationem mutui criminis, rem inter utrumque componere, vel facti causam facti tollere.* Ex Codice Gregoriano ad L. Iuliam de adulterijs, locum hunc descripsit S. Augustinus, qui narrat quibusdam displicere, vt inter virum & vxorem par pudicitie forma seruetur, *Et potius eligant maximeque in hac causa mundi legibus subditi esse, quam Christi, quoniam iura forensia, non eisdem, quibus feminas, pudicitie nexibus viros videntur obstringere.* S. Hieronymus grauissime: *Aliæ sunt leges Cæsarum, aliæ Christi, aliud Papinianus, aliud Paulus noster præcipit: Apud illos, viris impudicitie frena laxantur, & solo stupro, atque adulterio condemnato passim per lupanaria & ancillulas libido permittitur quasi cul-*

S. Aug.  
de mend.  
ad conf.

S. Ber. de  
præcepto  
& dispensa-  
sat.

Agell. 10.  
cap. 23.

Cod. Gre.  
l. 12. tit. ad  
L. Iul. de  
adul.

S. Aug. 2.  
de adul.  
Coniug.  
c. 8.

S. Hieron.  
epist. 30.

Amb. de  
Abrah. 1.  
tit. 14.  
Senec.  
epist. 94.  
Lact. 6.  
c. 23.

Quintil.  
declam.

pam dignitas faciat non voluntas. Apud nos quod non licet fœ-  
minis, æque non licet viris, & eadem seruitus pari conditione  
censetur. Contra hanc qualemcumque maritorum exce-  
ptionem vrget rescriptum Antonini supra allatum. Tan-  
dem concludit: Quæ cum ita sint, nunquid ideo minor est, ac  
non potius maior & peior virorum impudicitia, quia inest illis  
superbia & licentiosa iactantia. S. Ambrosio: Nec viro li-  
cet, quod mulieri non licet; eadem à viro quæ ab uxore debetur  
castimonia. Ita Seneca: Improbum est ut quis ab uxore pudici-  
tiam exigat, alienarum corruptor uxorum. Lactantius eandem  
elegantem quæstionem pertractat, & illius Imperatorij  
decreti tacitè meminit: Non sicut iuris publici, inquit, ra-  
tio est, sola mulier adultera est quæ habet alium, maritus au-  
tem etiam si plures habeat, à crimine adulterij solutus est. Sed  
diuina lex, ita duos in matrimonium, quod est in corpus vnum,  
pari iure coniungit, ut adulter habeatur quisquis compagem cor-  
poris in diuersa distraxerit. Paulò post: Seruanda igitur fides  
ab utroque alteri est. Imò exemplo continentie docenda uxor, ut  
se castè gerat. Iniquum est enim ut id exigas, quod prestare ipse  
non possis. Quæ iniquitas effecit profecto ut essent adulteria, fœ-  
minis egrè ferentibus prestare se fidem, non exhibentibus mu-  
tuam charitatem. Denique nulla est tam perditæ pudoris adulte-  
ra, quæ non hanc causam vitijs suis pretendat, iniuriam se, pec-  
cando, non facere, sed referre. Quod optimè Quintilianus  
expressit: Homo, inquit, neque alicuius matrimonij abstinens,  
neque sui custos, quæ inter se natura connexa sunt. Nam neque  
maritus circa corrumpendas aliorum coniuges occupatus, potest  
vacare domestice sanctitati, & uxor cum in tale incidit matri-  
monium, exemplo ipso incitata, aut imitari se putat, aut vin-  
dicare. Certè Ecclesiasticis legibus & pœnis iisdem vir  
adulter & mulier adultera constringuntur. Sic enim Con-  
cilium



cilium Ancyranum: Si cuius vxor adulterata fuerit, aut si ipse adulterium commiserit, septem annorum penitentia oportet cum perfectionem (SS. Eucharistiam) consequi secundum pristinos gradus. Idem repetitum Concilio Vormatiensi. Imperatores Theodosius & Valentinianus vxoribus repudij auxilio necessario vt permittūt in nonnullis casibus, e quorum numero iste est: Si ad contemptum sui, domusve sue, ipsa vxore inspiciente, cum impudicis mulieribus, (quod maximè etiam castas exasperat) cætum ineuntem illa probauerit. Sanctus Ambrosius, eo sensu dixerat: Vxor seuera scortari comparem suum nolit, non patiatur, non sinat. Pythagoras in illa sua ad Crotoniatis Parænesi, illos hortatur maximè, vt non alias quàm proprias vxores norint. Itidem Sixtus P. R., Dici potest fãmينا casta, seruans viro suo fidem, sed marito non à marito nisi etiam ab ipso continens fuerit. Hæc paulò obscura, quæ nihil aliud indicant, quàm vxores ab ipsis maritis pudicitiam edoceri, fidemque conjugalem seruari oportere. Quæ res nobis satis apertè demonstrat maritorum esse suis coniugibus benè ac pudicè sese in matrimonio gerendi viam ac rationem præscribere. Non frustra enim & Diuina & naturali lege necnon humana, virorum in vxores imperium constitutum est. Dei præpotentis vox illa est ad Euam: Sub viri potestate eris, & ipse dominabitur tui. Quod in Nouo Testamento multoties repetitum est. Philosophiæ princeps alter, mariti imperium in vxorem, vt & patris in liberos, si bi aliquo pacto respondere dixit, quod vtrumque sit in liberas personas. Differre verò quod mariti in vxorem imperium sit politicum & ciuile, patris verò in liberos sit Regium. At ne quis istud ciuile imperium aliter quam par sit interpretari velit, ac si in matrimonio om-

Concil.

Ancy.

c. 19.

Concil.

Vorma.

c. ult.

Cod. de

repud. l.

consensu.

S. Amb.

epist. 14.

Lampbl.

1. vit. Py-

thag. c. 9.

Sixtus de

castitate.

Gen 3.

Arist. l.

polit. c. 1.

c. ult.

S. Aug.  
l. 5. quæst.  
in Dente-  
ron. c. 33.  
Vlp. de  
testam. de  
iur. l. 1.  
Arist. 8.  
art. c. 12.

Paulus 3.  
Sent. tit.  
de adul.  
Sen. lib. 4.  
de benef.  
c. 14.  
Cassiod. 1.  
Varr. Ep.  
37.

nia sint paria, quandoquidem ciuile imperium sit inter natura pares, id est, quorum vnus alterum non superet, aut virtute, aut diuitiis, aut genere, aut libertate: & vbi parendi & imperandi sit vicissitudo. At in matrimonio longè aliter res se habet: nam maritus vxore, vt mas fœmina semper natura est præstantior, ac proinde non sunt pares. Deinde maritus semper imperat, itaque nulla est vicissitudo imperij. Neque tamen credendum est vxorem ita marito, obsequi debere, vt seruum Domino: Quanquam S. Augustinus dixerit, *Fœminas viris suis secundum legem penè famulas subditas esse*. Lex præclare mariti imperium triplici modo distinguit, pro triplici eaque dispari conditione personarum in quas ius habet maritus, *In potestate patris est filius-familias, in manu vxor, in mancipio seruus*. At discrimen istud statuit Aristoteles inter vxorem & seruum ex dissimili fine vtriusque, quod seruo non alius sit finis propositus quàm ministerium, vxori verò procreatio liberorum. Atque eam ob rem barbaros, seu præter Græcos ceteros populos, qui vxoribus tanquam seruis & mancipiis utebantur ad feruilia ministeria, reprehendit Aristoteles. Sed apud nonnullas gentes, vt pote Celtas, etiam viros in vxores ius vitæ & necis habuisse tradit, quod de Romanis simul prodit Paulus I. C. quod est imperium Regium. Eo respexisse videtur Seneca, cum scribit, *mulierem matrimonio copulatam, pudicitiam timori præstare, non sibi*. Nam aut legem (Iuliam) aut virum metuit. Theodoricus Rex apud Cassiodorum, de viro qui vxorem adulteram occiderat, sic loquitur, *Pro amore pudicitia porrigere ferrum maritis non est leges calcare, sed condere. Ita tamen, vt si legitimus extiterit accusator, de facti sui qualitate, te noueris audiendum, vt si*



innocuos peremisti, crimen publica districtione rescetur. Si malè  
 initos complexus adulterorum morte diuisti, aestimetur potius  
 vindicta quàm culpa. Veruntamen maximus ille præceptor  
 Aristoteles, Regium istud summūque & forsan tyranni- Arist. 8.  
art. c. 12.  
 cum imperium viri in uxorem, non omnino probasse vi-  
 detur alio loco, vbi contendit potestatem & societatem  
 rectam mariti & uxoris esse Aristocraticam. Quandoqui-  
 dem vt in Aristocratia ita & in matrimonio, pro dignita-  
 te, suo quisque fungitur officio & munere, pro virtutis  
 ratione, si quidem quæ viri sunt propria, principatum in  
 familia obtinere, & rem familiarem parare curat mari-  
 tus: At ista mulieris officia, maritum obseruare & colere,  
 ipsiſque ancillis pensa & munia adsignare, rei cibariæ con-  
 sulere, liberos rectè educare, satagat vxor. Attamen ad-  
 monet in matrimonio vitandam maximè Oligarchiam, in  
 qua ille imperat, qui non virtute sed diuitiis, opibus, an-  
 tecellit, quod si contingat, id contra naturam fieri affir-  
 mat. Accommodatè ad eam rem Plinius, *Multis illustri-* Plin. pa-  
neg.  
*bus viris dedecori fuit aut inconsultius vxor assumpta, aut reten-*  
*ta patientius: ita foris claros domestica destruebat infamia, &*  
*ne maximi ciues haberentur, hoc efficiebat quod mariti vxoribus*  
*minores erant.* Et quidem S. Hieron. rem istam magis vr-  
 get ex regula Christianæ pietatis. Cum caput, inquit, mu- S. Hieron.  
in Epist. ad  
Tit. c. 12.  
 lieris vir sit, caput autem viri Christus, quacumque vxor non sub-  
 iicitur viro suo, hoc est capiti suo, eiusdem criminis rea est, cuius &  
 vir, si non subiiciatur Christo capiti suo. At virum Christi impe-  
 rium detrectare quid aliud est quàm impietatis cuiusdam  
 scelere sese obstringere? Pythagoras apud Crotoniatis Iamb. 1.  
de vita  
Pyth. c. 9.  
 differit quo pacto, ritu sacro, in viri potestatem veniat vxor;  
 scilicet virum à Vestæ Deæ ara actò sacrificio & interpo-  
 sito fœdere, quasi supplicem & orantem accipere con-

Qq ij

*Isid. off.  
Eccles. 9.*

*S. Aug.  
quæst. in  
Gen. c. 153.*

*1. ad Ti-  
moch. 5.*

*S. Chrysost.  
1. Cor. ho-  
mil. 26.*

iugem & velut in conspectu Deorum ad maritum ipsam  
introduci, ut & ordine & animi moderatione exemplar  
existant, sicut omnibus domesticis ita cæteris externis. At  
Isidorus ex nostris ritibus illud idem demonstrat hoc pa-  
cto; *Fœmina dum maritatur velantur, scilicet ut nouerint  
se per hæc viris suis esse subiectas & humiles, unde & ipsum  
velamen vulgo maiorem vocant, id est, Martem, quia si-  
gnum maritalis dignitatis ac potestatis est in eo. Caput enim  
mulieris vir est, licet proinde velentur dum nubant, ut vere-  
cundiam mulieris agnoscant, quia iam sequitur inde quod pudeat.*  
Constat igitur viri imperium non modo lege Diuina, ut  
paulo ante indicatum est, verum etiam naturali, ut nos  
docuit Aristoteles, & ex eo descripsit S. Augustinus iis ver-  
bis, *Est ordo naturalis in hominibus, ut seruiant fœmina viris, fi-  
lij parentibus, quia nulla Iustitia est, ut maior seruiat minori.* In-  
terim *seruiendi* verbum, quo S. Augustinus usus, non ex  
Iurisconsultorum regulis explicandum est, sed pro morem  
gerere & obsequi usurpauit, quemadmodum Apostolus;  
dum Christianas adolescentulas matrimonio copulatas,  
viris suis subditas esse præcipit. Ita S. Chrysostomus, sub-  
dita est mulier, tamen ut vxor, ut libera, ut paris honoris.  
hinc ex eo istius erga viros obsequij, præcipuum argu-  
mentum est, ut domus curam habeant, sic vetus interpres,  
sed Græca vox, οἶκος ἐγὼ, longè aptior & accommodatior,  
quæ domus custodes, vel domi manentes significat. Pri-  
scus ille ritus Romanorum hoc indicat, apud quos vxori-  
bus domum maritorum primum ingredientibus, clauis  
dabant omnes illius, vna dempta cella vinaria, quo si-  
gnificabant ipsas matres familias esse, atque omnem rei  
domesticæ curam & potestatem habere. Eius etiam rei  
indiciu est, quod in familia curanda totæ occupatæ



essent, quoniam apud Veteres solè panem pinsebant. *Hoc*  
*mulierum opus esse* dixit Plinius, & res nota ex Sacris li- *Plin. 13.*  
 teris, & profanis auctoribus. Apud hos legere est, non *c. 11.*  
 apud pistores, sed pistrices panem publicè vendi solitum,  
 ut meminit Lucianus. Sed velut cibariæ parandæ mulie- *Lucian.*  
 res sollicitæ erant, ita vestiariæ. De optima illa matrefa- *Demonast.*  
 milias, dictum est à sapientissimo mortalium Salomone:  
*Quæsiuit lanam & linum, & operata est consilio manuum sua-* *Prover. 31.*  
*rum; de nocte surrexit, deditque prædam domesticis suis, &*  
*cibaria ancillis suis. Stragulatam vestem fecit sibi. Sindonem*  
*fecit, & vendidit.* Mitto cætera. Erat apud veteres pro-  
 uerbiū: Vbi cucumerem edant, ô mulier, lanam texe:  
 hoc est, vbi cucumeris esus occeperit, Autumnus ingruit,  
 à quo non longè distat hyems, ob quam de hyberno  
 vestitu cogitandum, cuiusmodi est læna. Interim qua ra-  
 tione domi manere illas iubet Apostolus, istud exponit  
 Tertullianus, dum Christianas mulieres in publicum pas- *Tertull. de*  
 sim, vel leui de causa, prodire vetat: *Vobis nulla procedendi* *cul. scem.*  
*causa non tetrica. Aut imbecillis aliquis ex fratribus visitan-*  
*du, aut sacrificium offertur, aut Dei verbum administratur.*  
 Catillantes & circūcursantes huius temporis non proba-  
 ret, etiam eumentita valetudine; aquas Bajanæ petentes.  
 Martialis istud discant mariti:

*Castæ nec antiquis cedens Læuina Sabinis,*  
*Et quamuis tretrico tristior ipsa viro,*  
*Dummodo Lucrino, modo se permittit Auerno,*  
*Et dum Bajanis sæpè fouetur aquis:*  
*Incidit in flammæ, iuuenemque secuta, relicto*  
*Coniuge, Penelope venit, abit Helene.*

Tandem integram illam & mutuam coniugum inter se  
 pudicitiam absoluamus eleganti B. Fulgentij loco: *Sancta* *S. Fulg.*  
*epist. 2.*

Qq iij

quidem sunt Christianorum coniugia, quia & coniugalis ibi castitas custoditur in corpore, & puritas fidei seruatur in corde. Illic equidem carnis debitum redditur viro, coniugalis autem castitas magis debetur Christo quàm viro, quia & corpus tunc verè castum est, quod fornicatione carnali non polluitur, quando spiritalis integritas Christi timore ac dilectione seruatur.

## CAP. VII.

**B**onum prolis secundo loco excutiendum est, quod quanquam à nostris bonum extrinsecum vocetur, attamen ipsius matrimonij finis vltimus est ac præcipuus: Sic enim Apostolus: *Volo iuniores nubere, filios procreare, matres familias esse.* Nihilominus bonum istud non esse ex rei natura necessarium, sed tantum in obligatione & energia nostri rectè adnotant; & ista obligatio nullam inducit necessitatem, sed sub conditione, vt si ex coniugio suscepta proles fuerit, perhumanè & religiosè educetur. Itaque etiam si liberi nulli nascantur, verum ac perfectum non desinit esse matrimonium, quandoquidem omnium Iuris vtriusque peritorum consensu: *Nuptias non concubitus, sed consensus facit;* etiam multò magis quantumvis interuenerit copula, si proles secuta non fuerit. Quin veteres ad eò consensum illum mutuum coniugum vrgent, quasi liberorum procreationis aut nulla, aut perexigua ratio habenda sit. Sic Sanctus Ambrosius: *Cum initiatur coniugium, tunc coniugij nomen adsciscitur; non enim defloratio virginitatis facit coniugium, sed pactio coniugalis. Denique cum iungitur puella, coniugium est, non cum viri admixtione cognoscitur.* Sic auctor operis imperfecti in Mathæum. Matrimonium quidem non facit coitus, sed voluntas. Hinc

*D. li. 5. tit. 4. tit. 17. varic. D. de Reg. Iuris l. 30. ex Vlpian.*

*S. Ambrosius de Inst. virg. l. 6.*



vt illud obiter dicam, factum est vt veteris Ecclesiæ Patres, inter sacratissimam Deiparam Virginem Mariam, & S. Ioseph, verum matrimonium fuisse affirmant. Vnus nobis hoc explicet S. Augustinus: *Non fallaciter, ait, ab Angelo dictum est ad Ioseph: Noli timere accipere Mariam coniugem tuam. Coniux vocatur ex prima fide desponsationis, quam concubitu nec cognouerat, nec fuerat cogniturus, nec perierat, nec mendax manserat coniugis appellatio, ubi nec fuerat, nec futura erat ulla carnis commixtio. Concludit itaque: Omne nuptiarum bonum impletum est in illis parentibus Christi, proles, fides, sacramentum. Prolem cognoscimus ipsum Dominum Iesum: fidem, quia nullum adulterium; sacramentum, quia nullum diuortium. Solus ibi nuptialis concubitus non fuit, quia in carne peccati fieri non poterat sine carnis pudenda concupiscentia, quæ accidit ex peccato, sine qua concipi voluit qui futurus erat sine peccato, non in carne peccati, sed in similitudine carnis peccati. Sed è diuerticulo in viam redeamus, ac quale sit bonum proles, ex vtriusq; Testamenti collatione dispiciamus. Procreandorum liberorum in veteri Testamento sollicitudo maxima, præceptum siquidem Diuinum, & benedictio apud populum Dei Hebræum: In nouo, quanquam istud concessum sit, est tamen longè sanctior & excellentior oblata conditio, virginittis nimirum eligenda. S. Augustinus Diuinè, vt omnia: *Hæc propagatio filiorum quæ in sanctis Patribus propter generandum & conseruandum populum Dei, in quo prophetiam Christi præcedere oportuit, officiosissima fuit, nunc iam non habet illam necessitatem, patet quippe iam ex omnibus gentibus spiritaliter gignendorum, vndeunque carnaliter nati fuerint, copia filiorum. Et quod scriptum est. Tempus amplectendi & tempus continendi ab amplexu, per illud atque**

S. Aug.  
de nupt. &  
conu. c. 11.

S. Aug. de  
bono coniug.

Sixtus de  
castitate.

Exod. 13.

Esa. 31.

Psal. 127.

Euseb. præ-  
par. 9. c. 1.

hoc, tempus agnoscitur distributum: *Illud* quippe fuit amplectendi, hoc autem continendi ab amplexu. Sixtus Pontifex Romanus quadruplicem matrimoniorum in veteri Testamento rationem adsignat. *Primam*, quia secundum Apostolum, omnia adhuc in mysterio & figuratim gerebantur. hæc enim in figura contingebant illis. Tandiu enim aliquid in figura exerceri conuenit, quandiu res non venerit, cuius figura est. Exhibita verò iam re, figuræ cessat adumbratio. *Secunda* ratio est, quia mundus adhuc vacuus erat atque desertus. *Tertia*, quia illius temporis homines non tantis mandatorum præceptis onerabantur, quorum perficere plenitudinem cum vxore vix possent. *Quarta*, quod eis præiudicare non potuit res, quæ nec consilio dissuasæ (mallem legere *suasæ*) fuerat, nec exemplo, imo potius demandata: *Quia* apud Iudæos gloria erat in partibus & parturitionibus, & maledicta sterilis quæ non habebat semen in Israël, & beatus cuius erat in Sion & domestici in Hierusalem, & in benedictione maxima ponebatur vxor tua sicut vitis abundans, in lateribus domus tuæ: filij tui sicut nouellæ oliuarum, in circuitu mensæ tuæ. Porro quod virginitatem vel cœlibatum, exemplo, apud prioris Testamenti Patres caruisse dicit Sixtus, illud nec ipse satis probabit, qui paulò ante hunc locum, Heliam, Helisæum, B. Ioannem Baptistam cœlibes fuisse affirmat. Addo Essenos illos Iudæorum Philosophos, de quibus ita Porphyrius apud Eusebium. Essæi genere Iudæi sunt, hi se inuicem magis diligunt, quàm ceteri homines faciunt, & voluptatem omnem quasi vitiosam aspernantur, continentiam & integritatem animi ab omni perturbatione remotam, præcipuam putantes virtutem. Vxores non ducunt, alienos autem liberos, teneros



teneros adhuc, & ad omnem aptos doctrinam, adoptantes, pro suis educare ac moribus suis stabilire solent. Sic Plinius Maior: *Esseni gens sola & in toto orbe præter ceteras* Plin. hist. 5. c. 17. *mira, sine ulla fœmina, omni venere abdicata.* Quod ad secundam rationem spectat, illa non parum lucis habitura est ex iis Sancti Augustini: *Cum genus humanum post primam copulam viri, facti ex puluere, & coniugis eius ex viri latere,* S. Aug. 15. de Ciu. c. 16. *marium fœminarumque coniunctione opus haberet, ut gignendo multiplicaretur, nec essent ulli homines, nisi qui ex illis duobus nati fuissent, viri sorores suas coniuges acceperunt, quod profecto quanto est antiquius, compellente necessitate, tanto postea factum est damnabilius, religione prohibente.* Singulare istud est quod de eare prodit S. Chrysostomus, Adamum S. Chrysost. hom. 1. in c. 1. Math. duas procreasse ex Eua filias, post natos Caïn & Abel, quarum vna Rifa, altera Edocla vocaretur, easque duobus illis fratribus Caïn & Abel matrimonio iunctas: nam cæteri omnes Ecclesiæ scriptores, Abel virginem fuisse affirmant. Certè apud S. Epiphanium, ut & apud Cedrenum & Chronicon Alexandrinum, Adamo due tribuntur filia, quarum vni nomen Saue seu Azua, alteri Azura; prior Caïn, posterior Seth nupta. Tandem ad prolis bonum redeamus, quod expetendum esse ut non negauerim, ita si minus fœliciter succedat, non valde laborandum arbitror, cum vel naturæ culpa, vel ipsorum coniugum contingat, vel in Diuinam prouidentiam causa referenda sit. Singula videamus. Naturæ beneficium esse volunt, non igitur res est nostri arbitrij. Dicam cum Papiro Fabiano, apud Senecam Patrem: *Expecta, potest parere.* Seneca 2. Contr. 5. *Non respondet ad propositum, nec ad certum diem facunditas, sui iuris rerum natura est, nec ad leges humanas componitur, modò properat, modo vota præcurrit, modo lenta*

R r



Quintil.  
decl. 25<sup>o</sup>

S. Hieron.  
in Io: 10.

Senec. con-  
sol. ad Hel-  
niam, c. 16.

S. Ambr.  
5. hexam.  
6. 18.

S. Hieron.  
in Io: 10.

est & demoratur. Sic apud Quintilianum: *Non semper fecunditas properat, aliquando dilata, veluti pleniores fructus reddit.* Non hinc agitur de sterilitate, quæ corporis vitio contingat, sed de ea quam sibi uterque coniugum suapte culpa procurat, ut si maritus in amores præceps, in cupiditates pronus sit. Hinc Beatus Hieronymus: *Certe qui dicunt se causa Republicæ & generis humani vxoribus iungi, & liberos tollere, imitentur saltem pecudes, & postquam vxorum venter intumuerit, non perdant filios, nec amatores vxoribus se exhibeant, sed maritos. Mulieres Romanas sui seculi aliquas vteri gestationem molestissimè tulisse testatur Seneca, suam commendans Heluiam: Nunquam, ait, more aliarum, quibus omnis commendatio ex forma petitur, tumescentem vterum abscondisti, quasi indecens onus nec intra viscera tua conceptas spes liberorum elisisti.* Hoc de sui temporis matronis locupletibus idem prodit Sanctus Ambrosius: *Ipsa diuites ne per plures suum matrimonium diuidatur, in vtero partus proprios necant, & parricidalibus succis in ipso genitali aluo, pignora sui ventris extinguunt, priusque aufertur vita, quam traditur.* Sed interim Diuinæ benignitatis argumentum aliquando in ipsa coniugum sterilitate deprehendere licet, Sanctus Hieronymus ex Theophrasto istud tacitè nos docet. Sed locum integrum describam, cum multa, eaque præclara de re, qua de agitur, contineat: *Liberorum causa vxorem ducere, ut vel nomen nostrum non intereat, vel habeamus senectutis præsidia, & certis vtamur hæredibus, stolidissimum est. Quid enim ad nos pertinet recedentes è mundo, si nomine nostro alius nominetur, cum & filius non statim patris vocabulum referat, & innumera- biles sint qui eodem appellentur nomine. Aut quæ se-*



*neclutis* auxilia sunt enutrire domi, qui aut prior te fortè morierur, aut peruersissimis sit moribus, aut certè cùm ad maturam ætatem venerit, tardè ei videaris mori. Quid iuxta Euripidis sententiam, quam etiam vsurpat clarissimus Boëtius, carentem liberis infortunio foelicem prædicare licet. Nunquam tot monstra produxit Africa, quot seculum istud, quod ad liberos spectat, nam de cæteris non est hîc dicendi locus. Neque verò duntaxat illud mirandum est quod

Boëtius 5.  
Consol.  
prof. 7.

*Filius ante diem patrios inquirat in annos.*

Ovid. 1.  
Metam.

Quis non potius exhorrescat tot parricidia ab ingratis-  
simis & hominum postremis filiis perpetrata. Fidem  
luculentè facient ipsa tribunalia: horum parentum  
quod aliud vel utilius, vel iustius votum esse aut potuit,  
aut debuit, quàm liberis carere? Sed pergamus &  
videamus quàm magno constet istud bonum prolis. Certè  
parientem mulierem in summo vitæ discrimine versari,  
non tam literæ, qua Sacræ, qua prophana, abundè  
testantur, quàm ipsa quotidiana experientia demonstrat.  
Quæ res efficit vt matres liberorum amantiores sint  
quàm patres, quandoquidem ipsa pariendi difficultas  
& labor incredibilis, longè teneriorem matribus erga  
procreatos liberos affectum indit inseritque. Ita censet  
præceptor summus Aristoteles, & ex communi hominum  
sensu istud confirmat, quoniam ea nobis chariora sint,  
quæ sunt difficiliora, & magis laboriosa, vt apparet  
in diuitiis ingenti sollicitudine & labore partis.  
Hinc longè lubentius accedo illorum sententiæ, qui ob  
eam rem maris & mulieris coniunctionem, non patrimonium,  
sed matrimonium appellatum esse aiunt, quandoquidem  
in isto nexu matris, non patris primariæ &

Aristot.  
Ethicor. 3.  
c. 12.

Rr ij



*D. de in  
ius voc. L.  
Quia.*

*Aristot.  
supra.  
Suidas  
Prometh.*

*Novell 17.  
Cod. 8 tit.  
18. L. ult.  
§. ult.*

*S. Hildeb.  
epist. 36.*

*Ennius  
Medea.*

*Diad. de  
Orat.*

præcipuæ partes existant. Quanquam & Iurisconsulto-  
rum illam non repudiauerim rationem, à matre matri-  
monium dictum esse: *Quoniam mater semper certa sit,*  
*etiam si vulgo conceperit, ut ait Lex, pater verò incertus.*  
Meminit etiam Aristoteles. Cuius rei lepida narratio est  
apud Suidam, de primis illis Atticæ habitatoribus planè  
rupiconibus & feris hominibus, eorumque belluinis con-  
iugiis, sed ad mansuetiorem ritum moremque à Cecro-  
pe homine Ægyptio reuocatis. Quæ igitur mulier non  
magno redemerit partus istius non tam dolores, etsi gra-  
uissimos, quàm vitæ periculum, quod ex iis non raro im-  
minet. Siquidem, ut habet Leo Sapiens Imperator, *Puer-*  
*peræ mortem præ foribus consistentem habent.* Iustinianus ut  
forfan gratiam suæ Theodoræ magis iniret, mulieribus  
ita prospectum esse voluit: *Quis earum, inquit, non mise-*  
*reatur, propter obsequia quæ maritis præstant, propter partus*  
*periculum, & ipsam liberorum procreationem.* Sanctus Hil-  
debertus Turonensis: *Magni soboles emitur, cuius conce-*  
*ptus infestatio est pudicitia, partus vitæ.* Non immeritò ita-  
que Medea illa apud Ennium ex Euripide, vociferatur:

*Nam ter sub armis malim vitam cernere,  
Quàm semel modò parere.*

Cernere, pro, de vita dimicare dixit. Sed ut laborem labori,  
& ærumnam ærumnæ ipsis mulieribus adnectamus, videam-  
us an proprios lactare liberos debeant. Nobilis ista quæ-  
stio est. Seu Tacitus, seu quisquis auctor Dialogi de Ora-  
toribus, veterum Rom. seueritatem & disciplinam circa  
educandos formandosque liberos ita demonstrat: *Iam*  
*primum suus cuique filius ex casta parente natus, non in cel-*  
*la emptæ nutricis, sed gremio & sinu matris educabatur,*  
*cuius præcipua laus erat, tueri domum, & inservire liberis.*



Apud Agellium decantatissimus ille Phauorinus de ea re Agell. 12.  
cap. 1.  
 multis verbis disserit, sed pauca proferam: *In primis, quæ*  
*filium proprio lacte non nutriat, nec totam, nec integram esse*  
*matrem filij sui. Quod est enim hoc contra naturam imperfectum*  
*atque dimidiatum matris genus peperisse ac statim ab se abiectisse?*  
*aluisse in utero, sanguine suo, nescio quid, quod non videret,*  
*non alere nunc suo lacte, quod videat, iam viuentem, iam ho-*  
*minem, iam matris officia implorantem. Quin naturam ipsam*  
*fœminis mammarum vbera quasi quosdam nœuulos ve-*  
*nustiores, non liberorum alendorum, sed ornandi pecto-*  
*ris causa dedisse? Idcirco detestandas illas prodigiosas mu-*  
*lieres, quæ fontem illum sanctissimum corporis, generis*  
*humani educatorem, arefacere & extinguere laborent.*  
 Affinis huic loco alter est Clementis Alexandrini, cum Clem.  
Alex. 1.  
ped. g.  
 scribit infantem in lucem editum, non alio nutrimento  
 educandum, quàm eo quo in utero materno vefcebatur.  
 Quod autem tunc temporis, cùm in aluo matris delitescer-  
 ret, sanguis erat; post partum formam lactis habet, &  
 fons nutrimenti efficitur, quo mulier ostenditur & vere  
 peperisse & esse mater, quæ inde erga puellum à se editum  
 beneuolentiæ stimulum accipit. Quinetiam aluisse, inter  
 homines, sæpe plura afferat amoris incitamenta, quam  
 procreasse liberos. Naturæ quodammodo istud aduersa-  
 ri, infantem non materno, sed alieno lacte enutrir, non  
 modo ex iis quæ diximus aliquis iure existimabit, verum-  
 etiam ex ipso nomine quo veteres indigetarunt matres ip-  
 sas Helladius apud Photium, priscos Græcos matres suas, Phot.  
Bibliot.  
num. 279.  
*Μαῦρας*, vocare solitos prodit. Varro Latinis vsitatum Varro Ca-  
ron. seu  
de liber.  
educ.  
 scribit vt matres, *Mammas*, Patres, *Tattas* appellarent,  
 cuius rei meminit etiam Martialis. Cuius vocis si quis ori-  
 ginem aliquam curiosulus quærat, ego coniectura forsan Martia. 1.  
Epiq. 162.

R r iij



Clem.  
Alex.  
1. pedag.

Plautus  
Mecat.  
Martian.  
Capell.  
lib. 1.

non omnino à ratione aliena, dicam ex Ægyptia reptendam, siquidem Ægyptiæ mulieres primum lac, quod infantibus præbent, *Mamma* vocant, quemadmodum Clemens Alexandrinus auctor grauiſſimus teſtatur. Indignum ergo penitus ut matris nomen gerant & *Mamma*, (vnde noſtro idiotiſmo, *Mammam*) vocentur, quæ *Mamma* ſeu lac proprium ſuis infantibus negent. Iſtud ne equo animo ferent, ut etiam ipſi puelli ſuas nutrices coram matribus *Mammæ* vocent; & nonnunquam apud Veteres, nutricibus nomen iſtud tributum legimus. Bono proliſ iſtud adiiciamus, liberos ex iuſto matrimonio natos, ſuæ familiæ ſtabilimentum & firmamentum videri, non modo ne res & opes domeſticæ ad extraneos transferantur, verum etiam ſi quis eam oppugnare & infectari audeat, firmiſſimis veluti propugnaculis munitam deprehendat. Iſta ſunt Stati,

Statius 4.  
Sylu. ad  
Maximū.

----Quod alma  
Prole fundasti vacuos pœnates  
O diem letum? venit ecce nobis

----Maximus alter.

Orbitas omni fugienda niſi  
Quam premit votis inimicus hæres,  
Optimo poſcens (pudet heu) propinquum  
----funus amico.

Plin. 4.  
Epiſt. 2.  
Tacit. 4.  
hiſtor.

Non Lu-  
fra.

Ita Plinius Iunior: *Domum pluribus adminiculis fundatam*, id eſt, pluribus liberis, dixit. Et apud Tacitum: *Liberi firmiſſima imperij munimenta* appellantur. Tantum bonum ſuppeditat Vxor iuſta & pudica, quæ etiam Aſranio veteri Poëtæ, *Firmamentum familiæ nominatur*.



## CAP. VIII.

**Q**ui facti semel à se naufragij tabellam ostentat, is  
 commiseratione dignissimus habendus est, sed si  
 mari denuo sese committat, cuius fides infamis est, ut lo-  
 quitur Tertullianus, nemo non temeritatem illius dam-  
 nabit. Non aliter de iis qui priore soluto matrimonio, se-  
 cundo sese implicare audent. Duo sunt quæ ipsos coniu-  
 ges altero orbatos ad nouam copulam impellere videan-  
 tur, proles suscipienda, quæ priore coniugio caruerunt,  
 aut repetendæ coniugalis consuetudinis cupiditas. Prius  
 illa ratio mihi semper æquissima visa est. Quis enim non  
 superstitem sui memoriam in liberis & posteris exoptet?  
 posteriorem istam attingit Apostolus: *Dico autem nonnu-* 1. Cor. 7.  
*ptis & viduis, bonum est illis si sic permanserint, sicut & ego:*  
*quod si non se continent, nubant; melius enim est nubere quam*  
*uri.* S. Fulgentius viduarum fœlicem statum illum mirifi- S. Fulgen.  
 cè commendat, Apostolum secutus: *Coniugali namque,* Epi. 1.  
*inquit, seruitute turpitudine vincitur fornicationis; viduali ve-*  
*rò libertate, crescit dignitas castitatis. Illic fides consulit infirmi-*  
*tati, ne cadat in vitium, hic se fidelis animus ad virtutis exten-*  
*dit augmentum.* Paulò post: *Beata quæ illicitum concubitum,*  
*turpitudinis horrore, non appetit, sed beatior licitum maiore pu-*  
*ritatis amore contemnit.* *Beata quæ alligata viro sic viuit, ut*  
*soli viro carnis suæ debitum reddat, sed beatior quæ soluta sic* Tertull de  
*permanet innupta ne debeat.* Debitum vocat, quod Tertul- vel. Vir-  
 lianus, tributum & communem contumeliam dicit. Apud Ana- gin.  
 stasium Nicenum, ἐξωνο, stipendium: cuius quidem de- Anast. Nicen.  
 biti mentio habetur in Exodo, secundum versionem He- quæst. 53.  
 bræi & Chaldaïci textus. Verum antequam secundum cap. 15.  
Exod. 21.



S. Zeno  
Serm. de  
contin.

istud nuptiarum iugum subeant, audiant Episcopum & Martyrem sanctissimum Zenonem. Responde, bonūne amiseris maritum an malum? Si malum, & desideras nubere, digna es quam peior affligat. Si bonum, fidei serua signaculum, pati non meretur iniuriam ipse, cui perhibes testimonium. Vbi est ille qui inuicem desiderantibus vobis tardior ceteris videbatur primus matrimonij dies? Vbi pretiose virginitatis festa utrisque dulcis occisio? Vbi amor qui in æquo vnitoque coniugio, è duobus altero superante, non moritur? Tu ne non illa es quæ mariti corpus expositum lauisti lachrymis, oculis deterxisti, crinium damno velasti, scissis genis, liuore fœdatis vberibus, sordido plus puluere tecta quam veste? Tu, inquam, non es, quæ nunc cælum ipsum ululatus rumpens, post talem maritum puncto temporis viuere te non posse clamabas? Nunc elusis dolore gemitibus, sæpe mortua spiritu, labentibus membris ad terram, incertas reddebases exequias, cui magis lachrymas commodarent mortuone an morienti? Posthæc, si lubet nubere, illa omnia mentita es. Quid hoc est? Ecce rursus ad lenocinia redis: colorem de pixide mutuaris paulo ante damnatum. Sanctus Hieronymus epist. 10. Superducit mater filijs non nutritium, sed hostem; non parentum, sed tyrannum. Inflammata libidine obliuiscitur uteri sui, & inter paruulos suas miseras nescientes lugens dudum noua nupta componitur. Mitto cætera non minoris elegantia, quæ non minus pungunt animum prioris & quidem tenerriam amicitia memorem.

Novell. 22. Vnde merito Iustinianus Imperator, mulierem quæ post viri mortem ad secunda vota seu nuptias transit, Defuncti mariti animam contristare dicit. Scio istud B. Hieronymi, Epist. 22. Vidua difficilior experta caret voluptate. Et alio loco: Virginitas in eo facilius est, quod carnis incentiua non nouit, & viduitas in eo sollicitior, quod præteritas animo recolit voluptates, maxime



ximè si se virum putet perdidisse, non præmisse, quorum alterum doloris, alterum gaudij. A Tertulliano ista sunt: Credo ait, difficilius saluum derelinqui, quàm amissum non desiderare. Durum enim & arduum satis continentia sanctæ faminx post viri excessum. Intemperatiam muliebrem Romani veteres appellarunt repetitas nuptias. Sic Valerius: Existimabant enim illi, eum præcipuè matrona, sincera fide incorruptum esse animum, qui depositæ virginitatis cubile pudicum egredi nesciret, multorum matrimoniorum experientiam, quasi illegitimæ cuiusdam intemperantiæ signum esse credentes. Ita Pompeius Magnus ad Corneliā uxorem apud Lucanum.

Tertull. 1.  
ad uxor.Valer. 2.  
cap. 1.

Lucan. 3.

---Ultima debet

*Esse fides lugere virum.*

Illud citra omnem dubitationem existit Romanis semper maiori in pretio & commendatione primas nuptias fuisse habitas, quibus celebrandis non quoduis tempus dicatum. Et de iis illud Ouidij intelligendum,

Ouid.  
Fast. 5.*Mense malum Maio nubere vulgus ait.*

Et paulò ante discrimen aliquod statuit nuptiarum,

*Nec viduæ tedis eadem, nec virginis apta**Tempora.*

Illā quauis die & mense, hæc virgo nunquam mense Maio. Rationem assignat Porphyrio Horatij interpres, quod eo mense Lemuria sacra, à Romulo instituta sint, ad placandos manes Remi fratris, suo iussu interfecti. At, ut hoc obiter dicam, Persæ aliter quàm Romani nuptias initio æquinoctij verni celebrabant, testè Strabone. Sed ad rem, & nunc expendatur Apostoli digna vox illa: *Mulier alligata est legi, quanto tempore vir eius viuit: Quod si dormierit vir eius, liberata est à lege. Cui autem vult nubat tantum in Domino. Beatior autem erit si sic permanserit*

Porph. ad  
Epist. vltimam l.  
2. Horat.

Strabo. l.

15.  
1. Cor. 7.

Sf



S. Greg.  
Nazianz.

Tertull. de  
Monegam.

S. Chry-  
sost. in epist.  
1. ad Cor.  
S. Hieron.  
in Iovin.  
S. Ambr.  
in epist. ad  
Cor. 1. c. 7.  
Author.  
op. imp. in  
Math.  
hom. 32.

Balsam. in  
epist. S.  
Basil. ad

rit, secundum meum consilium. S. Gregorius Nazianzenus, idcirco non ex præcepto, sed ex concessione secundas illas adstruit nuptias. Primæ, inquit, nuptiæ legis sunt; secundæ, indulgentiæ, tertiæ, præuaricationis & vile quod ultra est. Tertullianus: *Possum contendere non mere bonum esse quod permittitur. Quod enim mere bonum est, id non permittitur, sed vltro licet. Permissio habet aliquando causam etiam necessitatis: Incontinentiæ & impuditiæ scilicet periculum.* Sed quid sit viduam tantum in Domino nubere, vt hoc insuper addam, exponit B. Chrysost. cum honestate & modestia Christiana. S. Hieron. scribit iis verbis amputari Ethnicorum coniugia. S. Ambrosius, *sine suspitione turpitudinis & religionis suæ viro nubat.* Sic Balsamo. Scio aduersus secundas nuptias plus æquo duriores videri Tertullianum, S. Hieronymum, S. Ambrosium, S. Gregorium Nazianzenum. Sed omnium maximè displicet auctor ille quisquis sit operis imperfecti in Mathæum, qui illas fornicationem ausus est appellare. Hac ratione & Apostoli præceperunt secundas adire nuptias, propter incontinentiam hominum. Nam secundam quidem accipere, secundum præceptum Apostoli est, secundum autem veritatis rationem verè fornicatio est. Sed dum permittente Deo publicè & licenter committitur, fit honesta fornicatio. Propterea bene dixit Christus, quia Moyses hoc permisit non præcepit. Aliud est enim præcipere, aliud permittere. Quod enim præcipimus semper placet, quod autem permittimus, nolentes præcipimus, quia malas hominum voluntates ad plenum prohibere non possumus. Neque sum nescius viduas secundò nuptas bigamorum pœnis canonicis obnoxias esse, vt docet Balsamo, & legere est in Iure Græco Romano, sed ea est Græcorum sententia, apud



quos Leo Imperator, *Tertias nuptias turpem imo turpissimam imbecillitatem nominauit.* Sec nec præterire possum aliud eiusdem Imperatoris edictū, quod est huiusmodi: *Quem admodum adhibitis sacris deprecationibus adoptionem perfici præcepimus, sic sanè etiam sacræ benedictionis testimonio matrimonia confirmari iubemus: Adeo ut si qui citra hanc matrimonii inéant, id ne ab initio quidem ita dici, neque illos in vitæ illa consuetudine matrimonij iure potiri volumus.* Hoc si in Ecclesia Occidentali & Latina obtineret, secundas nuptias nullam omnino matrimonij rationem habere diceremus. Illud enim ratū apud nos, ex usu etiam veteris Ecclesiæ, in secundis nuptiis benedictionem sacerdotis minimè adhiberi. Quin si Presbyter eam adhibuerit, ab Episcopo mulctetur. S. Ambrosius eius rei sic meminit: *Primæ nuptiæ à Deo sunt, secundæ verò permixtæ sunt. Denique primæ nuptiæ sub benedictione Dei celebrantur sublimiter. Secundæ autem & in præsentia carent gloria.* Ad nostras secundas nuptias redeo, easq; sanctis Patribus Ecclesiæ nō satis laudatas, nec vna duntaxat ratione. Ita S. Chrysost. Nostis profectò omnes, quod etsi per leges (Romanas) secundæ nuptiæ permittuntur, multis tamen ea res accusationibus patet, earum nonnulla capita hæcenus explicauimus. De liberis, quos ex priori coniugio sustulit mulier vidua, nunc videndum, quorum conditio sapius ex illis secundis nuptiis longè deterior contingit. Aptè Sanctus Ambrosius. *Mutato concubitu parentes deprauantur prælati filijs posterioris copulæ, neglectis autem his qui ex priori progeniti sunt.* Constantinus lege insigni hoc declarat. *Lex, inquit, non solum contra tutores, sed etiam contra faminas immoderatas atque intemperantes prospexit minoribus, quæ plerumque nouis maritis res filiorum, sed etiam vitam addicunt, Scitè Iuuenalis.*

*Amphil.  
Iur. Græc.  
Rom. l. 8.  
Novell.  
90.  
Novell.  
89.*

*S. Ambr.  
in epist. ad  
Cor. c. 7.*

*S. Chry-  
sost. hom.  
2. ad Ti-  
m.*

*S. Amb.  
6. hexam.  
cap. 4.  
Cod. 5. tit.  
37. l. 22.*

Sf ij



*Iuuenal.  
Sat. 6.*

*Vos ego pupilli monco quibus amplior est res,  
Custodite animas, & nulli credite mense,  
Liniida materno feruent adipata veneno.*

*Ioan. Ma-  
gnus hist.  
Goth. l. 9.  
cap. 29.*

Historia memoratu dignissima de muliere, priore mari-  
to vita functo, secundas nuptias intemperantissimè pro-  
curante, & proprium filium ex priori coniugio genitum  
abdicante. Rem sic narrat Ioannes Magnus in historia  
Gothorum. Mulier defuncto marito, secundas nuptias  
amatori spondit, & conditionem adiecit, filium è  
prioris mariti domo eiecturam; quod dum tentat, con-  
quæstus est filius apud Theodoricum Regem Gothorum  
in Italia. Vocata mulier negauit suum esse filium, suppo-  
situm dixit. Res contentiosè agitata, Rex suadet mu-  
lieri vt Iuuenem pro marito accipiat, quia florenti ætate,  
quia pulchellus. Mulier consternata substitit & siluit,  
tum ad se rediens, cauillationibus rem subterfugere cœ-  
pit, & ambagibus multa inuoluere. Theodoricus, alio-  
qui rei inscius, suspicari cœpit quod res erat, fingit se pœ-  
nam addere nisi consentiret, tunc coacta mulier, horro-  
re sceleris, suum esse filium confessâ est. Vereor ne in  
hac causa præiurari me dicat quispiam, quandoqui-  
dem mulieres duntaxat secundo, etiam, si Diis placet,  
tertio nupturientes, perstringam; viris vero qui ad secun-  
da vel tertia vota, vt lex loquitur, hoc est ad, secundas &  
tertias nuptias confugiunt, paream; de quibus tamen ni-  
hil mihi grauius vel acerbius dicendum, quàm penè  
omnem exuisse humanitatem erga liberos ex antece-  
dente coniugio susceptos, si illis nouercam inducant.  
Vniuersim apud Tacitum *Valerius Messalinus* dixit, mari-  
tos sæpius ab vxoribus deprauatos, sed eo magis nouercalibus

*Tacit. 3.  
Annal.*



delinimentis & illecebris corrumpi non rarò, res adeò decantata apud Poëtas & historicos cuiusvis generis, etiam legum testimonio, vt nemo, nisi qui à Musis planè alienus. id negarit. Nec illud Statij prætermittam, *Vxorem viuam amare voluptas est, defunctæ religio.* Audiant præterea S. Hieronymum: *Qui uxorem habet, & debitor dicitur, & esse in præputio, & seruus uxoris, & quod malorum seruorum est, alligatus.* Quid istuc rei maritum cum seruo, & more veterum, mancipio cõparari. Scio priscos scriptores matrimonium, *seruitutem* nominasse. Sed B. Hieronymo maritum non tantum seruum appellasse sufficit, quin & malum adiunxit, quod probat ex eo quod Apostolus, *alligatum esse uxori dixit*, ac si maritus non sit ex ea classe seruorum qui frugi habebantur, sed è numero fugitiuorum qui vel literati, & frontibus inscripti, vel catenati, quique in splendorem redigerent cõpedes. Addo & illud, quid si post primas illas nuptias viri viduas ducant vxores, illos scire conuenit viduam nihil asferre irreposcibile, sed venire iam ab alio præfloratam, & ipsis ad quæ velint minimè docilem.

Statij  
præfat. 5.  
Sylvar.  
S. Hieron.  
lib. 1. in  
Iovin.

Apul.  
Apolog.

## CAP. IX.

**T**Andem ad tertium illudque præstantissimum matrimonij bonum peruenimus, quod Sacramentum vocant. Sed quoniam Sacramenti vox ipsa ambigua existit, illud primum videndum est, Sacramentum hoc loco non esse accipiendum pro Sacramento legis nouæ. Plurimum enim discriminis assignatur inter vtrumque, sed nostro more, nostrisq; verbis res explicanda est. Sacramenta nouæ legis à Christo numero septenario instituta, sunt signa sensibilia; at sacramentum, seu bonum eiusmodi matrimonij,

Card. Ar  
cel. c. 61.

Sf iij



Constit.  
Apost. li.  
7. c. 3.

Cod. Greg.  
5. tit. de  
nupt.

est quiddā spiritale in mentibus contrahentium, nos istud vocabulo paulō rudiori, sed tamen apto, indissolubilitatē vocamus. Deinde Sacramentum Matrimonij momentaneum, & vt loquuntur, cōsistit in fieri, indissolubilitas verò manet & citra vllum motum est. Tum Sacramentū propriè dictum est dispositio ad gratiam in dignè suscipientibus. At ita non se habet indissolubilitas eiusmodi. Itaque Sacramentum, vt est tertium matrimonij bonū, nihil aliud est quàm perfectio intrinseca matrimonij, quatenus est Sacramentum nouæ legis. Vnde verò vinculum hoc indissolubile seu indissolubilitas petēda sit, si quis quærat non aliunde certè quàm ex mysterio seu sacramento coniunctionis Christi cum Ecclesia, quam ipsi cōiuges representāt, nexu isto indissolubili, ita vt matrimonium semel ritè & iustè initum, nulla omnino ratione dissoluatur, quemadmodum inter Christū sponsum & Ecclesiam sponsam nullum planè dissidium repudiumve, imo ne fribusculum quidem pertimescēdum sit. In constitutionibus quæ Apostolorum nomine circumferuntur, multiplex vnio & nexus inter coniuges statuitur: Naturæ, quia vnum corpus & vna caro sint, conspirationis siue consensus, vnionis seu corporum cōmixtionis, affectus coniugalis, vitæ vnitatis seu cohabitationis, indiuiduæ vitæ consuetudinē seu societatem dicimus, vnitatis moris, qua quantum fieri potest optimè congruentem & conuenientem viuēdi rationem, supportantes inuicem, retineant. Ea res effecit vt omnes non modò Christiani, sed etiam Gentiles in matrimonio non tam profanum pactum, quàm dignitatem aliquam religionis ac venerationis plenam agnolcerent. Sic enim Diocletianus & Maximianus Imp̃p. de ipso matrimonio loquuntur: *Religionem sanctitatēque in connubiis copulandis volu-*



mus ab unoquoque seruari. Tum postquam affinitate & consanguinitate personas coniunctas nonnullas recensitas à nuptiis contrahendis remouerint, subiungunt hæc: *Nihil enim nisi sanctum & venerabile nostra iura custodiunt, & ita ad tantam magnitudinem Romana Maiestas cunctorum Numinum fauore peruenit, quoniam omnes suas leges religione sapienti pudorisq; obseruatione deuinxit. Istud paulò antea indicarant, cum iis verbis vtuntur: Id enim pietati nostræ maximè placuit ut sanctè necessitudinum nomina obtineant apud affectus suos piam & religiosam cōsanguinitati debitam charitatem.* Hinc Tacitus propter adulterium violatas religiones & Maiestatem dixit, Nec aliud intelligendum videtur ipsa Modestini sentētia, qua vult Matrimonium esse cōmunicationem Diuini & humani iuris. Veteris Ecclesiæ Patres nonnullos audiamus. Tertullianus: Vnde sufficiam ad enarrandam felicitatem eius matrimonij quod Ecclesia conciliat, & confirmat oblatio, & obsequium Angeli renuntiant, pater rato habet. Cœlestis nimirum, quod hæc sequentia declarant: Nam nec in terris filij sine consensu Patrum, ritè & iure nubent. S. Ambrosius: Coniugium velamine Sacerdotali & benedictione sanctificari oportet. Alio loco: Deum præsulem coniugij, custodem, & auctorem vocat. Quis & quàm religiosus cultus in nuptiis adhibendus sit, docet S. Gregorius Nazianzenus, cuius pro nuptiis alicuius puellæ sibi notissimæ hæc vota exprimuntur: Christus nuptiis intersit, porro ubi Christus est, modestia quoque est; atque aqua in vinum conuertatur, hoc est, cuncta in melius mutantur, sic nimirum, ut quæ misceri nefas est, inter se minimè misceantur, nec Episcopi cum Sannionibus copulentur, nec preces cum plausibus, nec psalmodia cum tibicinum cantibus. Mitto quanti faciant Græci benedictionem, vt vocant nuptialem, de qua Leo Sapiens, & Balsamo. Ista quæ paulò

Tacitus  
Annal.

D. 23. tit. 2.  
l. 1.

Tertull. 2.  
ad uxor.

S. Ambr.  
epist. 70.

S. Gregor.  
Nazianz.  
epist. 193.

Leo No-  
uell. 74.

Balsam. in  
Can. 99.  
Cœc. Trul.



Quintil.  
decl. 306.  
Calpurn.  
declam. 44  
Iur. Græc.  
Rom. l. 8.

Quintil.  
decl. 376.

Cod. Theo.  
l. 3. tit. 16.  
l. 1.  
Cod. 5. tit.  
17. l. 8.  
Cod. Theo.  
l. 3. tit. 16.  
l. 2.

Innom. Côt.  
9. art. 3.

superius à sanctissimo Episcopo recensentur, firmant veterum sententiam, non videri nuptias ritè celebratas nisi publicus apparatus & cœtus adhibitus fuisset. Vnde apud Quintilianum: *Asspice illam Virginem quam Pater tradidit euntem die celebri, comitante populo.* Sic apud Calpurnium: *Non probari matrimonium nisi faces accensæ, & fescennina decantata fuerint.* Græci ita sentiunt, dum dicunt, matrimonium esse coniunctionem maris & fœminæ, & omnis vitæ consortium, Diuini & humani iuris communicationem, siue per benedictionem, siue per coronationem, siue per instrumentum contrahatur. Quæ autem præter hosce modos facta sunt, pro non contractis habentur. Paulò post: *Nemo secretò coronetur, sed pluribus præsentibus.* Quorsum igitur clanculariæ nuptiæ? Nunc vinculum hoc matrimonij, nulla penitus ratione, si ritè contractum fuerit, coniugium, dissoluendum excutiamus. Apud Quintilianum non ineptè dixit Iuuenis ille, *Matrimonium tum perpetuum esse, si mutua voluntate iungatur.* Addit enim: *Quaratur mihi vxor socia thori, vitæ consors, in omne seculum mihi eligenda.* Hæc est quæ à nostris indiuidua vitæ consuetudo nominatur. Quod verò ad eam soluendam, siue ad dirimendum contractum matrimonium à Theologis & Iurisconsultis differitur, illud planè prætermitto, cum vnique obuium sit. Nec de diuortij causis, quas veteres, seu ex morum, seu ex criminum culpa repetebant, hoc loco quidquam dicendum est, nisi quod si Constantini Magni lex, & altera Theodosij & Valentiniani, quam descripsit Iustinianus, de repudio vxori à marito dando, & vicissim nostris temporibus in vsu esset, innumeras prope modum viduas necnon & cœlibes viros (sic enim & viri quibus vxores ademptæ, vocantur apud veteres) cernere-

mus.



mus. Constantinus ille Magnus, vult in repudio mittendo *Cod. Theod. l. 3. tit. 16.*  
 à fœmina, viro suo, hæc sola crimina inquiri, *si homicidam,*  
*vel medicamentarium* (id est, veneficum) *vel sepulchrorum*  
*dissolutorem maritum suum esse probauerit.* In masculis etiam,  
 si repudium mittant, hæc tria crimina inquiri conueniet,  
*si macham, vel medicamentariam* (id est, veneficam) *vel con-*  
*ciliatricem* (id est, lænam) repudiare voluerit. De iis verò  
 agendum est, quæ ementita viduitate, nouos sibi maritos  
 quærunt, adeò vel maximè priorum nuptiarum illas tæ-  
 deat, vel procacitate stupri, aut potius adulterij, aliquem  
 sibi conciliauerint. Sunt autem eiusmodi quæ aliquantum  
 diuturnam maritorum absentiam se ferre non posse te-  
 stantur. At de mora & absentia eiusmodi non benè leges  
 Ecclesiasticæ cum Ciuilibus conueniunt. Cōstantinus Ma-  
 gnus quadriennij absentiam constituit. Iustinianus ali-  
 quando quinquennium. Veruntamen idem longè aliter  
 postea censuit: *De ijs, inquit, qui in expeditionibus sunt, &*  
*in militijs sunt constituti, iubemus quantosunque annos in ex-*  
*peditione manserint, sustinere eorum uxores, licet nec literas, nec*  
*responsum aliquid à suis maritis susceperint.* Itaque vxoribus  
 huiusmodi præcipit Imperator, *ut adeant Chartularios nu-*  
*merorum, & cohortium, vel adeò Tribunos ipsos, qui Sacris*  
*Euangelis propositis, sub gestis monumentorum deponant, si pro-*  
*veritate vir mortuus est: quod si ita res se habeat, etiam post hoc*  
*iubemus, inquit, manere eam per unius anni spatium, quo de-*  
*curso tunc ei liceat legitimas contrahere nuptias.* Extat in eam  
 rem Capitulum Concilij Gallicani, apud Vermerias. Inte-  
 rim quis iste locus sit, ex Aimonio docet vir reconditiore  
 doctrina & acerrimo iudicio clarissimus Sirmondus, &  
 Palatium Regium ad Isaram fluuium situm esse prodit,  
 quod nunc apud nos Verberia nuncupatur. De posteriori

*L. 7. Cod. de repud. Nouell. 22. c. 7.*

*Nouell. 117*

T t

hac designatione est quod dubitem, nam ait eruditissimus Sirmondus non ita procul Compendio Verberiam sitam esse. Certum est Compendium Isara fluuiio allui, & Vermerias. ad Isaram fluuium positas, Verberia verò octo milliariibus à Compendio recto itinere distat, ac proinde ab Isara fluuiio. Vt-vt sit, caput huius Concilij ita conceptum est: Si quis, necessitate inuitabili cogente, in alium ductum seu prouinciam fugerit, & eius vxor, cum valet & potest, amore parentum & rerum suarum eum sequi noluerit, ipsa omni tempore. quandiu vir eius, quem secuta non fuit, viuit, semper innupta permaneat. Male vxor ista, quæ nosse debuit mulierem coniugio copulatam, dici consortium rerum secundarum aduersarumque mariti, vt loquitur Tacitus. Ita Vlpianus: Quid tam humanum est, quàm vt fortuitis casibus mulieris maritum, vel uxorem. viri participem esse? Non aliter sanctissimus Leo primus, Pontifex Romanus, rogatus à Niceta Aquileiensi Episcopo, quid de mulieribus, quæ viris propriis bellica cladè & hostilitatis incurfu in captiuitatem abductis, alios sibi matrimonio iunxerant maritos, sentiret: Respondit, Inculpabile iudicandum, quod necessitas (captiuitatis) intulit, & restituendum quod fides poscit. Redeant ergo, inquit, in suum statum voluntaria reintegratio-  
ne coniugia, neque vllò modo ad opprobrium malæ voluntatis trahatur, quod conditio necessitatis extorsit. Quod si aliquæ  
mulieres in posteriorum virorum amore sunt captæ, vt  
malint his cohærere quàm in legitimum redire confor-  
tium, meritò sunt notandæ, ita vt etiam Ecclesiastica  
communione priuentur. De vxoribus illis restituendis  
suis prioribus maritis, postliminio reuersis, sententiam  
firmat ratione à simili ducta: Multa quæ ad eos qui in capti-  
uitatem ducti sunt, pertinebant, in ius alienum transire potue-

Burchard. d.  
l. 2. c. 54.

Tacit. lib. 3.  
D. l. 24.  
tit. 3. l. 22.  
S. Leo  
ep. 77.



runt, & tamen plenum iustitiæ est ut iisdem reuersis propria re-  
 formentur. Quod si in mancipiis, vel in agris, aut etiam in do-  
 mibus ac possessionibus ritè seruetur, quanto magis in coniugio-  
 rum reintegratione faciendum est, ut quod bellica necessitate tur-  
 batum est, pacis remedio reformetur. Pergamus tandem, & il-  
 lam indiuiduam vitæ consuetudinem absoluamus, quæ li-  
 cet conuictum & indiuiduum vsum, ut loquitur Tertullia-  
 nus, denotet, & de qua Lactantius iis verbis: *Quis aut vir* *Lactant. 3.*  
*mulierem, aut mulier virum diligit, nisi habitauerint semper* *cap. 21.*  
*vnà? nisi deuota mens, & seruata inuicem fides indiuiduam fe-*  
*cerit charitatem?* Attamen nobis Christianis indiuidua illa  
 vitæ consuetudo præsertim ac præcipuè perpetuam & in-  
 dissolubilem, quæque diuidi nequeat, (vnde Horatius irru-  
 ptam dixit) copulâ denotat, quæ in personis legitimè con-  
 trahentibus quantumvis quoad thorum aliquando solua-  
 tur, nunquam tamen quoad vinculum dirimi potest. Hic  
 est firmissimus amoris coniugalis nexus, hæc arctissima  
 mutux amicitix copula, quam nullæ res aduersæ adeò  
 conuellere potuerunt, quin ad vltimam rerum humana-  
 rum metam, optimi quique coniuges illam ipsam pro-  
 duxerunt, & communi vtriusque sepulchro posteris te-  
 statam esse voluerunt. Tobias filium ita monuit: *Cùm ac-* *Tobie 4.*  
*ceperit Deus animam meam, corpus meum sepeli, & honorem*  
*habebis matri tuæ omnibus diebus vitæ eius. Cùm autem & ipsa*  
*compleuerit tempus vitæ suæ, sepelias eam circa me.* S. Augu-  
 stinus de S. Monica matre sua illud refert: *Gaudebam &* *S. Aug. 11.*  
*gratias agebam tibi, Deus meus, recolens quod noueram quanta* *Confess. 9.*  
*cura semper æstuasset mater, de sepulchro quod sibi prouiderat* *cap. 11.*  
*& preparauerat iuxta corpus viri sui. Quia enim valde concor-*  
*diter vixerant, id etiam volebat, ut est animus humanus minus*  
*capax Diuinorum, adiungi ad illam felicitatem, & commemo-*

T t ij

*Burchard.*  
*l. 3. c. 161.*  
*162.*  
*Ibid.*

rari ab hominibus, concessum sibi esse post transmarinam peregrinationem, ut coniuncta terra, amborum corporum terra tegetur. Burchardus Vormatiensis Episcopus ex S. Hieronymo ista refert: Quos coniunxit unum coniugium, coniungat unum sepulchrum, quia una caro est, & quod Deus coniunxit, homo non separet. Item ex B. Augustino: Vnaqueque mulier sequatur virum suum, siue in vita, siue in morte. Ita in primo connubio coniuncti, quia una & eadem caro est, in uno sepulchro sepeliantur. Aptissimè apud scriptorem antiquum: Sanè ibi idem & maximus & honestissimus amor aliquanto præstat morte (necnon sepulchro) iungi, quàm vitæ distrahi.

*Fæliciter ter & amplius*

*Quos irrupta tenet copula, nec malis*

*Diuisus querimoniis.*

*Suprema citius soluet amor die.*

Et Romæ apud S. Petrum, longè aptius, pudicissima & sui viri superstitis amantissima coniux, sic loquitur:


*Ne qua manus bustum violet, nisi forte iugalis*

*Hæc iterum cupiat iungere membra suis,*

*Vt thalami tumuliq; comes nec morte reuellat,*

*Et socios vitæ nectat uterque cinis.*





V A R R O,  
SIVE  
DE MVLTIPlici  
SCRIPTORVM GENERE.

## CAPVT PRIMVM.

**I**NGENIORVM bonitas à Cælo & solo. Ingenium viti persimile culturam desiderat. Europæorum & Asiaticorum collata ingenia. Atticum ingenium.

## CAP. II.

Ingeniorum cultura. Pater optimus liberorum magister: formido ad discendum nocet plurimum. Qui discipuli ad bonas artes capeffendas parum idonei, nec vna ratione.

## CAP. III.

Cui vsui comparata eruditio. Finis triplex Lactantio. A litteris & scriptione immortalitas.

## CAP. IV.

Lectio, Iudicium, otium ad scribendum necessaria. Bibliotheca paranda studium cuiusmodi: Iudicium in scribendo quo pacto adhibendum. Obscuritas vitanda. Festinatio non laudatur. Scribendi materia dissimilis parem stylum desiderat. Otium captandum.

## CAP. V.

Ingenij sterilitas, eius cause multiplice. Cur eruditi nonnulli aliquid litteris mandare recusent. Oij torpor homini erudito vi-

Tt iij

tandus. *Aduersus eos qui discendi cupidos scriptis suis nescio qua perniciacia fraudant. Seculi infelicitas, quo nullus laborum fructus, à scribendo plures deterret.*

## CAP. VI.

*Primum genus scriptorum eorum qui res antea à nemine pertractatas in lucem primi proferunt. Non omnia patefacta, multa superesse indaganda. Ad historiam verè scribendam iter lubricum.*

## CAP. VII.

*Secundum genus. Scriptorum, eorum qui rem iam tractatam attingunt, sed dissimili & stylo, & methodo. Imitatio non omnis laudanda.*

## CAP. VIII.

*Tertium genus, Plagiatorum. Tribus modis aliena sumuntur. Gentilium prestantissimi quique Philosophi quantum è libris Sacris Hebraeorum profecerint. Aegyptij Prophetæ, id est, Sacerdotes. Mosis Pentateuchus ante Alexandri M. tempora in linguam Græcam conuersus. Euripides Aristophani Plagiarius. Prouerbum, Phanicum sermones, quid significet, excusatio veterum, qui ex antiquioribus aliqua, vel non pauca mutati sunt. Veri Plagiarij qui, iique duplicis generis. Aliena opera, nobiliorum auctorum in inscriptione, prænotata.*

## CAP. IX.

*Quartum genus scriptorum, eorum qui ex vna in aliam linguam auctorem aliquem interpretentur. Quid in illis versionibus præstandum.*

## CAP. X.

*Quintum genus scriptorum, qui aut Commentarijs, aut Scholijs auctorem aliquem illustrare contendunt.*

## CAP. XI.

*Scriptorum imperitorum scribendi pruritus. Pracoces In-*



geniorum fructus. Non quam-cito & ad molem, sed aptè & conuenienter scribendum.

## CAP. XII.

De lectoribus & iudicio librorum editorum. Nemo sui operis Iudex legitimus. Vulgi Iudicium repudiandum; periti harum rerum, de quibus ferendum Iudicium, probi Iudices. Aduersus reprehensores malignos.


## CAP. XIII.

Qualis censura de nostris scriptis ferenda, aut quæ ad materiam quæ tractetur, aut ad dispositionem, aut ad stylum referatur. Scriptores styli Asiatici, vel styli Attici. Vulgo magna pro bonis. Theologica scriptio.



V A R R O,  
S I V E,  
DE MVTIPLICI  
SCRIPTORVM GENERE.

## PRÆFATIO.



I quis fortè miretur plus esse librorum hoc tempore qui in lucem aspectumque hominum veniant, quàm olim muscarum est cum caletur maximè, is nostri seculi ingeniorum fertilitatem reprehendat necesse est. Vitis fecundissimæ vberem prouentum quis damnet? nisi ut in plerisque vitibus, fron-

dium, foliorum, pampinorum, plus satis, vuarum parum; ita ingeniorum foetus quamplurimi exangues, expallidi, ipsa macritudine deformes, & nonnunquam abortiui, pauci vero succi, sanguinis, roborisque plenissimi appareant. Horum omnium discrimen quale sit, disquirere operapretium videtur, vt tandem verum ac legitimum scribendi genium deprehendamus.


Scriptorum quinque genera, ni fallor, statuenda sunt, Primum eorum qui circa rem antea vel ignotam, vel à nemine hæcenus pertractatam versantur. Secundum eorum quibus idem propositum genus subiectum in quo aliena laborauit iudustria, sed alia methodo, aliisque & planè diuersis rationibus adhibitis, ipsisque adiungo illos, quibus placet quidem iam excussa materia, attamen communes, seu doctorum, seu vulgi de ea sententias planè respuunt. Tertium est plagiatorum. Quartum interpretum qui auctores alterius linguæ in suam vel aliam conuertunt. Quintum eorum qui auctores seu veteres, seu alicuius nominis, vel libro commentario, vel notis illustrare voluerunt. His examinem eorum qui aliena scripta legunt subiungemus, ac qui legitimi nostrorum scriptorum iudices habendi sint anquiremus, denique reprehensorum nationem excutiemus.

CAPVT



## CAPVT PRIMVM.

*Ingeniorum bonitas à Cælo & solo.*

 E D antequam singula persequamur, ingeniorum vim naturamque prius explicare par est. Est enim mortalium dux & imperator animus, *Sallust.* aiebat Sallustius. Ingenium hominis vituper simile esse arbitror: Vitem ex Cælo soloque ac denique cultu, æstimandam esse veteres tradidère. Vitem, inquit *Columella prefat. op.* Columella, ceteris stirpibus iure preponimus, non tantum fructus dulcedine, sed etiam facilitate, per quam omni pene regione & omni declinatione mundi, nisi tamen glaciali vel præferuida, cura mortalium respondet. Sic sunt hominum ingenia, quæ quanquam in vniuersi orbis regionibus singulisprehendantur, suamque habeant à Cælo & solo propensionem, maximum nihilominus à cultura adiumentum consequantur. Nec enim, meo iudicio Curtius audiendus *Curt. l. 3.* est, à quo ista sunt: *Ingenia hominum ubique locorum situs format;* Magistro enim qui excolat præterea opus est: Quanquam quid Cæli solique situs efficiat primum videamus.

Medicorum princeps Hippocrates, Asiaticos cum *Hippocr. lib. de aër. ag.* Europæis ita componit, vt in Asia multo pulchriora & maiora omnia nasci testetur quàm in Europa, & τὰ ἐν τῷ ἀσίου ἀνθρώπων ἡπιώτερον ἐκτρέφονται. Ac gentes illas moribus benigniores, mitiores, cultiores, elegantiores; verum, vt paulò post indicat, virili animo minimè præditas, nec laborum, ærumnarum rerumque difficilium patientes. Illud autem à Cæli solique temperamento, huiusque proinde bonitate contingere, vt à voluptate vincan-

V u



tur, postea docet, eamque ob rem Asiaticos timidiore,  
 imbecilliores, effeminatiores Europæis affirmat, propter  
 æqualitatem tempestatum, anni & Cæli clementiam. Ari-  
 stotelis ea sententia est, cum gentes Europæas, quæ frigi-  
 da loca incolant, animosas quidem esse, ingenio vero &  
 arte minus instructas: Asiaticos vero homines, ingenio-  
 sos & industrios, sed parum animosos, Græcos vero &  
 animosos & ingeniosos. Vnde vero Asiaticos imbelles  
 suspicari liceat, non aliter explicat, quàm quod ex usu &  
 consuetudine Regibus parendi, hunc mollitiei habitum  
 contraxerunt; quandoquidem non sui planè iuris, sed ad  
 alterius arbitrium viuunt, ac si ad seruitutem nati viderentur.  
 Hippocrati non aliter visum, & vtrumque sic expressit Seneca, *Herè itaque Imperia penes eos fuere populos qui  
 mitiore Cælo vruntur; in frigora Septentrionemque vergenti-  
 bus immansueta ingenia sunt, ut ait Poëta,*

*Senec. lib.  
 2. de Ira, c.  
 16.*

*Suòque simillima Cælo.*

„ Ita Vitruuius lib. 6. c. 1. Propter tenuitatem Cæli meridia-  
 „ næ nationes ex acuto feruore mente expeditius celeriusq;  
 „ mouentur, ad consiliorum cogitationes. Septentriona-  
 „ les autem gentes infusæ crassitudine Cæli propter obstan-  
 „ tiam aëris humore refrigeratæ, stupentes habent mentes.  
 „ Terrullianus etiam ad stipulatur lib. de anima. Populi fre-  
 „ quentiores apud Orientalem & Meridionalem tempera-  
 „ turam, & ingenia expeditiora. Videndi Eusebius præpa-  
 „ rat. Euang. lib. 7. c. 9. & Theodoretus lib. 1. & 5. Græc.  
 „ affect. Vniuersim à Vegetio istud rectissimè pronuntia-  
 „ tum videtur, *Plaga Cæli ad robur non tantum corporum, sed  
 „ etiam animorum plurimum valet.* Platonem imitatus est,  
 „ cuius illa sunt, καὶ τὰ τῶν οὐρανίων τόπος καὶ αἰνῶται γίνεσθαι. Poly-  
 „ bius non aliunde hausit ista, ὡς συνεξέμεινεν περὶ καὶ μὲν πάλιν

*Veget. lib.  
 1. c. 2.*

*Plat. Ti-  
 mæo.*



*πες αὖ δευτοι κατὰ ἀνάγκην*, Cælo habitationis consimiles  
 necessario omnes euadimus. Hinc illud apud veteres per-  
 uulgatum quod princeps Orator ita extulit: *Athenis tenue* *Cic. lib. de*  
*Cælum ex quo etiam acutiores putantur Attici; crassum Thebis,* *Fat.*  
*itaque pingues Thebani & valentes.* Chalcidius eleganter  
 istud explicat sua paraphrasi Platonica in Timæum, *Hac* *Chalcid.*  
*quippe, inquit, exornatione priorem urbem vestram (Athenas)* *in Tim.*  
*sepsit honestauitque Numen illud quod condidit, electo, salubri,*  
*subtiliumque ingeniorum & prudentiæ feraci loco. Cui aptari*  
*possit vel maximè istud Statij,* *Stat. lib.*  
*Ingenium quàm mite solo?* *1. Syluar.*

Quamquam Cælo solique malignitate repugnante, si mo-  
 dō & diligens & studiosa animis ad omnem honestatem  
 & doctrinam efformandis cultura adhibeatur, ipsi maxi-  
 ma cum laude sese attollere valeant, siquidem auctore  
 Iuuenale.

*Prudentia monstrat*

*Summos posse viros & magna exempla duros,*  
*Veruecum in patria, crassoque sub aère nasci.*

*Iuuenal.*  
*Satyr. 10.*

## C A P. II.

*Ingeniorum cultura.*

Priorem illam ingeniorum à Cælo & solo formatio-  
 nem excussimus, cultura illorum nunc explicanda est,  
 & quamquam *Ingenium surgat ab infantia*, ut ait Arellius *Senec.*  
 Fuscus apud Senecam Patrem; nihilominus cui vnus *Suas. 2.*  
 quisque nostrum in disciplinam se tradat in primis ac  
 potissimum videndum est. Plinio iuniori, *Olim suis* *Plin. lib. 8.*  
*cuique parens pro magistro, aut cui parens non erat, maximus* *epist. 14.*

Vu ij

Cassiod. lib.  
3. ep. 6.  
Symmac.  
lib. 4. ep.  
20.  
Auson.  
Proreep.  
ad Nepot.

quisque & vetustissimus pro parente, nec immeritò Cassiodorus, *Feliciſſimus*, inquit, studiorum labor cui priscorum carmen contigit discere per parentes. Quàm blandè istud Symmachus pronuntiauit, *Repueraſcere nos pietas iubet, ut literarum dulcedinem liberis noſtris labor participatus inſinuet*. Ausonius affectu coniunctiſſimus Symmacho, eo alluſit, cùm culpam deprecetur, ob verſus in gratiam nepotiſ editos, venuſtulos magis quàm forniculos, quandoquidem hoc annis illius, magis quàm ſuis, ſcripſiſſet, & fortasſe ſuis, quia, *ἡσπάρδεις οἱ νέεστες*. Beatos illos equidem prædicamus, quos parentes ipſi erudierint, non extranei. Quis enim aut melius, aut certius, liberorum indolem recognoſcat, quàm ipſi parentes, qui liberos ſuos ab incunabulis, atque adeò ab ipſo ortu diligentiffimè obſervarunt? Paterna vox humanitatis pleniffima liberorum animis non niſi efficaciffimè ſe ſe inſinuat, eorumque memoriæ multò tenacius inhæret; extranei non ita facilè, præſertim ſi quis in Orbiliū incidere plagofum, ita enim rem ſe habere ſcribit Ausonius, hiſ ad nepotem, quem iam grandævus ſenex erudiendum ſuſceperat, verſibus.

*Nec te clamor plagæque ſonantes,  
Nec matutinis agitet formido ſub horis,  
Quod ſceptrum vibrat ferula: quod multa ſupellex  
Virgea; quod fallax ſcuticam prætexit aluta;  
Quod feruent trepido ſubſellia veſtra tumultu,  
Pompa loci, & vani fugiatur ſcena timoris.*

Varro Cl.  
101.

Varronis ea ſententia eſt, Remotiſſimum ad diſcendum formido & nimius timor, & omnis perturbatio animi: contrà, delectatio protelo (i. adiuvento eſt) ad diſcendum. Ele-

Senec. l. 1.  
de Clemet.  
6. 16.

ganter ducta ſimilitudine à brutis animantibus, quæ in uſum hominum cicurantur, dixit Seneca, *Quicquid ſit*



probae indolis comminui trepidatione degeneri. Plinij secundi elegans de ea re carmen:

*Sic hominum ingenium flecti ducique per artes*

*Epigram.  
lib.*

*Non rigidas docta mobilitate decet.*

Sed nonnullorum ea est sinisteritas, ut quanquam magistrum nanciscantur qui pudore magis & liberalitate, quam metu & terrore illos bonis artibus imbuendos curet, attamen Musas ipsas à limine salutasse sibi satis esse ducunt, in eorum adyta penetrare dedignantur. Hinc illud Petronij Arbitri nimisquam verum est: *Pueri in scholis ludunt, iuvenes ridentur in foro, & quod utroque turpius est, quod quisquis perperam discit, in senectute confiteri non vult.* Non ablimili ratione Cassiodorus, *Pueri liberalium scholarum conuentum querunt, proficiunt ut dediscant, erudiuntur ut negligant.* Hu-iusce rei testem vnicum eumque locupletissimum proferram B. Augustinum, is enim saxum istud satis diu voluit sudans nitendo; *Laborant, inquit, homines in discendo, & breuia non valent intelligere, proluxa non amant legere; laborant itidem in docendo (Magistri) qui & pauca tardis, & multa frigidis, frustra ingerunt.* Lepida illa est Tauri Philosophi apud Agellium de sui seculi discipulis narratio: *Alius preceptor ait: hoc me primum doce; item alius, hoc volo inquit discere, istud nolo, hic à Symposio Platonis incipere gestit, propter Alcibiadis comessationem, ille à Phoëdro, propter Lysie orationem.* Etiam seculi sui ignauiam socordiamque in solida eruditione paranda meritò perstringere videtur Seneca, iis verbis, *Nemo nostrum in altum descendit, summa tantum decerpimus, & exiguum temporis impendisse philosophiae satis abundeque occupatis fuit.* Neque verò liberos tantum huic culpæ obnoxios esse dixerim, cuius sapiusculè partem multò maiorem ad parentes ipsos pertinere credendum est. Pe-

*Petron.  
Satyr.*

*Cassiod. l. 8.  
ep. 31.*

*S. Aug.  
ep. 101.*

*Agell. l. 1.  
c. 9.*

*Senec.  
epi. 59.*

V u iij

*Petrus.  
Satyr.  
Sallust.  
fragm.*

tronij verissima vox illa est: *Parentes obiurgatione digni sunt, qui nolunt liberos suos seuera lege proficere; Atque hinc Calpurniani discipuli iure nuncupandi sunt, vt cum Sallustio loquar. Tacitus, seu quisquis auctor dialogi de causis corruptæ eloquentiæ vniuersim sic ista omnia complectitur: Quis ignorat & eloquentiam, & ceteras artes descivisse ab ista veteri gloria, non inopiâ hominum, sed desidiâ iuventutis, & negligentia parentum, & inscientiâ præcipientium, & obliuione moris antiqui.*

CAP. III.

*Cui vsui.*

*Lactant.  
l. 3. c. 8.*

**C**Vi nunc vsui bonarum artium cognitione exculta ingenia esse possint, explicandum est. Lactantio: *Artes ideo discuntur vt exerceantur, vel ad subsidia vitæ, vel ad voluptatem, vel ad gloriam.* Ab Archita Tarentino Pythagoræo istud desumptum videtur, cum diceret lectiones & meditationes propter aliud expeti. Ad scriptionem hæc Lactantij si referantur, eos, qui animum ad scribendum appellant, aut vt inde victitent, aut ex eo sibi oblectationem, vel denique laudem quærant, non alia fine, operi se accingere, dicemus. Primi istius generis hominum grauem & molestant conditionem arbitror; ecquid enim quod sit excultum ingenio, & elaboratum industria ab iis proficisci possit, quorum præcipua cogitatio in parandis vitæ necessariis posita sit? quod ab ipsis exasciatum opus expectes, quibus vitæ præsidia defuerint?

*Iuuen.  
Satyr. 7.*

*Neque enim cantare sub antro  
Pierio, thyrsūve potest contingere sana  
Paupertas, atque æris inops, quo nocte dicque*



*Corpus eget.* vt cecinit Iuuenalis. At verò secundi generis, qui sibi vni facere satis, sibi duntaxat plaudere, solos sese oblectare cupiunt, ita vicissim sibi vni notos esse existimare debent, quod quàm alienum sit à ratione, nemo sanæ mentis est qui non aduertat. Tertij autem generis qui vnus gloriolæ cupiditate ducantur, rei leuissimæ operam se dare fateantur necessum est:

*Contentus fama iaceat Lucanus in hortis*

*Marmoreis, & Sarrano tenuique Saleio,*

*Gloria quantalibet quid erit, si gloria tantum est?*

Verissimè id quidem Iuuenalis. Quanquam scriptorum *Ibid.* nullus sit qui non de sui ingenij monumentis in hominum memoria æternum victuris cogitet. Plinij Iunioris *Plin. l. 3. ep. 7.* sententia in omnium, ni fallor, qui eruditionis aliquantum sibi compararint animis, altius paulò infedisse videtur: *Quatenus nobis denegatur diu viuere, relinquamus aliquid, quo nos vixisse testemur.* A litteris enim immortalitas apud mortales speranda est. Ita Peto Albinouanus:

*Viuatur ingenio, cetera mortis erunt.*

Et Poëta ob carmen malè mulctatus:

— *Nil non mortale tenemus,*

*Pectoris exceptis ingenijque bonis.*

Sic lyræ Latinæ Princeps:

*Non omnis moriar, multa que pars mei*

*Vitabit Libitinam.*

Festus Auienus:

— *Musis intermina vita*

*Permanet, & memori laus semper pullulat auro.*

Focas Grammaticus, in Virgilij vita, sic Musam alloquitur:

*Tu nihil magnum finis interire,*

*Ped. Albi  
in obit.  
Mæcen.*

*Ouid. l. 3:  
Trist. Eleg.  
7.  
Horat. l. 3.  
Ode ult.*

*Fest. Aui.  
descri. orb.*

*Foc. Gram.  
vita Virg.*

*Nil mori clarum pateris, reseruas**Posteris, prisca monumenta saeculi**Condita libris.**Plin. l. 5.  
ep. 8.*

Hinc iure optimo istud à Plinio Iuniore dictum apparet: *Mihi pulchrum imprimis videtur non pati occidere quibus eternitas debeatur.* Neque verò quisquam sibi de immortalitate blandiatur, qui, seu ob voluptatem, seu ob gloriam, aliquid publici iuris fecerit: at qui totos se ad aliorum utilitatem componunt, nec quidquam in vulgus edunt, nisi cuius fructum non minimum ad lectores peruenturum existimant, rectum iter ad æternitatem pergere mihi videntur. Quod equidem ipsi vix aut saltem non satis feliciter præstare poterint, nisi maximis instructi præfidiis, ut pote lectione, iudicio, otio, de quibus nunc differendum est.

## CAP. IV.

*Lectio, iudicium, otium.**Plin. l. 7.  
ep. 9.*

**P**linio Iuniori quid in mentem venerit, cum scriberet, *Multum esse legendum, non multa,* penitus ignoro, nisi quis sui seculi rationem habuisse dicat: nam hoc ipso quo nati sumus, non multa legisse ei qui ingenij sui facturam publicare voluerit, perinde est, ac si propter orbem uniuersum in tabella descriptum apud se omnium gentium populorumque ortus, progressus, casusque varios, aliquis se comprehendere existimet. Si quis enim nostri aui solertiam subtilitatemque nihil aut parum ab illius seculi simplicitate discrepare censeat,

*Idem inficeto inficetior est rure.*



Nolim Senecam obtorto collo in hanc quisquam per- *Senec. l. de*  
trahat sententiam. Quo mihi, inquit, innumerabiles libros & *tranquill.*  
*c. 9.* bibliothecas, quarum Dominus vix tota vita sua indices perlegit?  
onerat discitem turba, non instruit, multo que satius est paucis te  
auctoribus tradere, quam errare permultos. Permultum certe  
interest qua fine aliquis ingentem librorum copiam com-  
paret: sunt qui elegantia vel cura, sunt qui studiosa luxu-  
ria id faciant, posteriores istos quis non damnet? hos me-  
rito Isidorus Pelusiota Βιβλιοφύλας, Βιβλιοτάφους, σητοπόφους, *Isid. Pelus.*  
librorum corruptores, sepulchra, tinearum altores appel- *li. l. ep. 27.*  
lauit. Recte id quidem, nam homines id genus tantam  
librorum molem congerunt, non in stadium sed in spe-  
ctaculum; & quod longe insulsius est, librorum non modo  
illustrum & notiorum verum etiam ignotorum & im-  
probatorum auctorum, tecto tenus extructa apud ipsos  
loculamenta cernere est. Quin illud multo magis dolen-  
dum, ista fieri nonnunquam ab ignaris seruiliū litera-  
rum, carum quibus seruorum frontes inscriptæ conspi-  
ciebantur, & iis certe tot libri non studiorum instrumenta, sed *Senec. de*  
*tranquill.*  
*anim. c. 9.* conationum ornamenta sunt, ut festiue differit Seneca. At in  
ista presenti literarum luce, quis iure damnet eum qui in  
eam curam cogitationemque incumbat, ut suarum vigi-  
liarum laborumque fortis palam edat? sed ea adhibitā  
solicitudine ut vulgaria quæque & protrita prætermittat,  
recondita quæque & paucis cognita tantummodo perse-  
quatur, an paucorum seu librorum, seu auctorum lectio-  
ne adpræstabit? Nequaquam. Philologia, ut cæteras  
omittam disciplinas, nemo partes strenue & gnauiter tue-  
ri potest, absque varia & multiplici quamplurimorum  
scriptorum obseruatione. Sed nos de ijs postea accuratius  
videbimus. De iudicio in scriptis adhibendo nunc agen-

*Fulgent.  
Fab. Tref.*

dum est. Lepidè Fulgentius Episcopus sanctissimus : *Aër,*  
inquit, *maritat in glebis, & producit in folijs, & gravidat in*  
*folliculis, sol autem maturare nouit in granis.* Sic se res ha-  
bet in homine, cuius ingenium multa molitur medita-

*Maxim.  
Tyr. differ.*  
34.

turque, quæ iudicium mentisque sagacitas concoquat,  
suisque conuenientissimè aptet locis. Maximo Tyrio Pla-  
tonico magni nominis placuit, vt qui sit fœcundiore in-  
genio, minus valeat iudicio, *ἢ ὑποείας τῶ φροῦ τῶ κεινῶ*  
*ἄποψιν.* Iudicij in scribendo certissimam notam esse arbi-  
tror, tum orationis perspicuitatem, cum rerum tractan-  
darum aptissimam, maximèque congruentem colloca-

*Suid. voce  
ἀνίου.*

tionem atque connexionem. Scitum illud est Socratis,  
cùm Euripides illi Heracliti Philosophi, cognomento te-  
nebricosi, librum, cuius inscriptio erat, *Musæ*, seu de na-  
tura, aut quiduis aliud tradidisset, rogassetque, quid ipsi  
de eo videretur, respondisse, præclara videri quæ intellexisset,  
existimare etiam ea quæ non intellexisset, aliis non  
esse dissimilia, verùm Delio natatore opus esse, ne quis in  
hoc libro tantam obscuritatis profunditatem habente  
submergeretur, eiusmodi operi non absimiles *Cata-*  
*criani libri*, ab Adriano Imperatore scripti, vt auctor est

*Spartian.  
in Adria.*

Spartianus: Digni Sphyngeis eiusmodi qui dum Græcos  
Poëtas nonnullos, Phrynim imitantes, hoc est, variis &  
implicatis verborum ambagibus vtentes, æmulantur, se-

*Suidas.*

uerè vapulent, vt qui Musas aboleant, quemadmodum ex  
Aristophane prodit Suidas. Nec propterea Mæcenas ille,  
Augusto charissimus, minus peccasse dicendus est, quod  
quanquam voluptatis gratia versus conderet, attamen  
stylo adeò obscuro, vt pauci quid sibi vellet assequeren-

*Senec.  
ep. 14.*

tur. Grauitè Seneca de illo sic pronuntiauit : *Magni inge-*  
*niij vir fuerat Mæcenas, si illud egisset via rectiore, si non vi-*



*taffet intelligi, si non etiam in oratione diffueret.* Extant versus ipsius, in quibus explanandis mirum quantum sese torserint quamplures doctissimi viri nostri æui, vno verbo: *Ille discinctus erat, cuius versus propterea non nisi discincti, ut dissoluta oratio,* inquit Seneca; quantumvis ipsum excuset *Senec. supra.* Pedit Albinouanus in eius obitum:

*Quod discinctus eras, animo quoque carpitur vnum,  
Diluitur nimia simplicitate tua.*

Interim verò vnius generis non sunt qui styli obscuritate delectentur, nonnulli siquidem humile plebeiumque dicendi genus existimant, quod apertis & vulgaribus verbis constet, idcirco turgidas & reconditas voces studiosè, nimium & anxie aucupantur, Mæcenati non absimiles: nec defunt quorum inscitæ istud tribuendum est. Alij eò ingenio nati sunt, ut assidui eodem opere eandem incudem noctem diemque tundant, & dum tandiu opus istud tractant & retractant, exemplo Tiberij Imperatoris, apud Suetonium, affectatione & morositate nimia obscurant stylum. Forſan istiusmodi scriptores in sui defensionem illud Heracliti vsurpabunt: *Etiam hîc sunt Dij.* Neque propterea illos probauerim, qui ingenio præuolare dicuntur, quod de B. Hieronymo scripsit B. Augustinus, *S. Aug. ep. 10.* B. Ambrosius de seipso istud prodidit: *Ipsi nobis conscij si- S. Amb. ep. 45.* ne ullo arbitro non solum auribus, sed etiam oculis ea ponderemus que scribimus. Ac multò diligentius magisque sedulo istud curandum est, si rei tractandæ dignitas & grauitas ita postulet, Lucilij præceptum est:

— *Labora*

*Discere, ne te res ipsa ac ratio ipsa refellat.* *Lucil. li. 9. Satyr.*  
Discere vocat, interprete Nonio, rem ignotam meditando assequi. In aliquo huius generis opere, *Compositius cun-*  
X x ij

Senec. præ-  
fat. li. Con-  
tron.

Symmac.  
lib. 7. ep. 9.

Symmac.  
lib. 1. ep. 31.

Plin. lib. 7.  
ep. 9.

Ita quàm festinantius agere præstat, ut cum Tacito loquar. Veruntamen ut dicendi ita scribendi parem rationem esse non dixerim. Seneca Pater de Calsio sui temporis oratore nobilissimo istud scripsit: *Nunquam non utilius erat illi apprehendi, quàm præparari.* Itidem Tiberius, Suetonio teste, aliquanto extempore quàm à cura præstantior habebatur, quemadmodum Calsius ille, qui vir præsentis animi, & maioris ingenij quàm studij fuit, cuius in dicendo felicitatem quis vnquam in scribendo assequutus est? Nemo minus passus est aliquid in actione sua otiosi esse, nulla pars erat quæ non sua virtute staret, nil in quo auditor sine damno aliud ageret, omnia intenta aliquo, petentia, nemo magis in sua potestate habuit audientium affectus, nemo non illo dicente timebat ne desineret. Quis de villo scriptore nostri æui idem meritò & verè pronuntiare possit? Iudicet Criticorum Senatus. Ad iudicij normam tandem redeamus. Variam & multiplicem scribendi materiam, dissimilem stylum postulare non negauerim. *Ingeniorum varietas*, aiebat Symmachus, *in familiaribus scriptis negligentiam imitatur, in forensibus acuere arma facundia debet.* Adde nunc seria, modò ludicra & iocosa, quin grauiora vel leuiora tractanda sunt; quidni animum nostrum sibi constantem æquabilemque adijciam, aut nonnunquam nescio quo mœrore & cura debilitatum; Cœli temporisq; statum ad ingenij humani partem aliquem, non parum cōducere dicuntur. Symmachus mihi auctor: *Non frustra prædicant, inquit, mentes nominum nitere liquido die, coacta nube flaccessere.* Sed si Plinius Iunior audiendus est dum hæc scribit, *ut terre variis mutatisq; seminibus, ita ingenia nostra nunc hac, nunc illa meditatione recoluntur, quidni & scriptioni par ius paremq; facultatem attribuendam esse.*



dicemus. Sincerum accuratumque iudicium plurima efficiunt, quorum nonnulla obiter attigimus, iis otium & feriatam quietem, vt loquitur B. Cyprianus, adtexandam arbitror, si enim Iuuenalis istud verum sit,

*Pectora nostra duas non admittentia curas.*

*Iuuenal.  
Satyr. 7.*

Proculdubio animus scriptoris in varias & dissimiles ductus distractusque cogitationes, de re proposita conuenienter & congruè pertractanda non rectè diiudicare poterit. Senecæ ita visum, dum ait, *Nullam rem bene exerceri posse ab homine occupato.* Phædri votum,

*Senec. lib.  
de breuit.  
vita c. 6.  
Phæd. lib.  
3. Prefat.*

*Aliqua venient ferie,*

*Quæ me soluto pectore ad studium vocent.*

## CAP. V.

*Ingenij sterilitas, eius causæ multiplices.*

**E** Leganter Saluianus, *Pertinet ad humani officij culturam aliquod linguarum opus, studio ingeniorum excudere, Terullianum æmulatus est cuius sunt ista, Ab æuo dignissimum creditum est studiorum experimentum committere.* Neque verò istud omnibus datum esse arbitror; frustra siquidem animum ad scribendum appellere creduntur, quibus est pertenuis litteraria suppellex, aut qui Mineruæ sacrificare norint, litare nunquam. Quàm ob rem verò qui bonis artibus instructi adeo pertinaciter vigiliarum suarum fructus posteris communicare recusent, non vna ratione id fieri credendum est, nec vnica huiusce rei causa adsignari debet. Singulas expendamus. Sunt qui de se ita demissè & humiliter sentiunt, vt cætera omnia à se, longè grauiora, difficiliora, magisque ardua existiment; quibus credo

*Salman.  
Prefat.  
Terull.  
aduers.  
Gnost.*

Xx iij



*Plin. lib. 6. epist. 16.* istud Plinij iunioris in ore sapius est, *Beatos puto quibus datum, aut facere scribenda, aut scribere legenda;* At cuiusmodi sint hæc postrema, Plinius idem satis aperte declarat iis verbis: *Institutum mortalibus studium magna & inusitata noscendi.* Pauci siquidem quæ protrita, quæ vulgaria sint legere desiderant, imò ne lecta quidem ab aliis audire tantisper cupiunt. Plinij eiusdem ea mens est, *Cum, inquit, ita natura comparatum est, ut ea quæ scripsimus cum labore, etiam cum labore audiri putemus.* Et certè seculo nostro ad summam perducto solertiam, ut cum Seneca loquar, quis tantæ cōfidentia, homo est, ut quidquid ipse scripserit, id neminem non posse non probare credat. Rem ipsam scriptis mandatam prius placere necessum est. Præiudicio nonnunquam res ista scriptori fœliciter succedit, si Maximiano fidem adhibeamus.

*Maximian.*

*Eleg. 2.*

*Plin. lib. 6. epist. 23.*

*Sit satis ut placeam me placuisse prius.* Cætera extrinsecus adiumenta petenda sunt. Plinij secundi sententia illa est: *Neque cuiquam tam clarum statim ingenium est, ut possit emergere, nisi illi materia, occasio, fauor etiam commendatorque contingat.* Ista si quis nullo negotio parari possit credat. Fusio histrione mihi bardior erit. Eleganter Plinius senior de ijs omnibus istud scripsit: *Res ardua vetustis nouitatem dare, nouis auctoritatem, obsoletis nitorem, obscuris lucem, fastiditis gratiam, dubiis fidem, omnibus verò naturam & nature sue omnia.* Græcorum Prouerbiū ei rei maximè congruit, *τὰ καλὰ τέλει ἐξω* quæ pulchra sunt foras appareant. Audio equidem doctorum istorum hominum sermones id genus à vero minimè abhorrentes. Quibus addo & istum Petronij, *Neque concipere aut edere partum mens potest nisi ingenti flumine litterarum inundata.* An propterea æquum potius esse censent ignauo torpescere otio,

*Petron. Satyr.*



quàm multorum discendi cupidorum vtilitati consulere?  
 siccine veterno sese obrui sinent? Columellæ placet ad- *Columel.*  
 monitio: *Nec si vel illa præstantis ingenij via vel inclitarum præf.*  
*artium defecerit instrumentum, confestim debemus ad otium &*  
*inertiam deuolui. Sed quod sapienter sperauimus, perscueranter*  
*consecrari. Senecæ consilium, Id age ut otium tuum non emi-* *Senec.*  
*neat, sed appareat. Horatius,* *epist. 19.*

*Paulum sepultæ distat inertiae*

*Horatius*  
*Ode 9. l. 4.*

*Celata virtus.*

Nollem Aiacem cuiusquam, vtillum Augusti, in spon- *Senec. lib.*  
 giam perpetuò incumbere, tandem aliquando in scenam *de triquit.*  
 prodeat. Grauius Stoicus ille Romanus, *Occupandi tempo-* *animi, c. 1.*  
*ris causa in usum tuum, non in præconium aliquid simplici stylo*  
*scribe. Certè exercitatio & pertinax reponendi studium, si*  
*quid eximium mediteris, longè perfectius pariet. Senecæ,*  
*Homines dum docent discunt. Et Beatus quidem Augustinus* *Senec. ep. 7.*  
*fatebatur se ex eorum numero esse conari, qui proficiendo* *S. August.*  
*scribant. Non placent qui laureolam in mustaceo quæ-* *epist. 7.*  
*rant, Phœdrus mihi suffragator, Nisi utile est quod fa-* *Phœd. l. 3.*  
*eimus, stulta est gloria. Et certè si Petronio credimus, Ge-* *fab. 56.*  
*nerosior spiritus vanitatem non amat; veruntamen, infructuo-*  
*sum saltem non est tentare prodesse, aiebat Saluianus. Sed il-* *Saluian.*  
*lud vel maximè in huiusmodi hominibus dolendum,* *præfat.*  
*quod vt plurimum sibi minimè satisfaciant, & iis quod*  
*ab ipsis proficiatur, nihil satis excultum, nihil satis eru-*  
*ditum videatur, quibus istud dictum Cassij Parmensis*  
*congruat,*

*Non leuis ascensus si quis petit ardua, liuor*

*Plurimus hunc tollit, nocturno ex somnis oliuo*

*Immoratur, delet quod mox laudauerat in se.*

*Equidem istud non rarò accidit, vt aliena nobis, nostra plus*

*Epigram.*  
*lib.*



Saluian.  
lib. 1.  
Suet. Ti-  
ber. c. 70.

Plin. lib. 3.  
epist. 9.

Stat. Epi-  
ced. in  
Parr.  
Ouid. 6.  
Fast.

alijs placeant, vt ait Saluianus. Velim Suetonij locum de Tiberio Imperatore tantillum illi expendant, Tiberius affectatione & morositate nimia obscurabat stylum, vt aliquanto ex tempore quàm à cura præstantior haberetur. Alios minimè probare possum, quia nescio qua inuidia, quod apud se confectum & absolutum doctrinæ opus in perpetuas damnent tenebras, malintque ingenij sui fœtum, vel ab ipso ortu suffocari, quàm vitam vitalem in hominum existimatione viuere. An istud Plinij magis placet. Neminem docere in auctoritatem sciētix est. Plin. præfat. lib. 25. Scio quod Plinius iunior scripsit nimisquam verum esse: *Habet quidem gloria, in studiis præsertim, quiddam, ἀρετὴν, & vt ipse idem alio loco dixit, Sux quisque inuentioni fauet, & quasi fortissimum complectitur quod ab alio dictum est quod ipse præuidit.* Si veterum scriptorum quilibet hoc in animum induxisset suum, quot præstantissimis & elegantissimis lucubrationibus careremus? Mihi certè nullo modo arridet Papiniani responsum, libros se idèd non scribere, ne chartæis qui scripturi essent, pluris essent emendæ. Hominem credas publicæ parsimonix natum. Cæteros videamus quos à scribendo, aut scriptis vulgandis variæ deterrent causæ. Illa in primis eaque grauissima occurrit, quod hoc æuo infelicitissimo, nulli sint laborum & vigiliarum fructus, rarique aut nulli Mæcenates. Iam olim & toties auditæ sunt huiusmodi querelæ; Statio,

*Vilis honos studijs,*

Ouidio,

*Dulcis erat mercede labor, tempusque secutum est  
Quod subito gratæ frangeret artis opes.*

Lucano,

*Ipse*



*Ipse per Ausonias Æneia carmina gentes  
Qui sonat, ingenti qui nomine pulsat Olympum,  
Mæoniumque senem Romano prouocat ore,  
Forſitan illius nemoris latuiſſet in umbra  
Quod canit, & ſterili tantum cantaret auena,  
Ignotus populis, ſi Mæcenate careret.*

*Lucan.  
Panegy.  
in Piſon.*

Cornelio Seuero,

*Torquemur miſeri in paruis præmiūque, labores  
Vt ſe pretio redimant, verūque profeſſæ  
Turpe ſilent artes.*

*Cornel.  
Seuer.  
Æthna.*

Calpurnij conſilium eſt,

*Frangere puer calamos & inanes deſere Muſas,  
Quid enim tibi fiſtula reddet,  
Quo tutere famem? certe mea carmina nemo  
Præterquam ſcopulis ventoſa remurmurat Echo.*

*Calpurn.  
Egl. 4.*

Res omninò commiſeratione digniſſima, quàm non tam  
Poëtice, hoc eſt, procul à verò, quam bona fide & ſeriò de  
venuſtiſſimo Poëta Statio commemorat Iuuenalis,

*Eſurit intactam Paridi niſi vendat Agauem.*

*Iuuenal.  
Satyr. 7.*

Quidni iſtud contingat, cum Tertulliano auctore, *Nul-  
lum opus certum ſit mercedis incertæ; Et ſunt qui ob ingratif-  
ſimos mortales, ſua edere dedignentur, ita non paucos re-  
perias quibus adeò inuiſa eſt tot hoc tempore ſcripturien-  
tium multitudo, vt eos etiam Muſarum nomina reſcire  
pudeat pigeatque. Nec deſunt qui propter iniquos rerum  
æſtimatores, & iudices parum æquos, addo & obrecta-  
tores, quorum feraciſſimum hoc ſeculum exiſtat, ſui in-  
genij ſterilitatem magis quàm fœcunditatem procurent,  
de quibus ſuo loco, id eſt, poſtremis Capitibus, abundè  
diſſeremus.*

*Tertull.  
lib. de re-  
ſur. carn.*

Y y

## CAP. VI.

*Primum genus Scriptorum.*

**S**criptorum primum genus illud est, eorum qui res à nemine antea propositas ac veluti ignoratas, & indagare & explanare aggrediuntur, homines de literis, de posteris optimè meriti, homines immortalitate digni, quos facile idcirco patior in suas ipsorum laudes excurrere. Annon merito ista pronuntiauit Lucretius?

*Lucret.  
lib. I.*

*Auia Pieridum peragro loca, nullius ante  
Trita solo, inuat integros accedere fontes  
Atque haurire, inuatque novos decerpere flores,  
Insignemque meo capiti petere inde coronam,  
Vnde prius nulli velarint tempora Musa.*

Quidni tantumdem gloriæ sibi promeruit Manilius cum ista scriberet,

*Manil.  
lib. I.*

*Primusque nouis Heliconæ mouere  
Cantibus, & viridi nutantes vertice sylvas,  
Hospita sacra ferens nulli memorata priorum.*

*Horat.  
Art.  
poët.*

Sic Horatius,  
*Libera per vacuum posui vestigia princeps  
Non aliena meo pressi pede.*

Nescio equidem an gentium nonnullarum, an humanæ mentis vitio fit, ut noua placeant magis inusitata miremur, indicta auidius legantur. Aptè Poëta princeps,

*Virgil. lib.  
3. Georg.*

*Cætera quæ vacuas tenuissent carmina mentes  
Omnia iam vulgata, & Cui non dictus Hilas.  
Olympius Nemæianus non aliter,*



Nam quis non Nioben numeroſo funere mæſtam  
Iam cecinit? quis non Semelem ignemque iugalem,  
Lethalemque ſimul, nouit de pellicis aſtu?

Olimp.  
Cynegor.

Deinde: Omnis & antiqui vulgata eſt fabula ſecti.  
Plus æquo ſtomachosè Iuuenalis iſtud protulit.

Sed vatem egregium cui non ſit publica vena,  
Qui nil expoſitum ſoleat deducere, nec qui  
Communi feriat carmen triuiale moneta,

Iuuenal.  
Satyr. 7.

Hunc qualem nequeo monſtrare & ſentio tantum.

Petronius illi præiuerat, cùm poſt enumeratos Home-  
rum, Virgilium, Horatium, Cæteri, inquit, aut non vide-  
runt viã quæ iretur ad carmen, aut viſam timuerunt calcare. Scio  
vt Poëticen ita Eloquentiam, ſuis omnibus numeris & par-  
tibus abſolutam, neminem vnquam aſſecutum fuiſſe. A-  
pud Marcum Senecam, Caſſius Seuerus orator inſignis,  
Magna & varia res eſt eloquentia, nec adhuc ulli ſic indulſit, vt  
tota contingeret. Non aliter Plinius Iunior, Eloquentia vix  
vni aut alteri, imo ſi Marco Antonio credimus, nemini contigit.

Seneca lib.  
3. contr.  
præf.

Reſpõderet non nemo, omnia non eſſe inuenta & multa  
adhuc latere reſeruata poſteris. Lucius Seneca ſolens ſuo  
more, hoc eſt, prope Diuinè, Rerum natura Sacra ſua non ſi-  
mul tradit, initiatos nos credimus: in veſtibulo eius hæremus. Illa  
arcana non promiſcuè nec omnibus patent, reducta & in interiore  
ſacrario clauſa ſunt. Idem alio loco: Cõtentiſimus inuētis, ali-  
quid veritati & poſteri conferent: Ille idem epistoſa 64. Mul-  
tum adhuc reſtat operis multumque reſtabit, nec ulli na-  
to poſt mille ſecula præcludetur occaſio aliquid adhuc  
adiiciendi. Plinius Maior in eam rem. Minimè mirum eſt  
hominem genitum non omnia humana nouiſſe. Quis igitur de-  
ſperauerit, ſe veterum ſcriptorum monumentis aliquid  
quod prætermiſſum fuerit, non minori induſtriæ laude

Senec. lib.  
7.  
Notat. qu.  
c. 31.

Plin. præf.  
lib. 3. hiſt.  
nat.

Y y ij



posse adiungere. Hoc quo viuimus eruditissimo seculo præstantissimi quique critici, vt istos præsertim commemorem, Annon densissimas anteriorum huius generis scriptorum tenebras suæ eruditionis luce dispulerunt? Tritam aliis viam dum deferunt, nobis quæ hætenus ignorata fuissent, apertissimè demonstrarunt. Quod de summo critico dixit Lipsius, secundum veriuerbium Græcorum, ἀεὶ πὺς ἐν νεφέλῃς; Aquila in nubibus, annon & verè & ex animo dixit? A quo in omnibus ferè disciplinis, noua & ante hunc diem inaudita, nec lecta, nec scripta, & literis consignata, & posteris commendata sunt, vt Theologos, Medicos, & persimiles si leam. Quis Iuris Ciuilis scientiam vni Iacobo Cujacio suum solendorem, nitorem, elegantiam non debere, affirmare audeat? Profligata veterum iuris interpretum barbarie, noua quadam & à se excogitata interpretatione, germanum syncerumque legum ipsarum sensum sic aperuit, vt ipsis Imperatoribus Iuris peritis, & prudentibus illas dictasse videatur. Non deerunt credo qui nouum istud scribendi genus in alienis explanandis, non ita perdifficile videri dictitent, ac si in noua quadam materia elaborandum esset. Istud equidem non diffiteor, nec abnuerim quod qui opus aliquod rei antea minimè expositæ, aut pertractatæ in lucem edunt, eos multo maiori laude dignos existere, quàm qui aliena illustrarint. Siquidem vt cum Cornelio Seuero loquar,

Cornel.  
Seuer.  
Æthna.

*Immensus labor est, sed fertilis idem.*

Seu gloriam spectes & spem immortalitatis adderè & fortunæ melioris magmentum, si homines istius notæ in Augustos & Mæcenates inciderent: Historiæ scriptores non attingo, nam de iis alio loco dicemus, attamen illud obser-



uatione dignissimum quod à Plinio Iuniore recta consu- *Plin. lib. 5. ep. 8.*  
 lente proditum est, *Vetera & scripta alijs parata inquisitio,*  
*sed onerosa collatio intacta, & noua graues offensa leuis gratia.*  
 Exscribo lubens Taciti locum in eam rem, qui de histo- *Tacit. li. x. histor.*  
 riæ scriptoribus disertim agit: *Postquam, inquit, bellatum*  
*apud Actium, atque omnem potestatem ad unum conferri pacis*  
*interfuit, magna illa ingenia cessere: simul veritas pluribus mo-*  
*dis infracta, primùm inscitia Reipublicæ vt alienæ, mox libidi-*  
*ne assentandi, aut rursus odio aduersus dominantes. Ita neutris*  
*cura posteritatis inter infensos & obnoxios: sed ambitionem scri-*  
*ptoris facile aduerseris. Obrectatio & tuior pronis auribus acci-*  
*piuntur, quippe adulationi fœdum crimen seruitutis, malignitati*  
*falsa species libertatis inest. Quis cum Tacito eodem non ex-*  
*clamet, raram esse temporum felicitatem, ubi sentire quæ velis*  
*& quæ sentias dicere, addo & scribere, liceat?*

## CAP. VII.

## Secundum genus.

SEcundi generis scriptores sunt, qui circa materiam  
 Santea pertractatam versantur, sed noua methode ad-  
 hibita, alijsque à se excogitatis rationibus, & quidem stylo  
 forè dissimili. Scio nonnullis istud minus placere, quibus  
 illa Iuuenalis reprehensio frequenter in ore est:

*Occidit miseros crambe repetita magistros.*

*Iuuenal.  
Satyr. 7.*

Alij Lucij Senecæ sententiam probant: *Nunquam nimis*  
*dicitur, quod nunquam satis discitur.* Græcorum prouerbium,  
*δὲ καὶ τὸ καλὸν*, Platonisea vox est, qui & alio loco af- *Plato dial. 6. de legib.*  
 firmat pulchrum & decorum videri rem pulchram bis &  
 ter dicere. Horatius de Arte Poëtica, de Poësi sic statuit:

*Horatius  
Art. Poët.*

— Si propius stes

Y y iij

*Te capiet magis, & quadam si longius abstes,  
Hæc placuit semel, hæc decies repetita placebit.*

*Leo I. ser.  
5. de Nat.  
Dom.*

Quamquam si lectorum ratio habenda sit, res dubitatione non careat, eruditus enim repetitio illa ingrata est sapius, nisi vel ab auctore, qui aliunde famam sibi nomenque parauit, commendetur, vel inaudita minusque vulgo nota proferantur. At si minus periti in ea inciderint scripta, non minorem ex iis repetitis vtilitatem percipient, ut sanctissimus ita & doctissimus Leo primus, Pontifex Maximus, aptissime dixit, *Melius esse doctos onerare iam notis, quam rudes fraudare discendis.* Totum hoc quidquid sit generis istius secundi, ad imitationem spectare videbitur, quæ quoniam multiplex est, aut probata existimabitur, aut reprehendenda. Quis enim illam non meritò damnet, quæ materiam ab aliis iam expositam usurpet, eodem plane ordine & dicendi genere? De qua re pluribus sequenti capite, cum de plagiariis agemus. Quamobrem iure optimo exclamat Horatius:

*Horat. l. 1.  
ep. 20.*

*O imitatores seruum pecus, ut mihi sæpe  
Bilem, sæpe iocum vestri mouere tumultus.*

*Senec. præ-  
fat. Contro.*

Quàm malè non paucos exagitat febris Attica, ut de Cimbro Rethore pronuntiauit Virgilius, hoc est, imitationis pruritus, qui eo magis ridiculus existit, cum imitator aliquis tantum sibi hac in re applaudit, ut venustatem, elegantiam, maiestatem denique scriptoris antiqui non modò assequi, sed etiam superasse sibi videatur. Præclare Marcus Seneca, *Nunquam par sit imitator auctori.* Sed istud indignissimum penitus si quis nobilem quempiam scriptorem imitandum sibi proponat, sed adeo accuratè, adeo anxie, ut & nauos illius æmuletur. Notum istud de Salustio:



*Et verba antiqui multum furate Cætonis*

*Crispe Iugurthina conditor historia.*

*Epigram.  
lib.*

Verba obsoleta, antiquata illius Censorij quid Sallustio  
necessum fuit usurpare? Orationi splendorem aliquem  
afferre non diffiteor, sed rarò, sed moderatè adpersa, &  
sui seculi vsum, non ingenij proprii oblectationem secta-  
ri Crispus ille debuit. Portius Latro, apud Marcum Sene-  
cam: *Imitatio alienæ culpæ non est innocentia.* Itaque non-  
nullos minimè excusandos putem, qui sine vllò delectu,  
quidquid apud nobilissimum scriptorem occurrat, quam-  
uis nonnihil censoriâ notâ dignum alioquin Critici cen-  
suerint, totum illud sibi imitandum proponant, & non  
leuem inde commendationem se assecutos esse gloriën-  
tur. Quàm verè istud dixit Plinius Nepos: *Stultissimum* *Plin. lib. 1.*  
*credo ad imitandum, non optima quæque proponere.* Euripidem *ep. 5.*  
sententiarum varietate præstantissimum imitari quis non  
exoptet? At litteræ sigma apud illum plus æquo frequen-  
tem vsum quis non damnet? Hinc enim communi qua-  
dam reprehensione à veteribus Grammaticis *στυγνίστιμος*  
dictus est. Et quàm facile aliena vitia imitamur. Tam ar-  
duum & perdifficile si quid sit præclarè dictum ab aliquo  
scriptore, etiam anterioris alicuius emulatione illud ipsum  
exprimere. Ita censet Plinius idem: *Cùm arduum sit simi-* *Plin. lib. 4.*  
*litudinem effingere ex vero, tam longè difficillima est imitationis* *ep. 28.*  
*imitatio.* Quid si vicissim ad eò peritè & eleganter alienam  
industriam aliquis emuletur, annon commendatione non  
mediocri dignus censendus est? Symmachus eo collima-  
bat cùm hæc scripsit: *Quodam pacto societatem laudis affe-* *Symmac.*  
*ctat, qui aliena benè dicta primus enuntiat.* *lib. 1. ep. 25.* Et si Lactantio  
potius accedam, qui ait, *Maius esse propria facere, quàm* *Lactant.*  
*aliena disponere.* Equidem hac in disputatione, si mihi quod



sentiam eloqui liceat, siue rei nunquam hactenus explorata, explicata tractationem, siue insignis alicuius operis imitationem spectes, non potest non videri

*Durus uterque labor.*

*Virgil. 2.  
Georg.*

Sed si Poëtam illum principem audias:

*Laudato ingentia rura,*

*Exiguum colito.*

Ac nihilominus de priori illo non immerito istud cecinit

*Fest. Aue.  
in descr.  
orb.*

Festus Auienus:

*Dulcis in his haustus, meritum graue, gratia perpes.*

Sunt & præterea qui materiam iam ab aliis excussam non aliter sibi explicandam proponunt, quam ut cæteros omnes hactenus in ea pertractanda longissimè aberrasse, & quæ usu communi receptæ sint, de illa, sententias Næuij buttubata vel Plauti mortualia esse dictitent, se solos sapere, reliquos Arcadicum & Medinum profiteantur. Sed lubens Campanum istud supercilium & strepitum Regium omitto. Discant istud Senecæ epist. 64. *Multum egerunt qui ante nos fuerunt, sed non peregerunt: Sufficiendi tamen sunt, & ritu Deorum colendi.*

#### CAP. VIII.

##### *Tertium genus Plagiarij.*

*Tertull.  
aduersus  
Hermog.*

**Q**Vinti Septimij Florentis ex intimis iuris scientiæ penetralibus repetita distributio, huic quam institui-  
mus dissertationi aptissimè congruere videtur: *Tribus modis, inquit ille, aliena sumuntur, iure, beneficio, impetu, id est, dominio, precario, vi, dominio non suppetente. Hæc quàm bellè triplici scriptorum generi conueniant animaduertere licet. Sunt enim scriptores qui sua ab aliis vsur-*  
pata



pata iure optimo repetere possunt, cuius generis sunt Christiani scriptores, qui cum ex libris Gentilium, quæ sunt fidei Christianæ consentanea, deprompserunt, non tam aliena quàm sua sibi furto ablata, iure ac merito sibi vendicarunt, & certè notissimum est illud Tertulliani eiusdem: *Quis Poëtarum? quis Sophistarum, qui non omnino de Prophetarum fonte potauerit? Inde igitur Philosophi sitim ingenij sui rigauerunt, ut quæ de nostris habent ea nos comparent illis.* Post paulo: *Homines gloria & eloquentiæ solius libidinosi, si quid in Sanctis Scripturis ostenderunt digestis, pro instituto curiositatis, ad propria opera verterunt, neque satis credentes diuina esse quominus interpolarent, neque satis intelligentes ut adhuc rectum sub nubilo etiam ipsis Iudeis obumbrata quorum propria videbantur.* Multo plura in eam rem congerit quæ nos lubenter omittimus. Eusebius Cæsariensis non vno Evangelicæ præparationis libro, post Clementem Alexandrinum, Ethnicos Philosophos, Poëtas, Oratores, & cæteros ab Hebræis non pauca, imo præstantissima quæque ethica præcepta, quin & sententias, & versus desumpsisse probat, ac vnum Platonem, quem planè diuinum, & cæterorum facile principem rebantur, sibi exagitandum proponit, ac in Mosis libris euoluendis versatum fuisse certissimè demonstrat. Clemens Alexandrinus, Platonem Secnuphidis Heliopolitani Sacerdotis in Ægypto, quem admodum & Pythagoram Sonchedis Archiprophetæ, id est, summi Sacerdotis Ægyptij, discipulum fuisse memorat. Quod & de Thalete Græco sapiente prodit, quem cum Prophetis Ægyptiorum congressum dum narrat, Sacerdotes Ægyptios intelligere necessum est, cum Sacerdotes ipsi non aliter quàm Prophetæ vocarentur, ut ex Herodoto & Synesio colligere est, & eo significatu Apu-

*Tertull.  
Apolog.  
c. 45.*

*Euseb. l. 9.  
10. 11. 12.  
præp.  
Clemens  
Alex. l. 1.  
strom.*

*Ibid.*

*Herodor.  
l. 2.  
Synesius li.  
de pronid.*

Zz



*Apuleius  
Apollo.*

*Clemens  
Alex. l. 1.  
strom.*

*Clemens  
Alex. l. 6.  
strom.*

*Orig. lib. 1.  
contra Cel-  
sum.*

*Eusebius  
prap. Euā-  
gel. l. 9. c. 3.  
S. August.  
epist. 34.  
Euseb.  
Platon.  
Clemens  
Alex. l. 1.  
strom.*

læius Prophetas Ægyptios pro Sacerdotibus dixit. Sed illud obseruandum de Pythagora apud Clementem ipsum auditorem fuisse Nazarati Assyrij, quem Ezechielem Prophetam fuisse nonnulli opinati sunt, quod pernegat Clemens, & tamen temporis rationem minimè repugnare cruditi quidam contendunt. Addo & Pherecidem Syrum, Pythagoræ præceptorem ex Prophetia Cham aliqua deprompsisse. Origenes ex Hermippi lib. 1. de legislatoribus scribit Pythagoram suam Philosophiam à Iudæis traduxisse in Græciam. Neque quisquam litem nobis de ea re moueat, quod veterum auctoritate, priscos illos Græcos Philosophos, eosque maximi supra cæteros nominis, Ægyptiorum Sacerdotum discipulos fuisse, necnon & Hebræorum Philosophiam didicisse asseramus. Erant tunc temporis Hebræi in Ægypto, nec minimo quidem numero, vt patet ex Hieremia Propheta, qui ex quotidiana consuetudine & conuictu cum Ægyptiis idololatriis in detestandos & flagitiosos mores prolapsi, non eo quo decebat loco & veneratione suam habuere peculiarem religionem, religionisque arcana. Hinc factum vt ego facile credam, minimè tamen asseuerem, circa hæc tempora, hoc est, plurimis ante Ptolomæos sæculis Mosis Pentateuchum, seu quinque libros in linguam Græcam fuisse conuersos. Equidem Eusebius Mosis eiusmodi libros in linguam Græcam longè ante Alexandri Magni tempora translatos fuisse affirmat. Clemens Alexandrinus idem prodit, & hoc præsertim, longè ante euersum Imperium Persicum, insignia quæque apud Iudæos gesta & leges ipsorum in linguam Græcam translatis. Sed pergo & tandem eo vesaniæ & furoris Ethnicos venisse miror, vt dicerent Christum seruatorem nostrum de libris Platonis pro-



fecisse, quos refutasse scripto de ea re libro, Beatum Ambrosium, auctor est Sanctus Augustinus. Vnus Numenius Pythagoricus hanc refellet putidam calumniam, cum scribat Platonem velut plagiarium è Mosaïcis libris quidquid de Deo & mundo verè scripsit, hausisse. Itaque non alium quam Mosem Atticum videri. Ita Clemens Alexandrinus, Hesichius Illustrius. Vnde fir vt si quid à Christo saluatore prolatum apud Platonem deprehendatur, illud è Mosaïcis libris, vnde Plato ipse surripuit, multo magis repetendum videatur. Origenes Numenium Pythagoricum libro cui titulum fecit, *περὶ παλάτου*, verba Prophetarum qui apud Iudæos scripserint, inseruisse & eorum visiones & figuras interpretatum esse, affirmat non vno loco. Verum illud nulla omnino ratione prætermitti debet, quod est ab eodem Origene proditum; Euripidem ab Aristophane taxatum fuisse, quod Anaxagoræ sententias & aliorum Philosophorum tribueret barbaris mulierculis, vel mancipiis, hoc est, vt ego interpretor, Hebræis, seu viris, seu mulieribus, qui apud Græcos duram seruiebant seruitutem. Firmat interpretationem meam locus Ioëlis Prophetæ, apud quem Dominus Deus sic de Palestinis conqueritur. Filios Iuda & filios Hierusalem vendidistis filiis Græcorum, vt longè faceretis eos de finibus suis. Ij religionem legesque patrias edocti, heros suos quidquid apud Iudæos præclarum esset, Gentiles edocuisse videntur, si modo ij tantisper virtutis & doctrine amantes existerent. Quo quæso spectat istud apud Græcos vsum, de quo Athenæus, *γεγύμνατα ἀλεξίλογα*, Phænicum, sermones mera animi solatia, nisi ab Hebræis mancipiis Græcorum, elegantes illæ è sacris litteris petita, cui libet hominum animorumque conditioni accommodata

*Orig. lib. 1.  
c. 1. Celsum.*

*Ioel 3.*

*Athen. l. 1.  
c. 22.*

*Herodot.  
lib. 2.*

Z z ij

S. Ambr.  
lib. de bon.  
mort. c. 10.  
S. Basil.  
Hom. 16.  
in princ.  
Macrob.  
præfat.  
Satyr.

sententiæ, indicatæ & vulgatæ. Phœnicū vt & Syrorum nomine, Iudeos apud Græcos scriptores comprehensos fuisse aliquando, vel vnus testis esse potest Herod. Sed vt locum hunc concludam post Eusebiū verè istud dixit S. Ambros. *Cognoscant gentiles ea quæ in libris Philosophiæ mirantur, translata esse de nostris.* Ita B. Basilus, furē veritatis esse Diabolū, & ea quæ nostra sunt, extra ad suos interpretes transtulisse. Secundi generis aliena vsurpata expendamus, quæ veluti precario, & quasi mutuo sumpta appellare licet. Qualia verò sint eleganter describit Macrobius, & quo pacto innoxie ac citra vllam reprehensionē, ab aliis deprompta in nostrum vsum cōuertamus aptissimè demonstrat. Ex illius satis proluxa dissertatione pauca delibabo, & pro nostræ mentis cōprehensione exprimam. Imprimis non indigesta tanquā in aceruum digna memoratu congerēda sunt, sed variarum rerum disparilitas, auctoribus diuersa, confusa tēporibus, ita in quoddam corpus dirigēda est, vt quæ indistinctè atque promiscuè ad memoriæ subsidium adnotauimus, illa in ordinem instar membrorum coherentia cōueniant. Nec vlli vitio vertendum, si res quas ex lectione varia mutuatur, ipsis sæpe verbis, quibus ab ipsis auctoribus enarratæ sunt, explicetur, quandoquidem meditatum opus non eloquētiæ ostētationem, sed noscendorum congeriem polliceatur, & boni quidem consulendum, si notitiam vetustatis, modo nostris non obscurè, modo ipsis antiquorum fideliter verbis, lector recognoscat, prout quæque se, vel enarranda, vel transferenda suggererint. Itaque, quidquid diuersa lectione quæsiuerimus, committamus stylo, vt in ordinem, eodem dirigente coalescat, nam & in animo melius distincta seruantur, & ipsa distinctio non sine quodam fermento, quo conditur vniuersitas,



in vnum saporis vsum varia libamenta cōfundat, vt etiam si quid apparuerit vnde sumptum sit, aliud tamen esse quā vnde sumptum cognoscitur, appareat. Hinc continget vlector inueniat plurima, quæ sit aut voluptati legere, aut cultui legisse, aut vsui meminisse. Ex iis scriptorum, seu Græcorum, seu Latinorum plurimorum, non tam excusatio quā commendatio apparet, qui ex antiquioribus præclara quæque & suo instituto maximè congruentia mutuati scripta sua mirum in modum illustrarunt. Singulos recensere qui istud egerint superuacaneum & ni fallor inutile esset: Plato quid & quale ex Heraclito, Pythagora & Socrate, mutuatus sit, vniuersim declarat Hesychius Illustris. Homerus Græcorum Poëtarum summus ex Corinno Iliensi Poëta Palamedis discipulo, qui Traiano bello adhuc durante Iliadem scripserat, suæ pœseos argumentum sumpsit, & in libros suos retulit, si Suidas vera refert. Nec istud omitti debet quod de Phocylide narrat Suidas, illum sententias Sibyllæ sibi vsurpasse, dissimulato eius nomine. Æschilum nemo sanæ mentis damnauerat, qui ex Homericis cœnis frustra lautissima collegit. Horatius quantumuis imitatores seruum pecus vocet, ex Pindaro & Anacreonte, quid non venustuli mutuatus est? Theodoretus Præfat. in Cantica Cantic. à se explanata, admonet lectorem ne furti insimulet suos in hunc librum Commentarios, quandoquidem multa in iis ex antiquioribus Patribus deprompta deprehendantur. Nequaquam verò furtum istud censi debet, sed paterna hæreditas. S. Hieronymus præfatione quæstionum Hebræicarum in Genesim, summorum virorum exemplo se se aduersus obrectatores tuetur, qui eum velut aliorum scriptorum compilatorem criminabantur: *Illud idem*, in-

*Hesich.  
Plat.*

*Suidas  
Corinn.*

*Suidas  
Phocylid.*

*S. Hieron.  
præfat. qu.  
Hebræic.*



quit ille, Terentio Comico Poëta, à Luscinio Laninio obiectum, Idem Tullio Romana eloquentiæ parenti, quem Græci repetundarum accusant. Idem Virgilio Poëta Principi, qui versus quosdam Homeri ad verbum transtulisse dicebatur, sed respondit ipse, magnarum esse virium Herculi clauam extorquere de manu.

Isidorus  
lib. 10.  
compilator.

Huius rei meminit Isidorus dum explicat quid sit compilator, is nimirum qui aliena dicta suis permiscet, sicut solent pigmentarij in pila diuersa mixta contundere: hoc scelere quondam accusabatur Mantuanus ille Vates. Cætera ut apud Macrobiū, qui totus est in detegendis Virgilij furtis, si ita loqui liceat, non tantum ex Græcis, sed etiam Latinis vetustioribus. Illud verò potissimum adnotandum quod de Afranio Togatarum scriptore Latino prodit ipse Macrobius. Is in ea Togata quæ, Compitalia inscribitur, non inuerecundè respondens arguentibus, quòd plura sumpsisset à Menandro, Fateor, inquit, sumpsi non ab illo solo modò, sed ut quisque habuit quod conueniret mihi, quodque me non posse melius facere credidi, etiam à Latino. Quam multa Aristophanes ex Euripide desumpsit, sic & Plato ex Sophronis Mimis, & S. Chrysostomus ex Aristophanis Comædiis, quarum assidua lectione nimium quantum delectabatur, non aliter quam Plato Mimorum Sophronis Syracusij, quibus etiam indormiebat. Etiam ingeniosus ille Poëta Ouidius ab vsurpandis Virgilianis non abstinuit. De qua re sic apud Marcum Senecam in Suaforis sententia ista Virgiliana: Plena Deo Nasoni valde placuit, itaque fecit quod in multis alijs versibus Virgilius fecerat, non surripiendi causa, sed palam imitandi, hoc animo, ut vellet agnosci. Illud autem in Tragædia eius (Ouidij Medea, ut arbitror) feror huc illuc, ut plena Deo. Læpida extat Petri Blesensis de ea re Epistola, aduersus inuidum quen-

Macrobius  
lib. Sat.

Macrobius  
lib. 6.

Saturnus  
cap. 1.

Hesychius  
Sophron.  
fab. 1 c. 10.

Seneca  
Suafor.

Petr. Bles.  
epist. 92.



dam, qui eum *Compilatorem* vocauerat. Mihi admodum placet Macrobij pro Virgilio defensio, aduersus eos, qui tanto viro alieni vsurpationem exprobrabant: *Illos nimirum considerare debuisse hunc esse fructum legendi; emulari ea quæ in aliis probes, & quæ maximè inter aliorum dicta mireris, in aliquem vsu tuum oportuna deriuatione conuertere.* Videsis S. Hieron. præfat. in lib. traditionū Hebraicar. in Genes. Tertium & postremum genus est alienorū sumendorum secundum Tertulliani distributionem, cū dominio non suppetente, aliquis vi alienum sibi vendicat. Plagiatium Iurisconsulti vocant, qui nimirum, hominem liberum seruitio premit, aut vt seruum sciens abstrahit, aut denique alienum mancipium supprimit, quæ sunt legis Fabiæ de Plagiariis capita. Translata vox ad eos qui alterius scripta pro suis venditant, non modo auctoris tacito nomine, sed illa velut à se excogitata, & literis mandata publicare, & profiteri audent. Verissimè quidem Symmachus, *Cū semel, inquit, à te carmen profectum est, ius omne perdidisti.* Oratio publicata res libera est. Non alio spectat istud Plinij Maioris de Asinio Pollione, *Hic primus bibliothecam publicando, ingenia hominum rem publicam fecit.* An idcirco quia res publici iuris facta est, ideò cuique illam sibi tanquam propriam vendicare conceditur? imitari, & quod alteri futurum sit vsui, veluti precario, sumere licet, annon illud est liberum & ingenium seruituti vnus addicere? Duplicis generis plagarios istos obseruo: aut enim capita integra, paginas integras, ex alterius scriptoris opere exscribunt, & quidem verbis iisdem, sui que ingenij velut proprium fœtum obtrudunt, cū proprij auctoris nomen penitus reticeant. Memini me olim cuiusdam Theologi Hispani opus de sacramentis legere, deprehendi non pau-

Macrobius,  
lib. 6.  
Saturn. c. 1.

Symmachus.  
lib. 1. epist.  
25.  
Plinius. hist.  
nat. lib. 35.  
c. 2.



ca ex Cardinalis Alani opere, similis argumenti, capita ad verbum descripsisse, sine vlla vel adeo leuissima Cardinalis mentione: Credidit Hispanus, pro fastu gentis, ceteros mortales fungos & stipites, quasi nihil vnquam quidquam de Cardinale inaudissent, aut eius scripta penitus interisisse, non secus ac Alexandrinæ bibliothecæ libros, infœlici conflagratione absumptos legimus. Quis percensere numerando posset scriptores nostri æui huic Hispano per similes? Vnicum eumque extra omnem ingenij aleam positum Criticum Adrianum Turnebum nostratē commemorabo, ex cuius aduersariis, tanquam ex copiosissimo & ditissimo penu, qui non sua miscellanea, obseruationes, & cætera idgenus abundè locupletarunt? Iusto Lipsio Criticē plurimum debere, omnes recta sapientes profitentur, & tamen plagiarium illum vocare ausus est Ricardus Montacutus Angelus, iis verbis, loquens de Onuphrio Panuino, *A quo, inquit, sua omnia transcripsit per plagium Iustus Lipsius, numquam Onufrio compellato, id quod alias solet regidissimus in alijs ipse repoſco.* Mitto recentiores. Sed quis litē illam grauissimā inter Plinium auunculum & Solinum componat? De Agellio & Macrobio res nota est, siquidem ille non paucis annis imo seculo non vno Macrobiū præcessit, quo fit vt ipse plagiarij infamiam, nullo pacto vitare possit. Idem in duobus præstantissimis Philosophis Aristone & Eudoxo contigisse testatur Strabo. Neque aptius quidquam de iis pronuntiabo quàm quod de Clerone Atheniensi scripsit Aristophanes & meminit etiam Suidas, qui spicas alienæ messis siccitas & alligatas, tanquam ex agro suo peritas, vendebat. Illi Poëtæ Principis versum ad se pertinere cogitent.

*Richard.  
Montac.  
exerc. 11.*

*Strabo  
lib. 17.*

*Suidas  
ἀπορροή.*

*Immunisque*



*Immunisque sedens aliena ad pabula fucus.*

Virgil. 4.  
Georg.

Sunt & alterius generis plagiarij, qui aliorum scripta integra, detracto germani auctoris nomine, & suo supposito sine vlllo pudore vsurpant. Iicertè persimiles mihi videntur Rhodiis, apud Dionem Chrysostomum, qui cum aliqui decreta esset statua veteri statuæ cuiusdam apud suos caput adimebant, huicque recentiori caput illius loco reponcbant. A nonnullis Imperatoribus Romanis idem factitatum legimus, sed detestandis, & flagitiosissimis Principibus. Augustæ historiæ scriptores Imperatorum quorundam vel tyrannorum deiectas merito statuas fuisse, litteris prodiderunt. Addo nonnunquam statuas ipsas minime deturbatas, sed abscissis capitibus, alia iisdem imposita fuisse. De quibus S. Hieronymus in Habacuc Prophetam, ad hunc versum, *Maledixisti sceptris eius, capiti bellatorum eius.* siue ex versione septuaginta Interpretum, *Diuisisti in stupore capita potentium.* Si quando, inquit, Tyrannus detruncatur, imagines quoque eius deponuntur & statua, & vultu tantummodo commutato ablatoque capite, eius qui vicerit facies superponitur, ut manente corpore, capitibusque præscissis, caput aliud commuretur. Quid commercuere, seu veteris, seu huius æui scriptores nonnulli, ut sua nomina ex sui ingenij monumentis eraderentur, & plagiariorum nomina illis inscriberentur? Huic hominum generi adnumerare licet eos qui auctorum & artificum nomina præstantissimorum, suis operibus inscribebant, ut illis auctoritatem conciliarent. De Democrito istud prodit Agellius: *Multa*, inquit, *videntur ab hominibus malè solertibus commenta, in Democriti nomen data, nobilitatis auctoritatisque eius perfugio utentibus.* Phædrus lib. 5. *Æsopicarum fabularum præfatione,*

Dio Chry-  
sost. orat. 31.

S. Hieron.  
in c. 3.  
Habacuc.

Agell. lib.  
10. c. 12.  
Phædr.  
præf. lib. 5.

A A a

*Vt quidam artifices nostro faciunt seculo,  
 Qui pretium operibus maius inveniunt, nouo  
 Si marmori inscripserint Praxitelem, suo  
 Detrito. Myronem argento; fabula exaudiant  
 Adeo fugata, plus vetustis nam fauet  
 Inuidia mordax, quàm bonis presentibus.*

*Dio Chry-*  
*soft. orat. 21.* Lepidum istud est quod de hoc argumento differiti Dio Chrysoftomus, Bibliopolæ ait, cum norint antiquos libros expeti ut melius scriptos & in melioribus chartis, illi

*Hesich.*  
*Æschin.*

*Isidor. lib.*  
*10.*

vilissimos presentium scriptorum libros, demittentes in frumentum, ut colorem veteribus similem situmque contrahant, pariterque corrumpentes, vendunt pro antiquis. Apud Hesichium Illustrum Æschines istiusmodi plagiarius describitur, qui dialogos aliquos à se conscriptos, nomine Socratis venditabat, velut à Xantippe ipsius Socratis vxore acceptos. Non inepte, meo iudicio, Isidorus, Plagiatoris etymon deducit, ἀπὸ τοῦ πλαγίου, id est, obliquo, quod non certa via gradatur, sed pelliciendo dolis. Istud nimisquam verum deprehendimus in huiusmodi Plagiariis, qui si proprii nominis inscriptione sua vulgarint scripta, illico explodantur, metuendum ne Asino Cumano Leonis exuuia, quibus amictus erat, detrahantur, & dum oblique fucum facere tentat, stolidus & vecors, inani flagrorum strepitu rudere cogatur perpetuo suæ famæ ludibrio. Nobilis historia de toto isto genere plagiariorum, apud Vitruuium præfat. lib. 7. commemoratione digna. Ptolomæus, Rex, ut ego arbitror Philidelphus, Alexandriæ ludos Musis & Apollini dedicauit, in quibus communium scriptorum victoribus præmia, & honores constituit. Iudices litterati sex, lectus septimus, additus Aristophanes. Primo Poëtarum ordine ad certationem inducto,



cùm recitarentur scripta, populus cunctus significando mouebat Iudices, quodnam probarent. Sex Iudices quem maximè animaduenterunt multitudini placuisse, ei primum præmium, sequenti verò secundum tribuerunt. Aristophanes sententiam rogatus, cum primum pronunciarì iussit qui minimè populo placuisset. Aristophanes verò docuit vnum quem iudicarat ex his esse Poëtam, cæteros aliena recitauisse: Oportere autem iudicantes non furta, sed scripta probare, & fretus memoria è certis armariis infinita volumina eduxit, & ea cum recitatis conferendo coëgit ipsos furatos de se confiteri, quos furti damnatos Rex cum ignominia dimisit. Tu Ptolomæe Philadelphæ tuque Aristophanes numero estis mortui.

## CAP. IX.

*Quartum genus, Interpretum.*

POst tertij generis scriptores, quibus plagiarij adnumerantur, interpretes recensentur, hoc est, qui ex vna in aliam linguam scriptorem aliquem interpretantur, quibus vulgatum istud Horatij præceptum in primis obseruandum est,

*Nec verbum verbo curabis reddere fidus*

*Interpres.*

*Horat.  
art. Poët.*

Labeo, de quo Persius, transtulit Iliada & Odyssæam, verbo ex verbo, ridiculè satis, quod verba potius quam sensum secutus sit, vt docet vetus interpres Persij, nec immeritò ille reprehensus, quandoquidem nulla caro per se placet, sed arte quadam corrumpitur & stomacho conciliatur aduerso, aiebat Petronius, ita Interpretes illi arti-

A A a ij

Senec. lib.  
de tranq.  
cap. 2.

S. Aug.  
epist. 49.

Lactant.  
l. 4. c. 9.

ficii & styli elegantia lectoris animum velut lenocinio quodam sibi conciliare debent. Sunt autem quamplurima in huiusmodi versionibus spectanda, ac primo loco, linguæ, qua opus illud conscriptum est, proprietas: Græcam linguam, Latina longe elegantiorum & ditiorum nemo sanus negabit, qui ex Græcis Latina conuenienter faciat, ipsius linguæ Latinæ genium sequatur necessum est. Eo spectat quod L. Seneca scribit: *Res ipsa de qua agitur, aliquo signanda nomine est quod appellationis Græcæ vim debet habere, non faciem.* Heracliti qui *ἑρακλῆς* dictus est, liber aliquis, aut Lycophronis Cassandra latio donanda est, quibus verbis Latinis horum obscuritas exprimi poterit. Quantumuis apta sed noua effingas verba, aut obscuram illam grauitatem minimè assequeris, aut latinitatem sub Euandri matre natam exhibebis. Lusi vir illustrissimus in Latina Lycophronis Cassandra facienda, & certè locis non paucis imorum subfelliolum Senatus litterarii viris crucem fixit, risit credo cum hæc scriberet. Mihi mirum in modum placet Beati Augustini sententia, quam ille ex veteri scriptore hauserat: *Sermoni humano (Latino dicam) verba noua vel minus vsitata moderatè ac decenter aspersa splendorem addunt.* Itaque verbis ipsis quemquam addictum esse nolim, vnicuique linguæ suus est genius relinquendus. Lactantio nil obstant verba, cum sententia congruit veritati. Sed longe maior cautio adhibenda est, si quid flagitiosi, & ad omnem turpitudinem comparati in vulgatum sermonem vertendum sit, an de honesta & deculpata verba, vt loquitur Agellius, similibus vocibus vulgatis explicabimus. Scio Petronij istud quasi Alexipharmacum opponi; turpiculum quodcumque occurrat, *Feras mentes obsidet, eruditæ (aut si mauis castas & pudicas) præ-*



SELECTORVM LIB. II.

373

terlabitur. Liuiæ Augusti, nudi homines à nudis statuis  
nil omnino distare videbantur, at non omnes mulieres  
nuptæ Liuiæ sunt, ita qui in Catullum, Petronium, Mar-  
tiale, & similes Latinos, vt Græcos omittam, inciderit,  
non quilibet Xenocrates est: nam,

Perf. Sat.  
I.

— carmina lumbum,

*Intrant & tremulo scalpuntur ubi intima versu.*

Et si auribus is sensus, cur non magis oculis, dum ista le-  
guntur? addo & meditati animo. Rectè Varro, *Sympa-* Varr. Sat.  
*thiam lumbi ad oculos habent.* Etiam pronuntiatio ipsa non  
parum afficit. Audio nepotum voces,

Eni. Hay.

*Ah pereat, cui sunt prisca supercilia.*

Sed magis exaudio Ennodium Ticinensem, *Melius est plus* Ennod. l. 3.  
*æstimationi per silentium dimittere, quàm monstrare diligentia* epist. 32.  
*damna per litteras.*

C A P. X.

*Quintum genus, Scoliastra.*

**Q**Vinto & postremo loco numerantur qui scriptores  
libris Commentariis notis vberioribus, Scholiis de-  
nique & illustrare, & explicare contendunt. Plurimos no-  
stro seculo in eo scribendi genere felicissimè versatos  
fuisse nullus nisi cui mens planè mota fuerit, dubitare po-  
test: Ita vicissim aliquos in isto interpretandi genere for-  
tuna destituit. Aut enim sua ipsorum auctoritate interpre-  
tationes suas niti volunt, & quasi dictatores nullis aliis ra-  
tionum momentis adhibitis, ita credendum, ita sentien-  
dum edicunt, hoc est *suspiciones suas ingratas fulcire, vt lo-*  
quitur Tertullianus. *Quam malè sæpius hac in parte cum*

Tertull.  
aduers.  
Hermog.

A A a iij

adoleſcentibus, qui bonis artibus dant operam, agi vide-  
mus, ſi in Doctorem iſtius notæ inciderint. Illis in aurem  
iſtud Aſinij Galli inſufurrabit non nemo,

*Epigram.  
lib.*

*Qui caput ad lænam deijcit, glosſemata vobis  
Præcipit, os nullum vel potius pugilis.*

Satis ſœliciter, vtego arbitror in aliquo ſcriptore expli-  
cando operam ſuam collocasse videntur, qui auctoris  
mentem verumque ſenſum expiſcari potuerint. Vnicum  
proferam Plautum, in quo emendando, illuſtrando, ex-  
ponendo, præſtantiſſimi quique noſtro æuo & doctrina  
ſupra cæteros inſignes viri, imo Senatus litterarii Prin-  
cipes non leuiter laborarunt. Priores ſequentibus viam  
quaſi præmonſtraſſe & veluti præluxiſſe videntur; at qui  
ſecuti ſunt ingenij acumine & ſœlicitate, palmam in ea  
Sparta exornanda reportaſſe præ reliquis dicentur. Nec  
ſua laude qui poſt hac futuri ſunt, ni fallor, carebunt. Pu-  
blicum iſtud certamen eſt, qui proſperè hætenus certa-  
uit ab hoſte valentiore ſuperari conſpicitur. Egregium C.

*Ibidem.*

Laberii Epigramma,

*Non poſſunt primi eſſe omnes omni in tempore,  
Summum ad gradum cum alacritatis veneris,  
Conſiſtes ægrè, & citius quàm aſcendas decidas,  
Cecidi ego, cadet qui ſequitur, laus eſt publica.*

# CAP. XI.

*Scriptorum imperitorum ſcribendi pruritus.*

*Iuuenal.  
Satyr. 7.*

**I**uuenalis ſcitum illud,  
—tenet inſanabile multos  
*Scribendi cacoëthes, & ægro in corde ſenſcit.*



Quàm verè huic nostro seculo aptari possit nemo est qui non facile aduertat. Tantę confidentiæ homines reperias, qui nullam siue ætatis, seu famę rationem habeant, nec, quanquam suæ imperitiæ conscij, aliquid in manus hominum dare vereantur, etiam vix puberes & inuestes, vt cum Tertulliano loquar, aliquod schedium, inconditum, & inelaboratum, vt Lucilij verbis vtar, publicare audent. Ita se res habet, vt isti adolescentuli in dolio figulinam discant, ad quos qui hæc Varronis referre velit, non valde repugnabo: *Tam nesciunt docere quàm discere quæ ignorant.* Horum nemo est qui de se non magnificè sentiat: *Quotusquisque vel ætati alterius, vel auctoritati vt minor cedat? Statim sapiunt, statim sciunt omnia, neminem verentur, imitantur neminem, atque ipsi sibi exemplo sunt, vt grauissimè à Plinio Nepote pronuntiatum est.* Ob tenellam pene pueritiæ ætatem sibi ignosci postulant. Istud Catonis de Albino, qui veniam gratiamque malæ existimationis, si quid esset in opere ab eo conscripto erratum, postulauerat legisse oportuit. *Næ tu Aule, inquit, Cato, nimium nugator es, cum maluisti culpam deprecari, quàm culpā carere. Nam petere veniam solemus, aut cum prudentes errauimus, aut cum noxam imperio compellentis admisimus. Te oro, inquit ille, quis perpulit vt id committeres, quod priusquam faceres, peteres vti ignosceretur?* Hæc Macrobius. Illi cogitent neminem vllum ingenij sui fœtum edere debere, quin simul periculum præstet rectæ scriptionis à se profectæ: Nam Cornelio Seuero teste,

*Turpe est sine pignore carmen.*

Præcocia ista sunt ingenia, verùm Plinio auunculo, *Quæ spectatissimè florent, celerrimè marcescunt.* Adonidis hortos nominat Iulianus ille Augustus, qui nobis Apostata. Et

Tertull.

Lucil.

Satyr.

Varron. li. 8.

de lingua

Lat.

Plin. li. 8.

ep. 23.

Macrobi.

præfat. Sa-

turn.

Cornel.

Suet.

Ætica.

Plin. li. 21.

hist. nat. c. 1.

Iulian.

Cæsarib.

Tacit. l. 1.  
Hesych.  
Epicur.

Plin. l. 6.  
ep. 2.

Athen. l. 3.  
c. 1.

Martial.  
l. 1. Epigr.  
vlt.

Martial.  
l. 6. Epigr.  
19.

quanquam mens nostra velut ager feracissimus rerum dicendarum & scribendarum copia plus satis abundet, at præstat compositius cuncta, quam festinantius agere, ut est à Tacito proditum. Cui rei firmandæ exemplum affert Hesychius Illustrius de Epicuro & Chrysippo, qui nimia scribendi festinatione multa parum castigata ediderunt. Per similes id genus scriptores oratoribus de quibus ista Plinius, *Qui dicunt, egisse malunt quàm agere, ut qui audiunt finire magis quàm iudicare*; non secus ac qui concitatissima mentis celeritate aliquid scribere aggrediuntur. Neque quantum scribas, sed quid scribas cogitandum; non enim eorum sententiam probare possum, qui cuiusvis scriptoris industriam, eruditionemque, librorum editorum mole metiri solent, *Magnus liber, magnum malum*, aiebat apud Athenæum Callimachus Grammaticus, cui affine illud est quod habet Martialis:

*Cum legisse satis non est Epigrammata centum,  
Nil illi satis est Cæciliane mali.*

Isidori Glossario, *pessimus*, id est, *verbosus*. Et certè istiusmodi scriptores quorum omnis cura cogitatioque in eo posita est, ut ingentis molis libros edant, sæpius omnia vndiquaque coaceruant & congerunt, quantumvis ad rem sæpè non pertineant, ut libri quos scribunt in immensum excrescant. Lepidè Martialis:

*Non de vi, neque cade, nec veneno,  
Sed lis est mihi de tribus capellis,  
Vicini queror has abesse furto,  
Hoc Index sibi postulat probari,  
Tu Cannas Mithridaticumque bellum:  
Et periuria Punici furoris,  
Et Syllas, Mariosque, Mutiosque,*

*Magna*



*Magna voce sonas, manuque tota,  
Iam dic, Posthume, de tribus capellis.*

Senecæ epist. 64. Ista vera esse quotidie experimur. Quorundam scripta clarum habent tantum nomen: cætera exanguia sunt, instituunt, disputant, cauillantur. Non faciunt animum, quia non habent.

## CAP. XII.

*De Lectoribus, & iudicio librorum editorum.*

**Q**Voniam de nostrorum operum iudiciis agendum est, peritos ab imperitis, eruditos à plebeiis & ignaris primùm secernamus. Quod ut facilius statuamus, certum est nos ipsos, aut amicos, aut extraneos nostrorum scriptorum iudices existere. A nobis quale de nostris iudicium expectandum sit, non est difficile diuinare. Nemo sui ipsius operis iudex legitimus esse potest. Meritò B. Ambrosius: *Vnumquemque fallunt sua scripta, & auctorem* D. Ambr. ep. 40. *prætereunt, atque ut filij etiam deformes delectant, sic etiam* Ennod. Tricim. lib. 4. ep. 4. *scriptorem indecores sermones sui palpant.* Ennodio Ticinensi: *Qui in prole censuram negligit, conceptum magis designat sibi placere, quàm meritum.* Absit à probis scriptoribus ista indulgentia; ingeniosum Poëtam potius æmulentur, dum ait,

*Multa quidem scripsi, sed quæ vitiosa putavi,  
Emendaturis ignibus ipse dedi.*

*Ouid. li. 4.  
Trist.  
Eleg. 10.*

Amicos si iudices nostrarum vigiliarum expetamus, quàm vereor ne benigniores quàm veriores experiamur. Nam ut rectè scripsit Symmachus, *Fit sæpè ut amicorum dicta* Symmac. li. 1. ep. 72. *factaque ea indulgentia censeamus, qua plerumque singuli etiam* Plin. li. 1. ep. 20. & 5. ep. 3. *vitia nostra diligamus.* De qua re aliter Plinius Nepos, qui

BBb



sui ingenij monumenta apud amicos recitare, id ad emendationem maximè conducere demonstrat. At ne cui hac in parte suspicio aliqua relinquatur, extranei potius iudices nobis quærendi sunt. Sed quoniam de nostris scriptis iudicium est ferendum, prius ea legi necessum est. Illud cuique scriptori maximè optandum videtur, ut eius libri in lectores idoneos incidant, tum enim persimiles habituri sunt iudices: quanquam non defuturi sunt qui Lucilij istud vsurpent:

Lucil. Sat.

*Persum non curo legere, Lælium Decimum volo.*

Cicer. 2. de  
Orat. & 1.  
de Leg.

Satyrographus ille siquidem dicere solebat, ut refert Orator Princeps, ea quæ scriberet neque ab indoctissimis, neque à doctissimis legi velle, quod alteri nihil intelligerent, alteri plus fortasse quàm ipse nosset qui scripsisset: Sic & lectorum longè acutiorum iudicium reformidans, aiebat, Tarentinis se & Consentinis, & Siculis scribere. De extraneis nunc videndum, ac primùm, vulgus & imperitam plebeculam ut à lectione, ita à iudicio penitus reiiciendam esse, quisquis Musas & pudicas & virgines esse percupiat,

Lin. li. 42.

sine vlla dubitatione censebit. Apud Liuium, *Vulgus incertaminibus ludicris, deteriori & infirmiori fauet.* Et sæpissimè quidem, apud plebeios homines præponderant violenta

S. Ambr.  
1. 1. ep. 3.

*moderatis, plura paucioribus, iucunda seriis,* ut cum B. Ambrosio loquar. Et isti planè digni quos oblectent Lybici libri de erroribus & peregrinationibus Hannonis Carthaginensis, ut habet prouerbium Græcorum; quibus affines esse dixerim Lamias, turres & pectines Solis, quos pueris

Tertull.  
aduersus  
Valent.  
Athenaus  
3. 8. c. 11.

narrant Africanæ nutrices, ut refert Tertullianus, Athenæo referente. Stratonicus cum Polydas superbiret, eo quod Philotas ipsius Discipulus Timothæum Musicum præstantissimū cantu superasset, dixit Timothæum *ῥόμω*,



id est, Sapientum decreta & sanctiones consecrari, Philo-  
tam verò *ἡ φιλοματία*, i. plebiscita, quæ optimis sanctioni-  
bus sapius derogant. Quis igitur populum iudicem patia-  
tur nostrorum scriptorum, qui de vnoquoq; nostrum non  
nisi vel odio, vel affectu pronuntiare solet, imo ne iudex  
quidem habendus est: cum enim ad eum prouocatur istud  
à Iudice ad Coronam prouocari dixit Seneca. Narrat Plinius

Senec. l. de  
Ira, c. 12.  
Plin. li. 7.  
ep. 17.

Nepos Pomponium scriptorem Tragædiarum si quid fa-  
miliarius amicus tollendum censeret, ipse retinendum ar-  
bittaretur, dicere solitum, *Ad populum prouoco*. Tantum ille  
populo dabat quod planè iniquum esse Plinius ipse existi-  
mat. Iure igitur exclamat Horatius:

*Odi profanum vulgus, & arceo.* Ita Virgilius:

Horat. l. 3.  
Ode 1.  
Virgil.  
Catalekt.

*Hoc satis est, pingui nil mihi cum populo.*

Neque enim ad vulgi captum scribere debemus. Quod &  
appositè monuisse videtur Horatius idem,

*Neque te ut miretur turba, labores.*

Horat.  
Art. Poët.

Eam ob causam alij nobis sunt quærèdi Iudices, qui & pe-  
ritè & candidè de nostris iudicent. Peritè dixi, ut nemo de  
nostris scriptis iudicium ferat, nisi qui eius scientiæ, ad  
quam nostra spectant, cognitionè habeat. Aristoteli Phi-  
losophorū præstantissimo, iudicium de rebus quæ ad ho-  
minum societatem spectant, nonnisi vel à cognitione, vel  
ab vsu petendum esse constat. Elegans de ea re dissertatio  
est apud Maxim. Tyrium. Trita est omnium sermone sen-  
tentia, quam pluribus explicat B. Hieronymus ex vtroque  
Fabio, Piëtore & Quintiliano: *Fælices essent artes si de illis  
soli artifices iudicarent, Poëtam non potest nosse nisi qui versum  
potest struere: Philosophos non intelligit, nisi qui scit dogmatum  
varietates*. Iraque Theologi de Theologis, Iurisconsulti  
de Iurisconsultis, Medici de Medicis iudicent. Planè ridi-

Arist. li. 3.  
Polit. c. 7.

Maxim.  
Tyr. differ.  
39.  
S. Hieron.  
epist. 26. ad  
Pammach.

BBb ij



Seneca  
ep. 108.

Senec. 1. de  
Clem. c. 6.

Plin. lib. 5.  
ep. 3.

Sen. pref.  
Controu.

B. August.  
ep. 7.

Phœdrus  
lib. 4. fin.  
Symmac.  
lib. 5. ep. 83.

Vopiscus  
Aurel.  
Ouid. de  
Ponto, li. 2.  
Eleg. 5.

culum videri debet si Grammaticus Theologum agat, aut si quis Theologica oculis Grammaticis, ut loquitur Seneca, legat & examinet. Illud certè æquo animo ferendum non videtur, si quis nostra obtrectandi & reprehendēdi studio legat. *Nemo nostrum non peccat, homines sumus, non Dij*, aiebat ille. Seneca, quanquam Catonianæ regulæ addictus: *Peccauimus*, inquit, *omnes, alij graua, alij leuiora, alij ex destinato, alij fortè impulsī; Vt omnia remissionis genera breuiter amplectar, homo sum*, aiebat Plinius Nepos; & eo facilius veniam consequi merebitur, qui ingratescente ætate & deuexa senectute, ut Seneca loquitur, quoniam ita necessum est: *In antiqua studia, & ad meliores annos respicere cogitur*, quemadmodum à M. Seneca proditum est. Ac vno nomine quoniam unicuique scriptori exerrare procliuè est, sic vicissim boni consulat si sui lapsus amicè moneatur, neque hunc emendare cunctetur, vel tergiuerfetur. Meminerit aureque istius sententiæ B. Augustini: *Dictimali, vel stulti, vel incommodi pœnitere cordatorum est*. Liuor interim non aliter quàm Silenus ille apud Iulianum Apostatam in Cæsaribus, vniuersim cunctos arrodit & vellicat. Seneca Pater, Suafor. 2. Ne Grammaticorum quidem calumnia ab omnib. magnis ingeniis submouenda. Generosè Phœdrus de suo libello istud scripsit: *Hunc obtrectare si volet malignitas, imitari dum non possit, obtrectet licet*. Verè Symmachus: *Mediocribus*, inquit, *scriptis amicorum benignitas scit fauere, alienorum inuidia nescit ignoscere*? Etiam illustrioribus quibusque scriptoribus Momi illi minime parcunt, & cum imi subsellii viris componunt. Sed *purpura ad purpuram examinanda est*, ut ait Vopiscus. Ea res Ouidio ansam non immeritò conquerendi dedisse videtur:

*Candor in hoc auro res intermortua penè.*



Moncant nos Censores id genus, ac citra odium, si tantisper aberrauimus, si à via defleximus, benignè rectum iter demonstrent, amica obiurgatio plurimum apud placidas mentes valere solet, increpatio stomachi plena ingrata penitus, siquidem conuitiandi magis quàm docendi studium præ se ferre videatur. Quàm ingenuè & candidè B. Ambr. *S. Ambr. epist. 47.*  
*brosius: Ego eorum beneficio annuero, si quis mea legens scripta, dicat mihi quo videatur moueri. Quàm blandè Marcellus, qui Marcell. de Medic.*  
 sub Theodosio Magno, de Medicina Poëmatium scripsit:

*Quisque tamen nostrum hoc studium dignabère, quaeso  
 Praestes iudicium purum, mentemque benignam.*

Quamuis capitones istos & plus æquo obstinaciores, non possim non damnare, qui quanquam suorum errorum peramanter moniti, aut præ pudore, imperitè, siue ineptè à se scripta emendare non audent, aut singulari peruicacia se peccasse pernegant, quique iuxta Accij dictum, *Nisi pro-* *Accius Helen.*  
*brum omnia alia indelicta aestimant;* quorum audacia nullis & veritatis & rationum momentis superari potest. Et nescio an præter ordinem aliquid tentandum sit:

*Cùm tamen ista filix nullo mansuescat aratro.* *Persius Satyr. 4.*  
 vt Persij imitatione istud exprimam. Ac eo magis vbi tantillú pietas religioq; Diuini Numinis violetur. Tum enim aptius nullum coërcendæ istius impietatis exemplum desumi potest quàm ex illa narratione Taciti de igne, apud *Tacit. l. 13.*  
 Iuhonum ciuitatem è terra edito, *Qui cùm extingui non pos-*  
*set, non si imbres caderent, non si fluminalibus aquis, aut quo alio*  
*humore niterentur, donec inopia remedij, & ira cladis, agrestes*  
*quidam eminus saxa iacere, dein residentibus flammis, propius*  
*suggressi, ictu fustium alijsq; verberibus, vt feras, absterrebant,*  
*postremo tegmina corpori direpta iniiciunt, quanto magis profa-*  
*na & usu polluta, tanto magis oppressura ignes.*

BBb iij.



## CAP. XIII.

*Censura.*

**S**ed tandem quid lectores & iudices nostrorum scriptorum in iis reprehensione dignum existiment expendamus, quod triplicis generis esse arbitror, aut enim materiæ quæ tractatur, aut dispositionis, aut styli peccatum est. Dignitas materiæ parem expostulat tractationem inquirunt illi; itaque si quid prætermisissimum fuerit, etiam quantumvis exiguum, totum quidquid sit repudiandum censent. Vbi scriptor pro ingenij sui solertia, & felicitate omnem adhibuerit operam in illa materia eiusque singulis partibus indagandis & explorandis, ac nihilominus quidpiam illum latuerit, planè venia dignus censendus est.

Audiant illi Senecam, *Multa seculis tunc futuris cum memoria nostri exoluerit reseruantur.* Et alio loco: *Veniet tempus quo ista quæ nunc latent, in lucem dies extrahat, & longioris aui diligentia.* Quod ex Plotino Platonico comprobatur Theodoretus: Manilius id affirmat cum ait,

*Semper enim ex alijs alias profeminat usus.*

Artes autem intelligit. Non aliter Gratio primi homines:

*Contiguas didicere ex artibus artes.*

Proferere. Eodem pacto Lactantius, *Iam plura prioribus seculis incognita necessitas, & usus inuenit.* Varronis sententiæ omnino standum esse arbitror: *Nemo omnia potest scire.* Sed vnum hoc me malè habet, quod Censores isti cum antiquitas venerationi potius esse debeat quàm reprehensionem, ab ea tamen fugillanda minimè abstineant. Cephisidorus

Ifocratis discipulus aiebat, reperiri posse vnum vel alterum

Senec. lib.  
7. quasi.  
natur. c. 31.  
Senec. eo-  
dem lib. c.

25.  
Theodor.  
lib. 6. cu-  
rat.

Grat. Cy-  
neg.  
Manil. lib.  
3.  
Varro 2.  
de re rust.  
6. 1.

Athene.  
lib. 3. c. 34.



dictum, quod à summis Poëtis vel Sophistis parum rectè *Senec. ep.*  
 fit pronuntiatum. Placet istud Senecæ, *Ingenia summorum* 33.  
*virorum non leuiter tractanda & examinanda*, & vno nomi-  
 ne, *veteres cum excusatione audiendi sunt*, aiebat Seneca ipse. *Senec. lib.*  
 In recentioribus perstringendis, non pauci plus æquo si- *6. quæst.*  
 bi indulgent, & quo audaciores existunt, eò magis in alie- *nat. c. 5.*  
 nis carpendis sibi licere putant, ac si valeant aliquando

*Victo leges imponere Cælo,*

vt loquitur Cornelius Seuerus. Neque tamen excusatio- *Cornel.*  
 ne digni sunt habendi qui cum nobilem quandam & am- *Seuer.*  
 plam ad scribendum materiam sibi proposuerint, adeò *Æthna.*  
 ieiunè & exiliter in ea pertractanda versati sunt, vt sibi sa-  
 tis esse putarent, si elegantes orationis flosculos, & quasi  
 meras nugas potius quàm solidæ eruditionis quidquam  
 adhiberent. Illi similes mihi videntur aui cuipiam, quæ à  
 Græcis *κέπφος* vocatur, hæc vilis admodum & nullius  
 pretij, è mari volitans & spumase dens, quæ corpore qui-  
 dem plumosa, sed carne strigosa, & quasi ossea, dum par-  
 turit clamore littora implet: Addunt & hoc de nonnullis  
 qui vt lectoribus, seu minus peritis, seu nimium credulis,  
 fucum facilius faciant, operum elegantes titulos excogi-  
 tant. Dicam cum Seneca, *Frons ipsa dat locum fabule*, & ad *Senec. lib.*  
*malam spem inuitat*; & vt ait Lucilius, *de vita*  
*Beata.*

*Principio exitu dignus exodiumque sequetur.*

Symmachus quam-bellè, *Sine argumento rerum, loquacitas* *Symmac.*  
*morosa displicet*. Sed plerisque Græcorum is mos est, au- *lib. 10.*  
 ctore Plinio Nepote, vt illis sit pro copia volubilitas. Asia- *epist. 51.*  
 nus ille tumor Attico sale siccandus est, vt aiebāt veteres. *Plin. lib. 5.*  
 Ac propterea lectores ipsi ex horum scriptorum lectione *epist. 20.*  
 fructum vberimum sperare nec possunt, nec debent. Ita  
 vicissim eos reprehensioni minus obnoxios dixerim, qui



rerum magis quàm verborum solliciti, quamquam propositam materiam pro dignitate, vt par est, minime pertractent, omnem tamen industriam suam omnemque ingenij sui conatum adhibuisse satis apertè restantur:

*In magnis voluisse sat est*

Propert.  
eleg. 10.  
Ilin. Prae-  
fat. bñ.  
Saluian.  
Praefat.

ait Propertius. Ita Plinius Auunculus ad Vespasianum Augustum, *Etiam non assecutis voluisse abundè pulchrum atque magnificum est.* Saluianus noster eodem modo, *Mens boni studij ac pij voti, etiamsi effectum non inuenerit capti operis, habet tamen premium voluntatis.* Quin etiam si quis in huius operis parte aliqua, velut loco confragoso cespita-uerit, libenter ei condonandum puto. Apud Senecam, *Non est facilè inter magna non desipere.* De materia leui, nec alioqui magni momenti non valde laborandum arbitror.

Senec. tit.  
6. quaest.  
nat. c. 28.

Lucil. Sa-  
cr.

Ouid. 2.  
de Pont.  
Eleg. 5.

Dicam cum Lucilio,

*Nemo hic vindicias, neque Sacra, aut Numina retur.*

Merito itaque Ouidius,

*Dum tamen in rebus tentamus carmina paruis,*

*Materiae gracili sufficit ingenium.*

Castiod. lib.  
5. epist. 16.

Nunc operis distributio dispositioque explicanda est, equidem rectè Castiodorus, *Praclare cogitata, si non benè agantur, ingrata sunt.* Ita est in iis quæ nos & scribimus & publicamus. Apta & concinna collocatio eorum quæ tractantur, quàm bellè cedit, quàm facilè ex animo lectoris tædium omne fastidiumque dispellit. Epictetus apud Arrianum, nihil ineptius esse docet, cum quis Poëta in Tragœdia, viles humiliorisque fortunæ homines inducit, quandoquidem soli Reges, Principes & Magnates in ea locum habere debeant. Quod antea Horatius monuerat. Sic qui citra rei propositæ grauitatem & decorum, multa perturbatè, cōfusè & demissè obtrudunt, adeò vt ista tam benè cum

Arrian.  
lib. 1. c. 24.

Horat.  
Art. Poët.



cum re subiecta cohæreant, quàm crepidæ clauus trabalis; Parerga perpetua voluisse scribere, quis non existimet? vnoquoque momento à subiectâ materiâ digrediuntur, atque hoc vnum conari, vtab operis mole & magnitudine commendentur. Senecæ, *Vulgo magna pro bonis sunt*, Senec. epist. 118. Sed vulgò, sed imperitis. Scio Aristophanem Grammaticum ex Archilochi Iambis eum qui longissimus esset tantum probasse. Noui istud Plinij Iunioris, *M. Tullij oratio optima fertur esse quæ maxima*; subditque & *Hercule ut alia bonæ res, ita bonus liber, melior est quisque quo maior*. Verum huiusce controuersia non alium legerim arbitrum quàm Plinium ipsum, dum ita pronuntiat: *Primum ego officium scriptoris existimo, ut Titulum suum legat atque idemdem interroget se, quid cæperit scribere, sciatque si materia immoratur non esse longum, longissimum si aliquid accersit atque attrahit*. Martialis ad eam rem accommodatè,

*Non sunt longa quibus nihil est quod demere possis,*

*Sed tu, Cosconi, disticha longa facis.*

Martial.  
lib. 7.  
Epig. 77.

Orationis alia ratio videri potest, quæ niuibus hybernis similis esse debeat, si Plinio Nepoti credimus, id est, *Crebra, assidua, & larga sit, in qua præuaticatio est transire dicenda, præuaticatio etiam cursim, & breuiter attingere quæ sunt inculcanda, insigenda, repetenda*; Nam plerisque longiore tractu vis quadam & pondus accedit. Hæc quidem in solis orationibus locum habere minimè arbitror, cum ista vel maximè in iis operibus, vbi cum aliquo aduersario depugnandum est, desiderantur: Quàm præstat in cæteris lectorem prolixitatem desiderare potius, quàm tadium profiteri. Symmachus mihi auctor, *Honos est ingenij cum desideratur vbertas*: Odi in paruo corpore longa velamina, illa vestis decenter induitur quæ non trahit puluerem, nec in humum

Plin. lib. 1.  
epist. 20.

Symmac.  
lib. 3. epist.  
10.

CCc

Symmac.  
eo lib. epist.  
57.  
Symmac.  
lib. 1. epist.  
39.

*demissa calcatur. Ille idem alio loco: Vt desideranti prolixitas grata est, ita displicere non poterit breuitas occupato. Placet & vel maximè istud eiusdem: Odi parsimoniam verborum bonorum. Ita se res habet, vt cum quidpiam scribimus quod in lucem aspectumque omnium veniat, non tantum rei subiectæ, sed & lectorum aliquam habeamus rationem, maximè eruditorū, nam de imperitis & fungini generis hominibus quis cordatus scriptor cogitabit? Rectè Martialis,*

Martial.  
lib. 2. Epi-  
gram. 86.

*Turpe est difficiles habere nugas,  
Et stultus labor est ineptiarum  
Scribat carmina circulis Palamon,  
Me raris inuat auribus placere.*

Martial.  
lib. 4. Epi-  
gram. 29.

*Istud ad suum gustum edixit Martialis idem,  
Sæpius in libro memoratur Persius vno,  
Quam leuis in tota Marsus Amazonide.*

Nec minus certè ad sinceram existimationem faciet, hæc concisa scribendi ratio operisque conuenienter scripti breuitas, quàm laciniosa quæuis & ineptè morosa dissertatio. Sic Cornelius Celsus,

Epigram.  
lib. 2.  
Plin. lib. 9.  
epist. 29.

*Nec minus est nobis per pauca volumina fama,  
Quàm quos nulla satis bibliotheca capit.*

Senec. præf.  
lib. 3. contr.

*Mihi semper plurimum arrisit istud Plinij Nepotis, Vt satius est vnum aliquid insigniter facere, quàm plurima mediocriter, si non possis vnum aliquid insigniter. Magna ingenia, aiebat M. Seneca, nunquam plus quàm in vno eminuerunt opere, Sed quod istius modi fuerit, vt in eo condendo nihil laboris, diligentiæ & doctrinæ pretermitti debuit. Deinde qui mediocri ingenio præditus fuerit, pro industria suæ modulo, sui similibus duntaxat sibi satisfaciendum esse cogitabit. Ecquid maius vel præstantius ab eo reposcas? Extis ingenij, aiebat B. Cyprian. angusta mediocritas tenues ad-*



modum fruges parit, multis ad copiam fecundi cespitis culmis ingrauescit. Ad rectam scribendarum rerum collocationem tandem redeo, & qui diuina atque cœlestia in litteras referre cupiunt, Synesij & eruditissimi Philosophi, ita sanctissimi Episcopi sententiam sibi ob oculos ponant. A diuinatione, vt ipse loquitur, *μυρτίδα*, ego afflatum quendam diuinum intelligo, sententiam sæpe præparari, dictionem accommodari, interdum vniuersam verborum structuram redundantem, & votum nouitate turgentem, à veteri loquendi norma degenerantem castigari dixit. Sed *ubi vult spiritus spirat*. Nemo in hac parte etiam ob vitæ sanctimoniam plus æquo sibi blandiatur: *Nihil est inepta hominum persuasione falsius*, aiebat veterum aliquis. Postremum superest reprehensionis caput, de stylo nimirum. Maxima quæque & grandia non nisi grauissimo dicendi genere explicari debent.

*Sed magnæ Numina Romæ*

*Non ita cantari debent, vt ouile Menalce,*

quemadmodum cecinit Calpurnius. Et quid aliud vocem, demissum & humilem sermonem explicandæ rei præstantissimæ adhibitum, quam *pannum in purpura positum*? vt loquitur Næuius. Veruntamen unicuique rei quam tractamus accommodata oratio usurpari debet. Sunt enim Theologica, & quæ de rebus diuinis agunt, quorū sunt voces propriæ & peculiaris stylus. In iis, quod de Philosophorum scriptis dixit Seneca, *Pressa omnia & rei aptata adhibenda sunt*: Theologi non efferat se oratio, ne longius quàm destinauerit, trahat, inelaborata sequatur, Theologus quantū velit, & plus significet quàm loquatur. Hoc maioris rei inditium est, apparet animum quoque nihil habere superuacui, nihil tumidi. Adde etiam quod de Philosophi sermone alio

Calpurn.  
Egl. 4.

Senec.  
epist. 59.

CCc ij



Senec. epist.  
75.

Agell. lib.  
18. cap. 7.

Senec. epist.  
108.

loco dixit & aptissimè ad Theologum scriptorè referam;  
*Non ieiuna esse & arida velim, quæ de rebus tam magnis, & planè Theologicis dicuntur. Neque enim Theologia ingenio renuntiat, multum tamen operæ impendi verbis non oportet: Sit sermo illaboratus propositi nostri summa; quod sentimus, loquamur, quod loquimur sentiamus.* Scholasticæ Theologiæ argutias quo stylo explices? homines delicatuli, has non minus derident, quàm mulierum voces præficarum, & quemadmodū M. Cato Philosophos, sic isti Theologos Scholasticos, *Mera mortuaria glossaria* appellare non dubitant. Sed si veteres Romani Saliorum carmina & Pontificum Annales, religionis ergò, quantumvis ignotis, peregrinis & barbaris dictionibus refertos, retinuerunt, quidni ad doctrinæ Christianæ illustrationem non parum conducentes istius Theologiæ voces usurpabimus? Quamquam si illas paulo asperiores & rudiores aliquis emolliat & blandioribus ac lenioribus Latinis exprimat, non minimam à nostris Scholasticæ studiosis gratiam inibit. Primus, ni fallor, Paulus Cortesius Scholasticam Theologiam à Latini sermonis puritate & proprietate minimè abhorre docuit, scriptis ante annos centum, eleganti stylo, quatuor sententiarum libris. Interea verò, si quis Theologus, quæ ad mores pertinet, Theologiam explicet, aut conciones scribat, multò liberior stylus illi conceditur: tum enim, ut ista Senecæ usurpem, *Ex eadem materia suis quemque studiis apta colligere perspicimus.* In eodē prout, inquit Stoicus ipse Romanus, *bos herbam querit, canis leporē, ciconia lacerat.* Hinc Theologiæ cādidatus, hinc Philosophiæ deditus, hinc Philologus, hinc Grammaticus, alius alio curam suam mittit. Sed me ipsum comprimo, si enim per singulas disciplinas nostra cuiuscemodi excurreret oratio, contra in-



stitutam breuitatem non leuiter peccare viderer. Vnum tamen addere liceat, apud Theologos maximum esse discrimen inter conciones scriptas, & eas quæ habentur ad populum, non secus atque inter prorsam & vorsam orationem; quæ soluta oratione dicuntur, non absque negligentia audiuntur, minusque percutiunt, vbi accessere numeri & egregium sensum adstrinxere certi pedes, eadem illa sententia velut lacerto excussa torquetur. Non aliter concio scripta & pronuntiata, ipsa licet omni verborum lepore & lenociniis ac mirifico apparatu exulta legatur, languidius incurrit in animum, ac viua vox multo magis afficit, quemadmodum veteres rectissimè iudicarunt: de qua re pluribus in perfecti Concionatoris idæa dicendum foret. Neque verò illud meritò debet omitti, quod sæpius id quod est obuium & vulgare, nullo elocutionis nitore dignum iudicamus. Verum, vt ex Sallustio refert Seneca, *Nihil magis cum cura dicendum, quàm quod in manibus est.* Totum hoc eleganti Plinij Nepotis loco concludere liceat, vt vnusquisque qui lucubrationes suas publici iuris facere cogitat, istud Plinij sibi dictum putet: *Cogita quàm sit magnū dare aliquid in manus hominum, nec persuadere mihi possum, non & cum multis, & sæpe tractandum, quod placere & semper & omnibus cupias.*

*Sen. li. 4. de  
Benef. c. 1.*

*Plin. lib. 4.  
epist. 17.*



IOANNES  
PETRVS ROSSETVS  
Doct. Theolog. Paris.

BENEDICTO KERVILLÆO  
*Theologo Parisiensi, S. P.*



OSTREMIS tuis litteris beasti me, suauissime Keruillæ, dum te ex ancipiti & periculoso morbo euasisse scribis. Audio te Lutetiam cogitare, an huiusmodi itinere nuper restituta valetudo plus roboris firmitatisq; consecutura sit nescio, ausim tamen polliceri, animo te longè melius habiturum. Cogita quàm iucundissimus futurus sit conspectus tuus amicis omnibus, & iis præsertim qui vnà tecum in circo Theologico varias & multiplices certationes, decursionesve absoluerunt. Qui ioci, qui risus, & post hos pietatis, eruditionis, grauitatis, ac moderationis plenissimi congressus. Video te iam ipsos percontari, quid in sacro ordine nostro Theologico non ita pridem memoratu dignum gestum sit. Omnia enumerare qui vellem? Nosti qui nos oppugnent, nec vnus generis. Domestico dissidio, & veluti febre ex interuallo recurrente, nostram Facultatem imminui, & rescies & dolebis, sat scio, externis non tam dolis & insidiis, quàm apertis armis peti, id tibi, non sine maximo animi mœrore, plusquam par sit, perspicuum fiet. Sed sine tuum ab hac molesta &



ingrata cogitatione animum auocem, & ride mecum, nostram Facultatem Theologicam carere nomine. Corpus dici non placet quibusdam. Quidni? Vnius ordinis istius Parisiensis tot tantosque Doctores existere, fumus illorum oculis. Quàm lubenter *Capitulum* vocarent, quatenus ex sententia Iuris Pontificij peritorum tres *Capitulum* facere dicuntur, quin & familiam, quum tres efficiant, vt Iurisconsulti affirmant ad mentem legis, *Neratius Priscus*, ff. de verb. signif. Ita Poëta Romanus ad Pontum Euxinum, lib. Fast. 4.

*Tota domus leta est, hoc est, materq; paterq;*

*Nataque; tres illi tota fuere domus.*

Tres Ecclesiam facere dicuntur Tertulliano lib. de Baptismo. Sed de hac Septimij Florentis sententia amplius deliberandum censeo, vt cum Iurisconsultis loquar. Etiam tres *Monasterium* faciunt, ait Leo sapiens Imperator, Nouella 14. Addam & iuxta prouerbium vulgi, tres mulieres nundinas exhibere. Sed vt ipsi aliquantum se sapere demonstrent, leniter in nos sauiant, nec tam exiguo numero, vt pote ternario, omnes nostræ Facultatis Doctores comprehendi volent, quindecim numerari saltem concedent. Incredibilis misericordia. Etiam *quindecim homines populus est* (scu δῆμος, seu καὶ μὲν interpretaris, ex Aristotele de Arte Poëtica) *totidem seruifamilia, totidem vinctiergastulum*, vt prodit ille Madaurensis. Eo quidem numero duntaxat totius nostri ordinis Doctores contineri, si in votis habeant, etiam *Collegij* nomen huic adsignari non valde repugnabunt, nisi forsan ex sententia Neratij Prisci Iurisconsulti, qui tres *Collegium* efficere dixit, loco superius allato. Sed à Corporis appellatione quid est quod tantoperè abhorrent? *Corporis* & *Vniuersitatis* vocabula pro

eodem Iurifconfulti vſurpare amant, poſterius hoc deli-  
 catulis iſtis ſtomachum mouere nullus dubito. Verum  
 cur *Corporis* nomen recuſent, dum *Collegij* vltro conce-  
 dunt, non video. Hæc paſſim leges copulare videmus,  
*ff. lib. 47. tit. 22.* qui eſt *de Collegijs & Corporibus*. Idem Ba-  
 ſilicorum lib. 8. titulus eſt, *περὶ συζημάτων καὶ σωματείων*, &  
 contextus ipſe, *ἐπαρείας, συζηήματα καὶ σωματῖα* ſimul me-  
 morat, ac ſi horum trium vna eademque ſit necnon com-  
 munis notio. Quanquam Scholiaſtes Græcus ad titulum  
 32. *Βασιλικῶν*, tenuiorum *ἐπαρείας*, quæ in Eccleſiis ſiant,  
*κεφάλαια* vulgò appellari teſtetur. Et quidem titulus ille 32.  
*Βασιλικῶν* edente & interprete Cujatio Iurifconfultorum  
 noſtri æui princeps, habet epigrammæ eiufmodi de *Colle-  
 gijs, Sodalitijs & Corporibus*, qui alioquin in libris *Βασι-  
 λικῶν*, Leunclauij deſideratur. Interim *ἐπαίεια*, quæ Dioni  
 lib. 48. nominantur, & nos *Sodalitia*, ſiue populari voce,  
*Fratrias* dicimus, vide prauo ſenſu vſurpari Concilio Cal-  
 cedonenſi, cap. 18. vbi *φράτεια* non aliter prohibetur,  
 quàm quod ſit ex interpretatione Zonaræ & Balfamonis,  
*ἀρεθούλιον καὶ κότελες*, conſilium & conuenticulum ad quid-  
 uis improbè moliendum & agendum inſtitutum. Ad no-  
 ſtras voces *Corporis* & *Collegij* redeo, & quæ artificum non-  
 nullorum *Collegia*, in Pandectis vocantur, in Codice,  
*Corpora* dici video. Addo & in Codice Theodoſiano, lib.  
 14. tit. 2. Urbis æternæ ſeu Romæ, varia *Corpora* homi-  
 num vniuerſim dici, quæ aliàs *Collegiorum* nomine cen-  
 ſentur. Idem legere eſt Codicis Iuſtiniani lib. 3. tit. 23.  
 Præterea eiufdem libri tit. 38. *Corpora communia*, quæ nun-  
 cupantur Cod. Theodof. lib. 12. tit. 1. *Collegia ſingularum  
 urbium* appellantur, niſi quis malit illa de artificum *Cor-  
 poribus* explicare, quorum meminit etiam Lampridius in  
 Alexand.



Alexand. Seuero. Eodem insuper libro 14. Cod. Theodos. *Corpora Caudicariorum, Catabolensium, Pistorum, Centonariorum, Fabrorum, Dendrofororum, Saccoriorum* habes expressa, quemadmodum *Fabricensium Corpus*, Nouell. titulo 11. Quin si nostrum *Ordinem Collegium* dici malint quàm *Corpus*, discant *Collegiatos & Corporatos* promiscuo nomine exprimi utroque Codice. Forfan pro non obscura erga nos similitate, *Corporum Artificum* exemplo, *Facultatem nostram Corpus* appellari vltro patientur, ac si non pluris facienda, nec maiori habenda in pretio, quàm vel *Pistorum, vel Suariorum Corpus*. Belli homines qui aut ignorant, aut dissimulant, lege Constantij Augusti, *Pistorum Corpus*, Reipublicæ necessarium videri. Et idcirco fouendum. Cod. Theodos. lib. 14. titulo 2. necnon Gratiani, optimi Imperatoris, lege prohibitum, ne *Corpus suariorum siue porcinariorum* sordidis vnquam muneribus subiaceat, quandoquidem laborem populi Romani commodis exhibeat. Theologicum nostrum ordinem minimè Reipublicæ Christianæ necessarium existere si dixerint, audio iam Prætorem illos ad agnatos & gentiles amandare. Denique res ipsas quas ex instituto & conditione tractamus, sordidas esse, nemo, nisi cui vena secunda sit, pronuntiabit. *Collegium* itaque si tam pertinaciter appellari voluerint, potius quàm quiduis aliud, nostræ Facultatis honori hoc modo probè consultum, nescio quo in eam odio excæcati, non satis aduertunt. *Collegium Decurionum* legant in Pandectis, ff. lib. 50. tit. 2. de *Decurionibus*, ac discant Decuriones velut minores Senatores habitos fuisse, quemadmodum statuit Maior

D D d

rianus Augustus, Nouella de Curialibus, vbi *Curialium* cœtum, antiquitatis iudicio rectè Senatum minorem appellari affirmat. Videbis de ea re itidem Cassiodorum lib. 9. variarum, in Edicto Athalarici. Quinetiam *Collegium Senatus*, siue *Senatorum* nominatur Senatus ipse qui amplissimus & clarissimus ordo, Cod. Theodof. lib. 12. tit. 1. de Decurionibus. Si nostrorum Theologorum Collegium, *Senatum Theologicum* dixerò, quàm vereor ne expuant quasi cuiusdam fasciniauerruncandi gratia. Mitto quæ apud veteres scriptores Ciceronem, Liuium, Valerium Maximum, Suetonium, Agellium, Macrobius, *Colligia* & illustrium hominum sicuti & magistratuum commemorantur, etiam Consulum, quanquam duorum duntaxat, *Collegium* Paterculo dictum, vis vno verbo absoluam. Vbi nostri tam ineptam intellexerunt sententiam, ad Logicen prouocarunt, cuius vix nomen nosse istius opinionis auctores, rectissimè nostri iudicarent. Ecquis enim est tantisper in Dialecticis versatus, qui nesciat generis nomen ipsi speciei attribui? in iure, *Collegium* species, *Corpus* tanquam genus censetur. Itaque Facultas Theologica, siue Collegium Theologorum, *Corporis* velut generis sui nomenclaturam sortitur necessum est. Si qui aliter sentiant, tu, ni fallor, superstitiosos & Barones meritò appellaueris, quos, vt ille Menæchmus Socrates apud Plautum, iubebis piari porcis sacris sinceris, & cum præsertim qui hoc excogitato commento, insignem suam prodidit inscitiam, & forsitan tunc temporis nodo Herculeo, cui nimium quantum obnoxius est, deuinctus cum esset, illum fugit & memoria & ratio. Hæc cum ad me Luteriâ scripta fuissent,



tibi ad Regiam illam Metropolim profecturo, pro iure veteris amicitiae quamprimum significanda esse duxi. Quis verò sit hoc tempore rerum nostrarum status, non est quod scire valde expetas. Scio & gaudeo te apud Aremoricos tuos iucundissimo otio & publica tranquillitate frui. Ego cum ad meos Albenses me recepissem, & Viuarioni non inglorius degerem, Sectarijisti, omnium mortalium profligatissimi & postremissimi, excitata plusquam Schythica tempestate, de illo suauissimæ quietis statu, & exæolso rerum diuinarum explorandarum fastigio deturbarunt nos,

— *Parcè puréque putantes*

*Viuerè cum patria, nunc sumus in rutuba.*

Vale, & me tui amantissimum iuxta præceptum Hecatonis amare perge.

Viuarione. Calend. April.

CIO. DC. XXV.

DDd ij



# APOLOGIA SMITHEA,

SEV

## De Ecclesiæ Benignitate:

AD CAMILLVM MONTENSEM  
ANIMADVERGIO.



VM postremis tuis literis de mea salute nimis anxium & sollicitum te videam, non aliter hac molestia leuatum iri existimaui, quàm si prospera nauigatione vsum me tibi significarem. Eo certè ingenio te natum semper agnoui, vt maritimum iter nimium quantum & reformidares & exhorresceres. Crebrò istud Cestij pij oggerbas: *Nihil est periculosius quàm instructa etiam nauigia, parua materia seiungit fato.* Profectio fœliciter cessit, nec aliter reditus. Hoc tibi facile persuasero si totius itineris mei Britannici rationem non iam particulatim, sed summatim exponam. Amœnam regionem quæ mihi occurrit, deprehendi, & ver perpetuum hîc sedem collocasse facile crederem, ni aliquando

Seneca  
Controu. 1.  
lib. 7.

Iuuenal.  
Sat. 5.

— Fremeret sæua cum grandine vernus

Iuppiter. —

Clementissimum & humanissimum Regem vbiuis locorum prædicari audio, Reginae bonitas & facilitas apud eosiam in proverbum abiit, & Britannia delicias vocant;



utinam quod illorum est singulare votum, multiplici prole beatam breui detur celebrare. Magnam partem qui apud eos nobili & bono genere nati sunt, etiam ingenio nobiles, qui præsertim vel melioribus literis exculti, vel peregrinationibus perpoliti. Cæteri suapte culpa degeneres abeunt, genus ingenio improbant, vulgus ubi ubi sit semper vulgus est. Nihil mihi tam diuidiæ fuit quàm cernere Britannos lege Sacrorum inter se dissidentes, sed vnum hoc incredibile cordolium, etiam inter Christianos Catholicos, qui hîc clancularij existunt scissuras esse. Forte fortuna in horum vnum incidi, à quo cum satis anxie tanti dissidij causas inquirerem, à piæ recordationis Reuerendissimi Bishopij Episcopi *us ætæ* carcere Romano, telam exorsus, ad hunc vsque diem narrationem perrexuit. Ille vbertim flens, quamquam non longè absim ab eo genere hominum quod Siccoculum appellant, tamen effecit vt vnâ atque alterâ lachrymâ oculi mei expuerent. Scio te auidè historiam illam à me expectare, non desunt apud eos qui ista oculata fide describât. Quod postremo loco narrauit, hoc te rescire opere pretium visum est. Episcopus, qui illis à Sancta Sede Apostolica præfectus, pro salute Regis, deinde pro fœlici partu Reginae grauidæ, preces Christianis Catholicis indixit. Qui verumque damnarent reperti sunt, etiam quibus necessum sit nihil eorum quæ in Ecclesia Catholica, aut scripta, aut acta sunt, ignorare. Postremum nulla omnino reprehensione dignum videtur, nec eniat nouas precandi formulas Episcopus iste excogitauit, sed velut post Diocletianea tempora, bello, quâ personis, quâ sacris libris Diuinorum mysteriorum indicto, vtrûmque pacato, priscei libelli officiales & rituales Dioclescon Britannia reperti

D D d iij.

sunt, in quibus preces eiusmodi designantur, quibus Maiores illorum, Ecclesiæ Catholicæ, Apostolicæ & Romanæ additissimi vsi sunt. Qui hæc reprehendenda iudicet, non absimilis seni Veronensi,

*Claudian.  
Epigr.*

*Proxima cui nigris Verona remotior Indis,  
Benacumque putat littora rubra lacum.*

Nec enim, arbitror, alias preces, siue probatas, seu vsitatas existimat quàm quæ in Liturgico suo libello reperuntur, suamque vnicam nouit Diocæsim, suosque peculiare castus,

*Metiturque suo rusticus orbe diem.*

At quod primum est, videlicet ab Episcopo suis pro Regis salute orare imperatum, nullo modo ferendum esse dicunt, cum Princeps ab Ecclesia Catholica Apostolica & Romana plane alienus sit, atque adeo profanus. Reprehensores istos miror, vel sacras literas minimè perlegisse, aut easdem cogitatè dissimulare. Deinde veteris Ecclesiæ morem vsunque omnino ignorare. Ista sparsim à Theologis nostri æui, non paucis occupata, animaduersa, vna veluti tabella tibi representabo, addamque nonnulla ab iis omissa. A veteri Testamento initium ducam. Hieremiæ 29. *Hæc dicit Dominus exercituum Deus Israël omni transfmigrationi quam transtuli de Hierusalem in Babylonem. Quærite pacem ciuitatis ad quam transmigrare vos feci, & orate pro ea ad Dominum, quia in pace illius erit pax vobis.* Ita qui cum Rege Iechonia in Babyloniam captiui abducti fuerant, ad Sacerdotes & reliquos Iudæos, qui remanserant in Hierusalem, ad hunc modum scripserunt. Baruch. 1. *Orate pro vita Nabuchodonosor Regis Babylonis, & pro vita Balthazar filij eius, ut sint dies eorum sicut dies Cæli super terram, & ut det Dominus virtutem nobis & illuminet oculos no-*



*stros, ut uiuamus sub umbra Nabuchodonosor Regis Babylonis, & sub umbra Balthazar filij eius, & seruiamus eis multis diebus, & inueniamus gratiam in cōspectu eorum.* Machabæorum liber primus, cap. 7. ut & Iosephus lib. 12. cap. 17. & lib. 2. contra Appionem, narrant Sacerdotes populi Iudaici significasse Nicanori, à Rege Demetrio misso, & demonstrasse holocaustomata quæ offerebantur pro ipso Rege. Eiusdem libri cap. 12. Ionathas, epistola ad Lacedæmonios scripta, quo pacto pro iis orarent sic indicat: *Nos in omni tempore sine intermissione in diebus solemnibus, & cæteris quibus oportet, memores sumus vestri in sacrificijs quæ offerimus, & in obseruationibus, sicut fas est, & decet meminisse fratrum.* Philo, de legatione ad C. Cæsarem Caligulam, affirmat Iudæos tres solemnes preces in illius gratiam instituisse. Primò cum mortuo Tiberio Imperium suscepit. Deinde pro eius salute, cum in morbum grauiissimum incidisset. Tertiò & postremò pro voto victoriæ tempore belli Germanici. Nemo est qui nesciat Nabuchodonosor Regem eiusque filium Balthazar ac vno nomine Assyrios omnes Idololatrias, & à veri Dei cognitione penitus abhorrentes extitisse, necnon de Nicanore Demetrij legato ipsiq; Lacedæmoniis idem sentiendum. Caligulam eo impietatis deuenisse historiæ Augustæ scriptores produnt, ut pro Deo haberi & coli voluerit. Attamen pro iis apud Iudæos publicas orationes atque adeo sacrificia oblata fuisse ex Sacra Scriptura hætenus intellexisti. Sed quid in nouo Testamento de ea re præceptum sit videamus. Apostolicam ac proinde Diuinam doctrinam eam accepimus, pro infidelibus orandum esse, & quidem publice, nec enim priuatim id præstare ullus sani capitis dubitabit. Gentium Apostolum itaque audiamus, ad Timotheum,

i. c. 2. ita scribentem: *Obsecro, igitur, primum omnium fieri obsecrationes, orationes, postulationes, gratiarum actiones pro omnibus hominibus, pro Regibus & omnibus qui in sublimitate constituti sunt, ut quietam & tranquillam vitam agamus, in omni pietate & castitate. Hoc enim bonum est & acceptum coram Salvatore nostro Deo, qui omnes homines vult saluos fieri, & ad agnitionem veritatis venire.* Locus hic Apostolicus ad id quo de agimus constituendum tanti ponderis est atque momenti, ut non cursim, sed paulo fusius explicandus veniat. Omnium Patrum huius loci interpretum, cum Grecorum, tum Latinorum, is est consensus ut doceant Apostolum velle Christianos pro omnibus hominibus, cuiuscumque conditionis & instituti sint, orare etiam in publicis ipsorum conuentibus & orationibus. S. Chrysostom. & ceteri qui illum secuti sunt Greci interpretes aptissime istud adnotant. Quid est quod Apostolus, pro Regibus, primo loco, secundum dignitatis ordinem orandum esse dixit, ne inquit quispiam suspicaretur assentari voluisse Apostolum Principibus ipsis cum eos primo loco nominasset. Deinde alius, quod pro omnibus orandum edicit omnium nomine solos fideles siue Christianos intelligendos esse existimare posset: etiam infideles atque adeo Imperatores, qui tum erant à Christiana religione abhorrentes, imo hostes acerbissimi, ex sequentibus Apostoli verbis comprehendi apertissime contendunt. Quo enim spectant ista, ut quietam & tranquillam vitam agamus, nisi quod innuat Apostolus, pro Imperatoribus istis, tunc temporis & aliquot postea seculis infidelibus, orationes ad Deum allegari debere, quandoquidem in illorum salute securitas nostra consistat, quæ ratio à communi utilitate, cuius Christiani sunt participes, petita est. At  
Deus



Deus pro publico & cōmuni omnium bono atque cōmodo Principatus, seu Regnā & Imperia instituit. Vnde perspicuē colligitur eos qui pro Regibus infidelibus orandum publicē negant, nō modo Apostolicā doctrinā aduersari, verum etiā in Diuinā prouidentiam, impetiorum authorem, publicamque salutem & vtilitatem peccare. Hinc altera ex ordine iustitiā ab eodem S. Chrysostomo subiicitur ratio, quod cum ipsi Reges seu Imperatores bella gerant, atque adeo arma tractent & in castris versentur, vt nos in otio & tranquillitate degamus, aequitati consentaneum est, vt nos pro periclitantibus & nostri causa labores, & belli discrimina subeuntibus vicissim preces effundamus. Etiam naturalis ratio istud dictare videtur, nec aliter mutuū auxilium constare posset, quo nos indigere certum est. Est & alia ratio ex eodem sanctissimo Episcopo obseruanda. Ita pro Principibus & iis qui in sublimitate positi sunt, expedit orare, quemadmodum & iisdem obedire. At eiusdem Apostoli praecepto, Rom. 13. Christiani necessitate subditi esse debent Principi suo, quisquis ille sit, non solum propter iram, sed etiam propter conscientiam. Quis igitur cui vel minimus conscientiae sensus relictus sit, pro Rege etiam infideli publicē orandum esse dubitabit? Sed haec quae sequuntur omnem omnino dubitationem tollere videntur: *Hoc enim bonum est, ait Apostolus, & acceptum coram Salvatore nostro Deo, qui vult omnes homines saluos fieri, & ad agnitionem veritatis venire.* Ista ergo insignis iniuria Christo fit ab eo qui pro infideli Principe publicē orandum neget. Ratio etiam tum seu charitatem, seu cuiusque Principis personam spectes, ex eo loco validissima desumitur. Pro

E E e



Regibus etiam infidelibus orare, & quidem publicè ita est bonum & acceptum coram Iesu Christo Salvatore, quem admodum vult omnes homines saluos fieri & ad agnitionem veritatis venire. At Principes etiam infideles non excluduntur è numero eorum quos Deus vult saluos fieri, & ad agnitionem veritatis venire. Hoc docent Sacra eloquia locis innumeris, ad cœlum nemini ab bonam frugem redeunti aditum esse interclusum, Ecclesiam piam esse matrem. Elegans ista B. Leonis Magni, epistola 91. ad Theodorum Foro-Juliensem Episcopum sententia: *Misericordie Dei nec mensuras possumus ponere, nec tempora definire, apud quem nulla patitur veniæ moras conuersio.* Quis igitur sanæ mentis affirmare ausit pro iis infidelibus publicè orandum non esse, nisi etiam Christianos Catholicos, publicæ orationis causa conuenientes, communi charitatis sensu carere, atque vniuersam illam de inimicis diligendis Christi legem tunc temporis repudiare dictitet, quod qui senserit Morboniam relegendus mihi videtur. Scio quod de nominatim excommunicatis, & notoriis percussoribus nunc scribant Theologi, sed de ea re hoc loco minimè agitur. Præclara huius loci explicati cōclusio ab eodem B. Chrysostomo repetenda est: Hoc enim bonum, inquit Apostolus, & acceptum est coram Salvatore nostro Deo. Quid illud est? Orare pro omnibus, hoc suscipit Deus, hoc iubet: *Qui omnes homines vult saluos fieri, & ad agnitionem veritatis venire.* Imitare Deum tuum, si omnes ille vult saluos fieri, meritò pro omnibus oportet orare. Si omnes ille saluos fieri cupit, illius & tu voluntati morem gerere debes, quod si velis eadem, vt par est, sine dubio pro iis orabis quippe volentium est orare. Vides, vt omni ex parte cuiusque Christianorum animum inducat Apo-



stolus ad orandum etiam pro Gentilibus ipsis, nec non pro hæreticis. B. Augustinus epistola 59. ad Paulinum, quæst. 5. alludere videtur ad hanc B. Chrysostomi explicationem de oratione pro omnibus etiam Regibus infidelibus facienda, cum Deus velit omnes homines saluos fieri, *Ne quisquam*, inquit, *sicut se habet humana cogitationis infirmitas, existimaret non esse ista facienda pro his à quibus persecutionem patiebatur Ecclesia, cum membra Christi ex omni essent hominum genere colligenda.* Ille ipse S. Augustinus solens suo more, hoc est, Diuino ingenij acumine, sermone 63. de Diuersis, cap. 9. præferens hunc locum B. Pauli, ex epistola 1. ad Timothæum, ita disserit: *Quid dicit Hieremias Iudeis transmigrantibus de his Babylonijs? Quia in pace ipsorum erit, inquit, pax vestra. Cum ergo transmigraret etiam per Christum & Apostolos Israël in Babyloniam, hoc est, Euangelium veniret ad Gentes, quid dicit Apostolus, quasi ex voce tunc Hieremie? Obsecro primum omnium fieri deprecationes, orationes, interpellationes, gratiarum actiones, pro omnibus hominibus, pro Regibus & ijs qui in sublimitate sunt constituti, ut quietam & tranquillam vitam agamus, cum omni pietate & castitate; nondum erant Reges Christiani, & orabat pro eis. Orans ergo Israël in Babylonia, exauditus est: Exaudita sunt voces Ecclesiæ, facti sunt Christiani, & videtis impleri quod figuratiter dictum est, In eorum pace erit pax vestra.* Methodicam illam huius loci explicationem apud B. Thomam, in Commentario Epistolarum Paulinarum, prætermittere mihi religio est. Ait itaque Apostolum velle orationes fieri pro omnibus hominibus, quia oratio sit interpres desiderij nostri; oratio enim petimus quod desideramus, charitas autem postulat quod desideremus bonum omnibus ad quos se extendit. Et ut ista ad Infideles quo-

EE c ij



que pertinere dicantur, profert ex veteri Testamento loca superius allata, Baruch. 1. & Hieremias 19. Subiungit & istud, ad verbum illum, hoc enim bonum est, & acceptum coram Salvatore nostro Deo. Rationem adsignat Apostolus, cur orandum sit pro omnibus hominibus, eamque petitam ex operis specie, quia quando aliquid est secundum se bonum, illud debemus facere, sed pro aliis (quales enumerantur ab Apostolo) orare secundum se bonum est, quia est actus charitatis, inde ex parte Dei illud bonum existere indicat, Apostolus, & insuper à charitate istud proficiscitur. Hæc omnia B. Thomam ex SS. Patribus, in quorum lectione plurimum versatus erat, delibasse, ex istorum collatione facile advertere licet. Sed quod hætenus à me expositum est pro Diuinorum oraculorum auctoritate, istud indubitata fide esse censebis; at censores illos hæc omnia abnuere dices, imò de priuatis orationibus intelligenda esse illos affirmare contendes. Vsum itaque & praxim veteris Ecclesiæ, velut Canonem certissimum consulendum arbitror. Apud priscam illam Ecclesiam in publicis Christianorum cætibus, atque adeo in ipsa Liturgia Sacra, solemnes preces pro quibusvis hominum generibus, quæ fidelibus, quæ infidelibus, oblatas fuisse demonstrari nullo negotio potest. S. Iustinus Martyr, Apologia 2. describit quid rerum ageretur apud Christianos, dum die Solis, seu Dominica, in cætum conueniunt ad preces communes & supplicationes, tum enim orant pro seipsis, pro illuminato seu recens baptisato, si quis sit, deinde pro aliis vbique Gentium omnibus. Postea SS. Eucharistiæ consecrationem & distributionem, ac cæteras denique Liturgiæ partes commemorat. Athenagoras, in legatione pro Christianis, sic eius rei



meminit. Quid iustius, inquit, quod orant impetrent, quàm qui pro imperio vestro vota precesque ad Deum profundunt, vt filius patri (M. Antonino Philosopho, L. Ælio Vero Imperatoribus scripta dissertatio) sicut æquissimum est, succedat, & vt id ipsum imperium cunctis populis sub ditionem vestram confluentibus accessum capiat & incrementum? Hoc autem & è re vestra fuerit, vt nos quietam & tranquillam vitam transigamus, quo ipsi vicissim omnia iussa vestra promptè exequamur. Tertullianus vnus omnium peruiacissimo cuiq; vel harum rerum imperitissimo, abundè satisfacere videtur. Sic enim Apolog. c. 39. *Ædam iam nunc ipse negotia Christiana factionis, vt qui mala refutauerim, bona ostendam. Corpus sumus, de conscientia Religionis, & discipline veritate, & spei fœdere. Cœmus in cœtum & aggregationem, vt ad Deum, quasi facta manu, precationibus ambiamus orantes. Hac vis Deo grata est. Oramus etiam pro Imperatoribus, pro ministris eorum ac potestatibus, pro statu seculi, pro rerum quiete, pro mora finis. Cap. 30. Precantes sumus omnes semper pro omnibus Imperatoribus, vitam illis prolixam, imperium securum, domum tutam, exercitus fortes, Senatum fidelem, populum probum, orbem quietum, & quacunque hominis & Caesaris vota sunt. Capite sequenti ostendit Christianos id præstare Diuino præcepto: Idem ad Scapulam, Sacrificamus pro salute Imperatoris, sed Deo nostro & ipsius; sed quomodo præcepit Deus, pura prece. Paulò post: Ita nos magis oramus pro salute Imperatoris, ab eo eam postulantes, qui præstare potest. Celsus apud Origenem, libro in illum octauo, carpebat Christianos quod pro Imperatore arma non ferrent, quasi militiam detrectarent. Respondet Origenes, Christianos ferre auxilium Imperatori, non humanum, sed Diuinum, iuxta Apostoli præ-*

EE e iij

ceptum, citatque locum B. Pauli, 1. Timoth. 2. de quo hactenus. In actis passionis B. Cypriani, cuius Pontius illius Diaconus meminit, ita beatissimus ipse Episcopus Proconsuli interroganti respondet: *Nullos Deos novi nisi unum & verum, qui fecit cælum & terram, & quæ in eo sunt: huic Deo nos Christiani deservimus, hunc deprecamur diebus ac noctibus, & pro salute populi, & pro statu Imperatorum vestrorum.* In alia passione eiusdem B. Cypriani, ex antiquis codicibus, habetur, *Pro incolumitate ipsorum Imperatorum.* Apertius multò & ad quæstionem accommodatius, Arnobius, libro quarto: *Nam nostra quidem scripta cur ignibus meruerunt dari? cur immaniter conuenticula dirui? in quibus summus oratur Deus, pax cunctis & venia postulatur Magistratibus, exercitibus, Regibus, familiaribus, inimicis, adhuc vitam degentibus, & resolutis corporum vincione.* S. Cyprianus ad Demetrianum: *Pro arcendis hostibus, & imbribus impetrandis, & vel auferendis, vel temperandis aduersis rogamus semper & preces fundimus, & pro pace ac salute vestra, propitiantes ac placantes Deum, diebus ac noctibus ingiter atque instanter oramus.* Dionysius Alexandrinus Episcopus, sanctitatis fama insignis, apud Eusebium historiae Ecclesiast. lib. 7. c. 10. Ab Æmiliano Præsidente & eo Pagano admonitus, ut Gentilium superstitionem amplecteretur, repudiata Christiana religione; respondit Dionysius: *Nos unum illum Deum omnium opificem, qui etiam pietissimis Augustis Valeriano & Galieno imperium hoc commendauit, colimus & adoramus, illumque indefinenter pro imperio eorum ut immotum permaneat oramus.* Constitutionum, quæ Apostolis tribuuntur, (de quarum fide scis quid mecum sentias) attamen veteris Ecclesiæ centones planè aureos hic haberi mecum semper agnouisti, lib. 2. c. 5. & lib. 8. c. 10.



in ipsa Missæ actione Pontifex ad altare stans, orat, discretis verbis, pro Rege, & pro iis qui sunt in sublimitate constituti, proque omni exercitu, ut per illos pacificè viuamus. Si vnus de ea re audiendus est B. Chrysostomus, totum quod queritur confectum est, in hunc B. Pauli locum ita scribit: *Quid sibi vult quod ait Apostolus, primum omnium fieri obsecrationes, &c. in obsequio scilicet quotidiano, perpetuoque Diuinæ religionis ritu.* Atque id nouerunt fideles, quomodo diebus singulis, mane & vespere, orationes fundantur ad Dominum, quomodo pro omni mundo & Regibus, & omnibus qui in sublimitate positi sunt, obsecrationes ab Ecclesia fiant. Subiungit paulò post. Quoniam consequens esse cernebat Apostolus, ut Christiani animus ad ista torpesceret, neque huiusmodi admitteret monita, siquidem pro Gentili, Sacramentorum tempore, preces oporteret offerri, vide quod postea adiunxit, ut ex consideratione communis utilitatis, admonitionem libentius faciliusque susciperent; ut quietam, inquit, & tranquillam degamus vitam. At conditio hæc non solis Christianis, qui postea sub Imperatoribus Christianis vixerunt, necessaria fuit, quin multò magis iis qui initio nascentis Ecclesiæ extiterunt, cum fidei & religioni Christianæ disseminandæ atque propagandæ eo tempore id maximè conducere videbatur. Istud verò in primis obseruandum est quod ait aureum illud os, Apostolicum istud præceptum perfici *in obsequio quotidiano & perpetuo Diuinæ religionis ritu.* Et apud Occumenium, tempore mysteriorum, quæ sunt Missæ periphrales, ut demonstrant nostri aui doctiores locorum controuersorum aduersus Sectarios scriptores. Istam formulam veteris Ecclesiæ, *quod norunt fideles*, ad SS. Eucharistiam potissimum

pertinere nemo tantisper in SS. Patrum scriptis versatus dubitare potest. Ecquid igitur aliud istud est quàm in celebratione Diuinæ Eucharistiæ, atque in Missa pro Infidelibus orare? Verùm B. Augustinum Latinorum Patrum, pro ingenij fecunditate & subtilitate, facilè principem audiant isti. Epistola 59. ad Paulinum, quæst. 5. post citatum B. Pauli locum, quo de agitur: *Multa quippe hinc dici possent quæ improbanda non sunt, sed eligo in his verbis hoc intelligere, quod omnis vel penè omnis frequentat Ecclesia, ut preces accipiamus dictas, quas facimus in celebratione Sacramentorum, antequam illud quod est in Domini mensa incipiat benedici; Orationes, cum benedicatur & sanctificatur, & ad distribuendum comminuitur, quam totam petitionem ferè omnis Ecclesia Dominica oratione concludit. Eo alludit S. Ambrosius, lib. 4. de Sacramentis, c. 4. explicans voces illas Paulinas, Obsecrationes, orationes, &c. Nam per reliqua omnia, inquit, quæ dicuntur, laus Deo defertur, oratione petitur pro populo, pro Regibus, pro cæteris, ubi venit ut conficiatur venerabile Sacramentum, iam non suis sermonibus Sacerdos, sed utitur sermonibus Christi. Cælestinus Pontifex Romanus, epistola 1. ad Episcopos Galliæ: Obsecrationum Sacerdotalium Sacramenta respiciamus, quæ ab Apostolis tradita in toto mundo atque in omni Ecclesia Catholica uniformiter celebrantur, ut legem credendi lex statuat supplicandi. Cum enim sanctarum plebium Præsules mandata sibi met legatione fungantur, apud Diuinam clementiam, humani generis agunt causam, & tota secum congregante Ecclesia, postulant & precantur ut Infidelibus donetur fides, ut Idololatæ ab impietatis suæ liberentur erroribus, ut Iudæis ablato cordis velamine lux veritatis appareat, ut Hæretici Catholica fidei perceptione respiciantur, ut Schismatici spiritum rediuvæ charitatis accipiant, ut lapsi penitentiae*



pœnitentię remedium conferatur. Eadem habet Prosper Aquitanicus, lib. 1. de vocatione Gentium, c. 12. proferens locum prædictum Apostoli ad Timotheum: *Præcipit Apostolus, inquit, imò per Apostolum Dominus qui loquebatur in Apostolo, fieri obsecrationes & postulationes, gratiarum actiones pro omnibus hominibus, pro Regibus, ac pro his qui in sublimitate sunt. Quam legem supplicationis ita omnium Sacerdotum, & omnium fidelium deuotio concorditer tenet, ut nulla pars mundi sit, in qua huiusmodi orationes non celebrentur à populis Christianis. Supplicat ergo ubique Ecclesia Dei, non solum pro sanctis & in Christo iam regeneratis, sed etiam pro omnibus Infidelibus & inimicis crucis Christi, pro omnibus Idolorum cultoribus, pro omnibus qui Christum in membris ipsius persequuntur, pro Iudeis, quorum cæcitati lumen Euangelij non refulget, pro Hæreticis & Schismaticis, qui ab unitate fidei & charitatis alieni sunt.* Haymo explicans locum nostrum Paulinum, ista profert: *B. Apostolus dirigens hæc verba Timothæo, in illo tradidit omnibus Episcopis & Presbyteris, omniq; Ecclesiæ formam quomodo deberent Missarum solemnia celebrare, & pro omnibus hominibus orare. Quam formam vel exemplum omnis Ecclesia modò retinet.* Omitto Liturgias SS. Basilij & Chrysostomi, in quibus, precibus conceptis, pro Regibus & Magistratibus oratur. Attamen quid responsuri Censores illi sint, præsentio, horum SS. Patrum tempore, Imperatores Christianos extitisse; sed verbum vnum, quid rei contigerit inter Valentem Imperatorem hæreticum Arianum, & B. Basilium, qui insanientis istius hominis furorẽ diuinitus represserit, Ecclesiastica narrat historia: Nihilominus S. Basilij Liturgiam, Valente imperante, in vñu fuisse nulla sui parte mutilam, tam mihi certum est, quàm B. Basilium huius Liturgiæ auctorem esse. Si quid

F F f



ponderis, si quid roboris quæ à me hæctenus prolata sunt, ex SS. Patribus, obtinere vel credis, vel opinaris, quod nunc à me postremo loco exscribendum est iam aduersarios manum tollere coget, ni in perpetuo veterno cubare videri velint. In veteri Ecclesia Missam Cathecumenorum vsitatam fuisse, ipsi fateantur necessum, cui non modò Cathecumeni, sed etiam Gentiles atque hæretici interesse poterant, & ea parte Liturgiæ Sacræ pro iis preces fiebant. Canon 84. Concilij Carthaginensis 4. *Vt Episcopus nullum prohibeat ingredi Ecclesiam, & audire verbum Dei, siue Gentilem, siue hæreticum, siue Iudæum, vsque ad Missam Cathecumenorum.* Repetitur hoc Concilio Valentino Hispanico, c. 1. *Inter cætera hoc censuimus obseruandum, vt sacro-sancta Euangelia ante munerum illationem, vel Missam Cathecumenorum in ordine lectionum post Apostolum legantur, quatenus salutaria præcepta Domini nostri Iesu Christi, vel sermonem Sacerdotis non solùm fideles, sed etiam Cathecumeni ac pœnitentes, & omnes qui ex diuerso sunt, (Burchardus hæreticos exprimit) audire licitum habeant.* Hæc ratio non tam iugulum aduersarij petit, quàm ipsum penitus conficit. Est igitur, mi Camille, quod mireris Britannos Christianos Catholicos paulò asperius appellatos, quod preces publicas ediderint pro salute Regis sui, alioquin ab Ecclesia Catholica Apostolica & Romana, vt apparet, alieni, cùm Sacra Scriptura, & veteris Ecclesiæ mos receptus illos infontes pronuntiarunt. Quidni etiam in reprehensoribus illis summam rerum Ecclesiasticarum antiquitatis incitiam deprehendas, cuius rei rationem si à me expostules, facilè tibi, ne diutius hæreas, expediam. Quorum consilio Britannorum factum tam malè acceptum fuit præsertim cogitandum est. Seculi nostri ea est infelicitas, vt



quidquid ad fidem religionemve tantisper spectare videatur, totum Theologis Scholasticis, vt vocant, discutiendum atque dijudicandum committatur, quibus, paucis admodum demptis, antiquæ & Apostolicæ Ecclesiæ castus ritusque veteres tam sunt ignoti, quàm Thomæ Mori Britanni Vtopia, quique veram, sinceram simplicemque Scholasticam Theologiam, qualem nobis Albertus Magnus, Alexander Hallensis, & qui in eo instituto familiam ducit B. Thomas, nobilissimus Aquinas, exhibuerunt, nescio quibus pigmentis fucoque commentitio deformarunt, vt iam non illa superiorum temporum nuda & suapte pulchritudine venusta virgo Theologia Scholastica conspiciatur, sed potius ementita Iuno à Ioue adornata, & Ixioni proposita, quæ meram nubem exhibeat. Meministi quàm stomachosè & quidem pluries de ea re mecum egeris, argutias illas adeo frequentes & multiplices tam iniquo animo ferebas, vt te non iam Theologiam, sed puram ac germanam Sophisticen agnoscere diceres; qualem sub nomine Dialecticæ mirum in modum expressit L. Septimius Florens: *Artificem struendi & destruendi versipellem, sententiis coactam, in coniecturis duram, in argumentis operariam, contentione molestam, etiam sibi ipsi omnia retractantem ne quid omnino tractauerit.* Quorsum enim continua illa & perpetua distinctiuncularum series, ac vnus ex altera fœcundissima soboles, quam atomorum Democriti procreatio. Annon istud antiqui scriptoris crebrò vsurpasti: *Maximum vitium subtilitatis esse nimis se Senec. praest. ostendere. Contrà verò, utilissimam esse dissimulatam subtilitatem, quæ habitu lateat, effectu appareat. Ita planè ridiculum disputatiunculis inanibus subtilitatem vanissimam agitare.* Ap- *Senec. epist. 117.*

FFf ij



*Plindib. 18. c. 24.* incendio perit: *Quæ nimia est, cæca videtur subtilitas.* Sc-

piam piscem verè illam imitari dixeris, cui perfimilem faciunt Aristotelem scriptores nonnulli. Hinc Stragirimon dixit B. Gregorius Nazianzenus. Ex tripode dictum puta, *Nihil iniquius esse his qui nusquam putant esse subtilitatem nisi ubi nihil est præter subtilitatem, & quidem*

*Sen. ep. 106.* *summa subtilitate nihil agitur,* aiebat ille. *Laterunculis ludunt, in superuacuis etenim subtilitas istius generis teritur; Auditores non vitæ studiosè instituendæ, nec pietati, sed scholæ discunt.* Ecquis enim fructus sincerus solidusque ex iis minutiis ad veræ minimeque fucatæ Theologiæ studiosos peruenire potest, nisi ut in perpetuo altercandi & disputandi studio versentur, similes Alexino Elæo, qui idcirco

*Hesich. Il-  
lustr.  
Suidas.*

Ελεγγιστος, id est, arguator seu altercator cognominatus; aut Pelusioris illis, in Casio monte, qui naturali arte nodos plectebant, plicas plicis connectentes. Hæc sunt quæ illos subtiles delectent ἀμύματα, seu scholia, videlicet sophismatum argumenta, obuersa inuicem vice spinarum, quas ventus conuoluerit inter se terere, paribus utrimque aculeis, simili penetratione, mutuo vulnere, ut describit lepidus Afer: Homines id genus non absimiles dixero Accursiis, Bartholis, Baldis, Alexandris, Salicetis, Deciis, quos veræ & sinceræ Iurisprudentiæ non rarò meras tenebras offudisse Cujacius noster præceptor dictitabat. Belli Censores rerum Ecclesiasticarum, qui Grammaticis sæpius ludibrium debeant, quibus barbarissimi venter sunt & dicendi lepores. Sino tandem illos tantum obtusi iudicij quantum acuti ingenij, sine spe prædæ in scopulo isto morari & reapse morari. Grauioris in Britannos Catholicos censuræ habes & Consultores & Iudices. *Medicus ægrotum imperitè secans, lege Aquilia, tenetur. Iudex nullo adhibito*

*D. 9. tit. 2.  
Cod. 1. tit.  
22. l. 6.*



assessore, cuius prudentiam sibi putet necessariam, aduersus ge-  
 nerales constitutiones pronuntiare non debet, ait lex. Quid si as-  
 sefforis imprudentia factum est, ut ius aliter dictum sit quam  
 oportuit, non debet hoc Magistratui officere, sed ipsi assessori, ut  
 nos leges docent. Vide annon Britannis iure optimo com- D. 2. sp. 2.  
 petat actio de damno aduersus adseffores, seu adsertores, l. 2.  
 ut aliis placet, vno nomine Consiliarios huius animaduer-  
 sionis. Neque tamen Iudices ipsos culpa vacare dixerō. Si  
 enim, ut habet lex, *Iudex quilibet nullum scriptum, nullam* Cod. lib. 1.  
*pragmaticam sanctionem, nullam sacram adnotationem, quæ ge-* tit. 22. l. 6.  
*nerali iuri, vel utilitati publice aduersa esse videatur, proferri*  
*minimè pati debeat.* Quid de illa censura iudicabis quæ con-  
 tra Christi & Apostoli præceptum, contra vniuersum an-  
 tiquæ Ecclesiæ morem & praxim, contra communem om-  
 nium Britannorum Catholicorum, quos alioquin iugu-  
 landos & mactandos, si ipsa retineatur, certissimè offert,  
 utilitatem, lata est, quanto æquius, rectius, Ecclesiæ & Re-  
 ligioni Catholicæ Apostolicæ & Romanæ vtilius, fructuo-  
 sius, legem hanc valere. Quod iussit vetuitve Prætor con-  
 trario imperio tollere & reperere, licet de sententiis con-  
 trà. Addo & Nicolai Papæ I. ad Michaëlem Imp. Bizanti-  
 num grauissimam edictionem: *Sententiam Romanæ Sedis*  
*non negamus posse in melius commutari, cum aut sibi subreptum*  
*aliquid fuerit, aut ipsa pro consideratione ætatum, vel tempo-*  
*rum, seu grauium necessitatum, dispensatorie quiddam ordinare*  
*decreuerit.* Quoniam & egregium Apostolum Paulum quædam  
 fecisse dispensatorie legimus, quæ postea reprobasse dignoscitur.

FINIS.

---

APPROBATIO.

**N**O s subsignati Doctores Sacrae Facultatis Theologiae Parisiensis, testamur perlegisse librum secundum Selectorum scriptum à M. N. IOANNE FILESACO, etiam Doctore eiusdem Facultatis, in quo nihil deprehendimus, quod aduersetur Fidei & Ecclesiae Catholicae Apostolicae & Romanae: In cuius rei fidem nostrum apposui-  
mus chirographum. Lutetiae Parisiorum sextâ Nouembris 1630.

*Fr. M. DOLES, Gardianus Minorum.*

*Fr. MAURICIVS BRACHET, apud Predicatores  
Theologiae Professor.*

---


SUMMA PRIVILEGII.

**R**Egio Privilegio cautum est, ne quis præter consensum IOANNIS FILESACI, Doctoris Theologi Parisiensis, intra decennium imprimat, aut diuendat duos Selectorum libros ab ipso conscriptos, sub pœnis contentis in illo diplomate Regio, dato Lutetiae, die 7. Decembris 1618. subsignato DV FOS. Huius principalis beneficii usum & copiam dictus IOANNES FILESACVS Theol. Parisi. MATHVRINO DV PVIS Bibliopola Parisiensi, quoad secundum SELECTORVM librum concedit. Actum Lutetiae, die 20. Ianuarij 1631.




*Errata sic corrige.*

Pag. 2. lin. 16. leg. ὀλιγοχρόνια. pag. 37. lin. 13. leg. angulo. pag. 38. lin. 22.  
leg. frustra. pag. 52. lin. 7. leg. fors. pag. 55. lin. 14. leg. prouehere-  
tur. pag. 56. lin. 24. leg. ex luxuria. pag. 125. lin. 11. leg. Μουσείου. pag. 131.  
lin. 4. leg. libros. p. 133. lin. 29. leg. gladiator. p. 149. lin. 21. leg. λόγους.  
p. 153. lin. vlt. leg. ἡμέται. p. 154. lin. 2. leg. ὡς τῆς αἰσθήσεως. p. 176. lin. 22.  
leg. χερσίν. p. 189. lin. 3. leg. eraserunt. p. 201. leg. ῥηθιμῶς. p. 217. lin. 13.  
leg. inguen. p. 233. lin. 16. leg. metus. p. 290. lin. 1. leg. arcessere. ibid.  
lin. 20. leg. iniunctum. p. 300. lin. 25. leg. legitimam. p. 309. lin. 25. leg. te-  
trico. p. 320. lin. 21. leg. parentem. p. 337. lin. 4. leg. viti per simile. p. 338.  
lin. 23. leg. lib. de anima. p. 345. lin. 19. leg. tot libri. p. 348. lin. 27. leg.  
hominum. p. 356. lin. 14. leg. splendorem. p. 365. lin. 16. leg. ποέσεος. ibid.  
lin. 30. leg. lepida. p. 368. lin. 19. leg. rigidissimus. ibid. lin. 28. leg. Cleone.  
p. 370. lin. 7. leg. differit. p. 381. lin. 30. leg. fuggillanda.







005644922



